

四川大學古籍整理研究所編

# 儒藏

史部  
第九十四冊

四川大學出版社



B222  
30  
(94)



# 儒藏

新加坡  
知不足齋  
印



四川大學古籍整理研究所 編

儒藏·史部

儒林年譜

第四十四冊

四川大學出版社 二〇〇七年



國家「211工程」重點學科建設項目

國家「985工程」創新基地規劃項目

中國孔子基金會重大項目



# 目錄

武進李先生年譜續	清・蔣彤編撰	.....	一
方儀衛先生年譜	清・鄭福照編撰	.....	一六五
太鶴山人年譜	清・端木百祿編撰	陳謐補編	二〇五
俞理初先生年譜	王立中編撰	蔡元培補訂	二五五
退菴自訂年譜	清・梁章鉅自撰	.....	四〇一
張介侯先生年譜	馮國瑞編撰	.....	四三九
馮柳東先生年譜	清・史詮編撰	.....	五四三
劉孟瞻先生年譜	(日本)小澤文四郎編撰	.....	五八一





武進李先生年譜卷二

陽湖弟子蔣彤編

二十年乙亥，先生年四十有七。仍在鳳臺，寓報恩寺。斷酒肉，日啖麥飯，絕遊燕，不作詩文，終日翻閱釋藏，蕭然如老僧。時同邑孫仿山先生讓令懷遠，無錫薛畫水先生玉堂守太平，招之，各一往焉。北通州白公鎔督學安徽，渴欲一見，介畫水延致之，僦禮極優渥。先生食蔬素而已，神志慘穆，終食不發一議。白公益咨敬焉。

任際殷之獄，撫憲胡公克家意欲從輕讞，先生力爭數四，始得伏法。



儒藏



二十一年丙子、先生年四十有八。春始克歸、與兄五初相持慟哭、哀感左右。自是居同室、坐同几、形影不離矣。討究喪祭諸禮、因發徐氏讀禮通考諸書、及

大清通禮品官士庶儀合參之、定其可行於今而無悖於古者。暇則錄皋文先生易注、日盡二十紙。與子常書曰、吾黨如皋文庶幾不朽、人之難成也如此、而天又靳之、嗚呼、誰爲後來者乎。其冬、葬奉直公於錫山之鳳尾墩。

是年、山右韓公克均爲安徽承宣布政司。乙丑會試分校、先生出其房。

二十二年丁丑、先生年四十有九。春、以官事未了、仍遊



安徽。仿山延主懷遠之眞儒書院。仿山固舊識也。有過必規、惑則辨之、有急則爲畫策。雖弈棋飲酒、亦爲裁量。居數月、懷遠知有先生而已。懷遠縣志已輟修九十年、久欲重輯之、仿山乃以編纂事質先生。先生鳳臺志以精覈稱、而鳳臺由壽州分出、於治爲簡、懷遠事宜詳於鳳臺者且數倍、本其體例、恢而廣之。至冬功過半矣。安徽巡撫合河康公紹鏞在京邸重先生名、又兄五初之姻也、固邀入省垣。先生辭以從者多、恐重擾、不獲已、乃以志事屬同縣董晉卿士錫赴之。經桐城、桐城令乃鄉先輩呂幼心榮也、遂留終歲焉。



是年秋九月、如皋吳公箴屬修東流縣志。先生爲之釐定章程、提挈綱要、載筆而左右者、則張彥惟、成孫、李英望、頴、大興、方彥聞、履錢也。明年五月而書成。成孫、皋文子。頴、先生從子、五初子也。

十一月、作韓公六十壽頌。

二十三年戊寅、先生年五十。春正月、進皖省課、康公子竹吾、兆奎二子、頴、願亦隨侍。訂正懷遠縣志、至七月而書成。凡爲志十、記二、考一、表傳七、圖一、敘錄一二、十有八篇。其敘錄曰、四至辨而乖離正、都圖析而閭里聯、是以官守於上、而民守於官也。峩峩崑山、莫邪衛之。湯湯大淮、渦淝會之。孰是鎮之、孰是潤之。述地



域志第一。丁田民屯、國帑正供、轉漕東南、天庾是充。爲解爲支、率循成制、課鹽權關、因民所利、土宜繁殖、各釐以類。述賦稅志第二。庠序之教隆、而名臣賢士、孝子貞婦之行作焉。書院之設、所以輔學校而損過、就中增美、釋回者、莫講習若也。維勸學繫先覺。述學校志第三。禮莫重於祭祀、事有常、苾芬其饗、諸歆茲民德、勛茲民之稼穡。述祭祀志第四。神武不殺、而備不可弛。詰戎閑衛、乃齊乃止、於千萬年、治安上理。述兵防志第五。府事孔修、聖化覃敷、備豫偏災、謹茲倉儲。

皇仁蕩蕩、蠲復頻書。凡百君子、靖其爾位、哀此惇獨、勤

其撫字。述倉儲志第六。荆山巖巖、依之如城、孰則宜飭、官寺郵亭、圯墁以時、吏民以寧。津則有舟、川則有梁、車徒是濟、惟安惟康。述營建志第七。隄堰之興、以稼下地。淮堧沮洳、漑可溉、淤可藝、弗云棄也。修而舉之、曰察其宜、曰勿違其時。述水利志第八。祲祥災異、君子不言、而水旱疾苦、民隱在焉、記載所弗刪也。述五行志第九。太常稽古、爲學士羽儀、迄乎有明、戴籍紛披、蒐采一曠、千年闕遺、後有作者、彙而錄之。述藝文志第十。漢建侯國、當塗曲陽、平阿義成、向及龍亢。晉屬馬頭、梁隸譙汴。唐析四境、入於旁縣。宋末置軍、元明用因。述建置沿革記第十一。萬國玉帛、塗山是





會征戰侵伐、戎事之大。汎覽前史、識其梗概。述歷代大事記第十二。郡邑棊置、一廢一興、六代列戍、乃數十城、孰真孰僞、壘址縱橫。述古城戍考第十三。令長侯相、鎮將戍主、漢晉梁魏、缺不可譜。元明以來、乃備縣尹丞簿焉、校官候人、亦差得舉數。述職官表第十四。文武甲科、辟舉貢士、登髦翼俊、代濟厥美、良將名臣、時焉蔚起。述選舉志第十五。師臣分茅、遠矣春卿、武功崛起、懿惟開平。東平赳赳、平陰矯矯、父勳子忠、長世斯保。李柳壯略、榮名亦寶。裕後顯親、上下推恩。述世襲封蔭表第十六。龍亢桓世、傳經作帝師尊。五更晉元、子遂披昌、沖守貞元以亡。述桓氏傳第十七。

子通輔魏平躋三公。明多勳戚。起於從龍。默齋忠貞。恭定廉正。諸楊接武。閎閎斯盛。聖清作人。樸樸莪菁。中丞總戎。爲國幹楨。述史冊英賢傳第十八。第十九。孝友睦婣。任卹士行之最良。蓋不可以不彰。政事文學之妙。貞介之操。而未見乎史籍之表襮者。又烏容略也。述耆舊第二十。二十一。賢孝貞順。惟曰女士。塗山啟之。桓氏似之。有以哉。或矢其愚。自立介乎其彌不可及。述列女傳第二十二。二十三。醫卜巫覡。皆術而已。研之而精。曰恆曰一。爰及神異。是爲方技。述方技傳第二十四。繫駒適館。所以安賓旅也。擇里而處。以令聞長世。君子交許之。述流寓傳第二十五。爲吏而



良臣職固宜。職則未稱。厥咎安辭。前哲所爲。敬而志之。先事之勞。後事之師。述良吏傳第二十六。名山崇崇。作鎮淮邦。經流十二。相維而東。四達者五。經五緯。惟里有長。區以百二。千振相聞。弗閒鳴吠。規方畫疆。瞭若掌示。述縣境諸圖第二十七。在昔王君。始著邑乘。惟孫副使。再經刪定。百二十載。唐君繼之。別帙爲八。燦然前規。迄茲重修。歲紀九十。伊余固陋。每懷靡及。聖皇立極。羣稟成憲。道續執中。方悅吹萬。小臣不敏。職思官常。勤求民瘼。曷敢怠皇。述序錄第二十八。按懷遠志。合繪一總圖。又鄉各一圖。每方二里。村落橋梁寺觀。工阜畢具。其徑路則密點細線。



以爲識別。眾圖湊合，則主撮不差。行路者持此，則按圖舉步，不須問歧。其精如此。先生嘗言，是可爲志書之法。宗若一統輿地圖，每縣得如此精密，實讀史者之大快。其爲用非小。後懷遠副貢生湯若荀修壽州志，山子先生修合肥縣志，董方立修咸寧縣志，皆參仿此書義例。方郢作圖，一依此法。

二十四年己卯，先生年五十有一。在皖省，爲竹吾製銅刻漏。

四月，同縣左公輔按察浙江。

睿皇帝六旬萬壽，禮宜獻詩冊祝。

設千里專使盛儀，走安慶求代作。是月，康公調廣東巡



撫敦約明年春除館以待。韓公亦尋擢貴州巡撫。先生有贈序。二公去後。先生遂主講敬敷書院。節數年。修脯所入。舉所負鳳臺雜款爲繳入藩庫。先生恥較貨利。如數償焉。

是年。兄子毓華捷順天鄉試。毓華卽頌也。

二十五年庚辰。先生年五十有二。二月。以合河中丞之約。赴粵東。友人相送。飲別於枕芸書屋。江陰祝子常。郡城莊卿珊輩共十餘人。以二十五日解維。同行者揚州鮑善之。繼培。安慶鄧守之。傳密。無錫華半樗希。曾山子也。至蘇州訪趙季由。學轍。朱青立。昂之。二子皆同鄉友。元和沈孝廉欽。韓約同赴粵東。故移舟載。

之既以親老不果請爲遊山主人遂得盡支硎穹窿獅子天半諸山之勝。凡三日而後行有紀行一卷見聞所觸皆書之。以四月二十二日到天使碼頭時中丞以三月  陞見適河南馬營壩大工方合龍而南岸儀封又成漫口、

上命於回任時迂道察勘河工別疏具奏尙未返也。竹吾來迂并邀山子半樗同入節院院故  國初封南平王尙可喜之策占地甚廣其後園包粵秀山不知何時劃山在外而園中尙極寥廓野竹蔽天蔓草塞途亭宇四五處基址尙一一可辨云。朱文正公珪撫粵時尙時時觴客於此文正公後相傳其中有巨蟒





閉不復啟者二十年矣。有一池甚深。石翳草間者甚多。有數枚雄秀挺峙。高皆丈餘。絕可愛玩。然苦荒穢不可居。先生之來也。竹吾於署西南偏古榕下。闢屋以居之。翠陰交垂。幽鳥啁唧。意甚宜之。因顏之曰眠琴廬。而榜其門曰勤志館。

儀真阮公元時。節制兩廣。夙與先生交契。往存問之。并爲山子道地。而竹吾相推重。不願其他往。山子藏有桐城姚姬傳先生。鼐所選古文辭類纂。竹吾意欲刊行。乃馳書還取之。校閱付梓。先生以爲唐以下始有古文之稱。而別對偶之文。曰駢體。乃更選先秦兩漢。下及於隋。爲駢體文鈔。欲使學者沿流而溯。知其

一原。

七月校刊鳳氏經說序曰、經說三卷、凡百有餘條、江陰鳳先生所著也。先生名韶、字德隆、江陰歲貢生。所居濱江村、巷僻陋、聚生徒謀精以活、城邑中無知之者。獨守一經、矻矻白首、困而不戚。年七十餘卒。嘉慶之十有六年也。國朝治經之家、獨盛於前代、而於三禮尤爲粹深。如長洲惠氏、四明萬氏、婺源江氏、桐城方氏、休寧戴氏、歙金氏、類能鉤稽故訓、探索隱誤、辨名當物。往往有疑辭奧旨、前人說之而愈晦、一經解駁、卽犁然當於人心者。先生生窮僻之壤、旣與諸先生闊絕、其所著書亦不能遍見、而窮思獨造、所得



殆不相讓。以是知志致卓越者、固無所待、而道術之明自有時也。然而諸先生盛時、聲望翕然、當亡與歎、公卿側席、承學之士無不就、而請業焉。而先生之居去予居不十里、而未嘗相聞。比予友王君瑤舟爲予言、思欲一見先生已歿。而其子不能世其業、及門之士亦無有能傳之者、可慨也。瑤舟又言、先生經說盈筭、皆隨手條記、羣雜無次第。釐訂逾月、始成此編。其缺落差訛、不能辨識者、尙十倍於此。精力疲薾、未能周稽、約予歸而盡以畀予。當更綜比而續刊之、以成一家之學也。先是有四書補考、其門人輯先生之說涉四子書者爲之、松江吳氏刻於藝海珠塵中者

曰讀書瑣記、僅數條、其名皆非先生所自定。今所編凡已見於四書補考者略之、瑣記則并入焉。瑤舟名獻陽湖縣學生。工文詞而篤於學、以沈思致疾、所著學易五種說、亦有裨說經者。

冬十一月、選錄駢體文鈔、稟略定、分上下三編。<sup>①</sup>其上編序曰、著錄若干首、皆廟堂之制也、奏進之篇、垂諸典章、播諸金石者也。夫拜颺殿陛、敷頌功德、同體對越、表裏詩書、義必嚴以閎、氣必厚以愉、然後緯以精微之思、奮以瑰爍之辭、故高而不楸、華而不綵、雄而不矜、逶迤而不靡。馬班以降、知者蓋希。或猥瑣鋪敘、以爲平通、或詰屈彫琢、以爲奇麗、樸卽不文、華卽無





實、未有能振之者也。至於詔令章奏、固亦無取儷詞、而古人爲之、未嘗不沈詳整靜、茂美淵懿、訓詞深厚、實見於斯。豈得以唐宋流末、澆剋浮佺、兼病其本哉。故亦略存大凡、使源流可知耳。中編序曰、著錄若干篇、指示述意之作也。或縝密而端慤、或豪侈而誅蕩、蓋指事欲其曲以盡、述意欲其深以婉。濟以比興、則詞不迫切、資以故實、故言爲典章也。韓非、淮南已導先路、王符、應劭其流孔長。立言之士、時有取焉。然枝葉已繁、或披其本、以仲宣之覃精、而子桓病其體弱、亦學者之通患也。碑誌之文、本與史殊、中郎之作、質有其文、可爲後法、故錄之尤備焉。下篇序曰、著錄若

千篇多緣情託興之作。戰國詼諧辨譎者流，實肇厥端。其言小，其旨淺，其趣博，往往託思於言表，潛神於旨裏，引情於趣外，是故小而能微，淺而能永，博而能檢。就其編者，亦潤理內含，秀采外溢，不徒以縷繪爲工，逋峭取致而已。後之作者，乃以遊戲佻側，洸盪忘其所歸，遂成俳優病，尤甚焉。尺牘之美，非關造作，妍媸雅鄭，每肖其人。齊梁啟事短篇，藻麗閒見，旣非具體，無關效法，十而存一，概可知也。其總序曰：少讀文選，頗知步趨齊梁。後蒙恩入庶常，臺閣之製，例用駢體，而不能致工，因益搜集古人遺篇，用資時習，區其鉅細，分爲三編。序而論之曰：天地之道，陰陽而已。



奇偶也。方員也。皆是也。陰陽相並俱生。故奇偶不能相離。方員必相爲用。道奇而物偶。氣奇而形偶。神奇而識偶。孔子曰。道有變動。故曰爻。爻有等。故曰物。物相雜。故曰文。又曰。分陰分陽。迭用柔剛。故易六位而成章。相雜而迭用。文章之用。其盡於此乎。六經之文。班班具存。自秦迄隋。其體遞變。而文無異名。自唐以來。始有古文之目。而曰六朝之文。爲駢儷。而爲其學者。亦自以爲與古文殊。路旣歧。奇與偶爲二。而於偶之中。又歧。六朝與唐與宋爲三。夫苟第校其字句。獵其影響而已。則豈徒二焉三焉而已。以爲萬有不同可也。夫氣有厚薄。天爲之也。學有純駁。人爲之也。體

格有變遷、人與天參焉者也。義理無殊途、天與人合焉者也。得其厚薄純雜之故、則其於體格之變可以知世焉。於其義理之無殊、可以知文焉。文之體至六代而其變盡矣、沿其流極而溯之、以至乎其源、則其所出者一也。吾甚惜夫歧奇偶而二之者、之毘於陰陽也、毘陽則躁剽、毘陰則沈隄、理所至也。於相雜迭用之旨、均無當也。

是年十月遊西樵山、撰紀遊、遊端溪記、研坑數十則、撰水巖、大西洞、硯石說、端溪硯坑開采圖記、各一篇。今上皇帝道光元年辛巳、先生年五十有三。在廣東校刊皋文先生所著虞氏易禮二卷、周易鄭荀義三卷、



易義別錄十四卷、虞氏易變動表一卷、易圖條辨一卷、并臧在東所著孔子年表、孟子年略等書。皋文周易虞氏義、虞氏消息、儀禮圖說、阮公元既已刊行之、先生復刊其各種、由是皋文一家之學備矣。

中丞會同督臣遵 旨覆奏查辦陋規、中丞爲其中多窒礙、以質先生。先生曰、此事務持大體、安用察察、又無裨於實政。手爲繕奏稿、其略曰、粵東負海濱海、盜會諸匪、甲於他省、公用以緝匪爲大宗、捐攤賠補次之、辦公雜項又次之。州縣歲入所藉、專在兵米折價、歷久相沿舊規、官民相安。緣粵東產穀稀少、全賴粵西湖南兩省接濟、故民間皆願折納、地方官代爲



買穀碾支。雖屬違例、循照已久。忽明著甲令、許其不徵本色、許其多取折價、

國家誤蒙加賦之名、而刁頑百姓多不能照數完納。州縣以浮折事屬違例、往往將贏補絀、自行賠補。今若定以折取額數、則所浮之價卽爲應納之數、設有短少、似難辦理。又粵東兵米零尾挂欠頗多、須州縣先爲墊解、是照正額尙不能年清年款。設經明定浮數、其挂欠待墊、恐較前尤甚。雍正年間議將地丁火耗酌給養廉、當時議者謂今日正賦之外、又加正賦、將來恐耗羨之外、又加耗羨。八九十年以來、錢糧火耗視昔有加、不出前人所慮。前項折價與從前增收



火耗事實相近、卽能明查暗訪、堅持於數年之間、亦斷難固防遠慮、遙制於數年之後。夫兵米正額、各州縣有定數、折收之價、粵省有通例、其不能行、尙如此。況雜稅等項、名目不一、或有無多寡、隨地不同、愿者減其數以求悅、黠者浮其數以取贏。究之浮者已浮、數已定而難改、減者非減、事有過而復加。是此時豪髮未盡之遺、卽將來積重難返之漸。中更有行戶商人向不完納、平餘致送規禮。今以案經奏定、數已申明、在官視爲固然、在民視爲非舊、兩相脅制、互爲稟呈。上司旣不能指爲官吏分外婪索、予以糾參、又不能因民間不繳陋規、懲以官法。爾時辦理、更形掣肘。

是雜稅等項之難辦、較兵米折價尤甚也。再四思惟、實無萬全良策。且各項所入既有陋規名目、今逐款臚列、上瀆

聖聰、於國家體亦未協。夫弊去其太甚、事不外舊章、將情形據實密陳、應請照常辦理、并隨時稽察。如有於常額之外多取絲毫、一經訪聞、輕則撤參、重則治罪。並督率司道等官、訓諭府廳州縣、力行節儉、屏除浮費、并將捐攤查明、裁汰勻減、庶幾以儉佐廉、量入爲出、省一分之費用、卽以紓一分之民力。疏奏、時惟兩江總督孫玉庭議略同。

六月中丞奉



旨人都署禮部左侍郎、尋丁母憂。先生亦於九月中旬起程返常。船窗有暇、整理海國紀聞二卷。先是、先生在廣州觀於洋商肆樓、見夷人形狀之殊詭、室屋衣服器用之窮巧極侈。欲求土人能通曉外夷事、一詢諸國所在遠近、海道曲折、及其國之大小、強弱、風氣厚薄、美惡、政令刑禁之大凡、幾以考驗故籍、規揣今勢。而通事驛卒、率貿然莫辨、復時爲謾誕以相眩駭、意常恨之。久之、有吳石華、蘭修、官廣文、有學問、言其鄉人謝清高者、幼而隨洋商船、周歷海國、無所不到、到必留意搜訪、目驗口稽、出入十餘年。今以兩目喪明、恨不得一人紀其所見、傳之於後、因受其所言爲

海錄一卷。先生取閱之、所言具有條理、於洪濤巨浸、茫忽數萬里中、指數如視堂奧。又於紅毛荷蘭諸國、吞并濱海小邦、要隘處、輒留兵戍守、皆一一能詳、尤深得要領者。然嫌其草草授簡、未盡精審、或失檢會、前後差殊、因屬石華招之來、將補綴而覆正焉。又以清高所言與故籍所載、或合或不合、或影響相似、古來著書者、大抵得之於傳聞、未必如清高之身歷、而清高又不知書、不能辨證古今之同異。因又檢諸史、自唐以上、愈遠愈荒渺、不可憑準、故斷自宋以下、及海國紀載如張弈東西洋考、艾儒略職方外紀、陳倫炯海國見聞錄諸書、爲海國集覽一卷、俟其來而問





焉。無何石華書去、而清高遽死、欲求如清高者而問之、則不可復得。乃就石華所錄、略加條定、疑者則缺之、復約其所言列圖於首、題曰海國紀聞云。然其博異、固足補前史之闕、供後史之求矣。

冬十月上旬、至里門、自廣州府水行至南昌府、以十里爲率、記郵程一篇。

十一月、中丞居憂寓揚州、仍邀先生往。先生亦以載籍中多未了事、仍赴之、以駢體文鈔付梓。卿珊謂駢體文鈔當改名、先生書喻之曰、第未閱洛前序耶、是亦未之深思耶。若以爲報任安等書不當入、則豈惟此二篇、自晉以前皆不宜入也。如此則四六法海等

書選本足矣、何事洛之爲此嘵嘵乎。洛之意頗不滿於今之古文家、但言宗唐宋、而不敢言宗兩漢、所謂宗唐宋者、又止宗其輕淺薄弱之作。一挑一剔、一含一詠、口牙小慧、譎陋庸辭、稍可上口、已是標異於白家家有集、人人著書、其於古則未敢知、而文則已難言之矣。竊以後人欲宗兩漢、非自駢體入不可。今日之所謂駢體者、以爲不美之名也、而不知秦漢子書無不駢體也。竊不欲人避駢體之名、故因流以遡其源、豈第屈司馬諸葛以爲駢而已、將推而至於老子、管子、荀子、韓非子等皆駢之也。今試指老子、管子爲駢、人必不能辭也、而乃欲爲司馬諸葛避駢之名哉。



報任安書、謝朓江淹諸書之藍本也。出師表、晉宋諸奏疏之藍本也。皆從流溯源之所不能不及焉者也。其餘所收秦漢諸文、大率皆如此。可篇篇以此意求之者也。此等語言本不欲自吐之、冀閱之者會之。吾弟既有此疑、故不敢不以告。向曾爲弟言、序中發言偏宕、恐治古文家見之不平。此時想治駢體者亦不平、則非其所料。姑俟異日何如。

二年壬午、先生年五十有四。在揚州。館鮑氏、頗有園亭之勝、爲搜集八代全文、上自漢魏、下迄於隋。當嘉慶甲戌乙亥閒、揚州鹽政阿公校刊全唐文、孫觀察星衍預其事、觀察旋與弟星衡、嚴孝廉可均撰集是書。

而未竟業、鮑氏意欲繕完進呈、故以屬諸先生

編輯。皇朝文典序曰、大圜不言、星雲爛然、實代之言、大方無紀、河嶽迤邐、以爲之紀。其在於人、精者曰文、下挾河嶽、上昭星雲、所以經緯宇宙、炳朗絲綸者也。其儒墨之訓、彫琢之詞、畸人術流之馳說、春女秋士之抽思、皆一花一葉、一翮一妓、各有可觀、而非其至者矣。拘學之士、閉門距躍、高指月窟、卑詮蟲天、囿於所習、得少自足、或服習卿雲、揚摧燕許、祇襲優冠、競陳芻狗、於朝家寶書鴻典、曾未或窺。是猶不覩建章宮之千門萬戶、而妄意蓬室爲璇臺、不聞鈞天廣樂之洞心駭目、而拊掌巴渝以軒舞也。曩廁庶常



竊抱此媿閒搜司存冀有采獲旋出宰邑斯業廢然  
罷官多暇憶之耿耿比遊維揚聞此士前輩先有纂  
集亟求而觀巨帙充几登懸圃而案玉入蛟淵而數  
珠矣就其輯錄小有乖紊遂加釐次以類相從都若  
千篇爲七十四卷羅列務盡非有取舍其所未備俟  
諸博求卷之大小不齊蓋留編續之地焉其於掌故  
以當中郎獨斷資之遣翰或同伯厚指南豈戴園履  
方之倫夸於創見庶大雅宏達之彥遂其乃心云爾  
校刊洪孟慈三國職官表三卷史目表一卷序曰吾  
黨之士自孟慈歿而亹然有志纂述者瞠乎如失所  
依據意消沮而力不自前矣孟慈志學旣篤博聞多



識加以強力兼人、夙夜不怠。其所欲爲者甚夥。如隋書經籍志考證、漢書地理志考證之類。凡十餘種。皆創手未就。其就者。世本輯補、三國職官表、史目表三種而已。世本輯補之成。以其稿請質於孫伯淵先生。遂留其齋中。孫後以其稿付江都秦氏刻之。遂冒秦名。於原書前後不易一字。但分卷不依原目而漫爲三大卷。又於序中竄入數語。以附其名耳。近世爲世本之學者頗夥。然采摭殘碎。約略編次。雜而不貫。獨孟慈此書。鉤稽義類。釐訛補闕。能使世本復還舊觀。用力甚至。有裨於承學之士甚大。秦氏旣梓而行之。則好學者得家置一編。於孟慈之意當甚慰。蓋書者



期有益於世而已。豈必爭此名哉。予既爲刻三國職官表、史目表、故并世本原序及收龔先生序刻之。以繫於後。亦使來者有考焉。嗚呼。安得有志之士。取孟慈未竟之業。一一成之也。

冬十一月返常。

三年癸未。先生年五十有五。江陰人士延先生主講暨陽書院。先是。鄉前輩丁安之先生履泰踐斯席者十餘年。常家居。歲時一往巡省而已。至是春正歿於里第。江陰諸故人稟請縣令山陰蕭公瑾轉達江蘇學政湘潭周公系英。公曰。甚善。當代人師無過斯人。而事出猝遽。雖具聘儀。江陰人無親至者。先生卻不受。

與子常書曰、行媒納吉、事有次第。無端委贄於人、而轉致之意、以此爲不足與爲禮也。子常答書謝焉。又與書曰、此事萬萬不可勉強、與其悔之於繼、不若慎之於始。今年姑應若士之意、明年洛更接手、何如。江陰又合辭敦請、先生曰、吾有鮑氏之約、不可不一至揚州。三人行、必有我師、何必株待。若不得辭、必二月末乃返棹耳。乃以是月二十日解維赴揚、周公系英渴欲一見而後出棚、蕭公急手札追及之於常。收盃、先生方招飲也。先生感其意、爲回舟赴江陰、而河路斷塞、兩日夜始達江陰南門。而痔患大劇、伏几作書、與子常諸故人、使致其情、遂赴揚州。



無錫孫文靖公爾準巡撫安徽、以乾隆閒兩江總督趙宏恩監修江南通志、厥後安徽分省、未有專志、議欲延先生創修之。未及行、移督浙閩。安化陶公澍自安徽布政司薦升巡撫、復續前議、幣聘再至、並屬陸祁生輩導達誠素。諸故人之在皖省者咸翹足以俟。先生以既許江陰、不可復貳、且兄五初年近衰老、不忍遠離。其地又僻簡、少官府酬應、可料理故業、開引後進。五十之年已過、不欲復向是非場中播弄也、乃決辭焉。於二月下旬旋里門、蓋自是名公之聘迭至、終亦不復出矣。

三月家居、有海棠對酒圖記曰、道光三年三月十五、

兄先燕臺去、五載閉窗牖。花亦不肯開、開亦莫之叩。  
比兄歸來日、仍復並肩肘。各自擁一甌、弟子常八九。  
曠時爭汲泉、開時共攜酒。坐看繁枝發、轉盼十年久。  
無何弟從官、太歲在乙丑。一往困纓鞅、若鼠戴簪釵。  
奉諱纔得歸、客授尙奔走。今年自誓苦、自此正立首。  
百歲已逾半、日月豈可狃。春風正融融、春雨閒瀏瀏。  
花意亦殊得、爲我開笑口。憶昔初種時、一枝瘦鰓虬。  
今年三本並、生意轉相受。所聞惟讀書、所見盡佳友。  
姿如潛虬媚、顏比姣人憫。花方及壯盛、人已漸老醜。  
膝前各有孫、兄孫美瑩琇。仍然向花讀、此屋幸不負。  
三復伊蒿篇、涕淚痛紛揉。有書數萬卷、有田數百畝。





饘粥藪可供、簡帙不外取。薪木無毀傷、庭除少塵垢。  
盤中羅宿脯、畦畔翦新韭。倚石招佳賓、牽裾速諸舅。  
此樂誰所貽、此福良已厚。如此不知止、對花忸怩否。  
請借僧繇筆、爲我圖不朽。歲歲長相保、花前共攜手。  
惟花聞此言、持以爲花壽。申耆

四月、赴暨陽書院。院久曠不居、頗失修整。蕭公子子  
滂以需具百金繕葺、稍復舊觀。先是乾隆丙子、盧學  
士文弼嘗主講於此、顏所屋曰輩學齋。閱四十年而  
先生來繼之。尋是額而不可復得、乃補書之。爲之楹  
語曰、薪木百年餘、手澤文章幾輩接、心傳蓋抱經時  
多植嘉樹、邑人趙曦明爲作花木記。至是一一補樹、

後復於院西南隅之垣外有方塘數畝、蘆葦塞之、乃芟夷之。拓院牆結軒於其上、蓋以茅、旋爲風所敗、乃易以瓦。詩以荷花、比夏盛發、往往觴客於此。

先是、江陰人相習爲舉業之下者、先生痛繩以先正理法、其務彩夸聲有名時輩者、率置下等。由是士氣一振、稍稍知所趨向矣。復擇其才者教作詩賦經解及策論、月一爲之、曰小課。重刊明人李廷機舉業筌蹄、班給生徒。選錄金正希、陳大士、黃陶菴三家文稿并史記、漢書、春秋繁露、管子、荀子、呂氏春秋、商子、韓非子、賈子新書、逸周書中切實通暢裨益神智者錄其目而授之、循循然誘而漸進之於古。每月二課、課



必瑣試<sup>⑦</sup>。非省墓及時祭不歸。十二月上旬旋里。以正月中旬赴院。歲以爲常。

四年甲申。先生年五十有六。在暨陽。校刊申受所著公羊釋例。初刻於邗。上未成。先生取以歸。爲補刊之。并移書京都。索其別種。而終未爲作序。嘗謂彤。吾於公羊未得其深也。

始刊行舊言集。序曰。乾隆壬子癸丑間。將輯郡志。因搜求邦人士詩文小集。悉令送局。以備纂輯藝文。予所采得送局者十有餘家。別見他人所采送者亦十餘家。其所未見者且不下百家。或素有詩名而集未行世。或無詩名而其集裒然成帙。大抵名不聞於鄉

里十三四其詩往往清婉可誦皆百餘年間人耳而  
湮沒不彰已如此私擬侯志局之竣悉取諸集各選  
次十一都爲一編其後志未及成而輟典守者不謹  
遂星散不可問意常恨之夫人不必名家詞不必極  
思爲之者或無意於傳見之者或不甚相愛而桑梓  
之舊風故老之軼事習俗今昔之異人物盛衰之變  
每於尋常吟詠彷彿遇之使人鏘鏘洋洋悠然以思  
忽然以悲此亦鄉邦文獻之所資也況乎師友之宴  
語朋儕親串之周旋當其綢繆戶庭契闊風雨言懽  
奉手涉想牽夢泊乎朝露俄晞墓草遽宿慙摹音容  
流連未已忽覩篇翰如親笑言詎能不寄永思於遺



文申短懷於往跡者哉。故欲及此暇日、聊追昔遊、凡有所見、隨加詮次。閒亦敷求前哲、旁及流聞、旋得旋編、不以前後爲第。所冀來者更引其緒、逐條可賡錄。名姓之下、略具出處、使其世可論、亦微裨志乘之求也。按序作於元年、至是始以付梓、有續送者、隨選隨刻、不濫亦不苟、多者成冊、少則數十字而止。先生季年已近千葉矣。

始綜輯江陰詩人爲江干香草集、比其年次、附以小傳、以備此邦掌故。按丙申歲作朱畫亭詩集序、備著此事本末。其略曰、予以道光三年主講暨陽、病其地尠藏書家、人士亦不知稽求邑之前賢往哲遺文



佚事並其著述之存否。乃綜邑之詩人爲江干香草集。積十數年。乃得百有餘人。大抵宋以前無傳。人宋則有葛勝仲常之父子。元有陸子方。許北郭。孫大雅。王梧溪。明有張溝南。藻仲父子。薛堯卿。夏冰蓮。卞華伯。鼎革時黃介子。梅正平。

國朝則李介立。沙定峰。曹義眉。徐昔民。翁霽堂。張半園。皆以詩鳴者也。葛氏父子遺集無傳。僅從韻語陽秋中錄常之二首。溝南亦無可考見。餘多得其全稿而甄錄焉。其他能詩而不以詩名。或不能詩而零章斷句可采者。指不勝屈。就其善者。梧溪疏而莊。藻仲雄而麗。昔民姣而婉。半園肆而雅。他如北郭之清迴。



華伯之流美、介子之恬蕩、正平之奇拔、霽堂之圓和、亦各具詩人之美矣。頗聞畫亭朱先生能詩而僑居汴陽、不可得見。今年春、先生子天石盡出遺詩見示。沈酣溫雅、宗法三唐、梧溪、昔民之亞也、可以馳驅作者之林。而窮老寓公、躑躑陋巷、詩人之窮固然、江干香草中安可無此芳澤哉。梧溪詩幸邑人已刻之、而昔民詩大半散佚、莫爲傳流。藻仲詩猶有鈔存之本、屢勸邑人刊之、無留意者。今天石薄田不給、一硯四方、其尙能爲先生謀剞劂事乎。寶此遺編、慎守弗失、以待後之人、其亦可也。

是年春、蒙山過訪暨陽、卽留課慰望輩數人。九月還

宜興訂其仍來、有此地幸不惡、如吾差可過之句。

五年乙酉、先生年五十有七。在暨陽。春正家居、與兄五初言、雖目前子姓僅有三人、而他日久長、當爲預慮。乃按產分析、各專責成。又以所受之產分授二子、書以誡之曰、自吾曾祖始居於此、吾祖恢而大之、吾父整而飭之、吾兄全而保之、以綿延百年、貽我後之人。汝父何嘗有一絲一粟裨益於其間、以庇汝哉。而汝居然有廬可居、有田可耕、有書可讀、汝等之幸、不可不自知之也。吾與汝伯父少小相愛相依如性命、及各長大、時時東西南北、不能常聚、然心志未嘗不同。汝祖察其如此、故聽其白首同居、不復異財耳。然十



餘年來、汝伯父之支撐門戶、整理家計者、心力交殫矣、年已就衰、豈能長爲汝輩作牛馬哉。故將祖產所貽、均勻剖析、可分者分之、不可分者仍公之。庶幾各有職業、各知艱難。此不得已之苦心、可以告無罪於先人者也。吾生平麤伉、惟略識文字、於人情曲折、每不甚諳、齷齪瑣悉、尤所不耐。著衣喫飯、皆賴父兄庇廕耳。年才過五十、已覺衰病侵尋。又婚嫁已了、頗復思逍遙人間、不與世事、欲自勉強持家作計、誠不能也。故以吾兄分授與我者、復析爲二、以授汝等。自今以往、吾但仰食汝等、不復有所關預也。汝等資皆中下、吾不望以功名顯榮、能純純謹謹、爲鄉里自好之

人便是克守家法、吾願足矣。苟能自守、已足終身飽煖。不能自守、雖銅山金穴、豈有濟哉。保家之道、制節謹度而已。保身之道、謹言信行而已。非分之想、莫萌、無益之事、莫作。此吾所常以語汝者也。勉之。

夏月荷花盛發、用古觀蓮節故事、以六月二十四日具飲招客、集者三十餘人、成詩者十有餘人。蕭公子子滂以霈、子蒼以霏、祝子常百十、劉彭甫鏗、季仙九芝昌、廣文王筠格、姚明府儲、劉春江濟、祝執舫陞芸、祝廣揚登墀、辭志安振鏞也。各次其韻酬之。夏永曦、煒如爲樂神之詞、先生戲仿宋人樂語、代荷花致語、以答樂神之詞。旣罷、張懷白瑩復爲寫圖以記之、題





曰講院荷觴、手書次韻詩并樂語於其後。其筆法結構逐首變格、無一複者。自是觀蓮雅集歲以爲常。纂集八代全文成凡二部、其一以時代前後相次、一則以類相從、分數十門。心該屢書來爲鮑氏致拳拳、然鮑氏不親取、竟不致也。

是年康中丞巡撫廣西、以粵西山水之奇甲天下、要先生往遊、且云暨陽所入不豐、何以克竟宏業。惠然肯來天末、故人尙可爲東道主。先生答書善辭焉。時山子在康幕府中。

六年丙戌、先生年五十有八。在暨陽。元旦晨興焚香拜天、筮之得恆、以焦氏易林占之、其繇曰黃帝所生、伏

義之宇、兵刃不至、利以居止。故名所記曰義宇。日涉、凡陰晴風雨及讀書作文、酬應書疏、悉記之。以是月下旬赴院。

春始刻所見帖。先生以古來稱工書者、率瑰瑋人、魏晉則鍾王、唐宋則顏柳蘇黃是也。自以書爲藝、而其途遂分。然端人傑士之書、要無不工。蓋志氣流露、自不可換。此本末之辨。因以所見宋元以來忠義之蹟、命孔省吾憲三摹勒入石、冠其首者、則宋岳忠武、文信國、元余忠宣也。又取明楊忠愍、繼盛、唐荆川、順之、盧忠烈、象昇、楊機部、廷麟、倪文正、元瑤、史忠正、可法、黃文節、漳耀、黃忠端、道周、墨蹟、刻爲屏幅、及錢魯斯



楷書孟子魚我所欲也全章曰是可爲養正之助。是年春周公系英薨於使院先生哭之有祭周石芳先生文嘗曰天下事能侃鑿言之者惟見石芳先生刊縮本輿地圖硃色印之加禹貢地名於其上則用藍色套版。繼繪皇朝內府一統輿地全圖。先是先生在京都得欽定圖書集成中輿地圖本苦其不著天度府各一圖。繼得康熙內府輿地圖大於集成所繪而有天度亦分省有外藩。東華錄言康熙五十年五月駐蹕熱河行宮諭大學士等曰天上度數俱與地方寬大脗合。以周尺算之天上一度卽地上一百五十里以今尺算之天上一度卽地下二

百里。古來給與圖者俱不依照天上度數以推地里遠近故多差誤。朕前特遣能算善畫之人將東北一帶山川地理俱照天上度數推算詳加繪圖。五十八年二月諭內閣學士蔣廷錫、皇輿全覽圖朕費三十餘年心力始得告成九卿等如求頒賜允之。卽此是也。又於廣東巡撫庫見乾隆間所賜各省督撫

內府輿圖則合繪之東西爲橫幅長卷而南北以次排之欲臨其本而未成繼乃得董方立所繪圖方立固穎敏絕人其爲是圖也仿兩朝舊本復博稽掌故旁羅方志自乾隆以來州縣之改更水道之遷異皆參考校確實而著之以道光二年爲斷分爲四十



一圖大者數尺、小亦尺餘。關合既難、觀者不易、乃總爲一圖、舒之則爲屏幅、卷之則爲冊葉、殊便尋覽。原圖依內府以天度經緯分劃、天上一度當地上二百里。然緯度無贏縮、而經度自赤道迤北、以次漸窄、則里數不可憑準。按一度當二百里、則一分當三里三分里之一、一杪當二十步、穹數卽小有不齊、而大約無甚盈縮。今則依靈臺儀象志實測、通南北畫爲每方百里、以取計里之便、而以虛線存天度之經度、使測天者仍可依傍其緯度、則每度分爲二以應地上百里。南北以北極爲準、自黑龍江興安嶺北極出地六十一度、至廣東崖州北極出地十八度、相距四



十三度。東西以京師爲中、東至三姓所屬海中大洲偏東三十一度、西至喀什噶爾偏西四十六度、相距七十七度。計里定方、南北八千六百里、東西一萬一千五百里、省十九府、一百八十五直隸廳、十九散廳、七十五直隸州、六十九散州、一百七十一縣、一千三百零四將軍等所駐城三十一、防守等所駐城四十八、卡倫一百七十六。是役也、凡閱三年而後成、操筆者六庚九承如、及其從子德只巖也。

七年丁亥、先生年五十有九。在暨陽。時陶文毅公撫蘇、已三年矣、書疏頻繁、至是固請主講省垣正誼書院、冀得旦暮見。先生以兄五初衰老、相愛彌切、且省會



喧雜有妨講授卒辭不赴。有答陶巡撫書公得書歎息愈益重之以典試四川時所著蜀輶日記及道光六年籌議海運事宜并繪海運圖郵示先生並爲之序跋題詠。陶公報書曰先生所題多得我意中事也。十一月福建來聘總纂通志時孫文靖公爾準總督浙閩韓公克均巡撫福建林公則徐與陳庶常壽祺皆熟於三山掌故皆以爲總司其事非先生不可。孫韓二公具手札期必至而先生猶答陶巡撫之意也作書薦彥聞可倚任書三至卒不赴。

是年蒙山輯錄盧忠肅奏議先生爲定其體例可付刊矣擬於宜興人士集資成之有夤緣兩江總督蔣

公攸鈺爲刊之。妄爲刪汰。識者譏其非善本也。乃錄  
蒙山原稿藏之。蒙山又欲重輯堵文襄集。亦不果。

校記

①考一：《養一齋文集》卷五《懷遠縣志序錄》作「考三」。又，下文表傳「七」，據所載《敘錄》實爲「十三」。

②祭祀：右引作「祠祀」。

③戴籍：右引作「載籍」，當從。

④上下三編：據下文實數，當作「上中下三編」。

⑤指示：當作「指事」，見《養一齋文集》卷五《駢體文鈔序》。

⑥自：疑作「是」。

⑦瑣試：當作「鎖試」。

⑧給：當作「繪」。



武進李先生年譜卷三

陽湖弟子蔣彤編

八年戊子、先生年六十。在暨陽。春二月、作廣東巡撫成公格六十壽序曰、果亭大中丞以 月 日爲生崧之辰。道光八年歲在著雍困敦、而年六十。辱知於中丞者、以其日奉介壽之觴、禮也。中丞少從游於吾邑管侍御蘊山先生、以故毘陵人士荷眄睐垂收攬者、指不勝屈、相與詣兆洛請爲侑觴之辭。兆洛避席擇言曰、吾聞之也、天地盈虛、與時消息、聖人以損益之道通之、使有泰而無否、故曰損益盛衰之始。人之生、百年爲大期、五十而半則始衰。天道人事、十年小變、





故世俗自五十以往、十年而一稱慶、幸其不衰云爾。凡衰之始兆也、非疾疢黯阨爲之尅鑠也。形骸筋骨完固不動、第居恆精爽、儼然如不自持、湫然如不自聊、卽泰之消於困、著於旅、成於損也。血氣有潛移焉者矣。盈虛之理、晝夜之道、駐顏還少、誕不足道也。易之道、受之以節、節而信之、合於中孚。毋以損疾服无妄之藥、毋以求益致勿恆之擊、循其自然、保合太和、則變豐息解、終日乾乾、而否反其類、而成泰。詩人所歌、天保定爾、非虛言之而已。治化亦然。聖人在上、則長治久安、挽回氣數、天地莫之能違也。方今天下休養生息日久、聖天子仁育義正、德意洽於域內、威

稜震於疆外、如日方中、如歲方夏、民生之暢遂極矣。風會所形、底滯湮鬱、若劫劫度日、媮甘食好衣、不暇爲久遠計、此亦氣之潛耗者幾乎。中丞爲天子撫綏南服、南服天下之足也。嶺嶠外環鉅海、海中之國輸珍賚而至者、耗中國財歲千萬計、而又適足以蕩民志、澆民俗。養生家有言、陰寒之氣常中於足、當衛之使其氣通、故曰至人之息以踵。然則南服之地、亦天下消息之樞矣。固護元精、辟除患氣、以壽斯民。他日保釐政成、入佐天子、調元斟化、致平康之上理、以贊我皇上祈天永命之治、而自致平格壽考之美。是吾黨所勤勤頌禱於中丞者也。若夫一身之康濟、



一家之第祿中丞。飫聞之，不當以溷左右之聽。聞者曰善，遂賤之以爲侑。

陶文毅公濬吳淞江，工竣放水，作長歌記其事，郵示先生。先生次其韻，下半篇云：鰕生家住北江尾，入江諸港殊盈枯。中間孟河最關係，爲公前席雍容掄。此河自唐迄明代，昔通義舸今乾嶇。京江冬堵月河塞，商舶賴此爲委輸。兩厓之田復高仰，一滴水比天漿濡。工經久廢事本鉅，急思借帑計轉愚。其西呂城有浦瀆，下游相接堪鬢梳。若通新河工較易，功成爲利當不殊。敬臚芻言乞清燕，別白一是求分區。土民望公如望歲，香花旦晚迎公輿。至十一月，公來書云：弟

在鎮江數日、內河乾涸不能通舟、將糧船改由焦、象二山之間至橫閘入運河、係屬拗行、尙爲順利。惟天晴已久、西風潮落、閘內無水、仍不能行。益足見孟瀆河之不可不挑以爲旁門後戶、但苦經費無出。前奏沙地歸公爲農田水利之用、部覆已準。雖吾計已確、而事在十年外、尙於水利無益也。觀此、知公勇於聽言。至庚寅而借帑挑河之議起矣。

刊程子香文鈔。子香名德賚、婺源人、仲倫之古文弟子也。其友王國棟以爲請、先生嘉其拳拳之誠、文亦不失規矩、爲序而行之。

十月、刊紀元通考成。江陰縣令秀水葉兩垞維庚所



著也。兩垞卒於官，遺有是書，先生爲之補其缺漏，去其紕舛，博推精檢，而成書十二卷。致書陶公，善處其後事，公以先生故，特委姚丞儲署縣事，俾資調劑。兩垞前乞陶公作序，先生以刊本寄呈，并要其踐諾焉。先生又以是書爲繁，命六承如別爲部分，爲紀元編三卷，經緯粲然，約而彌賅，閱者甚便之。

是年正月，在里第。兄五初以先生周甲之年，治酒集子，姓歡飲竟日。三月而五初卒，先生痛絕，弔客至皆親答拜之。至九月生辰，生徒於院中設樂，張燕。陶公贈楹帖，有名登循吏，經是人師之語。學政海鹽朱公方增壽以七律二章，親至拜賀，縣令以下畢至。而先



生懷在原之痛、於數日前已避往宜興矣。而朱公尋被旨入京、必待一見、乃手書蹙其還焉。彤之從先生自此年始、以正月下旬到院、先生方自蘇州見陶公還、同几席者郡城吳聖俞、咨江陰繆若芳、仲誥、陳堯賡、大韶、無錫黃藎臣、黻錢備三模、靖江熊宜齋、爾穀、泰興李粟、觀滄瀛、耿謙山中也。維揚劉君銘亦於是年冬到訓導任、存問甚勤。先生有牆邊自闢地三弓、繫徑安門、自過從之句。

九年己丑、先生年六十有一。在暨陽。春二月、家祠成、卜日致祭、記之曰、吾宗自慎、吾公冒輞川李姓、至於今七世矣、而生齒寥落、合見在子姓不及三十人。輞川



之族既繁、慎吾以下之主不復納於輞川之祠、不可不別爲祠以安主也。自明之公求夾山王氏本宗、冀得慎吾公以上支派、以復本姓、而竟不可得。因戒子孫世世與王氏無通婚姻。吾祖、吾父卽思別立祠以別於輞川、而卒未果。吾兄始經營之、稍有端緒、而遽先朝露。此吾猶子頽所以亟亟修建、以竟吾兄之事、而上以慰吾祖吾父之志者也。祠屋三楹、中一楹爲龕而三隔之、中奉始分祖主、中隔之右奉高祖主、中隔之左奉曾祖主、左隔之左奉祖考主、右隔之右奉考主。中隔分上下層、下層以安祧主。東西二楹空之、設祭筵。東壁爲櫥、庋先世所著書籍及畫像、龕後爲

櫝以安祭器。其東爲夾室，倚北壁爲龕，上以奉李氏春華公，此吾祖之所自別，不敢忘也。下則族中無後之主附焉。族有售屋於人而無後者，吾祖收其主而藏之，不忍毀也。堂之前三楹臨池，以通旁屋之出入，可置几案讀書。左爲小閣，東向卽祠門，平時閉之，惟祭乃開。外門三楹，扁曰家祠，亦東向。右側一小門，通出入。自宗法廢而譜法興，而宗無統紀，程朱諸子於祠堂之制嘗斤斤焉。今略本諸儒所說，通以經意，略條其大者，俾子孫守之曰：今世宗祀無復親疏限斷，徒侈源流之遠以相夸耀，而本末之序紊，厚薄之施亂，誠妄之心雜矣。程子之說四親之外益以始遷祖。



朱子之說惟祀四親而以祀始遷祖爲僭。然後之論者皆從程子。蓋人情之所同也。今以愼吾公爲始分祖不祧。高祖明之公。曾祖璞菴公。祖惕齋公。吾父第亭府君。爲四親。第二世存素公宜祧。吾兄五初公喪畢入主。則并祧明之公。以後子孫視此爲序。吾死不得入主此祠。吾曾元有讀書明理者。則別設祠堂奉吾爲祖。吾子吾孫則別祀吾於私室。而共祀吾之曾祖。祖考於此祠。此古人繼別繼禰之義。乃宗法之可通行者。所謂厚其所當厚。各親其親之道也。又曰。近世祠制。吾所知宜興任氏爲最。蓋王谷先生所定也。然吾謂其立法太夸。用意太褻。有入無祧。已無限

斷論德論爵復起爭端。見在子姓雖云能守而當其致祭祖宗紛紜於上、子姓淆亂於下、有法而仍無法、乖經意矣。聖人之制祧非忽也、緣恩也、天之經也。聖人之立宗非薄眾子也、明統也、亦天之經也。知此義則宗法廢而未嘗不存。誇言收族矜其名而不察其實、親疏無等、誠意不接、是相率而爲僞耳。又曰、凡四時之祭止及四親、惟冬至則先一日祭始分祖及祧主、祭畢復祭夾室之主。明日祭四親、皆每代爲一席。惟夾室之主則以春華公居中、而無後諸主附於旁、爲二席。此時之祭同祖明之公者得與祭。將來明之公祧則同祖璞菴公者得與祭。然其來也不拒、其





不來也不招、隨昭穆序拜、不與福胙。又曰、祠田若干畝、歲收所入、以供祠祭及墓祭之用。稍存其餘、以爲每歲修葺祠屋、培植墳墓之費。祠屋不許改造、充拓、祠田不許增置。自范文正置義莊、當時以爲美談、至今慕而仿之者幾徧天下。而其害亦遂不可勝言、甚至議禁議毀、大吏形之奏牘、此豈文正所計及哉。作始也少、其將畢也必鉅、法立弊生、勢固然也。子曰、以約失之者鮮矣。夫垂裕之道、貽之以德、不聞以財。貧窮鰥寡、自有睦婣任恤之教在、欲以祖宗而盡養其子孫、雖帝王不能。置產愈多、覬覦愈起、開爭端、滋獄訟、是教以參商也。利源旣廣、鴟張必生、恃族多財、

多橫暴鄉里、有急輒相助、許控甚至鬪、很不顧是教、以犯上作亂也。願吾子孫安貧守分、勉力自愛、知祖宗之不足恃、但長保此數椽、則亦無媿於爲子孫矣。夏、荷花盛發、昨歲以兄五初之喪、觀蓮之集遂缺、而不舉、乃重修故事、并先作長律四首以倡、有偶效野人投木李、浪希彼美步金蓮之句。當時屬和者頗多。先生以院宇褊小、不足容從者、於池東鑿壁通崇聖祠、復於祠庭東鑿壁通奎星閣。秋八月、重刻奎星像記曰、古無所爲魁星、明時舉子之黠者、戲就字形描摹成像、以謔其儕偶、而時俗遂傳之。說見七修類稿、湧幢小品、顧亭林日知錄亦深惡焉。予思長公外紀



載道君皇帝使道士林靈素拜章上帝、伏地久不起。帝問其故，曰：「值奎星奏事，俟奏畢乃通章耳。」帝曰：「奎星爲誰？」曰：「本朝蘇軾也。」然則奎星之說古亦有之。暨陽書院前有閣曰奎星閣，土塑魁星，久而壞，將易之，予懲其祀不經也，將易以蘇公。雖方士之說誕不足信，不猶愈於倣字寫形、猙獰怪怪者乎？多士以爲然。生員某因請曰：「曩館於繆文貞公裔孫家，其庭有黃楊，文貞手植也，大盈拱，以屋壞更營，妨於樹，遂伐之。某請其木而藏焉。以此刻文忠之像，其可乎？」予曰：「善。」乃命繪士圖公之眞爲奏事狀，旁彫飾雲物，如乘風上征者然。旣成，以月日奉虔於閣之中楹，率多士而

祀焉。夫文忠之文章氣節、揭若日月、人士所宜尸祝也。文貞學道致身、不媿古賢、其所植之木亦文忠所當式憑也。記其事、諗來者、或以此徧易無稽之俚俗、其可乎。寶山毛生甫嶽生爲奎星頌、山子楷書勒石、嵌之壁閒。生甫時客江陰縣令襄平德宣幕中、一見如舊相識、由是往還無間、有所譔述、互相質證、撰碑版文、書丹篆額、往往與山子三人聯款、以爲常。先生贈以楹帖云、南山隱豹誰知霧、東野爲龍我願雲、益深許之也。

大興徐新伯松、乙丑同舉進士、郵至塞上所作三種、曰西域水道記、曰新疆賦、曰漢西域傳補注、屬爲訂



正。且言揚州羅士琳深通四元算術、爲道地焉。

十年庚寅、先生年六十有二、在暨陽。刊校史問和集、有鑑樓先生遺文序。校刊潘觀常集、有靜寄軒集序。問和字屺銘、觀常字宸雅、皆宜興人。先生皆識其爲人、故刊行之。

是年冬十月、陶公實授兩江總督、知先生兄五初已下世、無所委辭、招延主講鍾山、卒不赴。尋以撫蘇稿刊本寄焉。

涿州盧敏肅公坤總督兩湖、時以書通懇勸、移節兩廣、寄書幣延主粵海書院。時朝議鹽法日利、弊由奸私、當減官價以敵之、緝私梟以杜之。同縣吳公光



悅巡撫江西、奏曰、官鹽有價、有課、有費、私鹽止有價而已、卽多減勢不敵、緝私急懼轉而爲盜、鹽之於民、猶布帛菽粟、茶煙竹木也。聽其買賣、任其流通、關津征稅、遠近利賴。若設官征課於場、竈民運販者旣出課稅、卽任其所之、則私販皆良商、國課裕而民食便。下其議直省督撫、先生閱邸報見之曰、此萬全上策也。繼見盧公覆奏、大背吳議、意甚非之、竟不作答書。十一年辛卯、先生年六十有三、在暨陽。夏四月、韓公客均入都、先生迎見於梁溪。言及漕務、先生曰、江南民力竭矣、公入見天子、必變法以爲久策。信宿別去。迨甲午春、松陽陸君我嵩入京、引見、託致韓公書、復



論漕運轉搬之法、冀一醒江浙重困。答書云、此事驟難議及、且有籌新款、捐者寥寥。大司農無日不仰屋歎、幾於百事俱廢云云。

陶公之受總督事也、值私梟黃玉林伏法、前督臣大學士蔣公攸銛及鹽政運司皆獲譴。天子厘念淮鹽、欽差戶部尚書王公鼎、侍郎寶公興赴兩江會籌改法。陶公因奏章程十有五條、而欽差復密奏請裁鹽政、歸總督管理、以一事權。由是鹽務大變、兩淮洶洶、幾釀成釁端。或詢彌治之法、先生曰、鹽法之弊在官引不銷、所以不銷在私鹽充斥。欲暢官引、必禁私販、婦孺皆知之。然緝私雖嚴、私不能絕、且不可

絕透漏之途多不勝防也。狡獪之技熟不勝詰也。容  
隱包庇食其利者眾不勝究也。且閒民之生計在此、  
百姓之所便在此、奪其所生、違其所便、雖察吏臨其  
上、嚴刑隨其後、其勢不勝、故曰不能。閒民之販私者  
不下數十萬、嚴刑密網、幸而絕之、此數十萬者其能  
束手待斃乎。獸窮則攫、患且不測、故曰不可。爲今之  
計、惟當化私爲官、罷鹽政各官、去眾商、權鹽於竈、定  
其程額、任民買賣、不問所之、征之於關、亦定其程額、  
庶國課不屈、人民相安。然權鹽於竈之法、亦婦孺皆  
知其利、而久不行者、則有持之者也。閒民之食於鹽  
者眾、改法則無所得食、故議裁商、而儀真掘鹽之民



洶洶。今裁鹽政、而揚州鹽院之隸役無不洶洶。慮其激而爲變、一也。商人所占根窩成本且數千萬、改法則盡奪之、還之則無以給之、不還則失政體、二也。由是浮言繁興、當事惶惑、知其爲利而不敢行、且不敢言。竊意此二患者、可通融而弭也。設局於運司署、或揚州府署、委員查揚州儀真之民之食於鹽者、逐戶登載造清冊、呈於局。委員遍查各場餘鹽、造清冊呈於局、然後酌定鹽價、每斤若干文。一場一委員、持諭曉示竈戶、令其照價發賣、而稅其十之一歸官。然後諭示揚州儀真諸閭民、諭以 皇仁溥大、失業者各賞給鹽斤、以爲資生之本、量其戶口給以鹽票、準其

赴場領鹽、聽其販賣。不顧<sup>①</sup>賣鹽於人、以其資本別求營趁。失業之民半係私販、無不樂從。卽隸役之類、守分者營生有資、游蕩者目前得過、亦必帖然無他矣。權歸竈課必大裕。令商人各籍所有根窩、成本若干存於官、每年償十之一、願鹽者鹽、不願與銀。十年而畢給、則商本無虧。國體亦得。先生旣以語客、退而筆之、然未嘗以示人。久之、彤整理書策得是稿、錄而存之。當改法時、保緒在揚州、熟練鹽務、持議有異同、陶公銜其阻撓、將摭其他故罪之。先生蓋有鑒乎爾、亦謀不出位之義也。

鄒某屬刊道鄉先生集、先生手自編校、取李氏長編





及名臣奏議補其缺遺、并刪輯其年譜。既成、序曰、自子遊子北學於孔子、以聖人之教啟南方之學者、其後二千餘年、而有道鄉先生揭中庸於禮記之篇、闡慎獨之旨、直接洙泗之心源、與河南兩程子遙相證明。先生之子遂從龜山先生遊、以紹伊洛之緒。至有明而方山薛先生啟新錢先生、實與涇陽顧先生、景逸高先生大振起之於微墜之中、天下學者視爲正鵠焉。是故南方之學、開於子游、導於道鄉、而昌於涇陽、非吾常一郡之私言也。道鄉先生所著書有易解、有繫辭纂義、有論語孟子解義、其集則奏議十卷、道鄉集四十卷。今所存者獨道鄉集而已。明時裔孫忠

允曾刊本以行、今亦湮滅無遺、承學之士求一見不可得、甚矣、斯道之衰且絕也。今夫事會之興廢必有其機、動於人之心而機應焉、而事乃旋效焉。世之以道學相詬病久矣、薛氏、錢氏、顧氏、高氏諸書具存、孰過而問焉者。有并其書之名且不能知、矧能知書中所言者何事乎。今裔孫某慨然購遺集、聚其族之人而刊之、夫必有動於其心者矣。其應於機而效於事無惑也、豈徒鄒之子孫將復其始乎。吾知鄉人士必有亹然念先民、勵實學、以期無媿爲生先生之鄉者矣。

郡城某氏設此壇、積錄所記、名曰執中允義、以質先



生。先生以其發語痛切，足以維持世道，刊而行之。序曰：天地之氣，其乘於運乎？聖賢之化，其因於時乎？夫天之仁愛斯民也甚矣。書曰：天佑下民，作之君，作之師。惟其克相上帝，寵綏之四方。三代以上，綏猷若性，保合太和，首出庶物之一人，實兼任之。司徒敬敷張其條貫而已。三代而下，天生孔孟，佐天子治天下，而後天下之待治於師者，與待治於君同。降自漢唐之末，學術益紛，舍本而務末，天於是生程朱以振起之，究上達之軌轍，範下學之途徑，而心性之理乃大明矣。顧惟其大明而言之者益易，亦聞之者益玩，騰口說，蔑躬行，加以民生益眚，風習俗益機巧，偷取旦夕，

莫保其性、而程朱之說不能動其心、而開其悟。天於是乎有文昌帝君之命焉、闡太上之遺、垂陰騭之篇、明禍福以示之嚮、以神道輔師道、而濟孔孟之窮。至於今、而又有孚佑帝君之命矣。心孔孟之心、言程朱之言、訓文昌之訓、問焉而以言、受命如響、爲君子謀、不爲小人謀。起信者恐悚、斂懾、棄咎若洗、自新如磨、信乎克相上帝也、抑信乎克相孔孟程朱文昌而作之師也。氣化之遷變、固如斯乎、豈徒以新民之耳目而已耶。至於發明元功、引之日用、則又舉下學上達一貫之旨、徹終始而言之、以實踐夫窮神知化之道、而闡隱怪之口、不復留餘蘊者也。嗟乎、民之生日益



蹙矣。質因以日滴、神因以日昏、智因以日短、人人置身於深淵薄冰之上、不可晷刻待、而機巧方日生、囂戾方日積、生理幾何而不絕乎。書中所言、彌近彌篤、彌深彌哀、大聲疾呼、垂涕泣而道之矣。傳曰、聖爲天、口帝君之言、卽天之心。天之心固如是、其宛轉援拔、惟恐一人之迷溺顛覆、以自殞其生、而受天之成形者、尙或肆然自棄而棄天、獨且奈何乎哉。是秋蟹羣上食沙田稻、先生蹙然曰、是橫征苛斂之象也。冬暖麥苗秀、先生蹙然曰、是卽今日之人心也。未苗而欲秀、未秀而欲實。人人振奮於名利而不肯安其守、而世患由此亟矣。蓋先生目擊亂世之末流、日抱隱憂、



故見一善則喜、聞小惡亦傷、字文有涉名教事者、奚啻痛哭流涕而道之矣。

是年倡修郡城忠義祠、命門人高式之承鈺董其事、并修復浩然亭。閱明年某月而功竣、擇吉日安神位、守令以下會者百人。祠裔鄒閏菴、澍莊子香、夢蘭輯忠義各人行略、刊行之。先生有忠義祠錄序。自是祠中經紀有章、時祀不忒。而孝弟祠、節孝祠、若季子廟諸所次第興修矣。

先生以民間貞節得旌甚難、致湮鬱者多、乃致書大府疏其情、得彙集奏請。由是同時獲邀 恩典者三千餘人、力省而功倍、徒無算。同人梓之爲闡幽錄。先



生采其尤異者并鄉黨善行爲桑梓潛德續錄刊之。白公鎔於是年夏莅督學江蘇任亟見先生以暢夙志并聘山子佐校文之役。公尋擢總憲去。

十二年壬辰先生年六十有四在暨陽。春二月武進令趙公懷鶚陽湖廖公鴻苞合辭邀先生入郡城議挑濬孟瀆章程。先生曰是必需土人乃招鄭上舍良弼言孝廉啟方同議。前和陶公吳淞江詩已將二人言孟河事宜書附呈也。

輿輿地一統全圖版成先印朱色數十部擬將廿四史中地名沿革墨書填注每一朝爲一部使讀史者雖南北朝之紛錯亦瞭然如示諸掌。并刊輿地略兩

卷以京師爲宗、自直省以逮府廳州縣、並著其四至八到、外藩亦然。由是萬里遼闊、如堂室可指數矣。繼見沈廣文欽裴所藏、別有乾隆內府圖、亦總繪而截爲正方、刻之、方逾二尺、直省略同、而西與北外藩之境、拓幾倍、乃以所刊本於外藩外、墨書填注補足焉。後又見壽陽祁員外韻士所著西陲事略、於內外蒙古部落、卡倫並著其地名里數、乃舉前補注所未備者、復計里定方、以朱書填注之。

德公宣於去年卒江陰縣、任生甫誌其墓、先生刊其集、有西礪詩文集序。

夏四月、陶公爲孟河事起、特委桐城姚公瑩任武進



司其役。公姚薑陽先生範之曾孫。惜抱先生肅之從孫也。其慕先生也久。至是以先集四種及令海外時所著東槎紀略寄示。并以惜抱書錄稿本及所著詩文乞校正付刊。先生與山子生甫共參其事。有惜抱軒書錄序。有東溟文集序。是年冬。兩先生奉旨入鄉賢祠。公集入祠始末爲崇祀鄉賢錄。乞先生題其籤。並爲作兩先生合傳。

是年。侯官廖公鴻荃督學江蘇。彤與先生從孫嶽生同補陽湖縣學生。其冬。先生送嶽生就婚涇縣令趙君仁基署中。先生舊遊安徽。婦孺知名。至是寓涇川書院。載酒問字者恆滿。有趙君岱頂看雲圖序。有胡

墨莊毛詩後箋序、有墨莊先生以詩招遊水西次韻奉答、題潘雲閣耀文敦素堂詩集、題墨莊詩集後、酬翟潤之漱芳、酬吳茲山念恆、次韻酬費星甫、趙羽可懇索排律、入同人試帖作、弄水尋回溪、埽石待歸月、二首諸作。乞書者尤多、幾於筆不停揮、潤筆填委、卻之不可。嘉禮之用、悉取給於是焉。

十三年癸巳、先生年六十有五、在暨陽。春正月、自涇川返常、留別涇川書院諸人、有徒慚坡老成饕餮、略似樊川半醉醒之句。有涇川送別圖。二月上旬至里門。江陰學武生徐泰能爲銅工、有巧思、先生招之院中、製天球成。先生釋之曰、天球之法、以木爲胚、以紙爲





膚膏之以豕血、塗之以蜃灰、俟其乾而去其胚、則堅滑輕利、便於旋轉矣。塗青以象天、圍墨以寫星、黃赤經緯各以其色、界之絲繫太陽於黃道、使可隨手移置、則冬夏節氣不愆其度矣。平置銅環、上刻地平、二十四向、承以銅柱、聯以十字架、則地平不傾側矣。側立銅環、上刻周天度數、於地平子午開鑿以容之、使可隨意旋轉、則北極高下可以隨地升降矣。斜倚一環、與側環十字相交、以當赤道、上刻十二辰名、則晝夜加時可得而紀矣。其設機也、側環容軸內貫球之兩極、南極之軸有齒輪焉、是謂運球之輪、其齒九十有六。別設四柱夾板於南極之左、上戴地平、十分夾

板上六下四、左八右二、以安釘輪之軸。中分其軸、以設釘輪、繞以銅索、索末繫錘、是謂運球之索。其北出夾板外、軸頭有齒、是謂運球之齒。其南藏於夾板、近板之處有大輪焉、其齒與運球輪等。釘輪、大輪之間有挺簧、有閘、有逆輪之用。順之則釘輪與軸若一、逆之則釘輪逆轉而軸不轉、所以繳運球之索使不墜也。八分大輪之齒、以其五有少弱爲二輪之齒、以其四有半爲側輪之齒。其一有少弱爲爪輪之齒、爪輪之齒與量天尺相摩相盪、而各輪之旋轉生焉。凡輪皆有軸、凡軸皆六齒、惟運球之齒當運球輪六之一。若欲使日行黃道、與天相應、不假人爲、則於運球輪



之內別設過極環。六絡天球之外，斜倚雙環，以象黃道。雙環之中夾一單環，內繫太陽，以隨球西轉。外刻三百六十五齒，以當一期之日。單環之側各設十二小輪，旋轉於雙環之內。單環之外別設兩小輪，與單環之齒遞相銜接。又於子午側環上設一小釘，單環左旋一轉，其小輪必與子午環一觸，則右旋一度矣。凡此諸法，先生以意指授，渠卽逆意造器，銖黍不差。更推是法爲合抱大銅球，其機巧如一。歲周而後成，時道光十有三年，年名昭陽大荒落，月名畢辜，日雄在丁，日雌在卯，時加申，日月會於析木之次。粵十有二日，時加日南至，躔箕一度二分半，大月在奎七，歲

在奎六、填在軫一、太白辰星皆在心三、熒惑在尾一、初昏東壁中銘曰、道一而已、惟變所適。開物成務、往來闔闢。消息盈虛、觀象於天。反復其道、君子乾乾。并爲面東面西、面南日表、用以朝夕覘候、並有銘辭。又廣天球之法爲地球、染黃以象地、灑青以象河海、填注中國地方及海中諸國於其間、架之俾可旋轉觀覽焉。

先生以歷法各朝不同、欲究諸術之或疏或密、歷代之遞因遞變、非舉廿二史中歷律志、盡通其術不可。元和李尚之有三統四分、乾象三術注、餘亦未就、乃命門人宋冕之、景昌從荆溪學教諭沈俠侯、欽裴受



四元算術。由是指示木工造正方、縱方各一具、次商三商之平廉長廉、俱一覽了然。又仿劉徽九章注斜解立方棋作爲壅堵、陽馬、鼈臙諸形、合之成一大方、分之則各體皆備。又弧三角一術爲西人絕業、其狀益復難辨、亦令徐泰鑄銅爲之弧、凡矢切割各線、俱能使學者了然。

夏五月、始校刊顧氏日知錄。先是嘉定錢氏大昕評釋日知錄百數十則、生甫錄以示先生、乃謀推其義例通爲箋注、有資實學。嘉定黃潛夫汝誠肯任剗劂之費、旣又得楊南屏諸家皆嘗用功於是書者、有可采錄悉收之。山子生甫分司之、彤亦與校讐焉。先生



嘗謂中言時務八卷、此爲有用、乃全書之精華、亭林所云爲王者取法者也。故漕運、河務、鹽政諸大端、博采名臣奏議及近儒論議、慎取而詳說之、與本義相發明、鑿鑿可見諸施行、非視因學紀聞諸家箋釋祇取該博而已。

十四年甲午、先生年六十有六、在暨陽。春三月、常熟張子琴邀遊虞山、顧懶厓劄書亦云、劍門拂水奇秀、甲江南諸山。近某觀察於虞山絕勝處、構雙忠祠、祀瞿忠宣、張忠愍二公、且於忠宣墓上植梅三百餘株、香雪成海。又其地破山維摩諸寺、幽秀蒨深、杖履不可不一至也。乃偕劉箴山學博、張君懷白、吳生冠英往。



遊假館朱遠翔少府家。投詩問業者紛集，有口占贈朱少府詩、遊破山寺詩，命冠英繪圖誌其事。

夏四月，刊日知錄成，生甫又爲刊誤一卷附其後。

秋七月，刻所見帖成。宋則岳忠武飛、文信國天祥、元余忠宣闕、趙儕鶴南星、鄒南皋元標、孫柏潭繼皋、高忠憲攀龍、姜養冲士昌、薛元臺敷教、楊大洪漣、史玉池孟麟、李修吾、吳嚴所儼、徐開奕、吳澈如、顧伯欽大章、朱平涵國楨、繆西溪昌期、文汝止安之、龔淵孟立本、方孩未震孺、盧涓隱象昇、陶元朗朗先、黃陶菴漳耀、黃谷簾淵耀、侯廣成峒曾、侯雍瞻岐曾、許仲嘉士柔、黃介之毓祺、黃錫於毓初、程仲若

國祥、李仲闇、邦華、倪鴻寶、元璐、劉晉卿同升。李仲達應昇、徐寶摩、石麟、黃幼平、道周、文湛、持震、孟也。隨所見入石，故明時諸賢不能依先後次第。然並考其時事出處、往來姓字，實足以輔史傳所不備。目次既定，外人多以所藏墨蹟求表章者，乃爲續刻。如趙文毅用賢、周忠介順昌、楊忠節數人。先生又多見鄉先賢墨蹟，因思別刻爲一帖，曰敬梓帖。如唐荆川及子凝菴手書詩稿、孫文介四十二章經、薛方山塞上曲、白康敏家誠數種。餘已有鈎摹上石者，而先生已不及見其成矣。先生自居鄉以來，於鄉邦文獻意甚拳拳，故倡修忠義孝弟諸祠，以妥其神。刻舊言集、輯江



千香草集、校刊道鄉集。命承生培元校刊陸文珪牆東類稿。刊行先正遺書及故舊別集、至數十種。命辭生子衡輯毘陵經籍志。定修府縣志章程、以表其行業文章。倡濬武進孟瀆、江陰映天河、勸修黃天蕩、馬家圩、芙蓉圩。守令至、必面語以土俗淳良、宜緩催科而急盜賊、以興其利而除其害。蓋至性流露、有發於不容已者、非爲名也。

瞿忠宣公式昶集十卷、以事涉本朝、國初未敢行世、故四庫書中不著其目。秋八月、常熟許伯緘廷誥來暨陽、言及之。先生曰、聖朝寬大、如熊襄愍之集、乾隆中奉旨進御、命其子孫刊行之、則是集

安可以不傳世。許乃悉所藏送暨陽。原本分十二卷。而誥敕、行狀、誌銘、追輓幾溢其半。皆爲別而出之。舊無雜文。許已爲搜采補之矣。公奏議尙有被逮申辨疏、辭廣西巡撫疏、薦錢繼登、譚貞吉等疏。見於公子元錫所爲狀。以非全文。不復采入。定爲十卷。雜文或尙有遺者。則俟續獲而補焉。稿本既定。卽以付刊。每一版竟。先生手自校之。是年仁和龔公守正督學江蘇。命其二子自閩、自閩從學焉。

十五年乙未。先生年六十有七。在暨陽。夏四月。刊瞿忠宣公集成。序之曰。公之在掖垣也。僅七月。而疏凡數十上。時天下雖已破壞。而疆索麤完。紀綱麤立。公所





建明皆一時之急於正人心厚元氣所以匡主德延國脈者皆略具於此。使得竟伸其志於定傾救敗之道猶有冀焉。思陵初亦信嚮行其一二及以會推閣臣入溫體仁之譖惑志遂不可解擯斥不顧好惡奪於愛憎是非眩於名實日甚一日以至於亡。聖人所以有災必逮身之戒也。悲夫。留守封事隨事補苴動或掣曳運際流極尚何言哉。當桂林播蕩危於幕燕臣主一心以禦外侮尚恐不支而吳楚內訌孫李外張小人之禍人國至於此乎。公之不肯從永明西行而以留守自任也亦猶史忠正公之不肯在朝而願爲介冑馳驅耳。蓋逆知王坤劉昌允之輩不可調劑

而朝中文武不能無水火也。雖然，百六艱難之會，必內有重臣，握紀綱，張法度，運籌決策，聯絡指臂，而後可以圖功。永明柔仁主耳，非有英姿明略，足以憚懾羣下也。呂大器、文安之，稍有聲望，可倚仗，而或死或出矣。彼吳炳、王化澄，嚴起恆，何騶吾、丁魁楚諸人，而望其匡弼弱主，制馭宵小哉。況當時所藉以死灰復然者，十三鎮之降將耳。彼皆犬豕豺狼之不如，勝則奮臂爭功，敗則回面內寇，名爲勛鎮，甚於盜賊。孔子曰：足食足兵，民信之矣。不得已則去兵，不得已則去食。烏有招盜賊以自殘其民，而可以爲守者乎？事已無可奈何，姑竭匪躬之節，置死生於度外，以告天地。



而報君父焉耳。夫田橫島中、壽春城下、覽古者猶爲之涕泗橫流。而況壞梁木於頽廈、殞大星於傾天、慷慨之士烏能不悲其志而閔其遇也。

命德只繪黃道赤道、並分南北作四圓圖、以朱絲界爲三百六十度、填注恆星、增星於其閒。跋曰、史記天官書、漢書天文志、中外常宿一百十八名、七百八十三星。至吳太史令陳卓合甘巫咸三家、並著圖籍、始多至二百八十三官、一千四百六十四星。晉以後皆宗之。今所傳隋丹元子步天歌數與之合。明代禁習天文、古圖失傳、傳者率顛倒其方位。國朝康熙十三年、監官南懷仁修儀象志、用西法考測所得星座、

較步天歌少有名者二十四座、三百三十五星、而增多無名者五百九十七星、又多近南極二十三座、一百五十星。乾隆初、監官戴進賢等累加測驗、推其度數、觀其形象、序其次第。至九年、較儀象志增多有名者十八座、一百九十星、而增多無名者一千六百一十四星。伏讀

欽定儀象考成、恆星經緯度表、總計恆星三百座、三千八十三星、以六等別其明暗、以經緯辨其方位、附注歲差加減、以便推步、燦矣備矣、蔑以加矣。既又伏讀欽定大清會典天文圖、以視法變、赤道爲直線、分十二宮爲十二圖、而別繪近南北極星爲圓圖、列於前後、



較之赤道南北分圖、尤便觀覽。第原圖俱無增星、今推準度分、合而繪之、以便占天者之考覽焉。其十二宮圖限於方幅、仍就赤道各分爲二、然直線中分配合甚易、非若圓規之判然難合也。至恆星隨黃道東移、歲差五十一秒、率七十歲五十一分歲之三十而差一度。今自道光十四年甲午、上溯乾隆九年甲子、中距九十一算所差一度有餘、表中經緯已與天象不符。因命門生輩謹遵

欽定儀象考成歲差加減表、隨星加減、各如本年冬至交宮度數、庶幾此後七十年中可以用行云。己亥年、又命錢生維樾將恆星赤道繪作分圖刊板、距極三



十度南北各爲圓圖一、距極三十度以外之九十度、南北各爲皋鼓形圖十二、各以朱絲一格爲一度。惟圓圖經度在距極五度內、以一格爲十度、距極五度外之五度以一格爲兩度、廣狹之勢然也。推步家得此瞭如指掌焉。

刊洪子齡、齋孫補梁疆域志四卷。子齡北江先生少子也。北江有補三國、東晉、十六國疆域諸志、先生命徐生思錯校訂子齡所著、刊之、使與北江之書並行、爲之序、並勸其有餘力、更補北齊、北周及陳時之疆域、則諸史皆具、爲求地理者之一大快矣。

是年、搜羅元朝憲章及元人詩文集最夥。時生甫以



元史疏叢、更著元書、取錢氏大昕元史經籍志列其目、屬先生訪求、先生每得一書、以授彤校閱、仿四庫書目義例、撮其書中指要、附於卷末、遂付鈔胥、錄存副本。生甫有得、亦寄院中、蓋兩相購致者不下數十百種也。

十六年丙申、先生年六十有八。在暨陽。正月朔旦乙酉、筮得晉之剝、以易林占之、其繇曰、天命元鳥、下生大商、造定四表、享國久長。蓋去冬向友人自山東歸者、索得筮草、銘其筒曰、與天地準、易簡理得。以此不易、成其變易。引而申之、遂知來物。其靜也專、退藏於密。筮筒常置几席、然未嘗瀆、偶於元旦一占其象而已。

秋八月、校刊胡石莊繹志。

是年、康竹吾來暨陽、有別竹吾卽題其行看子詩。先生之居鮑氏園亭也、竹吾隨從問業、有主客圖。至是圖始得成、而爲之記曰、道光元年、蘭皋康丈以奉諱暫居揚州、予從焉。未幾、丈還太行、予獨與竹吾及鮑善之居。時朝夕聚首、則保緒、修存、次貽、而山子、伯恬、曾容、彥惟亦時時至揚州、交相見、宴語輒竟日。懷白亦以繪事留揚州、因屬圖之、以誌一時雅故。曰石室藏書、予坐皋比、跣趺石榻上、旁曲室、皮書皆滿。竹吾挾一策前、若欲質予而藏之。曰竹磳鳴琴、竹吾坐磐石、置琴於膝而撫之、修存並而坐、伯恬持若聽。彥惟



坐稍遠、方臨礪濯足。其後捫髯若思者山子也。石幽盤、會容憑松根坐巖石、竹吾對之坐若酬對。曰秋林晏語、次貽善之、竹吾列坐石橙依樹陰、次貽方揮手縱談、二人聽焉。曰班荆說劍、竹吾與保緒席地傍長石几左右坐、有髻髯亂鬢士奉劍侍、莫不意度嫺雅、神致欲活也。圖未成、竹吾去揚州、留圖懷白所屬其成之。忽忽十有餘年而不果也。蘭皋丈騎箕去、竹吾既免喪、存故舊於吳中、始趣懷白畢之、而屬記於予。乃追記之如此。道光十有六年也。噫嘻、人世之遇、俯仰百變、試視圖中之貌、已各不自識、況其他乎。而氣志之間猶得微辨之、君形者存焉耳。夫形形者

不可狃而君形者未嘗亡。圖中人幸無恙。然落落星散。思可得哉。深願諸君圖所以不朽斯圖者也。蘭皋丈往矣。安得舉斯言而質之。案道光癸未先生作同車圖。凡十有四人。徐星伯書云。聞君有同車圖。恥不得與。則此圖之見貴於名流可知也。并錄記於此。露車一。轅中馬。左驂驢。跨驢而從者三。車之中白鬚中坐者子常。仰而與語者卿珊。青兕蔽耳。側坐露半面者。宛鄰。若士對之舉手。若相語。若士之後。左山子。右彥聞。紹聞背宛鄰坐。撚鬚若有思。善之坐右轅。回首與伯恬語。孝逸曳一足坐左轅。若與驢背人相盼也。驢傍車而稍後。前爲彥惟。後則贊卿。竹吾並而語。





竹吾拄鞭若聽者。馭夫結束，傍右轅而趨。揚鞭而顧，若指示車中人者，爲保緒。先是，張君懷白爲諸人名寫照，欲彙爲一圖，又欲俟宛鄰之歸，併圖之。會宛鄰自京師徑赴山左，不復歸，懷白不識宛鄰，故爲側寫，不能求似也。餘人則詡詡如對面矣。他日相思，但一展視，亦可以稍釋寤寐矣。夫子常祝大名百十，宛鄰張二名琦、若士丁四名履恆、紹聞、陸九名耀通、卿三莊四名綬甲、伯恬、周大名儀暉、贊卿、魏大名襄、山子吳五名育、保緒、周二名濟、孝逸、管大名繩萊、彥惟、張大名成孫、彥聞、方大名履錢、竹吾、康大名兆奎、善之、鮑六名繼培。此其齒序也。竹吾，山西興縣人，善之，安

徽歙縣人。山子吳江人。子常江陰人。保緒宜興人。餘皆武進人。道光二年正月集於常州之東坡舊館。再集於揚州之靜修儉養軒。三年三月。屬懷白畫此。在吾家枕芸書屋。其年十月裝於江陰暨陽書院。乃記之。時孝逸、竹吾善之。在京師。贊卿在雲南。宛鄰在山東。山子、彥聞在河南。紹聞在浙江。卿珊在安徽。保緒、彥惟在揚州。若士、伯恬家居。不常見。見予記此者。子常也。

十七年丁酉。先生年六十有九。在暨陽。春三月。繹志成。凡十九卷。六十一篇。序之曰。石莊先生名承諾。字君信。竟陵人。明崇禎丙子舉人。見湖廣通志文苑傳。予



家舊藏先生讀書錄寫本四冊、有柴虎臣先生跋、文體類淮南抱朴、鱗雜細碎、隨事觀理而體察之、竊甚愛焉。尋爲友人借觀亡之、深以爲恨。後於故書肆亂書中得繹志、檢之完具、甚喜、亟收之、思重錄一本以爲流傳地。道光元年在揚州、方令鈔胥寫之、未竟一冊、而四川龍變堂觀察過訪。龍有活字版、喜刻書、已成大帙、如郡國利病書之類者數種。向予索未見書之宜版行者、予以爲莫若繹志、龍意以不見四庫書目疑之、予謂此書出較後、收四庫者不及收耳。若論其書、則貫通古今、包合宇宙、不敝之纂述也。龍遂欣然將去、約半年當集印、并原本見還。去後閱六七年、

了不相聞。一日其從子某忽至江陰遺書數種而無  
雙堂書。閱其書皆非。問之則云未見刻此書。予乃遺  
書索之。時江陰錢君一士作令四川屬其尋問。錢復  
書云龍已死。問之其子云此書當在京師徐星伯處。  
蓋星伯故識龍。予疑龍或以書質。復書問星伯。而星  
伯書來云未見。予深惘然。以石莊二書皆由我而亡。  
地下能無遺恨。甲午之秋忽得一士書云龍之子以  
此書屬寄發書視之如故人重見也。狂喜累日夜常  
熟許伯堅少府過予。予爲述之以當懽笑。伯堅去述  
之所識上海顧君竹泉。竹泉聞予之嗜之也欣然曰  
是書所遭如此不及今刊行恐後遂湮沒。亟出重資



屬予校而刊之。是書自是有傳本矣。幸哉。先生之書醇明宏達。近古所不及。其精神自當不斂。而成書至今垂二百年。竹泉始傳之。竹泉之於先生。亦可謂神交。不第緣會已也。而彌恨讀書錄之不可復見也。或者先生之靈陰相之。使得復合。則尤幸之幸哉。

是年。命德只等集活字版印歷代地理韻編。今釋四月。刊李氏家牒成。其別有四。曰誌碣傳狀。曰誥命。曰記述。曰系錄。共一卷。先生手自輯之。序曰。家有譜。非古也。古者因生賜姓。世德則世祀。紀功立宗。別子以收族。其繫世之歷。太史職之。神明之胄。降在阜隸。宗殞。卽屬莫爲紀也。氓庶之家。生而書名于閭。史綴



其族辨其親疏遠近使勿淆。故有司馬致邑立宗之法。有司治之耳。古制旣泯。乃有譜學。寒門貴仕紛然相耀。而士君子未嘗不兢兢焉。誠懼其黷宗而蔑祖也。古者立宗以之收族。親盡則止。今通其法於譜。有收之不可勝收者矣。且無其位無其德而強名曰宗。有非所宜收而收者矣。是豈禮之本乎。夫事從其約則易循。要於實則慤而鮮失。若各就其身之所逮事。所逮聞。證錄而藏之。詳其所見聞。不知則闕。於辨宗。遵祖之道亦無謬。吾家素門。又丁不造。易王而李。至於今九世矣。旣別於王而李。本宗皆不可援。就吾別姓之祖而牒之。舊有譜附輞川譜中。今別刻諸家祠。



嗚呼、閱九世矣、而見丁不滿三十人、可不謂衰乎。吾祖考言行、有傳於里黨、所稱道者、有見文人學士所記述者、可聽其隕失乎。方夙夜慄慄、危懼於負荷之不克、而姑引其端、冀後有賢子孫、知自樹立、以恢前人之基、而茫然其不可待也、其能無恫於衷乎。

六月、刻抱經詩鈔成。序曰、乾隆五十四年己酉、先生主講常州之龍城書院。兆洛才弱冠、從受業、講習制藝文而已、於先生之學、無所窺也。同几席者、臧在東、顧子明、頗能研求一二、私心善之、不能專意。甲寅歲、先生之金陵、道毘陵、示疾於書院、遽捐館舍。兆洛侍屬纊焉。時抱經堂集已付梓而未竟、閱十年來始見

刊本愴然如接音容也。先生音和而亮、容舒而肅、教弟子不强以所不習、而誘掖如不及。學務實踐、未嘗甲乙流輩、惟津津道其所長。所爲文章、舉肖其爲人也。嘗患世俗刊書不知讎校、魚豕淆訛、點畫狼籍、疑誤後學、塵點前賢。故得一舊本書、悉心鉤訂、聞人有善本必倡之、丹鉛陳前、窮日夜不休止、隨時輯錄、成羣書拾補若干卷。精深小學、以今文合諸許氏說文、通其意而結撰之、義取其當、形求其完、不泥不詭。故所鈐刻載籍、爲當代最。以梓人自隨、在龍城時、兆洛亦與校讎之役。先生自謂不嫻於詩、酬應致少、故文集集中不載篇什、手所定也。道光十六年丙申秋、先生



季子慶錄枉存予於暨陽書院、攜詩一編授之曰、先  
人歿後、於叢殘遺稿輯錄成此、思以授梓而力未能  
也、子將有意乎。兆洛受而讀焉、而益泣然於先生也。  
先生不欲以詩名世閒、而先生立身得於詩教至粹。  
其出之也、宅心樂易、安節莊誠、鯁理縝栗、樸斲完固、  
不必問爲漢爲唐爲宋、而性真見焉、學問流焉、夫非  
來學軌範哉。先生主講暨陽爲乾隆丙子、蓋在主講  
龍城前、題詠懷舊諸詩皆見集中。閱四十年而兆洛  
繼踐斯席、向時弟子略無在者、庭中花木多先生所  
植。其人士猶設先生位於寢樓、歲時釋采、兆洛朔望  
肅衣冠拜焉。兆洛亦以梓人自隨、而先生所刊苟揚

賈董宏偉卓絕、兆洛所刊則日知錄、繹志及鄒道鄉、瞿忠宣之集而已、不能紀遠、乃紀於近。自度才所堪耳、尙能再侍先生一開固陋乎。道德負於師承、崦嵫促其短影、所爲自怨自艾、顧追悔而無從者也。刻先生詩附於文集後、敬識之。

七月、歷代地理韻編成、凡二十卷。先是先生初至暨陽時、賡九問、古今地名疆域膠輶、檢書猥繁、讀史者何道以理之。先生示以 皇朝輿地圖、令以古地名識其上爲別、以上古禹貢三代春秋戰國爲經、始年餘乃成。繼檢各史地志、別爲錄副而編以歸韻。繼檢皇輿表及 一統志表、詳其沿革、著之於圖、皆得





其實地、繼會前代郡縣、注之每韻下。司其事者則賡九、德只、康甫、冕之諸人、先生時時督課、蓋十餘年於此矣。爲其成之艱而散失、易乃以活字板集印數百部、凡六閱月而工竣。先生又欲爲歷代地名長編、凡史中地名見於事而非郡縣者、悉編出之、亦以韻類之、可并入上古禹貢三代春秋戰國諸地名。若成此、則地名皆有歸宿、讀史者無遺憾矣。而此事尤爲繁費、數年來僅康甫成晉書一種、餘多爲之而不竟也。姚公瑩之任武進也、十三年冬三河工竣、調元和。十六年秋、權淮南監掣鹽務、尋權運司事。至是年四月、運使劉以商力疲敝、奏銷期近、竟以身殉。陶公夙知

公英敏濟緩急飛檄再護運符不十日完納五十餘萬奏銷分數如常。以書來曰秋初佳日杖履能一渡江作十日譚否。門下多賢幸與一二英詰偕來。又書云瑩常爲人言東南講席惟先生一人而已非諛言也。今之擁皋比稱山長者無不爲束修計其以文章道義古詰是程者未之有聞而閣下不惟無升斗之望於書院且出其所有以養士教導諸生以古爲式表章修述仡仡窮年由此觀之非先生其誰與歸乎。今天下所不足者氣節耳古昔哲人風流歇絕羣奔走於利祿之場卽有二三考古尙論之人亦徒假以射利干名耳於是不精求古人所以爲學之本而急



於著作、摭拾唾餘瑣碎、動成巨帙、以此自炫炫人。後生小子爲之目奪心驚、亦爭希其所爲、於是相習成風、不可復挽。嗟乎、大道之湮久矣、非得數有道之君子力振其頽、以明古義、豈不長此終夜乎。此瑩所以渴欲數見閣下也。此間生甫、四農兩君頗爲同志、承許偕高足三人來、幸甚幸甚。謹當掃榻以俟。中元前後當可晤言。手此速駕、不盡所言。七月旣望、彤與冕之、冠英隨往揚州、住運司署中之景賢樓下。生甫、仲倫皆在。公曰、題襟館中寂寞二十年、不意復有今日之集。屬冠英繪談藝圖記其事。與於此圖者曰姚公曰養一師、曰仲倫、曰生甫、曰冕之、曰寶應劉楚楨、寶

楠冠英及彤也。四農歸山陽。姚公從子師沆已赴省試。虛其位俟其歸而補肖之。擇佳日遊瓊花觀。桃花菴。平山堂諸所。先生曰。凡乾隆時號爲名勝。靡不荒敗。真欲作蕪城賦矣。登。

御書樓。樓亦壞漏。文匯閣書盡移藏城中天寧寺。時姚公方取閣中乾隆二十九年重修大清一統志鈔錄。志由乾隆八年纂輯成書。嗣以戡定西域。拓地二萬餘里。迫削平兩金川之後。版章益廓。乃特詔重修。卷帙繁重。鈔胥數十人。因得假觀祕笈。鈔異域錄等數種以歸。

揚州有二董子祠。其一在運使署右。姚公撤新之先。



生爲作董子祠。改安神位。記曰：揚州鹽運使公廨隙地甚曠，相傳包漢江都王相董子仲舒故宅而爲之，有井曰董子井。明初，運使何士英亭其井，建董子祠於前。自後屢有遷移，大抵皆在旁近。記具州志。久而圯。隆慶中，運使漉其井，新其祠，榜之曰慎德書院，碑尙立井上。明之季，楊節愍公振熙官運副，史忠正公開閩揚州才之奏，擢都轉，留共守。忠正殉死，節愍從焉。其家口男女十數皆赴董子井死。亂定，人無汲飲者，爲冢其上如冢。後遂訛爲董子衣冠冢，構屋以祠董子，置神位於冢顛。

國朝乾隆四十八年，運使倉聖裔以形家言，廨右地空



闔氣散則財不聚，乃建祠於中，又構巍樓五楹。兩淮鹽政伊齡阿題其樓曰景賢，以適當董子祠前故也。有記勒石堂中。祠故有畫像曰董子像，移像於樓而祀之。道光二年，運使錢寶甫視所畫像，緋袍而鶴補，乃明時衣冠，以爲當是節愍遺像。乃旁稽志乘，以樓祀節愍而爲之記，勒石題襟館。而董子祠如故。道光十七年，桐城姚君瑩以廉慎綜練權運使事，謁祠下，訝其神位安置非所，因移位於中，發其冪而井見，寒泉泓然，然後知毅魄所在，人不敢褻而爲此也。爲移祠堂稍前，空其屋爲井闌樹碣焉。節愍之像持之有據，從死之跡又昭然著見，則節愍之祀於斯樓宜矣。



而井復爲井、去其訛存其實、董子之祠亦復於古。夫英靈之氣、焄蒿昭明、久而必發、而祀典所舉、昉爽晦昧、或疑於其義、必有人焉、以其祇肅純懋之誼、穆熙端懿之誠、爲迎而存之、釐而秩之、而後鬱者以宣、疑者以晰。茲祠茲樓茲井、至今日而照燭爛朗者、固因乎其時、抑亦幸遇乎其人也。記之以詔來者。先生旣爲之記、姚公題其井曰正誼成仁之井。生甫爲之銘曰、是大儒之遺澤、是士女之清流、並靈源之所滌、合道脈於千秋。肅再拜而心惻、匪王明之可求。盟寒泉以建標、頌有孚於井收。廬江江開豪士適來、遂令書之。是行也、留揚州十日。彤與冕之赴江寧應試、生甫

母服未闋與先生及冠英於八月下旬離維揚。

九月壽陽祁公寯藻赴江蘇學政任到江陰。初祁公拜命時問先生於部曹江都汪喜孫答曰其人有體有用知古知今學該漢宋道貫天人祁公至揚州謂姚公曰吾承天子命來江南得與李先生周旋此爲幸事。至之日已昏暮先生以非時辭疾不見騶從乃入使院侵晨乃相見焉。

是年冬十月姚公奉旨擢臺灣道。

十八年戊戌先生年七十。在暨陽。春二月姚公赴臺灣生甫送至餘杭。公來書云前在陶宮保所議兩淮鹽法續志事在必辦主筆者非先生莫屬輔以生甫楚



珍數人、可成善本。大端數事、暇當略爲條記奉教。蓋自鹽政旣裁、鹽務大變、中外謗議、數年未已。陶公以此欲勒成一書、爲信今傳後之計。然姚公去後、陶公於六月下世、莫爲主張、竟不及舉也。

祁公出其先公鶴皋先生所著書、外藩蒙古回部王公傳、則史館時奉 敕編撰稿本也。西陲總統事略、西域釋地、西郵要略、則謫戍時塞外所著也。松相國新疆識略多出其手。公以西域釋地三種已有刊本、而外藩傳先人精力所萃、外閒少知者、意欲綜各傳爲編年體、成一家之私書、故屬之先生。

鄉先哲莊宗伯存與諸經皆有譌述、多未刊行、孫卿

珊受甲先以尙書既見周官記二書示先生、一一爲訂正、定其體例、既序而行之矣。與卿珊書曰、周官記之書非尙書既見比、宜詳核周禮、參互融會、爲之注釋、使至精之思、至實之理、一一發露、庶幾懸諸日月、不刊之書。然卿珊急於刻之、未暇事此也。繼示以四書說、樂說、先生復書曰、樂律向曾學之、所說與宋明人多差異、而理解精微、遠過昔人。無奈不聰於耳、又不諳於簫管、故未能究極妙處。嘗欲覓一善吹笛者、與之細辨笛色工尺、則此處亦無不可了、而竟不得暇、此後當留心爲此、稍解七律、然後合之於書、庶幾不致茫然。再後卿珊子子定潤示以彖傳論、彖象論、





繫辭傳論、八卦觀象解、卦氣論諸種、并算法約言、先生常自攜尋繹、歎其精微廣大、心胸常若不能容受。又曰、此身通六藝、七十子之徒也。遂次第付刊。算法約言未成之書、付冕之徐竟其緒、并前卿珊所刻尚書既見、尚書說、毛詩說、周官記、春秋正辭七種、合并行世、而不爲序、曰、吾於莊宗伯不能測其涯也。傳宗伯之學者、從子珍藝先生述祖、外孫劉申受逢祿。申受書皆行世。珍藝書多至百卷、其子文灝不能盡刊、多刻序例、使學者可尋繹。先生并命子定刻卿珊遺書、使莊氏之學天下得覩其大全云。按、珍藝有說文古籀疏證、先生每歎爲奇書、賞其精而嫌其瑩、嘗

命聖俞錄存副本、就其義例重加訂定、發其凡以示聖俞、然不能竟業。屢書督珍藝子墀、冀又朔、墀冀固深於說文者、亦不及成也。

孫文靖總督浙閩時、書疏往復、頗喜表章古人絕業、因語以屬元和顧澗蘋千里校刊小徐繫傳。孫答以顧寧人所著肇域志手蹟存某所、世間止此一本、所急宜料理、故未能旁及。至是祁公留意小學、常恨歛汪氏石門馬氏所刻小徐書錯謬脫亂、欲別鐫佳本行世。先生爲取澗蘋手校鈔本、復宛轉借得吳郡黃氏所藏宋本、命門人夏忍庭灝參校、乃覓工書人繕寫、其篆書則門人承守丹培元、吳江吳巽先、汝庚筆。

也。

九月二十四日、先生七十壽辰。會者數百人、學使以下畢至、賀儀有自千里來者。保緒與先生書曰、推度輿圖兩業、是否已竟。足下今年政七十、所應一一了之。與其多營、不如急就。晉略已斷手、牘可擬宋景文耳。然精力已耗、怔忡遂成云云。時保緒去淮安教授、就兩湖總督周公天爵之聘、隨從幕府。

星伯自京師來書曰、同年中惟服先生與陳範川兩人、先生以師事、範川則兄事也。弟與範川同筆研數十年、同在詞館、同遭患難、又同直中書、蓋聚處時無一日不相見、自分手後思之不能置。弟因寄小照往、



約彼亦以小照來作數千里紙上之會。不意寄照到時而範川已下世。因裝作卷軸。首請煦齋師題識。意同年中惟先生之文能道此中曲折。且可必其傳世。今不遠數千里相求。暇時或文或韻語皆可。先生鑒其誠。抑笑其癡耶。聞先生有同車圖。弟不得與。故斯圖尤欲託先生之名以重耳。先生別星伯久。覽其照竟不復識。乃摹存其副。而肖已貌於星伯。範川之間。爲題詠以歸之。星伯答曰。獲覩有道之容。不覺肅然下拜。并識其緣起。爲後日佳話也。是時與星伯筆札往還最勤。有所撰著則互相告。有奇文祕笈則互相致。其尤所企望者。歷代輿地沿革圖也。至是始工竣。



裝成十二函、并地理韻編與小像同致之。大學士穆公彰阿、侍郎姚公元之、皆同年也。穆以書來、有先生學究天人才兼文質、如蛟龍虎犀之裔、皇怪駭而布帛菽粟之平易近人云云。姚督學兩湖、屬星伯爲先容、索所著書、道經毘陵、又手札相問詢。先生各寄書帖數種報之。

是年、聞練公廷璜來令江陰、喜曰、練公讀書良吏、江陰之福也。旣而江右陳公廷恩來、亦雅韻勤民、與先生甚交契。

十九年己亥、先生年七十有一。在暨陽。去年冬、楊槐溪傳檠爲泗州知州、張應雲致書云、泗州自乾隆四十



三年裁虹歸泗之後、未有新志、知先生必不肯出、不敢妄干、但求指陳新志體例、使有所遵循而已。至是春二月、先生如其請以復之。

光山王公德茂知陽湖、陽湖志輟修七十餘年矣、屢議及此。戊戌冬、長沙黃公冕權守常州、甫下車卽謁季子廟、修復延陵書院。王公極憇憇之、而續修郡志之議起矣。郡志已輟修一百六十餘年、主筆之陳玉璣被謗至今、盧學士又功半而廢。於是黃公力持此事、於三月十六日開局、延先生總其事。先生以鄉邦曠舉、又抱經師未竟之緒、欣然赴之。局設龍城書院、旣到、先刊定體例門類。其目曰



皇仁恭紀、免錢漕、賜賑貸、按年遞載、并錄謄黃。曰

巡幸恭紀、巡幸年分題賜詩文。曰大事紀、歷代兵事暨  
豐凶災祥皆詳之。曰輿地志、山川橋梁皆隨地分詳  
之。曰賦役志、田地科則、地畝埤漲之數、錢漕實數、徵  
科向例支解之數。曰食貨志、土產風俗、實銷鹽引、水  
利附。曰兵防志、武營分防分汛之制、武營官職、各詳  
其履任年月。曰營建志、城池衙署、學宮書院、寺觀壇  
壝、詳其創始及其修理。曰藝文志、凡郡中人所著述  
皆收羅之、列其目、其詩文緣事而作者、則分附各門  
下而不通載。曰金石志、凡郡中古碑版、郡人收藏古  
鼎彝器之屬皆收之。曰沿革表、詳郡縣所隸大府、及

名稱分析因革之跡。曰職官表、學使府縣丞簿尉校官俱詳其履任年月。曰選舉表、甲第進士、舉人、貢生、特科。曰列女表、按旌年列其年月姓氏。曰史策、英賢傳、卽鄉賢、凡歷代史書有名者悉錄。曰忠義傳、曰秉彝好德傳、凡鄉黨自好、孝友任恤、有行誼見稱於眾者、其能文而有學者、以所著作列藝文志、此不載。曰良吏傳、凡本地官長有功於民者。曰藝術傳、醫卜之流、旁及僧道有名於世者。曰流寓傳。曰古蹟考、古城、戍、古墳墓及園林第宅有蹟可紀者。共三紀、七志、四表、六傳、一考、凡二十一類。所分門類本縣所無者則缺之、如宜荆江靖<sup>③</sup>無 巡幸門是也、餘皆仿此。黃公



卽以示各邑、令依此各輯邑志、爲郡志張本。并詢各邑士之堪司其事者、先生於武陽薦薛子選、子衡、洪子齡、齋孫、江陰則薛雯、伯約、荆宜則吳仲倫、德旋、劉咸齋、鏗、錫、金、則顧懶厓、翊、華、紫屏、湛恩、靖江則文韻和琴。其入局協修府志者、則聽其邦人士之自擇焉。留旬餘還暨陽。

五月復赴局、留彌月還暨陽。

六月、黃公卽事、有留別長律、先生次韻四首。

九月、刊繫傳成。又命守丹巽先綜諸說異同爲校勘記三卷。是月、赴龍城書院。院西爲先賢祠、祀季子而下六十有八人。先生率弟子輩瞻拜、惻然曰、前人創

此基業、後人豈忍廢之。亟宜與守令議、且補入莊宗伯、張皋文二人。又曰、昭明太子爲吾常文學之祖、豈可缺而不祀。然竟不及舉也。

靖江縣志稿先各邑志繳上、先生閱之、多半收載文字、曰此志書、非文集也。命弟子輩籤其疏略、宜討究者、送府尊移還之、飭其一遵體例、詳加搜緝。十月、還暨陽。

十二月赴局。十九日爲蘇文忠生日、先生率同人而祀焉、會者二十餘人。文忠示疾毘陵、先輩每爲莛雅集、今則爲僅見之舉矣。

二十年庚子、先生年七十有二。在暨陽。春二月赴局、以





兩邑志將脫稿、議定刊刻程式。旬餘還暨陽。

五月、司局者爲經費計、府志已發引其端、而各邑新志尙未呈送、不如暫散以俟。未幾、水災迭告、救荒之議起矣。是役也、先生以主講故、兼司江陰志事、不能常在局中、而外人又好爲同異。王公於己亥八月去陽湖、黃公又於是年三月卸事、遂無有主持其事者、而府志又廢。

六月、英夷破據定海、訛言繁興、先生以爲英夷越數萬里、其來有限數、內地奸民附和其閒、則其患未有艾矣。彤因縱覽防海諸書、先生曰、形勢前人已詳、當求要務、惟在講求火器一法、然世傳機械之屬種類

繁多、以奇巧欺人、正誤事之大者。取其適於用者、在神而明之耳。

秋、江陰縣志成、有江陰縣志序。

二十一年辛丑、先生年七十有三。以疾故不赴暨陽、客來者多就里第問起居。陽湖令張公之杲再謁其第。先生自強、客至必出、必親送至門外、兩僮扶掖以行。雖手足痿罷、而神明不衰。時有題署、命慰望書之、或把筆作數草字、蓋其心不肯一息懈也。

三月、知常州府事查公奉豫制軍札、今營中鑄礮多不能精、未發而先裂。申耆先生通知古今、兼曉術藝、必有能推度準望、妙精火器、以禦寇侮者。萬宜備禮

幣造門敦請。萬一年邁不出。或弟子子姓能傳其業者。列姓氏以聞。先生答書辭曰。推度準望之事。門人有能之者。然無與於火器。鰥生幸蒙國家承平之福。槍礮之事。目所不見。且耳所不聞。實所不能。不敢妄言。明孫中丞元化集中言火器法頗詳。在通其法者用之耳。

五月朔。彤謁里第。請見於內寢。不許。出坐。辨志書塾中。問麥收如何。續問家中尊穉如何。從容讌語如平時。彤問及鑄礮事。曰。今上海開礮局。鑄八千斤大礮。其實在精不在大。有二千斤。苟精之。足以制敵矣。六月九日。得慰望書。云痰氣驟發。稍就平復。意稍安。謂



九月祝壽去矣。旋聞惡耗，卽買舟奔赴，而疾陡作，不能成行。作書詢慰望，猶冀倖萬一訛傳。乃書未達而訃至矣。果以八日巳時壽終。是年宜興吳仲倫、德旋、寶山毛生甫、嶽生並以九月十一同日而逝。浙江龔定菴、鞏祚、福建高雨農、澍然亦卒。數子者並以文章負東南望，乃同時殞喪，異哉。

武進李先生年譜卷三終

校記

①顧：當作「願」。

②遵祖：當作「尊祖」，見《養一齋文集》卷五《宋宗譜序》。

③江靖：本條下文作「靖江」。



儒藏

武進李先生年譜 卷三



# 先師小德錄

陽湖蔣彤

夫子非大端未嘗與人爭、嘗謂及門曰、吾氣弱、故不能爭。蓋并謙讓之名而不居也。同年胡君承珙曾有書至云、同輩中如沈小宛、欽韓、包慎伯、世臣、好詆訶人者、獨於閣下始終無閒言。

未嘗面折人短、有以文字質者、雖弟子輩亦必稍加獎譽、而後徐徐導之。

坐未嘗交膝。

未嘗一日晏起。

恆坐方板、不用椅背、不用踏腳。偶有疾、門人奉一交椅、

有機軸張弛、可眠坐惟適。夫子嘉其巧便、命匠仿制之。既成亦不用、移置於家。

未嘗晝卧、春夏日長、端坐炕上、一交睫而已。

每月朔望黎明、奎星閣上行香、及享德樓歷任宗師、未嘗爽漏刻。

春秋必躬省墓。去年有疾、羣勸沮、不允也。

每刊先哲遺書、必手自校之、鈔胥來者亦然。

借人書必裝訂完好而歸之、有遺缺則爲補足。有借書簿、備存其目。

有求書者未嘗厭倦。每十日一揮灑、輒布滿一屋。

小小疾痛、未嘗形於辭色。卽卧疾不起、弟子褰牀問詢、



亦曰無甚患苦也。

來學者無所可發、竟不與言、其能受言者亦不遽盡。凡讀書作文、其意所不樂、卽不復相強。

經書老而不忘。昔年夏晚納涼、猶背誦尙書全部。

與弟子同席而食、未嘗有私膳。

求詩文者甚夥、以次還答、總不沈積。

書帖山積、而位置有方、有所給付、輒於暗中採取之。一日醫爲形立方、適無紙、時已日暮、夫子曰、那有書几上而不得紙者。徐至冬讀書齋、取紅紙一片授之。月課卷必閱一過、而後加圈點、而後加評語、凡三反甲乙始定。不勸人學詩、以其無實益也。有所酬應則爲之、不自尋。

題目。毛休復自負其詩過於文。夫子終以爲文踰於詩也。彤幼時好吟。初至院。購吳詩集覽在架上。夫子見而尤之。遂恍然覺。自是不復買詩。亦不敢作詩。院中雞犬皆具。鼠有常餼。曰。其無傷我書也。偶失一墨。曰。是必鼠也。何所苦而有竊耶。及晨。墨在几矣。蓄一貓。飽餵之。不令捕攫。

書籍碑帖有好者。卽以授之。或假而不歸。亦不索討。朝晚則觀玩花木。雖小物不遺。

有枯榴一株。上聚白蟻數升。夫子命養其穉枝。迨長而能花。乃去其本焉。

庭中偶有異草。客疑其毒。夫子笑應曰。豈有酖人羊叔



子哉。

俗稱甘露不易作花、院中無歲不有數枝、亦一異也。

雖下人疏士片簡數行亦存之、護書不爲毀裂。

往來名刺、則截存其姓字、闊寸許、積數十百、則束而置之、留其餘紙、隨宜取用。

爲文起草多書疏舊函、反正皆書。

一切包裹舊紙、捆束廢繩、方摺條繫、都無棄物。

邑令奴送書來、不識、呼爲哥、夫子亦還呼爲哥、命之坐、持書徐去。

在歌筵中、獻者迭至、夫子無忤色、然終不舉。

集尙書作書、鐙贊、極工。



夫子與子常先生交好。在未第時幾無日不札。嘗數日不得子常耗。與兄五初坐月下。五初云。明日必得子常書。詢云。何由得知。曰。月色好。此時子常當作書也。既而不果。夫子云。昨夜月光到底不大亮。

辭畫水。子常之姊婿也。嘉慶丁卯。夫子在庶常館。畫水亦謁選都中。八月十九日。爲子常母壽辰。同人之知子常者。集畫水寓中。肅衣冠。再拜遙祝。得十有餘人。以爲盛事。先輩之敦友誼如此。夫子嘗云。子常每鄉試。三場畢。卽解維。爲十九日。母夫人壽辰故也。

少時嘗自鑄印章。筆法極蒼秀。形於尺牘中。見之甚夥。曰。我欲與君相知。曰。慎重。曰。枕芸書屋。曰。養一子。曰。養



一齋啟事之箋、曰出行大吉、曰水木湛清華、曰日在天之上、心在人之中。

與子常來往箋、名曰洛常小簡。

雖慶弔贈送不爲泛言。宜興路同戊、夫子婦兄也、年七十餘、以校官任舉知縣、謁選歿於京邸、輓之曰、問產足以給朝夕、讀書足以長子孫、何苦馳衰老之身、告終千里外。伯子喪於復先塋、仲氏喪於續祖德、可憐抱精誠之志、畢命數年閒。所謂痛哭流涕而告之也。

治經奧蹟並到、有問明堂制度者、則舉筆圖示之、歷歷如覩。問車制者亦然。曰、吾幼時仿鄭漁仲說作溝洫圖、頗詳明、其稿不知在何許也。



暨陽講院聚星樓重易奎星像既成、命弟子輩擬楹語記其事、殊不愜。乃自爲之曰、自古文章重忠讜、此間山水接峩嵎。蘇公之宜爲奎宿、蘇公之宜祀此樓、二語定之矣。篆之者山子也。又曰、典稽配食星纏古、圖補眞靈位業新。則山子楷書。

錫山有造舟者、求一題額、夫子不之卻也、命彤擬數語以呈、曰可用。及書、乃如天上坐四字、眼前語乃百思不到、才慧之懸絕如此。

閨菴屬懷白作照、問作何圖、夫子戲應之曰、蔓難圖。閨菴喜曰、甚善。卽仿其意爲之、夫子有題蔓難圖詩。未嘗自製一衣、隨家人所進服之。

院中故有牀、四柱已朽、則命截去、棕條穿斷、背著木枕、終不易置。

朝粥晚飯、雖變臭未嘗一詢下人、常謂門人輩曰、在此處不過飲啖苦些、然清苦可以滌嗜欲、滅疾病、適與讀書相宜。

最喜竹器、院中筆筒、香筒、筴草筒、帽架、界尺、酒樽悉以竹製之、皆繫以銘辭。

除自奉外、一切未嘗吝財、弟子輩能治一家之學、卽其所學之載籍器具、無不備致。

揚廣蘇湖諸書賈號曰書祖宗。

雅不喜叢書類書、通志堂經解中取宋人三禮數種而

已說郭擇一二有用者摘錄佩文韻府人家之九鼎也、未嘗一問價。

雅不喜宋板書、有不甚流布者、付鈔錄既竟、則託書賈轉售之。題元刻蔡傳旁通云、講章家每爭朱義藏弄家偏競宋刊、我是兩家門外漢、但沾古澤一成懽。

年三十餘、猶爲諸生、作石船圖。

既罷官、作弛於負擔圖、擔上有假面刀劍等物、身坐道旁石、如氣喘者然。

在懷遠作松陰飼鶴圖、張少伯鍾泉善彈琴賦詩、極相慕。家有萬松園、構屋以待、署曰申廬、圖之名以此。在嶺外、作羅浮清夢圖。



在揚州題襟館中作談藝圖。

在暨陽講院陳雲乃通守作談藝圖自劉顧兩廣文及毛休復外皆江陰人。負笈從遊與於此圖者彤一人而已。時彤適不在院中冠英尙留前圖稿本夫子令摹寫入焉。庚寅辛卯閒彤得咯血疾夫子危之令冠英爲寫照名之曰洗心玩易圖。曰似此則病自去矣。

年六十一在暨陽講院命懷白作倚杖數歸鴉圖則歲暮懷人之意也。于庭碩甫並有題詞嘗云吾於故人必人作一墓誌或傳表彥聞卿珊翰風保緒小常仿山孟慈蒙山澗蘋皆作之矣惟山翁未及作。與人書稱謂必謙辭氣必和。



作文必以示山子、生甫、有所刪潤處無不欣然從之。作文恆夜臥思、早作而書、然稿必再易、蓋其慎也。

爲人書必先正格言、有益身心者、否亦取格調高逸、如放翁、東坡諸公詩。

楹聯多手輯焦氏易林語、雖慶賀亦用之。

非祭祠展墓不歸、期某日至、未嘗失時刻。

每晚飯畢、則閱邸報。

有求觀其文者、輒曰、此何足觀。有求錄其文者、則曰、此何足錄。

近時作手則許生甫、錄其休復居文數首。福建高樹然寄抑快軒文稿就正、喜其醇雅有法、亦錄數篇。於彤文



則錄書荀子後、祠山廟碑、蓋其不遺人善如此。

有故舊來、必命僮持燭、親送至臥所、晨起親問安否。雖葭莩藍縷、未嘗異視。

夜與人食坐、鐙燭必當其前。

語及鄉先達、輒稱先生、未嘗直舉其字。

弟子之初來學者、亦不呼字、輒稱某世兄。

不喜爲考據之學、然見考據之書、輒收之、曰、以輔吾所不足也。

不喜宋明儒迂腐之言。如朱子學的、二程語要之屬、時置案頭省覽。

日長似歲閒、方覺事大如天、醉亦休、成語也、先生偶書

此易天爲山、蓋亦伊川上天神明、豈容褻慢之意、可見尋常筆不妄下。

陳碩士用光、姬傳弟子也、頗留意程朱之學、督學浙江、守之在其幕中校文。先生與書、碩士適見之、致書暨陽曰、伏讀與守之書、字字得儒先語要、而先生與故人及弟子書、實未嘗侈言理學、但就事作家常語而已。

語及舊事、閒情辭氣、未嘗矜厲。鄉里以事涉訟、冤苦不能自申者、輒爲言於有司、蓋亦立達之仁、不肯閉門作自了漢也。

生雲重露之軒、屬懷白繪生絹爲懸鐙、作老子騎牛入關、關尹迎謁狀、李將軍短衣射虎沒石飲羽狀、李德輿



精思亭中徘徊構思狀凡十有六人中有女子二人皆同李姓著名史策者亦游藝之一事也。

下筆總有宗旨廬江江龍門開射虎圖題者夸其豪氣而已先生則曰願君養之以守氣神不外散精與俱深山且自友麋鹿斑奴何足當馳驅會看馬首擁六纛十萬貔貅供指呼錢襄甫攜孫聽鸛圖題者寫其適時之樂而已先生則曰老人偷閒自蕭逸稚子挾少愁縱橫不如相攜且歸去阿閣細聆雛鳳聲。

有釋鐘釋車紀硯阮等篇皆精絕更命某作釋脈未及也。

託人寄遠書或致物件必先時整飭不至臨時急遽。



州城隍神廟園中有石高丈餘玲瓏如縐雲。一日偶從夫子遊焉徘徊相對賞玩久之。凡杖履所之有一物可人意者若將終日不爲泛鶩。遊虞山破山寺詩有門外雙幢迴殊絕坐看便擬永今朝之句。

弟子散處四屋每日辰午申三時親巡督察。夕食後則咸會輩學軒庭中肄業生員。冕之康甫諸君日必一至相與問難夜分罷去。左右立侍雖久未嘗命坐。或客乍散或有所適肩輿已在庭。或自家中來羣弟子出迎大。門外輒有教言前議未決則續申之。

恆常食坐必長幼以次未嘗苟使。

同人晤語有及利者必痛抑之。豔稱高科美官則淡語。

一二、令人爽然自失。

得未見書必錄存之、藉以餬口者常十餘輩、輒優給其直。

江寧人劉漢洲、攜書局以相隨者十餘年、所刊書以數十百種計、未嘗與綜覈細數。故舊輩或尤其太寬、笑答曰、又要馬兒走得好、又要馬兒不喫草、此卻難事。

日用一付僕隸、不爲屑屑、卽有欺侵、亦不苛察。

六安州晁氏索書文元公祠聯、卽集文元公法藏碎金錄中語書之云、有財不能用與無財同、有學不能行與無學同。知有緣之慈其慈尙小、知無緣之慈其慈乃大。得宋寫朱子像、命冠英重摹、卽命門人篆書中庸一節。



於其上、作像贊曰、尊德性而道問學、致廣大而盡精微、極高明而蹈中庸。溫故而知新、敦厚以崇禮。

相見必問堂上安否、次則問歲熟否、次則問盜賊不橫否。

接卑幼禮必恭、送必至大門、不問不告。

有爲出其力者、雖瑣務必致聲謝。

門下士課藝有不當者、席前枕上口授書之、不移晷而就、無義不搜、而下筆如水流、花放、純是化機。蓋若右軍暮年之書、不激不厲、而風規自遠也。

戊子春正被盜、衣件一空、邑令爲嚴捕、命緩其事、乃得寢。有朱生前曰、盜而取夫子物、不惟不敢、抑亦不忍。夫



子正色作而言曰、是何言、我何德而能致此。

對客飲酒、不量多寡、惟興所適。卑幼有拘節、辭讓者輒不許、至醺然而止。

干支之名稱、日月五星之纏度、二十八宿之分野、院中五尺童子知之。

客有來謁者、雖卑幼必往答。

與人約寄書籍物件在某許、定某日、必前期致之。

通醫家言、未嘗爲人立方、身有病、亦擇良者而正之。能琴、亦不見其撫弄、常襲而懸之座旁。解筮法、亦不常爲、惟於元旦偶以占一歲事耳。

與人書、多別紙起草、而後入箋。

人有書疏屬致、未嘗啟封。外來大函中藏小函與弟子輩者、隨時付之、亦不發視。

兄五初先生幼時所錄試帖一卷、從孫岳生於後著評語、夫子適見、痛責之。

侍僮章福從夫子於里第、偶有過、二日不得飯、以訴。夫子時病甚、徐應曰、兩日不飯、有甚希奇。

比年來每語涉人倫名教、輒流涕被面。一日在志局與子選、果卿輩論盧忠烈氣節、乃大哭不止。蓋其仁義忠孝之思、彌滿胸腹、故有觸卽動其性情、與古人俱化矣。

## 先師小德錄終



儒藏

武進李先生年譜 先師小德錄

校記

①勸沮：當作「勸阻」。



李先生年譜三卷、小德錄一卷、先生弟子蔣彤丹稜撰。先生名兆洛、字紳琦、更字申耆、號養一、學者稱養一先生、江蘇陽湖人。嘉慶乙丑進士、選庶吉士、改安徽鳳臺縣。丁外艱、遂不出。主講江陰書院二十年、以校勘遺文、開引後進爲務。著有歷朝輿地圖、輿地韻編、鳳臺縣志、皇朝文典七十卷、駢體文鈔三十一卷、文集五十卷、詩集四卷、暨陽荅問四卷。李先生學貫天人、名動中外、士林重之、如泰山北斗。所著各書、海內無不風行。丹稜爲入室弟子、援二十家年譜例、編成此譜、載例於前、以零星小事、另編小德錄附於後。使先生之言行略具、學者讀其書、卽可以知其人、尤爲不負先生者。丹稜亦陽湖

人文集四卷、刻入常州先哲遺書續編。癸丑十二月、吳  
興劉承幹跋。

# 方儀衛先生年譜

清·鄭福照編撰

郭齊校點

楊世文一審

李文澤二審

清同治七年刻本



《方儀衛先生年譜》一卷，清鄭福照編撰。清同治七年刻本《儀衛軒文集》附錄。

方東樹（一七七二—一八五一），字植之，安徽桐城人，清經學家、文學家。幼承家學，及長，用功心性之學，又學古文於姚鼐，與梅曾亮、管同、劉開並稱姚門四傑。中年以後，宗程朱理學，反對乾嘉考據之學，嘗著《漢學商兌》一書專攻漢學。晚年則耽於佛學。著有《書林揚鱗》、《昭昧詹言》、《儀衛軒文集》等。

鄭福照，字容甫，桐城人。嘗以所作謁東樹，蒙獎譽，遂時承講授，然未入室。

據福照後識，東樹生平行歷原詳載其自著《待定錄》中，後該編毀於亂，其他著述亦多散失。此編所據，則為方氏家譜、東樹詩文集、雜著，後人所作行狀、行述及交遊著述與傳聞。譜紀東樹學行為主，於其著述，多列梗概，所紀清代漢宋學之爭端及評論，可資參考。全譜編次得法，簡覈有體。其稱「語皆有本，不敢臆撰一字，以蹈誣妄之咎，其四十以前遊歷事蹟多不可考，姑從闕如之義」，顯示出編者值得贊許之求實態度。

此譜後刻入光緒十五年本《方植之先生全集》，故或題為《方植之先生年譜》。又有光緒間刊《考槃全集》附錄本，或題清方宗誠編，實則同為一譜（參《中國歷代人物年譜考錄》卷九）。

方儀衛先生年譜

同邑後學鄭福照輯

乾隆三十七年壬辰九月八日寅時先生生。先生姓方氏諱東樹字植之。晚年慕蘧伯玉五十知非衛武公耄而好學之意以儀衛名軒遂自號儀衛老人。上世明洪武間由婺源遷桐城魯礪代有潛德。高祖諱駿好讀書。延名儒以古學教子累世遂以學行顯。曾祖諱澤字芘川晚自號待廬。乾隆丁卯優貢生入旗官學教習候選知縣。生平論學宗朱子文宗明艾千子詩似宋楊祕監。門人姚郎中鼎銘其墓敘文行特詳事載安徽通志文苑傳。詩文曾刊行於世。曾祖母洪



儒藏

氏祖諱訓字味書處士嘗讓產於兄而不居名祖母  
胡氏父諱績字展卿縣學生著有經史札記屈子正  
音鶴鳴集學行載安徽通志文苑傳詩選入國朝  
正雅集桐舊集古桐鄉詩選母鄧氏處士諱林女繼  
母姚氏國學生諱興易女繼母吳氏諱某字西園女。  
四十年乙未先生年四歲二月二十六日大父味書先  
生卒。

四十七年壬寅先生年十一歲初學爲文效范雲作桓  
火樹詩鄉先輩咸歎異之。

四十八年癸卯先生年十二歲八月十九日母鄧孺人  
卒。先生少體羸多疾喪母後依大母胡孺人以長。



當鄧孺人沒時、先生病瘥、至不勝喪。其後頻咯血、怔忡、三十外始稍壯健。

四十九年甲辰、先生年十三歲。繼母姚孺人來歸於展卿先生。

五十一年丙午、先生年十五歲。閏七月九日、繼母姚孺人卒。展卿先生以孺人無出、渴葬之松窠尖祖兆近側。

五十二年丁未、先生年十六歲。繼母吳孺人來歸於展卿先生。

五十四年己酉、先生年十八歲。先生自少喜爲古文辭、十八九時、讀孟子書、憮然悟學之更有其大者遠者、

遂不肯輕易作文。

五十八年癸丑先生年二十二歲在江甯同里姚姬傳先生時主講鍾山書院姚故待廬先生門人展卿先生及先生皆受業焉而先生隨侍講席最久與上元梅伯言曾亮管異之同同里劉孟塗開並爲姚先生所最稱許世目爲姚門四傑入縣學補弟子員踰數年補增廣生先生自二十後多客四方生平僅一應歲試其年學使爲汪瑟庵尙書廷珍應鄉試十次道光戊子後始不復應冬配孫孺人來歸乾隆癸未進士諱顏孫女縣學生贈奉直大夫諱詹泰女先是孺人叔父嘉慶辛酉進士起岷與展卿先生友善愛



先生詩文因繩於其兄嫂而以兄子妻焉。

嘉慶元年丙辰先生年二十五歲。

二年丁巳先生年二十六歲在江甯書院冬歸里。

三年戊午先生年二十七歲授經江右新城陳石士侍

郎

用家。按詩集中過丹徒及西湖諸詩皆由江甯赴江右途中作也。

八月十三

日長子聞生。

四年己未先生年二十八歲授經陳侍郎家。三月自

訂少作文名櫟社雜篇序之。其畧曰周秦以來諸子

各以英資茂實獵道裂術散以爲文咸自久於世校

其畛域廣狹勝劣非一然莫不本於壹而出之後世

之士專欲工文章而不務本道術敝跬致役於文遊



心竄句、紛紜於百氏之場、於是其人與其言始離而爲一。既以離爲二、則象而累之、雖欲不雜焉、不可得矣。今余自集其文、不敢自欺、而命之曰雜、取別於古之以壹出之者、且毋俾後有作者見而笑余、謂同處於雜而惡以議人爲也。又自記云、時余年二十八歲、於後爲學、始壹正其趨向。雖未敢言能立本、而其於雜焉者、亦庶免矣。按、是歲惜抱先生與胡雋君書云、植之昨有書云、近大用功、心性之學。若果爾、則爲今日第一等豪傑耳。四月、老子章義成、序之。其畧曰、老子之書、不可謂無見於道、特其用意之過、感衰世澆訛之俗、發辭偏激、遂若顯悖乎聖人。然究其情、不過曰無爲而無不爲、使民無知無欲、以相安於渾樸。



無事而已。魏晉清談、寄心高遠、而制行全與相戾、豈知老子者哉。嗣其道者、既尠善說其書者、亦不可概見。朱子自言能得其義、而不欲爲之、則以其說之流、有害於道、故靳之耳。夫老子之言、固易知也。解之者、支離牽率、是以其義晦。今吾作解、合儒佛之理而通之。其本義則竊取之朱子、其分章則以吾所私見者斷之。老子曰：吾言甚易知、甚易行。天下莫能知、莫能行。凡求道者、但於近而易知處求之、則得所爲高遠。若於高遠求之、則有迂其難而却阻者矣。老子豈欺我哉。按先生少時曾著屠龍子、又註陰符經、均未刊。蓋先生少時爲學無所不通、後則漸歸純粹耳。

六年辛酉、先生年三十歲、授經同里汪稼門尚書志家。  
七年壬戌、先生年三十一歲、客阜陽王約齋大令署中。

九年甲子、先生年三十三歲、閒居里中。

十年乙丑、先生年三十四歲、授經六安。

十二年丁卯、先生年三十六歲、在江甯書院。姬傳先生

邀往、課其長孫誦。三月一日、次子戊生。

十三年戊辰、先生年三十七歲、客池州。按半字集齊山及池陽雜詩皆

是年作。

十五年庚午、先生年三十九歲、在江甯書院。

十六年辛未、先生年四十歲、江甯太守新安呂某修府

志、延先生分纂。



十七年壬申、先生年四十一歲、授經安徽巡撫胡果泉  
 侍郎幕中。按半字集和鄧中丞詩自注云余依果  
 序又云、甲戌秋、竹亭與余相遇於  
 池州太守署、當是暫往閱試卷也。

二十一年丙子、先生年四十五歲、閏六月四日、父展卿  
 先生卒。時先生隨胡中丞在江蘇、不及視含斂。

二十二年丁丑、先生年四十六歲、十一月十三日、大母  
 胡孺人卒。是歲先生旅困金陵、賃居青溪祇樹僧舍、  
 自春徂冬、十一月赴揚州、無所遇、復返金陵、聞大母  
 喪、欲歸不得、除夕、典衾充寺僧賃值、而不能具薪米。  
 二十三年戊寅、先生年四十七歲、客宿州。著考正感  
 應篇暢隱、其序畧曰、嘉慶丁丑戊寅、旅困金陵、端憂



於所應編纂者一月內告竣。將辭去。文達留之。因屬以總纂事。

二十五年庚辰。先生年四十九歲。在廣東通志局。

道光元年辛巳。先生年五十歲。主粵東廉州海門書院。

二年壬午。先生年五十一歲。四月歸里。九月應羅月川

太守之聘。復適粵。

按先生與羅公書俱附刻羅所著嶺南集中。

三年癸未。先生年五十二歲。主粵東韶州韶陽書院。

四年甲申。先生年五十三歲。授經阮文達幕中。著漢

學商兌四卷。大畧謂近世有爲漢學考證者。著書以闢宋儒。攻朱子爲本首。以言心言性言理爲厲禁。海內名卿鉅公。高才碩學。數十家遞相祖述。所以標宗





旨、峻門戶、眾口一舌、不出於訓詁小學、名物制度、棄本貴末、違戾詆誣、於聖人躬行求仁、修齊治平之教、一切抹掇、名爲治經、實足亂經、名爲衛道、實則畔道。某居恆感激、思有以彌縫其失、輒就知識所逮、掇拾辨論、以啟其端、俟後世有真儒出而大正焉。又曰、漢學家所執爲宋儒之罪者有三、一曰以其空言窮理、恐墮狂禪、不知古今能辨儒禪之分、毫釐利害之介者、莫如程朱、豈慮守捉者反爲盜賊耶。其一則以宋人廢注疏、空言窮理、啟後學荒經蔑古之陋。考朱子教人、誥誥於漢魏諸儒、正音讀、通訓詁、考制度、釋名物、以爲當求之注疏、不可畧、何嘗如今漢學家所詈。



其一則曰以其講學標榜門戶分爭爲害於家國。夫自古亡國以用小人。近世議論專以亡國之禍歸之君子。或謂之曰黨。曰道學。曰講學之家。曰講學門戶。若以比於佞人宦寺。尤當戒者。而不聞一人議曰某代之亡以用小人之過也。可謂失其本矣。或云洛蜀黨分而北宋亡。道學派盛而南宋亡。夫不咎蔡京童貫而咎洛蜀黨。不咎韓侂冑而咎道學派。不咎嚴魏而咎東林。此果爲理實之言乎。學不講則道不明。道不明安必躬行之。皆出於是耶。自一身而至邦國。自一物而至萬類。何在非學。何在不當講。故曰學之不讲是吾憂也。孰謂不當講學耶。又曰漢學家首以言

理爲厲禁、是率天下而從於昏也。傾敗正道、簣鼓士心、疑誤來學、馴至橫流奔放、人皆失其本心。學術之差、爲人心世道之憂、所關至鉅、非細故也。又曰、余生平觀書、不喜異說。少時亦嘗汎濫百家、惟於朱子之言有獨契、覺其言言當於人心、無毫髮不合、直與孔曾思孟無二。以觀他家、則皆不能無疑滯焉。故見後人著書、凡與朱子爲難者、輒恚恨、以爲人性何以若是其蔽也。故凡今之所辨、惟在毒螫朱子、悖義理、誤學術者。至制度名物訓詁之異同、是非、自漢唐傳注義疏、所不能一、無關宏旨、不强論焉。時阮文達方輯刻皇清經解、以漢學導世、先生以是書上之。按此書刊



於辛卯而勘稟實在粵東。  
文集上阮宮保書可證。

八月作待定錄序。先生

嘗曰余所著待定錄於身心性命之旨修己接物之

方體驗甚悉嘗白爲之贊曰博學篤志切問近思求

仁之術西河是師追惟生平否之匪人維瘠思善有

獲必新理本大同心有先得削其雷同務絕勦說雖

知無文行而不遠惟布與菽其又可貶匪曰振德惟

以自薰知德君子庶鑒余勤。  
按是書未梓行其稟咸

卯歲與姚石甫書曰先時爲學亦頗泛濫老釋雜家或爲之撰述近反求之吾身所見似日益明有所獲

輒剞記之名曰待定錄歲月既多積成七十餘卷據此則先生之學至適粵後益專精矣。

五年乙酉先生年五十四歲授經阮文達幕中。  
按先生

幕中兼閱學海堂課文有著作數首刻學海堂集中。  
在文達著書林揚解二卷其序

日、兩粵制府阮大司馬既刱建學海堂、落成之明年、乙酉初春、首以學者願著何書策堂中學徒。余慨後世著書太易而多、殆於有孔子所謂不知而作者、因誦往哲遺言及臆見所及、爲十有六論、以諭同志。知者或有取於鄙言也。其終篇有曰、藏書滿家、好而讀之。著書滿家、刊而傳之。誠爲學士之雅素。然苟學不知要、敝精耗神、與之畢世、驗之身心性命、試之國計民生、無些子益處、此祇謂之嗜好、不可謂之學。君子之學、崇德脩慝、辨惑懲忿、窒慾遷善、改過修之於身、以齊家治國平天下。窮則獨善、達則兼善、明體達用、以求至善之止而已。不然、雖箸述等身、而世不可欺。

也。按此書辛卯冬刊。

六年丙戌先生年五十五歲自粵旋里旋往浙右。

七年丁亥先生年五十六歲主廬州廬陽書院。七月

鄧嶰筠中丞廷楨校刊展卿先生屈子正音於皖城。

冬歸里葬考妣於武嶺龍井灣。先是先生家世貧困曾王父母沒七十餘年大父沒五十餘年皆浮厝淹久未葬嘗以爲痛立意首葬曾王父母大父母次考妣以爲所以安先人之心者必如是而後爲得也。及是從父鶴樓始爲卜得一穴於武嶺龍井灣將葬曾王父母而是歲考妣攢室生蟻易材改斂懼來歲蟻復生於是從權而先葬考妣焉。又逾數年從父敦化





又爲卜得一穴於龍眠烏石巖下、葬曾王父母及大父味書先生。其年月不可詳。

八年戊子、先生年五十七歲、主亳州柳湖書院。

九年己丑、先生年五十八歲、客宣城。五月旋里。按、半字

州試院呈張丈虎兒並諸同研詩、是往宣城。乃閩郡試卷也。庚寅客宣城、當亦是閩卷。

十一

月三十日、繼母吳孺人卒。

十年庚寅、先生年五十九歲、客宣城。五月、著未能錄、

序之曰、閩縣孟瓶庵先生以損益二卦歸之復卦、作求復錄、曰懲忿窒慾、遷善改過、凡四篇、用意密切、至矣善矣。然不逮戢山先生人譜六言、爲有始有卒。余參劑於劉孟二書、爲十言、以自程曰、謹獨、衛生、修內、

慎動敬事、燭幾盡倫、執義安命、積德以上十義、昔賢名理名言至精且詳、不可勝舉。今日惟在自家切身檢點實踐而已、不作言銓也。此書未刊。八月二十四日、孫淵如生。

十一年辛卯、先生年六十歲、主宿松松滋書院。五月、著進修譜錄、序之。畧曰、進修者、本易君子進德修業、欲及時之語、以自勸苾也。君子之學、進德以事天、修業以事人、舍是無所致其力。夫百工技藝、皆待規矩繩墨、法式模範、以成其事、獨至爲人、自孩提至老、任情放意、各以私智蕩性、虛憍客慧、忿慾偏惑、苟妄行之、而無不予聖自狂焉、天下所以少成德全才也。卽



少有質美志學者，不得其門，又昧於所從事，誤用聰明，可哀可憫。此吾譜之所以作也。夫四子、六經、諸史、小學、近思錄，皆人譜也。吾曷爲復作之？此吾所私具也。義理天下之公，曷爲有私？吾所謂私者，如人皆冠履，視之則同，然而吾所自具者，合吾首適吾足，必不同於人之所有也。其譜之類，凡八：窮理一、密察二、實三、巽宜四、節五、止六、借所七、恆八。此書未刊。校訂宿松朱字綠先生書文集並作序。是歲桐城大水，邑令楊大縉貪婪虐民，民大噪，令遂以民變愬大府，將調兵。先生適在巡撫鄧公幕，急以身家保。鄧公素敬信，事得寢，邑賴以安。

十二年壬辰先生年六十一歲。二月自編詩二卷名半  
字集。後同里胡曉東太守方爲刊於廣州。癸巳年刊。四  
月再適粵東訪按察使某公不遇旋歸。八月望晨舟  
過韶州曲江江口墮水有對月遣悶雜書絕句十四  
首。

十三年癸巳先生年六十二歲。二月赴常州。時同里姚  
石甫廉訪瑩爲武進令延先生編校其曾祖薑塢先  
生範援鵷堂筆記。同里蘇愷元來受業。七月二  
十九日妻孫孺人卒。

十四年甲午先生年六十三歲客姚公官廨中。時姚爲  
元和令。按考槃集有滄浪亭詩蓋是歲作。



儒藏

十五年乙未、先生年六十四歲。姚廉訪爲淮南監掣同知、先生偕之往眞州。八月三十日、孫龍光生校、援鵷堂筆記畢、書其後曰、古人校定書籍、綜覽義旨、軌示前則、有大體、有細意。大體炳諸所裁、細意隨時而發、一出通賢之手、卽爲凡例。故曰自揚雄、劉向、方稱斯職。歷覽古今、若馬鄭賈服、逮於陸元朗、孔沖遠等之於經、應孟如、徐逮於顏師古、胡身之等之於史、類皆以英敏之資、勤銳之志、識明心專、反覆討論、鑒別精審、意辭方雅、採獲分散、貫穿齊一、周其藩籬、窺乎區蓋、脈絡次第、曲得其指。故每編校一書、所費日力、卽與自著一書等。是以獨步邁俗、無愧雄向。準此



而論求之近人。惟惠氏定宇、何氏杞瞻、盧氏抱經、錢氏竹汀四家識精鑒密。差足與於斯流。顧三家書皆整雅。惟獨何氏之書體例乖俗。殊乏裁製。前人以紙尾譏之。良爲不虛。閒取而衡之。似遠遜後來錢盧二家條理淵密。枝葉扶蘇。精神煥發也。推尋其故。蓋由錢盧手自訂著。何氏出後人。寧次不得其措注之宜故也。蓋傳其所僅傳。而其不傳者。與人俱亡矣。是知書非自訂而託之後人。多成增謗。少成減謗。豈不失其指者。先生平日校勘羣籍。本以糾繆正誤。拾遺補闕。爲旨趣。使編其書者。納於謬誤闕陋之途。遺誦通識。比於誣謗。能無懼乎。編審既畢。特發斯義。以訖來



者笑。古人之未工、忘已事之已闕、不敏之愧、重爲口實矣。

十六年丙申、先生年六十五歲、居里中。命門人蘇愔元重編張楊園先生年譜。先生於近代眞儒推陸清獻公及楊園先生爲得洛閩正傳。惜陳古民梓所訂楊園年譜未盡善、屬愔元重編之。并啟告沈鼎甫侍郎維宜奏請從祀、且爲刊布遺書。

十七年丁酉、先生年六十六歲。二月、復赴粵東、客總督鄧嶰筠尙書幕中。六月、編校展卿先生鶴鳴集、同里光律原方伯聰爲刊行。

十八年戊戌、先生年六十七歲。閏四月二十四日、孫濤



生。八月刻援鵠堂筆記葉誤序之曰。往歲癸巳甲午。爲姚石甫撰其曾大父蕺塢先生筆記。寡昧不學。多所繆盭。浩裘已行。不及削改。中心思之。如芒在背。一己之遺譏通識。其事小。古義之疑誤來學。則其害大矣。故卽其所已悟者。亟改正於此。其未悟者。則望之來哲。九月。粵海關監督豫某延先生修粵海關志。漢學商兌。書林楊解刊行後。先生檢其中尙有宜改正者。後觀書時有所獲。可以補入本條。相發明者。隨劄記於本書之上下方。積久遂多。取而尋輯之。成刊誤補義二卷。十月。序而刊之。校勘管異之七經紀聞。時鄧尙書任爲刊行。先生於其致疑朱子者。

附說於後、以正其誤。十二月、序之。定族譜義例。先是辛卯歲、已作族譜序、族譜後述。至是寄從父敦化鶴棲及子聞書、屬以譜事。次年修成。

十九年己亥、先生年六十八歲、在粵東。四月、校刊同里胡雒君虔柿葉軒筆記、因撰其行歷、並及同里先輩與展卿先生尤厚者、爲先友記。著昭昧詹言十卷、論詩學旨要。大畧謂學古人詩、當求之於義理蘊蓄、本領根源、精神氣脈、不可襲其形貌、宜力守韓公陳言務去之戒、及山谷隨人作計、終後人二語、而又以文從字順、各識其職爲貴。卷一通論、二卷以下專論五言古詩、漢魏一卷、阮陶、謝鮑、小謝、杜、韓、黃各一

卷。八月序之。刊末

二十年庚子先生年六十九歲夏歸里文漢光戴鈞衡

及從弟宗誠俱受業於門著大意尊聞以教諸孫

讀書行己制心處事之要道。據獵較正簿序及終制是書蓋成於辛丑前。

二十一年辛丑先生年七十歲著續昭昧詹言專論七

言律詩。六月朔序之。刊末

二十二年壬寅先生年七十一歲五月著獵較正簿一

卷示諸孫其序畧曰科舉八比時文爲仕進始基出

身起家之切用功令所昭舉世奔命於此特其源

流得失求一卓然通達解了者率不易觀故今粗爲

說之所謂叩兩端而語空空也俾汝曹他日不爲歧



儒藏

方儀衛先生年譜

途情闇不知而亂道者所誤云爾。刊作病榻罪言。

先是十八年客粵時、大臣請厲禁洋煙、下督撫議、先生著匡民正俗對、陳所以禁之之道、勸制軍鄧公覆奏、不從。英夷公司領事義律桀傲不受約、居省城夷館、先生勸制軍陳兵斬之。制軍慮啟釁、謝不敏。然終反覆生變者、義律也。及是、夷人犯順、東南數省皆被禍、大帥多退避。先生時時痛心切齒、因作此書、極論制夷之策、遣人上之浙江軍門。時浙藩卞公士雲與先生相識、是書因卞公上。惜方議撫、不能用。十月、自定文集十二卷、序之。同治六年、從弟宗誠爲選刻之。

二十四年甲辰、先生年七十三歲、取古人格言、去其膚

傳約其警切成一卷名曰山天衣聞以示三孫。四月序而刊之。

二十五年乙巳先生年七十四歲。九月同里方仲山大令璋招集里中諸老七十以上凡九人爲九老會。先生以七十四與焉有詩紀之。

二十六年丙午先生年七十五歲。先生前因三世遺柩未葬盡鬻生產買山有謀佔之者邑令史某忌先生伉直置不爲理。本有一山長講席以瞻朝夕又與邑紳某讒沮於當事遂被裁奪由是貧益甚。

二十七年丁未先生年七十六歲。合葬祖母胡孺人暨繼母吳孺人於龍眠喻冲。除日阡成作詩記之自注





云、三世遺柩七、今皆畢葬。著一得拳膺錄。刊

二十八年戊申、先生年七十七歲。七月、作思適居鈴語序。是書取經史所載古今述傳而義未安者、爲之辨論、凡四卷。僅刊首卷先生晚年詩名考槃集、隨時刊刻。起癸巳、訖戊申。五言古詩二卷、七言律詩一卷。

三十年庚戌、先生年七十九歲。修改大意尊聞述其旨趣。同治五年、從弟宗誠校刊於郡城。

咸豐元年辛亥、先生年八十歲。先是、句容唐魯泉大令

治宰桐城、雅重先生。及移任祁門、延主東山書院。以二月初旬往、門人文漢光、甘紹盤從。五月二十二日、感微疾、與門人飲酒論學自若。二十四日時加寅、盥



洗更衣冠坐講堂。顧席微斜命正之。又命僕持簡辭唐明府。漢光曰先生心內受用否。曰甚安。時加申乃卒。咸豐二年春。柩歸自祁門。其冬葬於桐城西鄉挂車山吳家背祖墓側。先生貌清臞。長身玉立。神采凝重。少承家學。又受文法於姚姬傳先生。然好爲深湛浩博之思。不專專於文字。故其文醞茂昌明。言必有本。隨事闡發。皆關世教。詩則沈雄堅實。深得於謝杜韓黃之勝。而卓然自成一家。生平研精義理。最契朱子言。勤於學問。每日雞鳴起。秉燭讀書。至漏數下始就寢。嚴寒酷暑。精進靡閒。七十後猶不輟。所著待定錄凡百餘卷。自天道治法。物理人情。修齊之教。格

致之方、省察存養之旨、諸儒學術之同異得失、以逮說經考史、詩文小學、無不探賾抉微、析非審是、嘗言立身爲學、固以修德制行、內全天理爲極、而於人世事理、亦必講明通貫以待用。蓋天下無道外之物、凡此皆吾性所應有也。惟當知本末先後之次、不可以徧物、喪志勞心、失其大者遠者耳。旣著漢學商兌、又慮漢學之變、將爲空談性命、不守孔子下學上達之序、乃著辨道論。跋南雷文定、以砭姚江山陰牴牾朱子之誤。老年尤服膺二程遺書、日夕潛玩。嘗論儒者學聖人之道、徒正不及中、中必純粹以精、而純粹以精、必在於明辨皙。又曰、士君子行己素位而道中庸、



亦曰行乎理之所安而已。使微有感激偏宕之意，則失中。失中則失道。失中失道，君子不由也。又曰：人第供當時驅役，不能爲法後世，恥也。鑽故紙著書作文，冀傳後世而不足膺世之用，亦恥也。必也才當世用，卓乎實足濟世，不幸不用而修身立言足爲天下後世法。古之君子未有不如此厲志力學者也。少補縣學生，銳然有用世志。凡禮樂兵刑、河漕水利、錢穀關市、大經大法，皆嘗究心。然卒困於諸生，無所試。性仁孝，十二歲喪母。鄧孺人事祖母，胡孺人繼母，吳孺人思慕終身，言及輒零涕。展卿先生卒時，先生客江蘇，慟念斂未親，誓宜沒於外以自罰。將卒，猶命門人必

薄斂。先世七喪未葬。先生內自疚。親跋涉卜兆。盡鬻  
生產。營葬畢而後安寢。又修族譜。立祠規。以尊祖收  
族。族戚交遊。門人中有疾病患難者。驚惶憂懼。至廢  
寢食。自奉極菲。而遇人則厚。凶歲更減食飲。以周困  
窮。與人交。遇事據理直陳。或面折人非。無所顧忌。虛  
衷好學。時退然如不足。然擔當世教。辨論學術之純  
駁。則侃侃不撓。尤廉介。不務進取。邑令以禮先者。往  
答後。不輕造其室。姚石甫廉訪左遷入蜀。假數百金。  
奉先生爲治生計。及聞廉訪使乍雅。歸券於其家。嘉  
興沈鼎甫侍郎督學安徽。告撫軍鄧公。方伯佟公。景文  
欲選拔先生貢成均。先生不就試。道光三十年。詔





舉孝廉方正。姚廉訪首以先生行義告撫軍。先生曰：吾耄矣，尙堪世用耶？何爲此虛名也？生平所與交遊，皆一時宏才碩學，如上元管異之、梅伯言、宜興吳仲倫、德陽湖陸祁孫、繼輅寶山毛生甫、嶽生祁門洪翼甫、嘉木建甯張亨父、際亮同里朱歌堂、雅馬元伯、瑞辰徐六驤、璩姚石甫、華光律原、樹劉孟塗、馬公實、華諸公，皆最爲縝密。阮文達公初與先生論學不合，晚年乃致書稱先生經術文章，信今傳後。又極贊所撰三年喪辨，謂其解中月而禪真解，剋獲實前人所未及。其言未出世，莫能知。其言既出世，莫能廢。有功名教爲宇宙必不可少之言。沈鼎甫侍郎讀先生書，始以不見爲憾。既見，



則自恨年老不能從學。嘗以告於知先生者。鄧嶰筠  
尙書與先生論學。稱曰。凡心有所疑。未啟口而君已  
先發之。覺義理原委更加貫暢。李申耆大令推先生  
負荷世教。廓清翳障。使程朱之道復明。姚石甫廉訪  
稱先生老而愈窮。見道愈篤。言義理粹密。有遠過元  
明諸儒者。又謂先生理究天人。貫穴古今。博大精深。  
無所不學。知者咸以爲無溢量之言。自客遊四方。主  
講席及里居時。凡以詩文就正者。旣告以法。必進以  
古人務本之義。尤重實行之士。韶州譚麗亭。同里許  
玉峯。閩修無知者。先生推爲君子之儒。教人作詩文。  
必曰精讀而出之。勿易。晚歲家居十一年。專以成就

後進爲事。從遊者如蘇愔元、文漢光、戴鈞衡、江有蘭、甘紹盤、馬起升暨從弟宗誠皆以學行知名於時。子二人聞、戊孫三人濤、聞生淵如、龍光、戊生皆能世其家學云。先生老年家居所著書尙有陶詩附考、解招魂、向果微言、述旨、最後微言皆不知撰述年月今附記之。

福照年十六七時初學爲古今體詩得讀先生昭昧詹言因畧辨塗轍。歲庚戌以所作謁先生過蒙獎譽遂獲時承講授。辛亥春先生赴祁門臨行命從往代課其幼孫濤讀書以家累不克應命。逾數月先生捐館遂不得復見至今常以爲恨焉。先生



生平行歷具詳所著待定錄中今已燬於賊其餘撰述已刊者亂後板片並不存未刊者藁亦多散失。每念先生之學醇正精博實近世諸儒所不逮。其行誼本末不可以不詳爰取方氏家譜及先生詩文集雜著從弟宗誠行狀子聞行述並同時諸公集與所聞於師友者述年譜一卷俾天下之士得以洞悉其質行文章之實語皆有本不敢臆撰一字以蹈誣妄之咎。其四十以前遊歷事蹟多不可考姑從闕如之義云。同治六年春二月同里後學鄭福照識。

# 太鶴山人年譜

清·端木百祿編撰

清·陳謚補編

郭齊校點

楊世文一審

尹波二審

民國二十三年鉛印本

《太鶴山人年譜》一卷，清端木百祿編撰，陳謐補編。民國二十三年瑞安林氏鉛印《惜硯樓叢刊》本。

端木國瑚（一七七三—一八三七），字鶴田，一字子彝，晚號太鶴山人，浙江青田人。嘉慶間舉人，任歸安教諭十五年。以通堪輿之術，召卜壽陵，特授內閣中書。道光十三年成進士，仍就原官。著有《周易指》、《太鶴山人集》等。

端木百祿，字叔總，一字小鶴，國瑚子。道光二十九年拔貢，候選直隸州州判。好爲詩，喜金石文字，著有《石門山房詩鈔》。

陳謐，號木厂（一作穆庵），瑞安人。

此譜爲百祿所作，而謐得之於國瑚曾孫文斌。謐後記稱：「余即其家宗譜及《太鶴山人文集》、端木家集而益以他書所及，略爲補輯，勒成斯篇。凡譜所稱『按』與『補』及『增』者，皆余之所錄也。」蓋陳氏之補輯，「於叔總原文不易一字，惟增定《香亭》前後兩賦入正文中，餘皆以小字分隸原文之下。末附詩文集序、墓表及墓圖序，皆於山人學行有關者，而與叔總原文不相雜廁，蓋其慎也」。譜主深於《易》，阮元極稱之。雖兼通風水陰陽地理雜學，於儒家亦嘗精思，時出「利妨於義也甚，而義又未嘗不須利以成之」一類議論。譜中詳列重要原文，有助展示譜主思想。惟早年所記多文事，涉於學術者甚少。

# 序

陳子穆庵補輯太鶴山人年譜成以示余。譜爲山人子百祿叔總所作。其後裔別居瑞安。陳子得其家集爲補輯之。於叔總原文不易一字。惟增定香亭前後兩賦入正文中。餘皆以小字分隸原文之下。末附詩文集序、墓表及墓圖序。皆於山人學行有關者。而與叔總原文不相雜廁。蓋其慎也。山人少負文名。晚歲乃致精於易。著有易指四十五卷。近人杭辛齋謂有清易學專家如刁氏包、李氏光地、胡氏曉滄、胡氏渭、任氏啓運、惠氏士奇、惠氏棟、萬氏年淳、姚氏配中、張氏乘槎、彭氏申甫皆能獨抒己見。各有心得。至若焦理堂之通釋、紀慎齋之易問與觀、易外編、一宗漢學而能串合六十四卦之爻象。無一辭一字不相貫通。一講宋學而能闡發性理與六十四卦之爻象變通化合。皆爲歷來講易家之所未有。端木





鶴曰後起、莫治漢宋於一爐、一一以經傳互證、無一辭一字之虛設、視焦紀二氏更進一層、允足以殿勝清一代之易學。蓋其傾倒至矣。山人於形家言最自負、然爲宣宗相地、適值清祚中微、其自營兆吳興、亦未見有特驗。後世遂訾宗其說者。豈苞符祕奧未易窺測、抑術數之學致遠而泥弊。余蓋於斯譜重有感焉。方阮芸臺相國視學浙中、招選高材生、肄業詁經精舍、一時人文蔚起、彬彬稱盛。而吾溫人士獨尠膺上選、經籍纂詁所列分纂姓氏、溫郡不得一人。定香亭筆記於所甄拔諸士多所獎借、而甌括兩郡所見稱許者、唯一山人而已。蓋其時甌中人士專習帖括、餘力兼涉詩賦、從未有湛深經術、能與陳鱣、嚴杰、洪頤煊、震煊諸子相頡頏者。山人處括萬山中、獨能開闢風氣、不爲方隅所囿、不可謂非振奇之士。余讀陳子是編、旣於山人深致其景仰、抑亦見當時吾溫諸

老未能與之驟斬爲不無遺憾。同光以後學風始稍稍起。則太僕孫氏喬梓倡導後進之功爲不可及也。民國二十三年八月平陽劉紹寬書。



儒藏

太鶴山人年譜 序

# 太鶴山人年譜

瑞安陳 謚補輯

青田端木百祿原著

府君諱國瑚二字陳增字鶴田一字子彝又字井伯晚年自號太鶴

山人先世籍山東濟甯府自黎陽公傳四十七世諱倩者仕宋爲禮部侍郎高宗南渡扈蹕至金陵居烏衣巷尋遷溧水之留  
下村荷花塘至六十七世祖諱潤當明季自溧水徙浙之青田  
縣太鶴山乾乙峯下世居焉。

乾隆三十八年癸巳府君以三月初十日辰時生先是曾大

父芝崖公諱檜邑庠生謚案端木宗譜檜字筠友號芝崖初以  
商賈起家讀書能通大旨於論語弟子

章行之若終隱居乾乙峯下好讀易觀卦象不事著述惟口授  
身焉配季氏。

大父樸山公大父諱成章亦庠生謚案成章檜次子配陳氏楊氏府君

生三日芝崖公見右胛有赤痣左掌握大方井文喜曰此子



有異相、可傳言易。乃取乾九二見龍在田、中孚九二鳴鶴在陰之義、字之曰鶴田。

三十九年甲午、年二歲。

四十年乙未、年三歲。

四十一年丙申、年四歲。

四十二年丁酉、年五歲。

四十三年戊戌、年六歲。

四十四年己亥、年七歲。授易經、孝經、能通其義。大父顧之色喜。

益刻苦自厲、鄉里稱爲養志。

四十五年庚子、年八歲。四月、芝崖公卒、樸山公以遺命進

府君而誥之曰、易者象而已、言天地萬物象得理得之。又曰、易卦氣六十四卦起中孚九二是起乾九二。易全部歸之大過、漸

下歸妹一卦爲天地終始。此汝祖言易命以告汝者。府君退觀卦爻中孚九二是乾九二。中孚鳴鶴乾在田。恍然悟。大父命字鶴田之義。卽於始生時取象在此。由是謹誌勿忘。

四十六年辛丑年九歲。

四十七年壬寅年十歲。

四十八年癸卯年十一歲。

四十九年甲辰年十二歲。

五十年乙巳年十三歲。正月。曾祖母季宜人卒。

五十一年丙午年十四歲。

五十二年丁未年十五歲。

五十三年戊申年十六歲。八月。祖母陳宜人卒。

五十四年己酉年十七歲。

五十五年庚戌年十八歲。

五十六年辛亥年十九歲。

府君服闋赴試。

時諸城寶東皋光

薰督學至括甚器之擢第一補弟子員評試卷云包括尚書一

部。府君自謂尚書未熟因晝夜誦至二十日卒業盡悉其義。

五十七年壬子年二十歲。

五十八年癸丑年二十一歲。

五十九年甲寅年二十二歲。

六十年乙卯年二十三歲。

嘉慶元年丙辰年二十四歲我

母陳宜人來歸。

是歲儀徵阮

相國元典學至括以

府君品學兼優大加稱賞院試桃花畫

虎兩賦有才調斬新得六朝真意評語經古皆冠全郡旋食餼

相國又以所作括蒼山雨七古屬和。

謚案阮文達學經室集括  
蒼山雨示端木國瑚詩括



儒藏

太鶴山人年譜



蒼之山應天符。粵維羣仙之所都。羲皇既遠。洞天閉。何處尚有  
仙人間。我來交嶺。疊足望。但見青峯萬丈矗。立東南隅。是時仲  
春。日已炙。陰巖起。蟄蛟龍。蘇盤崖。百里直到郡。觸石已見雲合  
膚。一日二日雷。車驅三日四日雨。始濡春城。夜聽溜滂沛。青天  
晝看烟模糊。遙知風門天井響。飛瀑濺起萬斛光。明珠突林虛  
棧散。成霧溼氣。迺結松千株。棠溪管溪流。並急箭。枯不受。山林  
紆。陽開陰閉。復幾日。此時真有羣靈趨。仙臺福地。不能到。誰來  
示我。經與圖。却喜甌江水。新漲石門山。色迎川途。我行寫此示  
國瑚。有山不吟。毋乃爲試畢。邀府君至杭州肄業。敷文書院。

腐儒國瑚和章見詩集

府君至杭州肄業敷文書院

先是、府君曾受知於秦少峴觀察。瀛時膏火無以自給。作鶴

詠篇

見詩集

呈觀察。觀察語相國曰。此青田鶴也。乃命居署中西

園。使得壹志於學。署中西園有亭。故無名。相國以風定池蓮。自  
在香之意。名曰定香亭。命撰賦。府君仿六朝體。以呈賦云。謝  
公水月。杜老乾坤。抗心古哲。怡志名園。榜修月斧。階斲雲根。井  
惟客轄。市豈臣門。神清藻想。氣馥蘭言。聞空香而入妙。儼寂定  
而無喧。榜曰定香亭。宜標碣。地展三弓。居容十笏。碧淺檻低。綠



沈屏凸。晨光雨後。三徑草薰。午詔晴初。一闌花發。友相問。今冰  
心。世不知。今仙骨。噓翰墨。以繪林。招烟霞。而彌窟。水曲雲平。橋  
連虹斷。鴨綠頭低。雁紅齒短。露氣沉寒。日光抱煖。苔侵午潤。蝸  
合紋移。藻漲春陰。魚闌影散。簾疊浪而香連。簟含漪而翠滿。人  
疑陸海。潘江地是蓬壺。桂館亭則宜春。梅花絕俗。塵不凝紅。莓  
還襯綠。紙帳褰幃。銅瓶臥褥。品逸於仙。心閒似鵠。句淨鏤冰。神  
清照玉。愛處士之清淺。黃昏。這高人於水邊。籬曲綠檻。晨潤朱  
華。夏榮露白。羽淨霞紅。衣明香空。月淡影重。風清碧筒。醉淺白  
社緣輕。翠淩波而脈脈。芳襲袂以盈盈。問騷人。今何多怨。愛君  
子。今未忘情。梧蔭初長。洞陰遠送。碧抱吟蟬。香披么鳳。一闌涼  
影。彩筆分題。半榻清香。瑤琴微弄。黃葉烟疎。蒼苔月空。不知秋  
思誰家。莫道秋光如夢。檐空四壁。竹擁千椽。疎陰碎地。密翠浮

天綠圍書幌。青護重筵。昏黃佇月。深碧流烟。湘枝按曲。玉版談  
禪。招此君而入座。共歲暮而忘年。時若座拱冰壺。軒懸玉界。金  
石紛披。琳琅密挂。唾散珠璣。氣澄沆瀣。棋憑客聽。石供丈拜。梨  
雲蘇軾之詩。蕉雪王維之畫。來物外之清虛。去胸中之芥懣。高  
密列座。公幹升堂。擘牋韻僻。擊鉢聲長。虹光躍硯。霞氣流觴。性  
諧荀令。文述歐陽。蜺頭雲暗。麈尾風涼。句奪五花之簞。心嘔古  
錦之囊。爲想永和人物。雅宜江左文章。額已留題。碑誰作記。手  
淨薔薇。心清茉莉。古綠摹文。硬黃搨字。筆花夢驚。墨藻心醉。寶  
色星迷。神光電萃。地惟奎壁之區。案是玉皇之吏。陳據端木有家集補有  
清思古藻。絕似齊梁人手。筆評語。一時藝林相與傳誦。故相國  
贈 府君詩曰。誰是齊梁作賦才。定香亭上碧蓮開。枯蒼酒監  
秦淮海。招得青田白鶴來。時觀察重修敷文書院。新建秦淮

海祠、府君各紀以詩。按阮文達定香亭筆談云、秦少峴觀

人菴老詩。月芒游子衣。寒綻可憐。最爲雅切。

二年丁巳年二十五歲秋、阮相國修禊蘭亭、府君與同人賦秋

禊詩。見詩集又和相國秋桑四律。見詩集是年按試各屬、卽令襄校

三年戊午年二十六歲隨相國按臨各屬、歷遊雁蕩、天台諸名勝、

有紀遊詩數十篇。見詩集相國稱爲奇麗、採入定香亭筆談、以定

香亭賦列於首。相國嘗曰、武進陸劭聞、適耀於時、賢罕所折服、

獨於子彝心折焉。迨試紹興、以雲漢賦試士、少厭心之作、命

府君賦之、亦稱壯麗。按阮文達定香亭筆談云、秦少峴試紹

興、以雲漢賦試士、少厭心之作。因命鄞縣

童夢君槐言、田端木子彝、國瑞撰之。槐有云、何日倒傾滄海、匪

爲天上文瀾、有時瀉落青霄、流作人間壁水。國瑞有云、秋泛一

槎、耿耿聞仙家耕織如常。春涵雙劍居西園、日與名流往來、詩

篇成帙、江右吳蘭雪舍人、嵩梁游浙、甚相契。





是秋中式本省鄉試第十五名舉人。典試爲南匯吳白華。省蘭天門蔣丹林祥墀。

四年己未年二十七歲。正月北上會試。爲本房。今吳縣潘相國世恩薦卷不售。自運河歸。

五年庚申年二十八歲。春客溫州。是年阮相國奉命撫浙。邀

府君至其署。舟至孟家堰。遇潮幾覆。有詩紀事。見詩集

時相國

同年劉信芳閣部。鑲之視學浙中。署中定香亭圯。閣部重葺之。

復囑府君作後賦云。竹裏留愁。花間住杜梨。趁香山梅招水。

部芳心易孤。勝事誰數。安石寄閒。歐陽愛古。明月共壺。清風接塵。旣翰墨之有緣。豈烟霞之無主。亭有定香。著名已早。風月依然。林泉恰好。竹瘦椽疏。松新瓦老。秋暖蟲宜。春寒花惱。雨到綠生。風來紅掃。人夢湘雲。客吟池草。觀光景之泥人。忽芳馨之盈



抱。於是修階、礪屢、幔亭。高低酌檻、疏密安檣。斧痕借月、石影分  
星。春梁待燕、秋案留螢。蘭書碧亞、簾寫紅丁。鶴迎秋而已、帳蟾  
入夜而何局。屏冷則雲窺雙白、簷虛則天抱四青。水鑿玻璃、翠  
通窈窕。冰上敲菱、鏡中刈蓼。流杯分池、浴研添沼。航比鷗輕、磯  
共鷁小。花氣醉魚、沙痕篆鳥。雨白荷秋、烟黃竹曉。縮圓嶠於座  
中、拓仇池于塵表。塘圍錦砌、橋匝芳隄。星填漢淺、虹臥秋低。花  
垂雲曲、柳搭烟齊。蘭扶黑醉、桂試紅題。響來木屐、影隔花梯。吟  
綠波、今天上。餞紅日、今亭西。爲竹添山、緣花布石。岫雲吐青、峯  
月窺白。蕉額纔方、松身只尺。翠點盆秋、香生瓶夕。鏡前之湘草  
春紅、壺畔之石蓮、夜碧。安排春事、調護芳時。花連蝶徙、樹帶禽  
移。竹量笛料、桐酌琴規。籐長於格、菊瘦似籬。買猿守果、呼鶴種  
芝。紅飛蕉鼠、綠放荷龜。圖離騷之麗句、搜花木之新辭。故當紅



影初晨綠光正午蜂拈碧香蟲墜青縷選荔應圖寫蘭入譜池  
容鷺漁林借鶯乳蝴蝶黃兮春風蜻蜓綠兮秋雨吟芳草則兩  
字鷓鴣悵落花則一聲杜宇更選佳客共此秋光園吟蟋蟀谷  
寫簫管評琴似穎說劍如莊黃花四屋紅葉一牀槐青雨冷藕  
白風涼鴛影秋而人憶茗雪雁聲夕而客夢瀟湘坐久移時重  
來憶昔碑記舊摹榜看新畫鴨綠添鑪鳧青留鳥帖試鉤雙韻  
探珠百橘露千頭茶風兩腋畫憐顧癡香愛荀癖似佛頻趺比  
仙非謫異小隱之在山愛主人之如客雅宜醉白之堂更稱草  
元之宅

陳據端亦  
家集補

有先後雙絕之譽冬北上

六年辛酉年二十九歲二月子大雅生時府君留京師身弱多

病作嚇病鬼詩

見詩  
集

七年壬戌年三十歲會試不第六月自京師歸前一日子大雅殤

始終未之見也。

八年癸亥年三十一歲掌教蓮城書院十屬赴課生甚衆並多在院受業者時王賴山太守績著有古循吏風其題一覽亭楹聯有云看今日民風土俗問七年太守何如之句與府君以詩文交甚契次年解任滿人時雲崖敏守此折節禮士並工書畫與府君交懽契洽夏初阮相國奉旨視兵甌括到郡事畢府君以詩謁見即邀同游石門有詩紀事。

九年甲子年三十二歲。

十年乙丑年三十三歲客永嘉。

十一年丙寅年三十四歲八月子嘉議生。

十二年丁卯年三十五歲八月赴杭州便道北上。

十三年戊辰年三十六歲會試不第大挑一等引見圓明園用知



儒藏

太鶴山人年譜

縣。府君呈請改教職。八月、樸山公卒。府君在京聞訃、星奔回里、哀慟幾絕。因窀穸未安、究心形家言、境內諸山、躬親陟歷殆遍。

十四年己巳年三十七歲、掌教中山書院。有新修中山書院記。記云、國家教化之大、惟學校書院。學校設於朝廷、而書院則設於官府。故學校者、非士著籍、無得登乎其堂。而書院則雖野之童而執卷者、皆得進於其列。是則學校之教尊、書院之教親。親者、近人其效視學校爲易睹。而教之興衰、固居是官府者之事。而亦其鄉之士大夫者之任也。歐郡自宋儒王儒志先生講學、始有東山書院。至本朝乾隆二十七年、郡守斟城李公始置田畝、而移其址中山。閱今四十餘年矣。余未到郡之前、前守長白廷公議修書院、擇主者皆曰、郡學生陳生遇春可。於是畀白金百、授以事。而廷公已解職矣。陳生卒終其役、而其貲蓋一、則倡之、廷公四成之、陳生也。余既到郡、爲延師課士、求廣膏火、而書院畝入年侵月削、百事不供。迺爲擇員搜括、期益士人、以無忘斟城李公之舊。是余事也。余因思聖賢設教之心、止爭義利、而風俗興壞之由、亦止同義利。今人徒勸以義、則莫不正色而任之。及非其利、則又無不隱忍而辭去。利之妨於義也、甚哉。然而任義又未嘗不須利、以成之。故學徒既集、而舍之草間、能安其鼃日乎。安其鼃日矣。而黜之膏蘇、能安其猛起乎。故夫教事不具、

郡有司與鄉先生之過也。而乾業不造，則又諸子弟之事也。方  
今國家養士深厚，既隆學校以重其事，又樂夫郡與縣之有書  
院以廣其教，則凡士之被澤而成于學者，宜無不扶教翼良，通  
義而遠利，以興起有志者於登善之路，研精之蘊，導求于聖  
書之方，以達風俗之本，而後書院之材迺學校之材，學校之材  
延國家之材也。是則國家之所需者，學校儲之，學校之所儲者  
書院成之也乎？書院堂室若干楹，若干田，孰已列舊記，其修日  
嘉慶十四年四月朔日，廷公去郡之月也。落成則七月望日，余  
到郡之第四月也。陳  
據太鶴山人文集補。

十五年庚午年三十八歲葬 樸山公於蕭陽之原。是年服闋，

府君念大父遺言及 樸山公述訓，究心易學，于十翼象告  
情言，悟徹至理。六月，子嘉議殤。先是，曾大父拾得象牙猿  
鈕印，文曰嘉議大夫，用以爲孫小名。是年，府君於書篋內見  
印，嘉議字裂膠而存之，竟爲惡兆。冬，北上。

十六年辛未年三十九歲會試不第。四月，自京師返，過闕里，訪  
孔壁古文。上嶧山，觀李斯刻石處，游蜀岡，登焦山，訪支硎，撫古



鼎訪瘞鶴銘而還。是年七月次女生。

十七年壬申年四十歲。時青田大饑。府君籲請邑尊開糶以振

貧窮人頌仁言利溥。秋客橫陽主蘇石緣居士璠家爲作大

雅山房印譜序。序云橫陽蘇氏石緣居雅山之足構池館聚圖

觀其概也。己巳客永嘉過之松臺辛未北遊共自燕而魯而吳

過闕里想孔壁古文上峴山觀李斯刻石處登焦山撫古鼎訪

瘞鶴銘而還壬申始偕潘氏彝長至橫陽得息其園林而樂之

怪其雲容石狀咫尺靈變而有以知其中之多奇也亡何觀主

人藏書處壁榻俱滿又出所作隸古所作印數百石與商榷之

燈每至曙其時大風雨三四日夜秋氣如海余三人屹屹而忘

之也其所擇印主人命志之以爲一時之鑒會也余亦以爲余

今日之遊適固余二人之曩所期思而今諧之者也余志之非

十八年癸酉年四十一歲。北上天津客李石農觀察鑒宣署中。按

項霽且甌集癸酉送端木國瑚入都會試三十韻。擊鼓青齊急

衣冠終闕遙將行萬里道又駕一封詔。夙羨風騷客人推學藝

超詞林俱退舍。文苑看高標。縷織辭章麗笙簧典籍調。名賢爭

培軀身世尚漂搖。書屢讀黃耳裘曾敵黑貂。輕裝仍虎僕行笈





復牛腰。幸值明良會。宜膺旄組招。鄒枚欣接踵。丙魏况連鑣。下  
 士公輿盛。奇才藪澤饒。攝衣文足用。補袞職無驕。共慶龍騰舜。  
 何期犬吠堯。常陳光不變。帝座犯逾昭。入夜然烽火。衝途響斗  
 維雷聲。瘖凍馬。風勢壓盤鵬。傾蓋思前度。歌羅又詰朝。揚眉嘗  
 負俗。把臂忽相邀。未謁癸辛里。先過丁卯橋。雕龍辭涉臘。捫虱  
 狎漁樵。山水供雙屐。田園付一鉤。引錐心已券。舞劍氣難銷。捉  
 手思張翰。遺鞭效繞朝。京華虛袞袞。哀哀鄉國路。迢迢寒色幽。州日  
 流漸渤海潮。望懷能久渴。桐廬不終焦。月讀驚江泌。星占識伍  
 喬。京明需著作。揚厲待詞謠。僅入金閨籍。  
 行稱玉署僚。賢臣應獻頌。漫賦漢宮簫。

十九年甲戌年四十二歲。會試不第。歸過天津。李石農觀察邀遊

芥園。同徐貽山 迪惠 劉鷺羽 翥 有詩紀事。見詩集

二十年乙亥年四十三歲。時選湖州府歸安縣教諭。謚按項氏且

田訪端木鷄田詩鶴立風裁好青田寂寞濱爭名甯避俗抗節豈謀身經術他年重文章此日珍脂膏難自潤愁作折腰人。

秋客羅陽。是年納側室葉氏。

二十一年丙子年四十四歲。五月到歸安任。繼祖母楊太宜人

就養署中。缺既清苦。食指又多。時有空乏之慮。然矢志寒素。不



妄受一錢。士有志于學而力難自振者，往往典質以資給之。地方有獨行異節、有關名教者，輒首先捐廉倡率，以表彰之。迄今湖之士大夫猶切去思焉。

二十二年丁丑年四十五歲。

二十三年戊寅年四十六歲。

二十四年己卯年四十七歲。

是年有上阮相國書。

書云：國瑚頓首，久不奉牋。

記：自顧駑下，不能舉辭。居學官，無事，竊欲立六經一說，依附傳後，自念假手于人，無用何用之？天下有用書，古今盡在，且用不能願求爲人用乎？又念古今書有易言易盡者，有難言難盡者，苟質敏心勤，雖繁重悠遠，天地積算，布指可得，以理衆驗，法習成故也。天下有其理，理不傳，有其法，法不傳，天下竟無從傳者，有二：天地律書，聲音不有其人，天地葬書，理氣不有其人，二者皆在易也。律書其人知治亂，不能爲治亂，葬書其人知盛衰，能爲盛衰，顧聲音一道，古矇師以爲守，儒者尙從而習之，理氣一道，墓大夫不以爲教，儒者盡從而棄之，儒者好以名物爲議論，苦以成事爲規模者也。六經中，聖人常言，天下萬世常用可也；聖人不言，天下萬世不用可也。聖人書，不盡言，言不盡意，天下萬世遂以不盡其言，不盡其意，不盡其用，可乎？聖人不盡言，何



言不盡意何意。天地陰陽也。聖人不可使天地陰陽。人不知人。人不用仰以觀於天。文  
人用。又不可使天地陰陽。人不知人。人不用仰以觀於天。文  
俯以察於地理。知陰陽之說。知死生之說。天地陰陽也。葬也。聖  
人不盡言。不盡意之說也。墓大夫不以爲教者。防俗失止。禮棄  
聖人。有隱虞者也。不然。葬取大過。天地陰陽。盡乎易矣。聖人豈  
無言而言。言言乎。以易常理言之。中正而已。中正則於身於家  
國其象言。不中正則於身於家國其象凶。聖人言之。天下萬世  
守之。而無不然者也。聖人取大過。陰陽中正而已。中正則陰陽  
和。天地山川小大生人。于家于國爲正。人于天下久長。不中正  
則陰陽不和。天地山川小大生人。于家于國爲不正。人于天下  
衰敗。此自然理也。家國大者。自在天地。天地何爲。而然。非陰陽  
乖天地。然乎。聖人以人所不能與。而後聽之。天地不以人所能  
與。而皆聽之。天地也。天地設位。聖人成能。何能也。人謀鬼謀。百  
姓與能。何能也。人謀生人之始。鬼謀生人之終。人謀鬼謀。謀生  
人之終。謀生人之始也。皆在天地。陰陽設位中。聖人成能。百姓  
與能者也。著龜易取象者。易取數者。幽明之故。而幽明生死之  
說。而生死非著龜能也。象陰陽龜是象。數陰陽著是數。聖人告  
之以著龜之象。數用陰陽。不當復以陰陽之象。數用著龜矣。莫  
大乎著龜。用著龜。象數爲用。莫大者也。用莫大乎聖人也。猶嘗  
謂易不可以常理常象說。必究明天地陰陽死生之故。及陰陽  
五行之數。五行之象。六十四卦。知五行之氣。所以通五行之數。  
所以配五行之象。所以成一卦。互交何卦。正互何卦。對待何卦。  
反對何卦。顛倒何卦。錯綜何卦。先後天何卦。上下序何卦。而後  
其象可得。而睹其理可得。而言。然一卦出入數卦。其數卦又各

自爲卦。欲執一說以見陰陽之用。而又不能如用火用木。不見木。不見火。聖人立象以盡意。正此意也。胡不揣箸周易葬說一篇。據易說葬意也。借葬說易象也。易陰陽不能說。說葬易陰陽明。葬陰陽不能說。說易葬陰陽明。于說易說乎其端。易當如是說。于說葬說乎其底。葬當如是說。從儒者言。希夷先後天理。即其理。周子太極象。即其象。邵子經世數。即其數。從術者言。郭氏經。即其經。邱氏楊氏書。即其書。指南二十四字。代卦爻推行陰陽當位不當位。卦爻相雜。成文易雜卦。盡在焉。取諸大過。聖人之情。見乎辭。其言曲而中。其事肆而隱。信夫天地易簡而已。百姓與能者。過陰陽易簡而已。天地相似。聖人成能。易簡而已。百姓與能者。謂也。儒者皆不肯言。謂聖人不言也。聖人不盡言。不盡意。不盡何德。曰生。葬生人。大本。陰陽生人。大用。易百物不廢。生人。大用。生人。大本。易生人。廢生人。陰陽于何用之。易人用之。人道地用之。地道。天用之。天道。人仁。義地。剛柔。天陰陽。用人。廢天地。不用非易也。人始于天。終于地。始終於天地。而人不能用天地。非易也。儒者不肯言。一。人言。何以故。謂吾道非彼術也。不知易體之爲道。易用之爲術。聖人不言。所以利而用爲道。常人利而用爲術。道不可不明。以故道之體顯。道之用隱也。術不可不慎。以故術之用顯。術之體隱也。儒與術各不相習。儒者難乎用以天地爲虛。術者難乎體以天地爲實。是故道無術不行。術非道不可用矣。世葬書術而非者。非易也。世人殉乎其中。俗失體。棄犯聖人之慮。而又不得陰陽之用。生人大患也。非夫聲音一道。是不足爲治。非是不足爲亂。而可從其是非是也。易陰陽是。則是葬。易陰陽



非是則非葬。孝子於親仁人于天下非葬不可者也。儒者奈何不推本大生廣生之說少傳易道之用於後世乎。聖人天道命不傳傳其不待告。易言後世常在也。其人儒者自爲之庶乎可也。竊謂此篇生人有用者于易說乎其端而天地陰陽之用可說此而盡其變矣。政錄上侯陽暇  
賜覽焉。遠懷太壽山人文集增。

二十五年庚辰年四十八歲會試不第歸。

道光元年辛巳年四十九歲周易指始屬稿。先是府君學易十有四年嘗云易家言漢言宋各究心病其於聖人言皆無左驗。廢然反之易惟十翼是問何謂象告情言聖人不欺余辭所<sup>③</sup>之可也。易六爻文始終具六爻質易一封質之諸卦易一經質之聖人諸經及古微言大義同乃敢信諸心明諸掌至是撰著易指又十有六年而稿成。是年十月爲長洲顧沅作賜研堂叢書序也。序云余于山一升岱之巔窺碣石以東蒼蒼而不能諦市泥車瓦狗不足于兒戲而欲問大秦之耳璣于闐之腰玉臧奴唾其笑矣習辯毅之方起腸者三日受命監大官廚毀杯水



鹿鼠果然不信。始皇蠶食能畢六國。余之於書大抵然矣。一寸之日一縷之心昏如甄鈍如椎其不足以矚九天之上窮九地之下明矣。長洲顧子湘舟方大鏤書以苦余。苦余則然。世固有空洞之輩吞若雲夢者八九于其胸中曾不帶芥。顧子或不能苦之而徒以苦余。無容也。雖然余亦自有我法。顧子不能苦余而反以助余快何者。長夏之次樹蔭百丈大寒之廬綈幕一重茗椀長設地爐復開周公之夢方醒孔氏之談亦倦。抽此一編置之膝上未嘗不如清風來溫耐沃也。此時也顧子之書又何異華氏之青黏漆葉體一不快而投之五藏利三蟲去也。則欲以苦余而竟何如。西方聞者不然。方且責其殊義詭制纖詞進仲舒之說用李斯之計則吾輩荒陋之黨利之而雕龍騁談天衍掘然其不服。二者未得其平。余又起而調之觀河海者之遼且不得議懸雷鈞突之非水而宴曲室者之密耳奈何厭明堂大會之造石增眩也。顧子但輯而行之賈胡剖腹以藏珠有好事之者毋譏異同之說不休也。顧子近閭門之市余嘗倒囊過者貨別墜分不貲之物中國勿名豈以宴人多而罷市哉。陳據太

鶴山人  
文集補。

二年壬午年五十歲。

府君初次俸滿入都。

謚按方成珪寶研齋吟草自識有云道光

壬午偕端木鶴田出都。車中同坐相與談詩。鶴田謂余曰。子從事於詩也久。亦知詩之不易言乎。觀理不精則無以深其旨趣也。讀書不富則無以壯其波瀾也。非偏識乎古今之體裁。則無以通其變化。非靜調乎陰陽之氣脈。則無以養其中和。故人人



言詩而詩之途寬。亦人言詩而詩之途窄。鶴田固深於詩者也。而其言若是。此則可以知國朝論詩之旨矣。

府君病瘵。與家三合元運之蔽於俗說。纂周易葬說。後序云。天

六經已耳。其他有用書。用六經已耳。六經之用。皆道用。而民咸用之。則成乎藝。是故藝者。皆道之至精者也。神農作本草。黃帝

之臣。作素問。本草。素問。於後世。藝文出。雜家以下。古聖人如神農。如黃帝之臣。豈無可以為天下後世。而是雜家下者。為不知

為天下後世。莫先於濟生。莫先於救死。不足濟生。不足救死。雖出六經。無用也。醫書生死然矣。葬書其生死於醫書。何如。葬上

世不封不樹。後世聖人封樹可也。蓋取諸大過。何取諸大過。而葬之道。盡乎易矣。通乎易。不必知醫。通乎易。未有不

易。不必知醫。所以。上世有本草。素問也。通乎易。未有不葬。所以上世不有葬書也。今醫書難者。人人讀。人人可解。讀久而愈

以解。葬書難者。人人讀。人人不解。讀未久而人自以為解。人人不察。自以為解。為天下後世生死也。大矣。不避狂瞽。注葬書四

篇。注是葬。理是易。又本易作葬說。郭氏楊氏來。未一人言。庖犧文王周公孔子。明明言者。乃在六經內也。由乎此。則由乎生之

道。不由乎此。則由乎死之道。易死生之說。本然也。死生之說。本然天下後世。何可不然。不然。非葬也。道乎藝乎。有用乎。無用乎。

葬雜家以下者也。予亦第出雜家以下。用六經之。嘗又取揚用於天下後世而已矣。陳據太鶴山人文集補。

曾地理元文一書釋之。自序云。立天之道曰陰與陽。立地之道曰柔與剛。立人之道曰仁與義。人也者。



中天地而立三極之道者也。人自其道非仁無處、非義無行、則不求之天地而天地之陰陽柔剛日與人之仁義立而三、人之道豈有不存者乎？是則取諸大過之葬、何必問陰陽柔剛之於天地何如哉？然而聖人之訓天下、不外乎世人之心。故積善之家、不曰積善而已、而曰必有餘慶；積不善之家、不曰積不善而已、而曰必有餘殃。餘慶餘殃者、世入皆有之一心。賢子孫之於祖父、賢祖父之於子孫、其心皆餘慶餘殃者也。華可以有慶、何弗爲我祖父而有之？苟可以無殃、何弗爲我子孫而無之？積善之家、而曰吾積善不積不善之家、而曰吾不積不善、而責有善之慶、無不善之殃、於天地乎？必不敢謂然矣。然則葬也者、慶與殃之大者也。責之冥冥、吾既不敢已信、責之昏昏、吾又不敢人信。然則如何？通天地人之謂儒、人而儒也、仁義不知乎？陰陽不知乎？剛柔不知乎？陰陽剛柔、葬之道也。葬、事親之大事也。立人之道、仁與義此仁至義盡事也。儒乎儒乎、可弗知乎？陳據太鶴山人文。

集補

是年冬、同年徐鹿苑明府

樓卽迪惠

至、爲製序文、尋刊行

於江右。

三年癸未、年五十一歲。

是年出都。

謚按龔自珍定盦詩集有癸未送端木鶴田出都詩、天人

消息、問端木、若書自署青田鶴。此鶴、南飛誓不同、有鸞送向城頭哭。鸞、鶴相逢、會有時、各持高名動寥廓。君書若成願祕之、不爲三山實五嶽。七律一首上。條方說壬午出都、疑誤據謚。

四年甲申年五十二歲。是年三月納側室林氏。鹿苑明府邀府君至紹興游禹穴南鎮。時將赴江右。握別而返。冬十二月子百祿生。

五年乙酉年五十三歲。注易指六十四卦具。

六年丙戌年五十四歲。

七年丁亥年五十五歲。易指十翼及圖象具。是年六月杭州襲定庵舍人自珍問易題解。以向易說所無者訪府君。詢所注易大義說數條。府君以乾初九不易世一節說之。舍人以爲聞所未聞云。七月湯雨生都督貽汾官湖州協鎮。以詩文相往來。甚相契重。又作易圖數紙上阮相國。冬十二月子百禮生。

八年戊子年五十六歲。府君二次俸滿。赴省驗看。兼送鄉試。居



吳山回任。嘗注易於尊經閣下。顏曰易堂。

謚按端木宗譜在湖州歸安縣學署中。

五月得一異石於階下。大不及升。如母追形。其光黝然可鑑。儼一小嶽阜。徑路上虬松芝草細紋縷刻。一面麟龍鸞鳳皆凸凹刻狀。卽以易筮之得坎天玄之卦。是日己亥時辛未。適府君生日時甚異。嘗言昔宏成子得一文石如鵲卵。吞之後授五鹿充宗易。遂爲碩儒。此石得於易堂。其或天以注易十二年之久。先錫之瑞歟。

九年己丑年五十七歲。

十年庚寅年五十八歲。正月三女生。是年會朝廷欲改卜萬年吉地。諭宗室大臣各舉所知精形家言者。那制軍彥成、禧尙書恩於書肆得楊曾地理元文注以獻。上問近臣知此人乎。曹文正公振鏞對曰。此是浙江名士。臣久聞其名。於是廷寄浙江巡



撫劉公彬士

隴鎮

召之。

六月初十日、恭奉上諭、朕聞浙江歸

安縣教諭端木國瑚通曉堪輿、著劉彬士即傳該員到省、飭令

來京、務於中秋前後趕到、將此諭令知之、欽此。時鹿苑明府以

江西泰和令同被召、府君即抵省、巡撫劉公遣武弁送至京。

府君將遠行、移家僑居溫州瑞安。八月初五日、圓明園投

文、命送禧恩公直廬中。秋、鹿苑明府來京、亦同住。時上看元文

首篇江東一卦等語、屢蒙傳咨註義、謹即條對具陳、并作一圖

上之。廿六日、隨同欽差大臣往西陵相度。

三十進泰陵、九月初一日

逐日周覽。府君以北方土性高燥、砂石水風之患、往往有之、

而身膺相度者、既求形勢之合、又宜悉杜此患、方有當於萬年

永固之義。既看有蓮花山、老龍潭諸地、而同時保薦相度者亦

擇有望仙山、六道灣、大灣峪等地。府君謂望仙山下面是砂

水六道灣有界水四道在穴水內大灣峪其左肩上兩峽龍去  
肩上兩灣水反弓而下決其無氣到穴初同事仍不信及針土  
望仙山穴俱白砂大灣峪穴俱黑砂堅石三地皆不堪用乃以  
府君所擇老龍潭地上之老龍潭地後龍四重大帳到穴龍  
身百八節左右夾龍發源水收過穴前合襟去竟爲龍穴水三  
字全府君列在次取而蓮花山地五曜歸垣穴以爲非常大  
地當事者不取遂置之十月十四日回京移住浙甌館時鹿  
苑明府遭母喪回籍惟府君一人留工有公事則往暇則闔  
戶注易一時朝貴罕識面焉

十一年辛卯年五十九歲二月二十二日上謁西陵臨覽萬年吉  
地親自登頂高上把羅經對向聖意大悅賜名龍泉峪二十三  
日在秋瀾行宮恩給六品頂戴以內閣中書陞用又蒙賜御用





袍褂四身。二十八日，到內閣漢票籤處轉事。三月十九日，又派擇阿哥福晉地。十一月初三日，隨同欽差大臣扞萬年吉地。初八日，開穴正中開六尺許深，留見方一丈外，前後左右皆開至一丈二尺。土先淺黃，至五尺深黃，紫氣堅細光潤，有四五丈寬，橫開二十丈，皆堅土。兩角裹有石，俱五色，可鋤而穴前後亦開二十丈，皆堅土，無石。穴中每開一二尺，即黃袋盛土，至一丈二尺，黃袋盛土六號，即具說進呈。上喜，知言地已針，有吉土也。十二月，引見補缺。十四日，召見詢及龍泉峪形勢及祖籍年歲甚悉，奏對皆稱旨。三時許乃出。府君自言生平厲志於學，本冀通經致用，今以堪輿微技受主知，初非本志也。惟敬謹從事，盡心以報効焉爾。

十二年壬辰，年六十歲，移住下斜街全浙會館藤花書屋，會試昆



明池滄庭舍人生春得 府君卷薦之評云運以生筆澤以古香合觀三藝於易學尤邃戴金溪司寇亦激賞之時主司持議不一卒見遺。

十三年癸巳年六十一歲會試中第十三名進士時歙縣相國爲正總裁儀徵相國以雲貴督入覲副主禮闈皆平日曾受知者人皆傳爲美談房師爲華亭沈舍人第應殿試第三甲第三十八名。謚按方氏寶研齋吟草癸巳喜端木鶴田國瑚登第詩云定香亭賦蚤知名垂老方爲得意鳴一卷青囊書舊譯三府君呈請注銷改歸內閣中書先後三辭縣令。

十四年甲午年六十二歲。

十五年乙未年六十三歲九月次女卒。

十六年丙申年六十四歲撰周易指掌卦畫六十四卦井井於易



性命理得乃象而已易全部本末終始歸之六過漸下歸妹一  
 卦而已皆不出 曾大父所命者。謚按太鶴山人文集國朝自  
 先大父雲友府君以壽終隱居青田乾乙峯下日觀卦象歲久  
 欲有撰述數年老等謂且待後人余於諸孫生晚生三日抱見  
 大父見右府赤股左手掌握握方井文大父喜曰此兒能成吾  
 易乃字之鶴田名曰鶴故余名字乃從始生時大父命也六歲  
 七歲授易經孝經九歲即大父辭世為年七十有三及余少長  
 十四五方有知識先父樸山府君大父名鶴田字父鶴始以  
 大父遺言進而命之曰易者家而已言天地萬物象得理得之  
 又曰易卦氣六十四卦起中孚九二是起乾九二易全部歸之  
 大過漸下歸妹一卦為天地終始此汝祖言易命以告汝者余  
 聞茫然退而觀易卦爻中孚九二是乾九二中孚鳴鶴乾在田  
 恍然悟大父字余鶴田於始生時取象在此即可知卦觀象法  
 在此而其時思之不通且亦謂待後日於是二十三十走聲譽  
 途涉獵傳記求工詩古文無百氏皆從事等盡龐雜至二十六  
 歲元父辭世終喪乃念先大父遺言乃父所以重命余者廢然  
 反之易易家言世人請漢謂宋各究心病其於聖人言皆無左  
 驗又廢然反之易惟十翼是問何謂象告情言聖人不欺余辭  
 指所之可也易六爻又始終具六爻質易一卦質之諸卦易一  
 經質之聖人諸經及古微言大義同乃敢信諸心明諸掌如是  
 十年然後起道光元年歲在辛巳撰易指始閱四年六十卦  
 具又二年十翼及圖象具其於易在在求言有據行有效聖人

不盡言。言不盡意。求至聖人元文字易。反復七於天地萬物。思盡後止。迄道光十六年。歲在丙申。撰易指掌。而易卦畫六十四卦。并井於易性命理得。乃象而已。易全部本末終始。歸之。是年大過漸下歸妹。一卦而已。皆不出先大父所以命余者。

梓成。卽有歸志。

十七年丁酉。年六十五歲。春。朝鮮金秋史侍郎正喜。託其朝使申翠微。尙書在植。及隨使李瀉船。尙迪致聯語通問。且曰。君所作定香亭賦。東國人皆傳誦。慕名已久。初。申尙書出使其國時。諸老錢有詩。皆囑其到京。請府君序之。序曰。古詩章四牡。皇烝民。韓奕。仲山甫。出祖吉甫。作頌。韓侯出祖。顯父。錢之。錢行之。詩之始也。風雨。蔓草。至七子。賦詩不出。鄭志。則邦國主客相遇。以其國之詩。見君子。這好問。又其始也。古人詩。性情真已耳。今人詩。求性情真已耳。真則數千載。上古詩人。如吉甫。皆得見之。即靈萬里外。今詩人。能如吉甫。亦皆得見之。古不遠。今不遙。而共日暮。共戶庭。皆相見。可矣。今東國爲古聲教之地。我朝聖人。日月遐覆。東國同之。穴土。其詩教盛固宜。丁酉歲朝正月。使擇其國碩臣名學。得尙書申公。一時重其使。國之位高才美者。若數公。皆錢之詩。其詩七律。從同俗。其律一韻。從同聲。其數陳也。幸好其稱道也。實直。于是申公奉以來正。君子之光。影影者矣。



瑚處京華下止識閉戶豈能有聞於代而東國諸公獨以詩性情之故于其國乃言里外聲應求同心之言登諸簡而過以虛聞于瑚申公且行請以三此胡致然非當今環瀛海如比戶而何有于默處者特采其一言如是用是瑚不敢自距遠忘其愚私載筆以申東國諸公之美見其執而來者皆性情真有不可已於詩而國風俗在之故三于使臣踐行及夫主客通好問皆與古詩章之義有合以著其今之盛是以并求詩文經注手爲之辭而書其首陳據太鶴山人文集補

蹟俱喜服而去謠按詩集有謠朝鮮中翠微尚書請相見長春寺爲謠大謠謠易詩一首端本宗謠載中尚書

和詩云義室畫後聖三人經我得言章見範型可與言詩端本子行將歸里少微星先天觀理寧初白高士流芳簡欲青千載相茶熱已通靈

三月秩滿告養歸過河南留住瑞安洪敘堂守彝甯陵署中數日過揚州爲阮相國留置多日邀遊甘露竹林招隱諸名勝相國又囑擇地以爲壽穴乃擇定雷塘一處瀕行相國贈聯有班固屬文傳兩賦虞翻夢易得三爻之句

五月回浙江自吳興抵青田謁祖墓畢至瑞安居家時嘗訓百祿曰易指之書爾長大當知先代隱澤以業易爲家學俾長勿



忘。至余研思索微、頗費苦心。在地爲山長青田正誼書院二年、處州蓮城書院二年、爲教官歸安學署十四年、官中書、浙會館紫藤精舍。謚按：端本宗譜此在北京下斜街。國瑚任內閣中書時所居也。七年於易共二十六年、成書四十五卷。今剗剗告成。余亦且老矣。易草本前後若干束、欲瘞之乾乙峯下。謚按：青田縣志：鶴田易塚在青田縣混元峯下。國瑚所著周易指稿葬於此地。故名。會稽宗稷辰爲撰塚銘。清咸豐甲寅年刊石。銘曰：黎公傳詩而遠孫鶴田子迺以易名。加年十五得其大指。蓋久而始有成。超漢唐宋之銓解、通天地人之精粹。道既明而神遂歸於太清。其遺稿一千三百五十三紙。命藏於混元峯下。艮石之堅貞。昔蛻之家。以儲厥文也。茲鶴之家。以瘞其經。嗚呼。此可以蘊養元氣。含育羣生。歷千百萬億歲。無漬無傾。後有攷者。視此銘。碑陰有國瑚女恬原書曰：易冢銘既刻石於杭。亡弟百祿輒搨一紙寄予。云將攜石歸。豎於混元峯下。並取易稿一千三百五十三頁藏之。承先志也。乃未及舉行。百祿竟短折。續經髮逆之變。石亦毀棄。遺孤庭璠。年在垂髫。語之未遽省識。若聽其蹉跎。恐就湮沒。無以仰答先靈。卽亡弟銜憾。九原其有旣乎。因出貲重鈎上石。令嗣子茂生親奉外祖易稿詣太鶴山中。相混元峯來脈。營冢立石。庶宗滌甯侍御不虛此銘。而予未亡人竊有念焉者。先府君自定兆於湖州仁王山。雖有故舊門生爲置田以供祭。



能第自括赴若約千里我端木氏子孫能一生再三趨謁難尚  
 能歲歲清明往來致涉也哉有易系在是諒可少抒展墓之情  
 三三歸安歸復有定而魂氣則無乎不之况易稿有先府君手澤  
 畢生精力盡注於斯來承祭者神必恪思也茲故勒之碑陰願  
 我兩家後來之秀不徒以為慕美而共思所以保護之自今欽  
 於世世歸瑞安洪氏長女悟原謹志又有易亭兩壘跨建易系  
 之上瑞安孫衣言題聯云即爾曾祖易廬也八月赴處州  
 易師轉田子太極混元峯  
 游遂昌主吳榕壘孝廉世涵家其邑有含輝洞勝蹟遂題銘其  
 上以洞門向東改輝為暉時徐鐵孫先生榮令斯邑往來甚契  
 九月感嗽疾二十日卜疾不言榕壘遣急足至瑞安來告越二  
 日辰時終于客寢

宗稷辰太鶴山人文集序

鶴田子少以詞藻稱於時中年放情  
 歌詠晚乃一意治易以明其心得其

發揮旁通奧衍奇闢已超漢魏說經之文文莫古於是矣然其  
 偶為論著序記銘傳書牘亦復力追韓柳而躋及之臧篋中舊  
 稿零散其子百祿集成若干篇余還山時為之訂正又三年復  
 請序以行世想鶴田子易指成時雖儀真公不求其敘其前刻  
 詩鈔尚有文明題贈之辭若古文體尊於詩雖視注經則有間  
 設至今尚存或亦不過自敘而無藉於評騭惟故鄉文字舊交



已落落如晨星。誼親而道合者。合。余其誰耶。余所以讀其書。思其人而不能不爲之歎。頃不置也。咸豐七年春三月。會稽宗稷

辰敘。陳據傳鈔本。太鶴山人文集增。

秦瀛太鶴山人詩集序。青田多佳山水。余所至者。惟石門洞。舊

鏡天巖屏中斷。天紳下垂。隨風曳練。蕩漾空際。非烟非霧。瞥然而下。如雷霆之震。賦奔崖裂石。及其既過。則飛流灑雪。如玉龍

之飲于淵。陰陽變幻。莫可端倪。余喟然嘆曰。此天下之奇觀也。乃今於子彝之詩。遇之。子彝生文成之鄉。昔爲諸生至杭州。余

賞其詩。時儀徵阮公芸臺方爲學使。亦盛稱子彝。自是子彝遂以詩名。無何。舉於鄉。數年來。余宦遊南北。子彝屢困禮部之試。

久不相聞。今年春。余在京師。而子彝復以試事至。報罷。既得。縣令子彝辭之。一日者。持其太鶴山館初稿。丐余序。則子彝十數

年之詩。悉萃於是。子彝性情澹澹。而奇逸適與。其地之山水相肖。而詩之孤峭。絕特。一如登懸崖。攀絕巖。聽猿鳥之夜啼。而睹

銀潢之下墜也。石門古剎。與三石以併。在括蒼游其地者。蓋少。然世固無不知有石門者。子彝貌甚癯。而精悍之色。常露眉宇。

其詩激壯之處。劇似文成集中作。雖伏處隱約。嘗爲鉅公所識。今之人。既皆知有子彝矣。欲詩之無傳於世也。得乎。嘉慶十三

年孟冬月。無錫秦瀛序。陳據洪刻本。太鶴山人詩集增。

宗稷辰太鶴先生墓表。太鶴先生者。青田端木君也。青田故有鶴而山以鶴爲名。君生而神貌肖之。其大



父芝。嚴翁取易乾中孚而九二之義字之曰鶴田。而命其名曰國瑚。晚乃自號太鶴山人。海內外知名者多。稱太鶴先生云。當仁宗皇帝時。真州阮文達公。採風東南。得君。以詩示朝。右曰。吾得青田一語。爲至幸。由是名聞天下。及戊午書升。明年文達在朱文正公主會試。甚望得君卷。乃竟下第。人以此高之。後三十餘年。君已官於朝。爲內閣舍人。文達適自滇黔持節朝京師。遇於郊外。與君酌酒。朱文正墓道猶言。曩昔聞中文正。以不得鶴爲憾。是年癸巳三月。文達將進。辭宣宗皇帝留之。入闈。錄異才三數人。君適在選。世既奇其選。時上知君深明易理。汪文端曹文正曾交薦之。其以召相吉地。官內書。加六品秩。皆由特恩。至是時。論當選擢。乃因卷置三甲。用縣令。仍請回直閣中。蕭然如未第。益淡世味。專力注易。易指成俸未滿。即求去。人以此愈高之。言性清介。不耐繁劇。曾辭縣令。至再。爲歸安學教諭。樂將終身焉。自召入直。貧甚。於教士時。進奏勞山。變不以爲功。深悔地理元文之注。欲毀其板。在京絕不與大家卜地。居浙邸紫籐精舍。閉門著書。談易以外。薄酌詠歌。無他嗜。閣中與山左閣星持山右李蒔蘭及履辰最親。自君退而先歿。李與閣相繼逝世。余爲作內閣三先友傳以哀之。君歿後。湖州學子附位於峴山。蘇公祠鄉士大夫請祀於郡。邑鄉賢祠。爲吏所尼。久之始得入。奏章到。上差念其人。即俞允。蓋聖明知之深。而恩尤獨優於身後也。雖命之蹇。數之奇。而三才通六行。修生完其性之潔。沒終不失其名之高。非古所謂無求自得之君子乎。受於世者薄。則合乎道者多。其傳無窮。奚疑也。君齒與名德皆先余。余素尊禮之。君亦與予相得甚。就沒其子。百祿來見。就予問學。予妻以少女。所以

永舊誼也。君所著書周易指四十五卷詩集十三卷已行世。文集四卷待刊。生於乾隆三十八年三月初十日沒於道光十七年九月二十二日。是年十月從君遺命葬湖州之仁王山。故交門弟子爲置墓田歲時酌薦不絕。君元配陳安人。篴葉氏林氏。子四長大雅次嘉議早殤三百祿爲拔貢生能世學幼百禮女子三歸士族君葬時無內碑故詳及之。咸豐三年其姻稷辰始爲表。陳據宗稷辰躬恥堂集增。

汪昉仁王山展墓圖序

仁王山距湖州城十數里青田端木鶴田秉鐸歸安時自擇墓地於茲山之麓。

先生既沒遺孤叔總扶先生之柩葬焉。先生故有德於州之人士老友奚虛白上舍倡捐墓田一區以其入供歲時祭掃之資。每春秋佳日虛白凜肴酒邀其里黨向與先生相契者浮舟徑詣墓所奠醑既畢則餞餘於仁王寺。歲戊戌予爲人司筆札客歸安因亦得預其會。癸卯九月先生之故人徐明府鹿苑自上虞渡江至湖州邀周馨山學博奚上舍戴銅士陳嗜梅兩茂才展先生之墓鹿苑既爲詩祭之又屬叔總補圖於冊首叔總因以圖屬予予固不敢以拙陋辭也。憶予始識先生也在道光己丑之夏是年予客烏程縣廨老友奚戴兩君介予謁先生於雪上易堂。九月間同游弁山之黃龍洞予中病暈不果登。先生所爲詩集中所謂庶慰臥遊人持爲垂堂諺者是也。明年予客湯雨生都督許先生被命入都來杭州與雨生言別盤桓者兩日。越三年癸巳予以事至都又晤先生於下斜街之古藤精舍。嗣後遂音響隔絕不久而先生之訃至矣。憶四五年與先生蹤跡



往還者如此。至其學問品誼相去不可以道里計。而叔總願置  
于於父友之側。于其是愧不敢當也。圖說婆因并記此。以誌叔總  
國。按端木宗譜。太鶴山人墓在湖州仁王山。爲今吳興縣地。  
焉。至今不絕。並附祀嶼山蘇公祠。  
見湖州府志。此序據端木宗譜增。

右太鶴山人年譜一卷。青田端木叔總百祿爲其父中書君鶴  
田先生國瑚之所作也。昔者子貢爲仲尼弟子長。其後傳六十  
世。有名以善。明洪武中以縣令累遷至刑部尙書。舉二子。孝思  
孝文。嘗皆出使朝鮮。並以清節著稱。當世朝鮮人立廟祀之。曰  
雙清廟。有云孔門十哲。魯論推言語之科。溧水二難。清節致遠  
人之服。再二百歲而至鶴田。鶴田故深於易。朝使申尙書在植  
贈鶴田語曰。祖德雙清留史冊。義經一卷見天心。蓋紀實也。然  
自鶴田上距聖人之徒。已七十二世矣。當清道光之朝。內閣中  
書多異人。龔自珍定庵以才勝。魏源默深以學勝。宗稷辰越峴



以文勝。吳高梁蘭雪以詩勝。而鶴田獨以經術勝。是時有薇垣五名士之目。今國史以鶴田與定庵同傳。有以哉。歲辛未。余歸稚城。道出禾中。一展鶴田墓於仁王山麓。是譜得之。鶴田曾孫文斌。余卽其家宗譜及太鶴山人文集。端木家集而益以他書所及略爲補輯。勒成斯篇。凡譜所稱按與補及增者。皆余之所錄也。嗚呼。明德之後。必有達人。易始乾坤而終未濟。文斌其世寶之。共和紀元二十二年九月。後學瑞安陳謚記。

書太鶴山人年譜後

端木小鶴舊次其父子彝舍人年譜一卷同社友陳木厂從其後人得之。既復旁涉廣撫補輯別寫爲此帙以視小鶴元作慮周而藻密矣。先大父太僕公每論枯郡人物必由舍人及湘巖韓先生以上溯明之誠意伯劉文成公稱青田三異人。夫誠意以邦國勳烈兼傳世文章詩古文辭與潛溪華川青邱諸家抗衡爲一代宗主。後四五百年至清乾嘉間迺覩滑疑太鶴二集一則恢偉奇肆追武郁離一則激壯雄深嗣音覆瓿而三省循良之聲四世述作之業婉於洪武儒者經綸之盛。太僕公石門洞謁誠意祠堂詩有云儒者經綸盛一時又非所謂百慮一致殊涂同歸也哉。太僕公書湘巖贈石門僧寶殊序行楷卷後曰此書婉媚娟好似極意效趙王孫者。先君子偶觀舍人以廷試卷臨黃庭經小楷墨蹟歎其書法迺古直接晉人糸以





詩云、柔豪踴楮寫黃庭、晉帖唐樑見典型。雲黯括蒼仙鶴去、更無人賦定香亭。光緒青田縣志官蹟傳稱湘巖工書畫、而儒林傳不言舍人兼擅翰墨、藉此可概見耳。小鶴之爲仁王山展墓圖、嘗徵時賢賦詠、太僕公二絕云、橫目紛紛亦可哀、令威城郭隱蒿萊。湖州博士風流在、猶有詩人上冢來。白頰長眉記昔年、酒壚容易隔蒼烟。湯張姚葉皆黃土、何處青山一惘然。白頰長眉與秦小岷所謂貌癯而精悍之色、常露眉宇者、並想見舍人風度。而益陽湯海秋鵬、建甯張亨父、際亮、漢軍姚秋士、斌桐、歸安葉筠潭、紹木諸先生、皆同時詩流。太鶴集中有題亭於太僕公又嘗爲清侶者也。嘉道之際、吾瑞前哲之以文字交舍人者、自項雁湖、方雪齋外、有敏齋觀察培厚、石笥孝廉從炯、二林氏、而曹秋槎、孝廉應樞爲舍人高足弟子、敏齋官翰林時、顏其京師寓居曰寄雲客舍人、爲撰寄



雲廬記。蓋在庚午、辛未間。石筍蹤跡尤密。舍人之在沽、在霅、在都、每同作客。今檢兩家集中頗多酬復之篇。如玉甌集題鷗莊消夏圖。舍人教授歸安所居曰鷗莊。太鶴洞天石歌。石得於學署已見本譜。石筍此溫瑩作淪縻色表裏皆花木紋或曰此蘇頌花石之祥也抑少陵豆瓏中物耶又小鶴復爲此石補圖徵詩見曹秋槎梅雪堂集。題樸山先生清溪坐隱圖遺照及太鶴集題珠江買醉圖各首似爲青瑞二邑徵文者所不可廢歟。余家所藏漢趙綰仔印繆篆拓本及晉太康甄硯舍人故物也。先君子記其事謂卽爲錢唐何夢華文學所得。此本卽夢華手拓以詒舍人者。有舍人手跋。頃從舍人家購得之。甄出湖州與馮登府浙江甄錄載鈕氏所藏甄文略同。又端木舊藏尙有漢永建殘甄後歸周伯龍丈瓏。晉黃字甄後歸黃叔鏞丈紹第。咸康甄後歸林若川丈向藜。永和甄後歸張蔚文丈蔚。並見戴咸弼東甌金石志。則一門遺事有關瑞安收藏家

源流者也。木厂出示此帙，因略舉平日所窺於先著及他書者，雜綴數語於其冊尾。時余僑居永嘉之九柏園樓，掩卷之餘，孤亭坐對，默誦青山積穀之句，益不能不悄然以思焉。甲戌八月既望，孫延釗識。

校記

①想：當作「訪」，見上文嘉慶十六年條。

②著龜：據上文當作「著龜」。下同。

③所：當作「指」，見下文道光十六年條注引端木國瑚《自識周易指後》。

④封：當作「卦」，見右引。

⑤襲定庵：當作「襲定庵」。

⑥陞：當作「陞」。

⑦以上二句疑有誤。

⑧億：當作「憶」。

⑨人：當作「又」。



需 藏

太鶴山人年譜 跋



# 俞理初先生年譜

王立中 編撰

蔡元培 補訂

楊世文 校點

郭齊 一審

李文澤 二審

民國年間鉛印本



《俞理初先生年譜》一卷、譜餘一卷，王立中編撰，蔡元培補訂。民國年間鉛印《安徽叢書》本。

俞正燮（一七七五—一八四〇），字理初，安徽黟縣人，清經學家。性好讀書，過目不忘。道光二年舉人，晚年主講江寧惜陰書院。治經以漢儒爲宗，於史學、諸子、天文、輿地、醫術、星相及釋道之說無不探究。常備巨冊數十，以讀書所得分題記載，斷以己意，成《癸巳類稿》、《癸巳存稿》，論事有見識，不拘於世俗偏見。

王立中，字叔平，安徽黟縣人。

蔡元培（一八六八—一九四〇），字鶴卿，號子民，浙江紹興人，著名教育家、學者。光緒間進士，授編修。早年嘗任紹興中西學堂監督。後與蔣觀雲等發起組織中國教育會，與陶成章等組織光復會並任會長，任同盟會上海分會會長。一九一二年出任臨時政府教育總長，宣揚新教育觀。赴法國，與李石曾、吳玉章等倡辦勤工儉學會。一九一七年任北京大學校長，後任國民政府大學院院長，改任中央研究院院長。抗戰爆發後，與宋慶齡、魯迅等組織中國民權保障同盟。其著作編爲《蔡元培全集》。

此譜編列甚備，前有總目、書影、蔡元培跋、王立中序、例言、敘錄、譜主著書目錄、稿本及批校本目錄，後有譜餘、譜餘補、詩文補遺，一應俱全。據序跋，蔡氏初擬編年譜而未脫稿，王氏之譜乃先成。蔡氏以爲王譜較其初稿爲詳贍，遂就王譜加以補訂而成此編。序、跋、例言除交代編例外，並論及譜主思想學術之大端，讀者可參考。該編事無鉅細，已盡力搜羅。然材料以本人詩文爲主，似尚未博採。著述繫年詳確，且時有考辨。但行文中詳舉出處，有繁冗之感。其早年事蹟則甚簡略，多推測之詞。無事蹟者，往往充以無直接關係之他人他事，如包世臣生、李兆洛生、編《四庫全書》成之類，似有尚待商定之處。又，本譜原刊時附有譜主像、手蹟，文中並有（）、□等標點符號，今均予保留，以存其原貌。

總目

遺像

墨跡影宋本說文繫傳序  
劄記一頁

序

例言

叙錄

著書目

校書目

年譜

譜餘



儒藏

俞理初先生年譜 總目

補遺

跋



儒藏

俞理初先生年譜 遺像



重刊影宋本說文繫傳序



許氏叔重當東漢結說猶存之時博采通人誤說文解字。後為小學所取法。呂忱字林出頗有新義。唐重書學兼用說文字林。學徒傳錄。多解混之。李陽冰又以己意刊正。唐人引說文已雜呂李說。至南唐徐氏兄弟鼎臣楚金為說文學始專家。楚金就書殿之書校定作繫傳。鼎臣入宋見秘閣書較廣。承詔校定自為一本。後人分述大小徐本是也。小徐不喜李說多辨論。今繫傳依疑義其字不當在通釋者及宋雍熙時詔附益者皆有之。蓋宋人也。合併之。許氏解義者



讀二本又互有多少。是誠讀說文者不可不兼覽之書也。說文存世者僅徐氏二本。二百年來。大徐本學者能有其書。獨小徐繫傳無善刊本。道光丁酉。壽陽祁春浦侍郎視學江蘇。聞有佳寫本。欲刊示學者。余以有盜小學之書。多一本即得一本之用。約共成之。乙亥秋刊畢。其郵借更補之勤。及作校勘記。侍郎序武進李中耆前輩跋。已詳其事。故惟述小徐之有釋說文。當為流布者。為之序。道光十有九年十月。



子知

此是我國主

永豐里 第十居

一、國之計、衣、食、住、行、

國司轉送城注國主

東城兵馬司及唐

大學士翰林院中書

科  
考  
制

西遊記

今所行孫行者西遊記山陽吳承恩撰淮賢文目載

去者去來者來王侯無定國相奏為

女卷中既習聞而後方

相愛惜。与竊共榮。天神。希聖。非冀。

罪而不忌，雖考情与主共知，美老

有旨詞本劉克莊跋

求長生福壽它業

我便是死誰管得。

吳仁傑集汝陽王漢公詩序作石杯

窪様、以察 五ノ其ノ之 大老尹 三字景

不知何年至此城壁

大、集仙保能夫人福壽宮大德壽君中央聖老君有  
其老母恩恩懷夫人玉手有子

言導通丁，然居則以為

引其說守素真人之徑若中興黃老

及上卷卷末

惕愴決經世不惑七

墨跡三

# 俞理初先生年譜跋

余自十餘歲時得讀俞先生之癸巳類稿及存稿而深好之。歷五十年而好之如故。欲爲俞先生作年譜。苦無四養齋詩集。吾友程君演生爲於王君立中處覓得一冊。王君且以所藏之俞先生劄記一冊見借。又貽我以俞先生遺像之印片。程君又爲我覓得俞先生及其弟正禧之鄉試朱卷。於是參考之材料稍稍具矣。乃寫年譜初稿。然尙以爲未備。欲再有所輯補。經年未脫稿。王君不及待。乃自爲之數月而成。以示余。余以余之初稿對勘之。王君之稿較爲詳贍。余稿中有若干條可爲王君補充者。徑補之。以致



程君附印於安徽叢書二集中俞先生手訂本癸巳類稿之前。賴王君之精進，成此年譜，何快如之。

抑余猶有不能已於言者。余之崇拜俞先生，有最重要者二點，分述於左。

一、認識人權。男女皆人也，而我國習慣寢牀寢地之詩，從夫從子之禮，男子不禁再娶，而寡婦以再醮爲恥，種種不平，從未有出而糾正之者。俞先生從各方面爲下公平之判斷，有說明善意者，如類一（即癸巳類稿卷一）下倣此。（大象傳后義說、泰傳復傳、姤傳之后，皆周之王后。類十二並配義以繼室，宜並配。存四（即癸巳存稿卷四）下



做此。女子稱謂貴重，以娘子爲一家尊稱，託意至高。同卷姬嬭謂「姬者美女之稱，貴妾呼嬭，若以爲主母之姊妹也者，卽古之娣媵，又以明女君不妒忌。」類三娣姒義謂「娣婦其位，娣姒其年，禮本人情，必各遂之，其義始備。」類十三妒非女人惡德論謂「夫買妾而妻不妒，是恕也。恕則家道壞矣。妒非女人惡德，妒而不忌，斯上德。」存四女謂「白居易婦人苦詩，其言藹然。莊子天道篇堯有嘉孺子而哀婦人之語，書梓材成王謂康叔敬寡屬婦，合由以容之語而歎爲聖人言，以天方典禮有妻暨僕，民之二弱，衣之食之，勿命以所不能之語，而悟持世之人，未有不

計及此者。」類七釋小補楚語筭內則總角義謂「可觀古人尊長諒幼之意。」存四額黃眉間黃謂「嘗求相法女人妝飾皆是好相。」類三女吊墳駁義爲弱女證明無遠吊之責。類十三貞女說謂「男兒以忠義自責則可耳。婦女貞烈豈是男子榮耀也。」存十三亳州志木蘭事書後以木蘭代父爲師都戍而不肯入師都宮爲合於孟子往役禮也。往見非禮也之義而歎爲眞女士。同卷尼菴議證明女身可受記爲如來可化爲金輪王可轉身爲釋迦文佛爲彌勒佛。是皆從理論說明女權者也。有爲古人辨誣者如存一廣解謂「棄婦能念其夫愈是賢。」存一魯二女



以爲妄人所誣，故爲證明之。同卷息夫人未言義，以未言爲守心喪禮。楚樊姬、涼武昭王后尹氏亦然。類十二書舊五代史僭僞列傳三後對花蕊夫人謂「能改齊漫錄之別護送，聞見之頗示寵鑒，戒錄之妄詆徐后，皆誣覺不成人美。」類十五易安居士事輯謂「素惡易安改嫁張汝舟之說，不甘小人言語，使才人下配駟儉。」又謂「至後人貌爲正論，碧鷄漫志謂易安詞於婦人中爲最無顧藉，水東日記謂易安詞爲不祥之具，此何異直不疑盜嫂亂倫，狄仁傑謀反當誅滅也。」有爲無告訟直者如類十三書舊唐書輿服志後謂「古有丁男丁女，裹足則失丁女，



又出古舞屣賤服、女賤則男賤。」類十二除樂戶丐戶籍及女樂考附古事謂「除樂戶之事，誠可云舒憤懣者。」存十四家妓官妓舊事，以楊誠齋諱妓面，孟之經文妓鬻爲「虐無告」，無一非以男女平等之立場發言者。

二、認識時代。人類之推理與想像，無不隨時代而進步。後人所認爲常識而古人未之見及者，正復不少。後人以崇拜古人之故，認古人爲無所不知，好以新說爲古人附會，而古人之言反爲之隱晦。俞先生認一時代有一時代之見解與推想，分別觀之，有證明天算及聲韻者，如存三與程君式金書謂「學當知古今之分者，天文測算小學



聲韻二家。劉向之賡雅。且以夏歷不合爲僞。劉歆引經以證其術。後人又以時法說經。經義遂晦。依經立義。則疇人子弟妄等之。嘗謂以渾說經。則亂經。以經子證算。則亂算。經自有法。鄭以緯說之。是也。大明自有法。劉宋所行者。是也。算自有法。今算學生所用者。是也。言小學者。不知聲音遞變。好言古音。又多不問古人作文字之意。略有所聞。輒欲執古改今。又不精審。竟成醜謬。見人強言字母。而自跲於方言。欲彼此不相曉。是人。不須有言矣。更何須有音韻。又何問音韻之當否乎。類十書開元占經天體渾宗後。謂「天部之學與音韻之變。或世異地異。不能強

同。說經者引王蕃注天，依廣讀定讀，皆所謂無是非之心者也。「有專言天算者，如類一光被四表格於上下古文，說謂一緯書所言與算經事事皆合，經緯俱用蓋天也，其率周三徑一。後世王蕃祖冲之更開密率，則虞夏史臣所不及知，不得引後證前，失其本旨。」「今求渾天，取蓋天第四衡，其外則反之，無所謂四表，其法今是而古非。然古人已非矣，不得掩其非而沒其意。」「故鄭說經專采緯義，不涉渾天，正如書之王位，不得以漢唐之王當之也。」類十蓋天論謂「今求之經傳，諸子史記太初憲以前皆蓋天。蓋天實疏，不勞後人飾之。」「蓋天但無南極，故與後



人之說全異。三國以後矜言渾蓋通憲甚無謂也。」同卷史記用蓋天論謂「渾天之說誠是以之說漢書則不可。况以之說史記又進而說經乎。又况以回回西洋所得之數說經。夫知古而不知今與知今而不知古皆疏漏之說也。」存六天門謂「乾位在西北以天門所在蓋天之說也。渾天則不然。故說經宜通蓋天。……不知蓋天則經子皆可疑矣。」同卷燭龍謂「經緯子及佛書皆蓋說後人治渾乃好引之。非特亂古直自亂其算。二千年來術士不悟也。」存六日長短論謂「渾天日月高下里差不可以說蓋天。」類十古憲論謂「減四分求交食定歲差乃後人

推得古人本所不知，非其術僞也。」「自古經傳皆各用其時憲法，雄（揚雄）烏從豫知後世有承天法？且承天法後亦不驗。自蔡邕以後，世法說月令而注與經背。久之，時術又改，展轉相謗，其法亦廢。是經義終不能明。注說又不可用，無益於術而有害於經。是故說經傳者當知其時，布算立度而各申其旨，則於天學沿革當明古憲，不可不知也。」「七政西移，自一代之法……說夏書者必宜知之。而後儒以概唐虞商周，又宣明太祖之漫斥之。蓋惟夏憲則可以七政西移言之也。」「梁人刻漏經以佛法九十六刻爲古初，亦不悟古今各異制，妄造故實也。」「古憲



不可行於後，後世之法亦不可以說經。蓋術雖工，非經本意也。」一事有沿革，貴好學深思，心知其意，循文求義，各申厥旨，而後進求精密，庶亦舉妄破經義，詆毀古憲二千年之陋習而空之。」同卷天事闕疑說謂「東漢言聖人記日食者以正失朔，不悟聖人並不知日食而合朔也。」一日食與復，三代聖人尙未能知，由積測未至。後人不知當時之意，乃爲聖人展轉諱之，則妄矣。」一日食定是合朔，而古人則定不知也。」同卷恆星七曜古義謂「漢人所創之法，不可以說三代古書。」類三中星鄭義謂「書禮中星不同，後人以歲差解之……歲差非作書禮者所能



曉。」類十六壬古式考謂「凡術當順天以求合不可爲法以改天。古人制法適與其時天行合。」存六天九重謂一天以十二重布算其法精密。然以說經則經文當改抹矣。言九重者則在中古。」古人測候未全非故爲其疏也。」同卷歲星謂「鄭言小周服言龍跳天門以後世所推者說古古人實不能知也。甘氏所推已有遲伏若緯止言歲行一次與經傳合。古法疏故謂之歲。後法密當曰木星不當曰歲星矣。」類二啓明長庚古義謂「今法作詩者所不曉古法則如此。」存六日月古證文答宣城張徵士炯謂「古今名義不相蒙者儒者當知其意。知春秋時



吳楚而疑今名江南者、非也。知今江南而疑明名直隸者、亦非也。日月之說、宣城定九梅先生之言是矣。元明人之言是也。然古人測之未詳、就其所見言之、亦是也。」有說地理者、如類一揚田下下說、謂「揚州田下下、荆田下中、梁下上、此卽禹作貢時地力言之也。」年久土復、而揚荆梁三州之田、皆後世之最上者、地力不同故也。」有說禮制者、如類三周鄉遂田制義、謂「遂人匠人、一以夫計、一以井計、事本不同、制無緣合。大司徒助制、遂人大司馬貢法。周官貢不爲井、後人欲以己意井之、遂改說周官、使不可通。」陳祥道、鄭樵謂遂人匠人之制、無不合者、不識數

矣。」類三古命於廟義謂「古者爵命必於祖廟以祖孫同廟故就之。王制云爵人於朝秦漢之制祭統云古者明君爵有德必於太祖乃漢時儒生測度之言。」類三鄉興賢能論謂「說者引唐事以況宋已爲不達況引周事以繩明選舉經義益荒援據失義矣。」類三媒氏民判解謂「此令也非禮也。禮不下庶人令言其極不是過以令爲禮則文義不通。此經文之時久矣。令各有爲制各有時不可不察也。」類二問名義謂「婚禮問名者太古相傳之禮而記云問女爲誰氏則周禮也。」有證明古書詞例者如類二兄弟辭解謂「閔元年傳子女子云以春秋爲春秋



今以公羊爲公羊，當如此。」類二春秋書比月日食義謂「時無推日食之法，失在策書（謬複）。孔子不能追改，以春秋爲春秋。」類三君子子解謂「以君子爲貴人，周人之語也。」同卷食之者寡義謂「聖人必重農，然書各有義，大學實不曾說重農，不必改財貨爲米粟，失古人本意。」類七書隱三年左傳後謂「貳叛弑古語，上下共之。秦漢以後始定於一。今讀古書多險詞，當知古今之所以異。」同卷補儀禮篇名義謂「白虎通云王太子亦稱士何……是東漢人不知古言之證……古人愛之則曰士，惡之則曰夫夫也。美之則曰如處女，譏之則曰婦人也。古言茫

昧意則可知。吳越春秋云、貞明執操其丈夫女哉、出辭倍矣。且此女三十未嫁、子胥何得呼爲夫人、尤作書者東漢人不明古語之證。類十一百里奚事異同論謂「奚實賢者、後人喜稱說之、增加事蹟、不能強同。」商君傳自是趙良之言、史載其言、不得改之。困學紀聞引范太史謂還言自爲違異、此范亦可謂不達史體矣。同卷秦漢亥正記事記言說謂「封禪書於是秦以冬十月爲年首、又云高祖以十月至霸上、因以十月爲年首。此記事之詞以作者時所謂十月追名之、則易曉也。封禪書又云、高祖十年春、有司請令縣常以春三月及時臘。此記言之詞、依其



言記之不失實也。」類十二書五代史馬縞傳後謂「讀者不察古今語言文同義異之致乃疑古事矣。」類三鄉射堂義謂「敖繼公集說云記言出東房是必有西房有室。此本於朱子儀禮釋宮注乃宋元人作室法周公所不曉。」同卷旁三義謂「宋元諸儒所言左右旋乃僧義淨法與東西南北經緯之改自西法者誠各有意然必不可牽之以證三代舊書也。」其於引後證前執古改今兩方面之謬誤言之重詞之複可謂詳盡而透澈矣。

右二點外尚有可附記之一點。張石州序癸巳存稿稱「理初足跡半天下得書卽讀讀卽有所疏記每一事爲一



題巨冊數十，鱗比行篋中。積歲月，證據周徧，斷以己事一文遂立。一可以見俞先生準備成立之方法。然此等一事爲一題之稿冊，尙未得見。而所見者有一劄記，卽王立中君所藏者。其體例於讀書時隨筆疏記，標題之有無不同，而以聯想所及之材料附之。其他時所得，則書於別紙而簽誌之。蓋此爲最初之疏記，而張先生所舉之巨冊數十，則第二級之疏記也。附記於此，以覘俞先生工作之一例焉。

中華民國二十三年五月五日，蔡元培。

# 序

吾邑俞理初先生引江戴之緒學貫九流口敝百家性介家貧手成官私弘巨著述等於傭力不自署名其癸巳兩稿甄錄繁衍又或視同補苴裝續之業故李元度氏國朝先正事略并其名而無之數年來擬輯先生年譜顧山居徵集羣書極感困難去年春蔡子民先生介吾友程演生兄徵予所藏俞先生手寫劄記謂方編訂年譜私幸鄉先正學術得通人以張之則急郵致所藏供其甄采顧遲至年餘音息寂然則不自揣鈎稽各書年月件繫費三月之勤草稿粗就鄙意尤所屬目者則凡不自署名之書必細



細稽討、指出證據。蓋先生年二十餘卽饑驅南北、旅店篝燈、蓬窗安硯、船唇馬足、不廢著述。畢生勞苦、倘并此後世之名而亦湮沒之、旣短後賢之望、尤不足以瞭解先生學術之全。山中藏書旣極儉陋、而月躊躇、幾中輟者再。稍引其端、集證尙猶有待。倘子民先生不斥其謫劣、指正之、補充之、俾俞先生思想學歷顯白於學者後世、豈僅區區之私幸已哉。

民國二十二年歲次癸酉冬月、叔平王立中書於城南草堂。

# 例言

癸巳類稿二百四十九篇、存稿五百五十六篇。類稿爲先生手自編訂、存稿亦一本前例。雖未分類、實以類相次。然署年月者不過十之二三、其重要撰著既無法證其歲月、除錄程侍郎序外、輒就譾陋所及、摘錄原文、稍加案語、爲叙錄若干條。其單詞片語之有關真性者、亦甄錄一二、以概其餘、冀爲讀先生書者先導焉。

凡不署名之官私著述、必鈎稽博考、一一指陳其歲月。如五代史記補注、續行水金鑑等、一經抉剔、則鑿然無復疑義。寒士辛苦著述、并此後世之名、猶復湮沒之、是亦予輯



儒藏

俞理初先生年譜 例言

先生年譜動機之一。惜山中徵集圖書極感困難、海內鴻學尙希不吝指示。

先生著述分現存、不自署名、亡逸三類列目、而草稿批校本確然知其歸宿者與書爲某人校者、亦一一詳列其目、庶有以攷信焉。遺逸詩文或墨跡或見於他籍、另爲補遺一卷、附之譜末。予藏先生手寫劄記一冊、因字過多、擬另輯出、別印單行、名曰俞珏初先生丁酉劄記。

先生之沒、去今已百年、文獻凋零。立中雖生同里、而蒐羅材料、乃極感枯窘。如可亭先生何時到官、句容元配王氏繼配萬氏娶在何年、卒在何年、中秀才之選、又何年、二

子懋堂懋穎生卒年月譜例必一一詳載。竟付闕如。據竹瑞堂詩鈔。哭先生詩。曾爲劉金門入幕之賓。事在何時。又據癸巳類稿。嘉慶二十年。曾客休寧縣汪氏。一年所纂何書。近在隣縣。傳自同時鄉人之口。竟不能詳。諸如此類。待補尙多。是則有待於吾鄉好學喜讀先生書者。隨時訂補也。

編纂此譜。胡敬庵先生。從勉最力。並介俞氏族人。助其蒐討材料。例應誌謝。





## 敘錄

清儒考證學對於學術界貢獻最多，其治訓詁也，往往一字音義列證至百餘，精確無以復易。先生生當乾隆末葉，經學方面，諸老宿已有至優成績，似無發展餘地。輒利用前輩治經歸納方法，向多方面發展。對於歷史糾誤辯証疏證，用力尤勤。如韓文靖公事輯、易安居士事輯，篇各五六千言，引書至數十百種，爬梳排比，鈎稽年月，無一字無來歷。非淹博強記，有十百人之力，何能一氣呵成。較之治訓詁，白懷疑而懸一鵠的，遇同此鵠的者，輒疏記之。積年累月，證具義定。此則散在羣書、正史野錄、故書雅記、方志

目錄、詩詞、小說、書非一類、事非同時、非胸蘊羣籍、無由標其鵠的。非定一鵠的、又不足以貫串之、綜合歸納而情實昭然、詳與誣、不待駕詞雄辨。梁啟超氏謂先生之學長於局部考證、予謂此種歸納方法用之於史、清儒僅先生一人、全部著述均以此法治之。如百里奚事異同論、書宋史、梁顥傳後、關內侯說、漢南北軍義等篇、皆史學方面重要論著也。

不獨偏於考古也、卽近代史料如駐劄大臣原始、總河近事、喀喀爾喀、伊犁、阿拉善、書西域見聞錄後、除樂戶、丐戶籍及樂女考附古事、書舊唐書輿服志後、木棉考、均旁推



互證、證無贅義、爲後人治政治風俗經濟史者省無限精力。而少吏篇上下數千言、條舉其制有五善、一以知閭閻善惡、以徵調軍旅、以知戶口賦稅、以察奸弭盜、用爲官役、一疏明歷代利弊之跡、十八九猶可行之於今日也。

戴東原著孟子字義疏證、醞釀故訓而出、予朱子以重大攻擊、承其風者、至毛舉纖細、卒之有漢宋門戶之爭。癸巳兩稿對於宋人性理極少討論、惟皇極篇引朱子云「天卽理也、又云性卽理也、此粹然儒言、」對於朱子從未顯攻其短。如書古文尙書冤詞後、一枚書固宋以來言精言微、言心性者之資糧也、而朱子獨以爲疑、嗚呼卓矣。「卦



變篇「古今言易者鄭虞之外惟朱子耳。」惟對於宋人惑經誣古則必辯。「五代宋時有陳搏關朗種放邵雍劉牧之圖一爲九圈一爲十圈。陳以十圈爲洛書關以九圈爲洛書。蓋道士見聖人受命紀年則亦有延康龍漢之號。見聖人設官分職則亦有金闕上相之名。見僧徒撰有蘇由闕澤誑主之言。陳搏終南太乙碑亦撰漢武帝詔問有司奏案。道藏三洞要典云太乙元君作九天之祖母其諸太乙則居衆辰之首萬曜之先爲天皇上相。見儒家易經有云太極河圖洛書陳搏亦言秘傳有太極圖又別有河圖洛書。今世通人謂宋洛書是太乙下行九宮不知彼所

謂洛書者本十圈也。宋人以八卦九疇爲妖妄，而反用九圈十圈之圖，請得質之。古所謂圖，五代宋所謂畫也。古所謂書，五代宋所謂字也。今九圈十圈之圖中無一字，止應名爲河圖洛圖，何以謂之河圖洛書乎？此道士無智之論，雖蘇張復生，不能爲之解也。（存稿卷一洪範洛書義）「大學本漢時詩書博士所雜集，後人誦之不熟，乃始有紛紛之論，至塗竄其文，深滅其誠意之義。宋人改之，謂是曾子撰，明人改之，謂是子思居衛撰。又謂其說出於賈逵，使曾子、子思、賈逵沒世後，又增一篇文字，爲尤妄也。」（存稿卷二致知在格物）「不寧惟是，凡魏晉儒誣古，亦必辯如





「魏王肅、何晏、王弼、晉皇甫謐、唐啖助、趙匡、陸質、宋孫復、王安石、此九人者、蔑棄典文、幽沈仁義、游辭浮說、波蕩後生、使易、書、禮、春秋、論語舊說盡亂、而王肅最爲精悍、」謂之異端。（存稿卷十四異端）而白席篇謂「通鑑綱目有書法發明等書、續綱目又有發明、廣義等雜于事實之中、卑情諂態、甚可厭惡。容齋五筆云、楊愿佞秦檜、檜食間噴嚏失笑、愿倉卒間亦隨之噴嚏失笑。此等書頗似之。」嘉道之間、國力漸卽削弱、留心邊務、具遠見者、外人制器之精、知非從前隣疆小國可比。先生同時之友、如張炯、澳門紀略、汪文臺、英吉利考略、魏源、海國圖志、癸巳兩稿中



俄羅斯左領考、俄羅斯事輯、荷蘭篇及海國紀聞等，皆不外審敵自鏡之言。而臺灣事輯引清聖祖五十五年十月上諭海外如西洋等國，千百年後中國恐受其慮，此朕逆料之言，尤具遠識。

主張男女平等，喜爲古才婦訟冤。如疏證魯季姬、子叔姬二女被誣，書舊五代史僭偽列傳之後，及李易安事輯均發千載之覆。詩集中更有題昭君圖詩序云：「予於古之美人，獨念昭君及兩莫愁，以爲洛陽豐麗，石城閒曠，昭君則人才多，智謀足，明艷寡雙，而恬淡無營，母儀行國，閱十三載。然而中土人士方且抒忱追慕，嗟失其所，競飾文詞，



爭加事實亦可喜矣。」蓋先生賦性嚴毅短書誣古必辯。事既供麗筆鋒所至文采燦然。三節婦說「男子無再娶之儀。聖人所以不定此儀者。如禮不下士。庶人刑不上大夫。非謂庶人不行禮。大夫不懷刑也。自禮意不明。苛求婦人。遂爲偏義。古禮夫婦合體同尊卑。乃或卑其妻。古言終身不改身。則男女同也。七事出妻。乃七改矣。妻死再娶。乃八改矣。男子禮義無涯涘。而深文以罔婦人。是無恥之論也。」自程子餓死事小。失節事大之說興。寡婦再嫁。士大夫羞言之。方望溪說禮。對於婦人尤多不近情理之論。存稿卷四出夫篇「古人稱名。必其義委曲可通。出兼男女。

則寡與獨亦兼男女。……左傳齊崔杼生成及彊而寡則兼男女也。詩鴻雁傳云偏喪曰寡本是達詁。一蓋先醞釀古義最深持卓見不沿襲後起繆說也。貞女說一後世女子不肯受再聘者謂之貞女其義實有難安未同衾而同穴謂之無害則又何必親迎何必廟見何必爲酒食以召鄉黨朋友世亦何必有男女之分乎此蓋賢者未思之過。一精醫學持素三篇謂一拊翁以來至於小生匝月寤思庶幾神明。一則爬梳靈素整理羣籍先生亦頗自負矣談玄莠書篇一宋蘇軾言每日胸中出少許議論積久便成一書此宋時習派不問是非甚害事也石林燕語云晁迥晚



年耳中聞聲如簣、如雷、如鈴、如潮、如磬、如蟬、如泉、爲學佛仙之驗。按此衰年腎枯之病也。耳脈在腎，骨之本在腎。腎枯則骨之相接處不潤，故精澀神疲，喜按摩，欠伸，頭骨不動，腎枯則頭昏失志，骨之湊理磨響，耳根自聞之，乃以爲妙。此種議論，雖少許，然不如不出也。」

先生信鬼神，有非無鬼篇。「聖人能饗帝，孝子能養親，獺亦祭魚，豺亦祭獸。自人以至禽獸，皆明鬼也。娶妻如之何，曰共事宗廟。軍旅曰社稷之事，田獵曰宗廟之豆，聘曰不腆先君之器幣，和好曰徼福於先君，征伐曰先王之鐘鼓。自絕地天通，以至每飯必祭，古今明鬼也。自四郊迎氣以

至大難逐疫、善惡皆明鬼也。」而駱君小傳明明見鬼繪形繪聲。嘗云、「自蓋天學隱、儒者習於游詞、始不足與知鬼神之情狀矣。」言黃大王傳、「過兩壩三閘、得兩神佑。」誦佛經上下篇。「或曰誦經以求來世之福、則真妄矣。以愚度之、此說又可信。古之取士、射中者爲諸侯、後之作人文、高者得美仕、於治民平訟、蓋無預焉、而不費顯達。佛於鬼神爲近、端誠誦經者、自當留勝因矣。」則筆端尤挾憤懣之氣。下至六壬占經、相術推命、無不探本窮源、辨列雅僞。嘗謂「通人不專家、專家無通人。」真確論也。

俞理初先生所著書目錄

癸巳類稿十五卷

道光十三年求日益齋刻其板今猶存俞氏家祠聞頗有蟲損

癸巳存稿十五卷

靈石楊氏刻入連筠籀叢書光緒甲寅縣李氏刻今其版猶存李氏

四養齋詩稿三卷

咸豐二年姪懋麟刻板佚

不自署名編纂之言

御纂春秋左傳

道光六年爲程恩澤祁寯藻纂

五代史記補注七十四卷

嘉慶九年輯署彭元瑞劉鳳誥同撰

續行水金鑑一百五十六卷

道光十年十一月爲張井纂

湖北通志

道光十五年林則徐聘纂未見原書不知署何人纂姑列于此

大清會典

嘉慶十年爲葉綬選要纂





已佚之書

說文部緯各一卷

校補海國記聞二卷

宋會要輯本五卷

俞理初先生稿本及批校本目錄

癸巳牘稿一卷 見藝風藏書續記卷二。惟繆氏書已散出。今不知歸宿何地。原跋遂錄於下。

俞氏手跋曰。潤巨與其兄崑巨爲正燮理癸巳類稿已付刊。丙申夏。潤巨索此牘稿。欲寫存之。笑與之約。得清本。卽以與正燮。而以此草與潤巨。其與否。想必肯也。丙申六月初九日。正燮記。

癸巳存稿三冊。竟留尊處。弟攜另寫本去。冀有所增益。以謬承譔愛。乃不知其醜瑣瑣奉瀆耳。日來無事忙語。無條理事。無頭緒。此其所短也。噫。此卽問近好。祝頌不



儒藏

俞理初先生年譜

稿本及批校本目錄

宣。正燮頓首。七月十六日。

胡氏手跋曰。黼俞理初先生所著癸巳類稿十五卷。南通州王氏爲之刊行。世多有之。未刻者曰存稿。張石州明經亦編爲十五卷。靈石楊氏刻入連筠簃叢書。而流傳甚少。昨歲獲一刻本。因借趙撫叔同年得諸葉氏所藏稿本三冊對勘。知張明經所刪不止積精一篇。尙有魏新字等十五篇。實共刪去十六篇。內除板闌喻及時憲書後葉兩篇與類稿所刻。乃別錄存之。冠以原目。而刻本增多四十三大數不同。於是先生之稿咸完。具無遺失。同治八年己巳二月。郡後學胡澍書於京都大吉巷寓齋。

手寫劄記一冊 現藏立中處。壬申春，蔡子民先生曾借去影印數頁，立中嘗跋其後，茲錄如下。其未刻者，擬繕寫另印。

去年冬，書友來談，謂荒攤上有殘書，內有寫本一冊，索價昂。予亟偕往觀之，審爲鄉先正俞理初稿本，亟收之。頃細細翻閱，係道光十七年五月至八月讀書隨手劄記之本，凡經義史例、朝章雅故，下至藥方雜碎、詩稿律例，無所不記。其墨筆鈎勒者，已刻入存稿，爲用紙條一一標出。詩則上加珠圍者，已刻入四養齋詩稿，餘均未刊。因此而悟治學之法，則凡讀一書，須眼銳筆勤，觸處



儒藏

俞理初先生年譜

稿本及批校本目錄

旁通、由單詞片義多積而歸納之。立一說則上下古今言必有佐證、證必辨真僞。雖以俞先生之目下十行設不如此勤學勤寫、恐亦不能成其宏通博雅之造述也。予讀書半生、無一手抄之本、對此能無愧死。

稿中標年月凡三處、一、右讀元詩、在漢上偶錄之、丁酉五月初五。二、丁酉七月初四日讀青箱雜記抄此數行。三、道光丁酉八月二日丁未記。此三語可爲佩。時在夏江夜未涼。按、丁酉爲道光十七年、先生年已六十三矣、而猶勤學銳思、細書潤密如此。丙寅

批校本書集傳 書爲崇道堂刻本、朱筆批校、藏立中處、



跋如下。古文真偽爲六經中一大案。至閻若璩尙書古文疏證歷指枚本剽竊所自出。本成信讞。俞先生謂閻百詩說古文醇疵相半（見存稿卷十二箚園日札序）此批本更廣引羣書證枚本割裂雜湊。疏比指實強辨如毛西河亦當關其口矣。文繁不徵茲摘錄禹貢篇糾正宋儒說若干條。蔡傳案桑欽云周定王五年河徙矜磔校云無矜磔地此本河徙注云今濞耳。（按此或宋本經注相混未經董理以前實如此）蔡傳蓋禹河自澶相以北云云批云此言誠通人之論但宋人南渡後不知河北地理澶相東去西山甚遠無山麓也其時河



行今真定地耳。大陸在真定無疑。集傳漢王橫言云云。批云此言可信。青州之遼東中斷處是也。集傳遂有味別之說。批云此等言險而無理。聖人寧不知味乎。但蘇說本不足取。蔡駁尤不似儒者之言。集傳錫者必待錫命而後貢。批云史記集解鄭曰此州有錫則貢之錫所以柔金也。考工記攻金之工執金錫之齊。集傳今詳漢九江郡之潯陽云云。批曰此等議論由不詳古今地勢耳。史記河渠書云余登廬山觀禹疏九江則爲今鄱陽上流審矣。東陵地志云在廬江金蘭縣西北在今河南固始地。豈得以宋時水流言之反謂古人非乎。其誤由



鄭樵地名不同、山川不異二言耳。集傳、地志、水經云在安豐者非是。批云：在安豐自是確義，乃云非是何異閉目而談黑白。集傳、山甚小而卑云云。批曰：此義又非矣。禹貢不必皆取大山，自言岷山所盡處耳，與廬山何涉。集傳西北皆以黑水爲界云云。批云：黑水出南廣縣，可入南海。又鳥鼠山西有三危山，近岷山，見漢書，相如傳注張揖說。集傳既非從東折北之高地，批云：須知禹貢黃河由此北折，載之高地，鄭氏不得誤也。集傳今廬江之北云云。批曰：此言正確。以北江證之，朱子之才智過人遠矣。但後多轉折耳。集傳孔氏曰：鳥鼠共爲雌雄云。

云批曰、確是二山、亦確有此事、亦確見於經、確可信。今人或亦詆蔡注、謂是一山。今山東人呼華不注爲鵲花山、土人名同一例不足據也。華不注去鵲山三里。而武成篇批云、枚本之意、自惟一月至弗服、是言武功成也。自丁未至承厥志、是以武成告神告天下也。自底商之罪至大定、是告成言終、更序其事也。自乃反商政至天下治、是言所以大定之德政、無所謂錯簡。正義云、既戊午之上、失其本經。史叙戰事、當承于征伐商之下、而此句次之。言甚妄誕。宋人好言錯簡、遂從而大改之。不知此經此傳皆一人所作、並非古書、更無錯簡之理。且各



儒藏

俞理初先生年譜

稿本及批校本目錄

段字數參差不合一簡如何致錯。程朱於此亦千慮之一失而蔡氏和之可愧矣。此本攜往江西遭匪遺失見城南草堂曝書記前跋。今竟尋獲豈鄉先生精神所寄真有神物呵護之歟。擬影印以廣其傳庶永無後悔也。  
甲戌

校本六臣注文選 書藏立中處。予有跋載本譜道光六年下。

校禮記集說 書爲崇道堂刻本藏立中處。有校正置算兩條依樣逐錄於下。王制古者以周尺八尺爲步一節注校云此疏置算誤。所謂愚案者誠愚案也。鄭注云

當百五十六畝二十五步其數至確。疏何解而不依之。  
陳澧又刪之可怪也。

古步積六千四百寸。今步積四千零九十六寸。

畝六十四萬寸。畝四十萬零九千六百寸。

百畝六千四百萬寸。百畝四千零九十六萬寸。

五十畝二千零四十八萬寸。

六畝言四十五萬零六百寸。

二十五步十萬零三百寸。

恰合古百畝積寸之數。卽依疏又八折計之亦合。不知  
陳孔何處尋有畸零也。

此里數亦經誤，不得有分數也。

言步六尺四寸 里三百步 二百四十丈 百里 二萬四千丈  
今步六尺四寸

今百里 一萬九千二百丈

二十里 三千八百四十丈

五里 九百六十丈。此係鄭注，其數至精。

孔疏悖注，且其數尤謬。今依其說推之，亦與其數不合。

古步六尺四寸 里二百步 一百九十二丈 百里 一萬九千二百丈  
今步五尺二寸

今百里 一萬五千六百丈

二十里 三千一百二十丈

三里 四百六十八丈





二十步 一丈零四尺

三步 一丈五尺六寸 又四寸合古百里。

又王制方一百里者爲田九百畝上百字朱筆圈去。

爲田九萬億畝萬圈去旁書千字。爲田八十萬億一

萬億畝兩萬字均圈去旁書千字。按癸巳類稿卷三有

鄭數學證義編可參驗。

晚年校改本癸巳類稿 現藏黟縣杏墩胡敬庵先生處。

安徽叢書編印處近據影印。

永懷堂十三經古注

漢學師承記

杜預春秋左傳注

惠棟禮說

張中法正字要說

以上五種均經先生批校見黟縣王以寬氏靜怡山房書目。後被焚有恆心齋竹瑞堂文抄均有序目藏立中處。

校宋本說文繫傳道光十七年爲祁寯藻校。

校顧氏方輿紀要道光十二年爲陳用光校。

校六壬書嘉慶十一年爲楊芳校。

校三古六朝文目道光十八年爲祁寯藻校。



儒藏

俞理初先生年譜

稿本及批校本目錄

校記

①晁迥：當作「晁迥」。按，此段記載見《石林燕語》卷一〇。

# 俞理初先生年譜

山陰蔡元培參訂

黟縣王立中纂輯

先生姓俞氏名正燮字理初安徽徽州府黟縣人其先世概略見先生在嘉慶二十五年所作俞氏世譜序其文如左

俞姓本出俞跗。或言周伯牙亦姓俞。檢呂氏春秋本味篇高誘注則伯氏牙名其姓俞之說無所出。其後吳俞韶賜姓孫梁俞藥改姓喻而俞姓益單。今所知者宋柱國諫臣公墓誌銘言晉永嘉之亂俞氏自河南徙居黟歙見劉公是集而咸和三年蘇峻祖約屬賊韓晃攻今



藏

俞理初先生年譜

涇縣之蘭石宣城內史桓彝遣將軍俞縱守之力戰死。或云宣城人以先籍河間故今河間爲俞氏望。柱國致仕居杭州。慶歷六年返葬歟云從先人居也。是則河間俞氏徙居黟歟可攷者。其姪孫康直字彥之檢鎮江府志人物孝義云從其父希言自黟來居潤州用從祖柱國恩爲太廟齋郎。潮陽主簿。後通判睦州。其先世有田在錢唐讓而不有。則宋時黟已有俞姓而僑居於杭。至彥之公則父子出遷今丹陽而彥直公仍祀黟學鄉賢祠中。我族在黟者祠譜言由婺來居。自明中葉時玄泗公始有世系可攷。初居東門外俞家園。天啓時始建北

街家祠云。（此序從其族人抄出）

曾祖啓侯。祖成溶。父獻字可亭。乾隆四十二年拔貢生。工駢體隸事。尤熟於掌故。曾主講河南聞政書院。（見抄本俞氏家譜）官句容縣訓導。署望江縣教諭。著有星巖集。（未有傳本）母程氏。黟城中桂林人。弟正禧字鼎初。道光十七年舉人。著有薌林堂文集二卷。（未見傳本）正馥字見初。經商於江西。正祺字介初。正樞字佺。（見黟縣志及家譜）

乾隆四十年乙未九月初七日先生生。

先生之父可亭先生二十六歲。（据家譜父母同庚）





包世臣生。李兆洛生。嚴可均十三歲。阮元十一歲。

乾隆四十一年丙申二歲。

五月戴震卒年五十五歲。

乾隆四十二年丁酉三歲。

先生父可亭先生中拔貢生。

乾隆四十三年戊戌四歲。

乾隆四十四年己亥五歲。

乾隆四十五年庚子六歲。

乾隆四十六年辛丑七歲。

朱筠卒於京師年五十三。

乾隆四十七年壬寅八歲。

清編纂四庫全書成。胡培塈生。

乾隆四十八年癸卯九歲。

清修續通典成。

乾隆四十九年甲辰十歲。

王筠生。程晉芳卒年六十七。

乾隆五十年乙巳十一歲。

清修一統志成。程恩澤生。林則徐生。

乾隆五十一年丙午十二歲。



儒藏

乾隆五十二年丁未十三歲。

乾隆五十三年戊申十四歲。

乾隆五十四年己酉十五歲。

乾隆五十五年庚戌十六歲。

乾隆五十六年辛亥十七歲。

先生少時從師何人，徧攷無徵。惟序汪子秀千文音義彙略（此書僅有抄本，原四卷，止存一二兩卷，現藏立中處）云：「正燮少與共硯席。」豈可亭先生亦嘗授徒歟。

乾隆五十七年壬子十八歲。



侍父可亭先生在句容學署讀書。案存稿卷十五駱君小傳云、「時乾隆五十七年五月也。駱縣俞正燮在句容聞之。」按可亭先生何年到句容，因無書查攷，則姑系於此年。其實駱君小傳述曰、「念小時一字一句，駱君皆奇賞之。」則先生初到句容之年似非十八歲，且甚久。又存稿卷十四賊書條「少時見句容名捕居明者」，又句容詩「城南遊釣處，久客認爲家」，（見詩稿卷一）與句容王喬年同撰陰律疑，（見存稿卷十二頤正堂文序）是爲先生試行著述之始。

乾隆五十八年癸丑十九歲。

祁寯藻生。姚瑩生。

乾隆五十九年甲寅二十歲。

乾隆六十年乙卯二十一歲。

嘉慶元年丙戌二十二歲。

先生之友同邑汪文臺南士生。（據程鴻詔氏有恆心齋集黟兩先生傳）道光二十四年十二月壬寅汪先生卒年四十九。由此上推實生於本年。

嘉慶二年丁巳二十三歲。

撰唐律疏義跋（類稿卷十二）其後孫淵如刻唐律疏義雖由顧千里任校勘或由先生發之。十月作史記

十二諸侯年表索隱書後（存稿卷七） 讀明人所刊  
管韓子（類稿卷十四書管子後文中）會通河水道  
記（存稿卷五）中云「嘉慶丁巳秋自汶上汎舟至  
臨清。檢書記之時九月七日也。」  
嘉慶三年戊午二十四歲。

戊午元旦詩（詩稿卷二）句云「身無一藝名，栖栖亦  
所惡。」先生此時已往來京師求學。書難字後（存稿  
卷三）末署嘉慶戊午重陽日，書於鵲兒胡同慎德堂  
北軒中。有云「今略就所集者正之。」則先生治學引  
申歸納之方法，少年時已適用之。九月，書五禮通攷





後。(存稿卷十二)據魏晉以後禮制多本王肅皇甫謐其說不可不采。然宜附所引史志後不宜附經後。引經止存漢傳注本義。魏晉以後野文皆削之。宋元人平話帖括兩體文尤不當載而制度則案年次之。通考之體應如是。此書體例非也。按五禮通考號稱精博先生譏其體例不是真通識也。少年時已具此學力宜有不朽之業。十一月先生之友句容王喬年卒。(存稿十二頤正堂文序)「句容王喬年字崧鶴與正燮同歲少相好也。頤正堂者其所居。正燮錄其詩四十二首詞一首。駢體文十四首爲一卷。」又云正燮少時嘗與崧鶴作

陰律疑、裁書滿屋、朱墨爛然、松鶴之力爲多。」

嘉慶四年己未、二十五歲。

居京師。存稿卷十五汪先生事輯逸云、「嘉慶己未、旌德劉君成書入都、先生寄文集、屬正燮校定。」（按此時汪先生年已七十一矣。）三月三日作頤正堂文序。（稿卷十二）

嘉慶五年庚申、二十六歲。

居京師。「庚申前四月一日、出永定門、自石頭莊回車、感舊述懷一首。」（詩稿卷一）句云、「納粟成均始、國子與觀禮。」是先生捐國子監生必在二十五歲以前。



七月十八送歙胡先生梧實樞。十七夜同續溪胡容怡堂石頭莊看月達旦（詩稿卷一）撰胡先生事迹（存稿卷十五）詩稿卷二次韻送友人南還詩「誰絆村夫子長安住五年。」由此推測是先生到京求學之年。當屬嘉慶元年。東昌作（詩稿卷二）「我已征衣逾五年」亦可證也。然送友人南還詩究未署年月。則定嘉慶二年爲入都之始。因有會通河水道記年月可按。則千礪萬礪矣。

嘉慶六年辛酉二十七歲。

先生之父可亭先生於是年十一月十九日卒於望江。



縣學署年五十三歲。（見先生手題五弟見初行看子及俞氏家祠本主抄本家譜）歙縣金榜卒年六十七。十月書煙波釣叟歌後。（類稿卷十）同卷六壬古式考或亦同時作。其後先生爲楊芳校刻六壬書想正醞蓄於此時。此年奔父喪以前必不在黟。六月十三日睡起詩（詩稿卷二）句云「貧又故鄉違。」嘉慶七年壬戌二十八歲。

春過曲阜見公府建初銅尺。（類稿卷十二書舊五代史樂志下文內）五月在滋陽縣撰古本大學石刻記。一某公循吏達官好刊古本大學。自述曰乾隆丙申

補五臺令、讀陽明全集、乃取古本大學朝夕尋繹、身體力行、遂於歷任所至、刊龕門壁、不忍聖賢真種子遂亡。……乃所刊於五臺、保德、潁州、開封、濟寧者、皆明萬歷十二年南京戶部員外郎唐伯元所上豐道生書、當時號爲魏政和石經。此又署王羲之書。……程朱改大學後、有志道學者多效之。明正德十三年七月、王守仁從禮記寫出大學本文、其識甚高。時有張夏者、輯洛閩淵源錄、反極詆守仁、倒置經文、蓋張夏言道學、不暇料檢五經。又所傳陳澹禮記中無大學、疑是守仁僞造。然朱子章句現在、爲朱學者多以朱墨塗抹其章句之語。夏欲自



附朱子亦不全覽其章句致不知有舊本可云奇怪。今欲宗陽明者亦不審覽王書窺尋禮記直以豐道生書誣之。……此數人者慷慨下筆殆有異人之稟其書初行毛奇齡云止有宋體楷字書五葉道生死忽有篆及分書本時已誤正始爲正和蓋不檢魏時年號以古刻石者皆當號政和此本則以政和刻石當時義之妙墨不謂爲陽明學者上下四方往古來今亦信之而不疑也。  
(存稿卷十四)此篇箴朱王學末流可謂婉而虐矣。  
夏在泰安作木槿不應在釋草說。(存稿卷十一)  
書左傳精舍誌後。(類稿卷十四)有嘉慶壬戌冬過濟



南之語。十月，泰安旅舍撰木桃木李釋。書埤雅後。

（類稿卷二）小除日，撰省堂寺碑跋。（存稿卷九）

冬，始識成筭園。（見存稿十二成君瓘筭園日札序）

嘉慶八年癸亥，二十九歲。

與成筭園徧游山東。計其年夏在惠民，冬在曲阜。（

同見存稿卷十二成君筭園日札序）夏在掖縣。（類

稿卷十四書左傳精舍誌後文中）存稿卷八書五代

史纂誤後，「癸亥夏在濟南，見朱氏彝尊注手稿，即南

監板本，夾手書籤千七百餘條，多碑拓文字。魯道篇

（詩稿卷一）中有「我行值大暑，不願逢曦馭」以年



月推之，必作於此年。七月歸里。八月復出游。（見存稿十四汪先生事輯逸）觀世音菩薩傳略跋（類稿卷十五）末署嘉慶癸亥八月二日甲子，跋於縣東門賃舍。然則赴山東必八月二日以後就道。九月十三日過順河集（詩稿卷一）短歌五章，癸亥九月十三順河集作。冬泛張秋決河。存稿卷十五駱君小傳「追憶去年冬」（按小傳係嘉慶甲子年作）平度于君重輝、鄒平成、君瑾、新城何君承壯同泛張秋決河。四人在船蓬上說鬼風霜淒緊，潰爛攢擊，真有神物魚龍來竊聽也。」書蘆城平話後（存稿卷十四）末署「嘉慶癸

亥、重過句容、住葛仙庵中、信平話及舊報爲比附之幾、以爲字字可據、過宣和遺事遠矣。」按此篇當在七八月間來往山東、道經句容時所作。先生「生平喜人稱說故事」(見存稿卷十五何端簡父子事述)又眼鏡筆勤、頭緒紛錯、一經排比、便羅羅清疏、可誦不但富史識、并擅史筆也。

嘉慶九年甲子、三十歲。

正月、在歷城。(存稿卷十二籌園日札序)二月十日、赴濟寧。(存稿卷十五駱君小傳)「重到荷澤」(駱君小傳)作左山考。(類稿卷九)原文雖未署年月、有云



案驗左山方位其爲重到荷澤作無疑。張穆癸巳存稿序一理初年方二十餘，負其所業北謁孫淵如觀察於兗州。時觀察旣爲伏生建立博士，復求左氏後裔。理初因作左邱明子孫姓氏論，左山攷左墓攷申雜難篇，觀察多採其文以折衷衆論。一雖不足以息多口之爭，而先生博覽求是之學已爲人所矜式。按先生二十八歲已在山東，又因張氏有年方二十餘一言不知見孫淵如，果在何年。繼讀書左傳精舍誌後（類稿卷十四）有一甲子夏，山東頗采申雜難文答部駁，一顯證也。而在德州糧道署見宋本文選（存稿卷十二）校文選李

注識語）在德州得劉績校房注足本管子（類稿十四書管子後）又旁證之佳者。七月在德州記僞笑篇（存稿卷十四）輯太乙十神事（類稿卷十二宋會要輯本跋）書管子後（類稿卷十四）按孫淵如矜賞先生之學不能如程春海祁春甫兩公故書伏墓攷證後稱爲貴官。後辛未孫氏解組卜居白門冶城山館招顧千里氏校刻各書（見思適齋集卷十二嚴小秋詞序）門無先生轍跡而顧氏校勘之業先生亦有微詞。近人刻書喜仿舊本存其誤字而後載校勘語以爲古雅而舊本不誤之字仿本多轉寫致誤是未能仿舊而反



誣舊本也。自漢至唐校書者蓋不如是難與迂拘而囈訟者道也。存稿卷十二校文選李注識語。又類稿卷七引書字說。一何焯校文選刪庶士有揭。胡克家刻文選疑王府有則。以此悟注書當有法。校書當深思也。一則尤明白規正顧氏矣。冬韓新五代史記補注七十四卷。一讀朱氏曝書亭集。知朱氏亦有注。亦用裴例。嘉慶癸亥夏在濟南見其手稿。卽南監本夾手書籤千七百餘條。多碑拓文字。……甲子秋見彭文勤注名五代史記傳注十六卷。亦用裴例。其冬爲此學。依姚朱彭例采書裁貼成篇。不能校寫也。朱籤存者已前全采。惜姚書未



見。而三孟蜀之書已錄爲可喜。」（存稿卷八書五代史纂  
誤後）未署嘉慶甲子小除夜書於拜斗殿寓舍。今五  
代史記及序目彭春農知其詳。（元瑞子名邦疇。）姚  
石甫不知其事。謂劉官保延蘇州王姓王姓不可向邇  
云云。實則官保在浙日以正燮稿本廣延詁經精舍人  
校對。皆茫然。及罷官寓蘇州又延王君渭校之。王君日  
醉不看書。丙子秋仍以稿還正燮。正燮日食不給不能  
看書。仍還之官保。而阿鹽使爲寫清本未校也。越十年  
丙戌夏正燮仍以還官保而刻於廣東竟無有爲校者。  
其未審處惟自知之他人未能察也。辛卯正月過揚州。



宮保病亟矣。仍以此書爲言。壬辰夏春農商改訂。談何容易。是可歎矣。癸巳九月。天津舟中。」（同篇低一格）按。以上記輯刻此書始末詳悉。今五代史記補注七十四卷。署彭元瑞。劉鳳誥合撰。書目答問且列劉氏於史家。不知爲先生所輯也。先生表弟程友石尋親至京。（見存稿十五程友石說文類求序）

嘉慶十年乙丑三十一歲。

正月。在北京。書舊五代史樂志下後。（類稿卷十二）末署時正月燈節。寓於拜斗殿。二月。與成簞園會於京師。（見存稿卷十二簞園日札序）四月十三日。

作成君瓘籌園日札序。(存稿卷十二) 十月書孫  
馮翼禹貢地理古注考後。(存稿卷一) 王勃滕王閣序  
書後。(存稿十二) 末署嘉慶乙丑二月與程君式金夜  
語。卽其舊集滕王閣序爲改其題。又改南昌故都爲豫  
章故都。四月二十四日答葛君宗昶書。(存稿卷八)  
論明人創會典義例云。制異典墳宜於今而不泥於古。  
法殊紀傳叙其事而不錄其名。此會典之異於會要典  
章爲明人創例也。推原其意。事瑣時近。策之得者。爭  
欲附名。其失策當載者。又競求隱諱。不書名。誠善法爲  
元以前人思慮所不及。然論旨與叙事人名何可刪乎。



倘執筆者心知其意，無改成書之大例，則書完可存，異義亦息矣。」似葛氏亦在會典館，惜無書詳證也。十月，讀京報。（存稿卷六俄羅斯長篇稿後）爲葉繼雯給諫纂大清會典，按有恆心齋文集卷八，黔兩先生傳：「漢陽葉給事繼雯得先生稿，盡三晝夜讀之……起來際，貴與於今日，亟與之角而力不敢暇，他何論焉。曩承修會典，丐理初庀其事，文案山積，披閱一再，遂已了然。州居部分，源流井井。」又卷九葉給諫事述：「嘉慶六年，充會典館總纂修官，兼提調，先後在館二十年，專司其事，成千有百卷。」十三年，毋憂去職。<sup>①</sup>會典四次

敕撰成於嘉慶二十三年。先生究以何年襄其事。按存稿卷六丙寅八月撰俄羅斯長篇稿跋中云、「問之館中寫書者。」再則曰、「問之寫書者。」云見在國史館。此所謂館中其爲會典館無疑。然則先生爲葉襄纂必在丙寅以前。而乙丑又居京師。未他往。更有答葛君會典義例書。鈎稽參驗。系於本年。似不爲無據。詩稿卷一更有漢陽葉先生繼雲栽竹圖。或亦是年所題。荒政（存稿卷九）中有云、「乾隆時修會典。凡涉民事。刪去虛文。歸於實惠。俱高宗純皇帝丹毫改定。……乾隆二十年。會典進呈。將先農壇齋宮。改爲成慶宮。此改定



之見於記載者。且丹毫牽絲鈎勒及單雙圈擡寫式樣，尤爲使歸劃一。此亦在會典館時所見外間無由知其詳，故亦系於本年。先生之友平定張穆生。

嘉慶十一年丙寅三十二歲。

正月十六日書左傳精舍誌後。（類稿卷十四）書武城家乘後。（類稿卷十四）此文雖未署年月，按書左傳精舍誌後云：「左傳精舍誌武城家乘，建立伏氏博士始末，是三書者皆無所謂是非之心也。」則此文爲同時所作無疑。三月作俄羅斯左領考。（類稿卷九）俄羅斯長編稿跋。（存稿卷六）五月在德



州學會書唐書與服志後（類稿卷十三）言婦人弓足、徧考經史、故書雅記、詩詞小說、纒纒數千言、爲後人作風俗史者省無限精力。眞所謂非以歷證談者之短、亦庶爲讀古史好學深思者之一助焉。六月、在德州、撰亳州志木蘭事書後（存稿卷十三）證木蘭爲亳人葬於完縣。七月、丁汴落水五言古一首（詩稿卷一）句云、一脚蹋兩舷、開魂飛人在水。拍浮我安能有人挽之起。楚語短後衣、方面亦大耳。十一月、作張炯演門紀略跋（類稿卷九）十二月望、作六壬書跋（類稿卷十）此先生爲楊芳校刻六壬書時跋、予未見。

其書大致不誤。

嘉慶十二年丁卯三十三歲。

書開元占經目錄後（類稿卷十四）二月二日作書  
開元占經天道渾宗後（類稿卷十）二月既望書易緯  
是類謀後（存稿卷十二）書開元占經九勢法後（  
類稿卷十）同卷內如五行傳用亥正論占憲論九宮  
應九星攷九宮紀年論想均同時研討星算占經時所  
撰。四月書武經總要後（類稿卷十）有云「淘金  
歌吾邑前輩所作（按宋邱濬撰）欲爲校之而行路  
無休息爲牽連記於此」一冬至汲城西北三十里太



公泉碑、乃魏定八年穆子容書。入廟讀其碑云、齊太公呂尙者、此縣人也。（存稿卷十太公碑）十二月朔在汲縣望京臺寓舍、致成君瓘書。（類稿卷十一）中云、「推石鼓爲太武時物、其地合、其人合、其事合、其日合、其字合。閣下一言、勝馬生萬餘言矣。」按、石鼓究爲何時物、至今猶是聚訟。惟先生謂「韋韓詩與會議論、乃仰椽虛構」或不然乎。又云「此去輝縣有蘇門百泉之勝、日對佳山水、披覽講章語錄、閣下時時念我、當爲撫掌也。」按、蘇門山在輝縣西北七里、宋邵雍、元姚樞嘗隱居於此。先生不滿於邵氏之學、故有語錄撫掌語也。」

冬在衛輝。」（存稿卷十五阮宮保六十壽引集香山文句注）駐劄大臣原始。（類稿卷八）此篇計萬數千言。乾隆繼康熙未竟之業，西定準噶爾，一定回部，兩定廓爾喀，鈞稽敘述，真良史筆也。

嘉慶十三年戊辰三十四歲。

二月在百泉，書朝野僉載後。（類稿卷十三）「戊辰春，登蘇門山，憶同鄒平成，瑾肅中，新城何承壯，履正蓬萊之游，得二十字，墨於泉亭。」（詩稿卷一）輝縣看新婚者二首。（詩稿卷三）句云：「記取榴花影正長，是五月間事。」秋得明藏優字，函唐不空譯文殊師利菩薩及



諸仙所說吉凶時日善惡宿曜經二冊。因撰時日宿曜經篇。(存稿卷十二)除夕撰科舉之學不壞人才論。(存稿卷十二)

嘉慶十四年己巳三十五歲。

凌廷堪卒年五十五歲。

嘉慶十五年庚午三十六歲。

九月在宣城舟中。(存稿卷十四僞笑篇)十月十六日作尼菴議。(存稿卷十三)「夥迎靄門外建書院。當碧山之陽十里曰碧陽書院。舊有尼菴直書院西南。邑人欲爲遷之。難其地不果。則爲議以告尼。」十二月



書河南府施志後。(存稿卷十二)右志於乾隆五十年後奉畢撫部檄修撫部又薦名士入局宜盡善矣。乃其例云前志多抄賦役全書展卷目迷。况良法隨時更定亦無事重衍云云。人讀書有分量本難苛求。而空談古文格調者比戶皆是。遂謂此乃施君妙論……自單行古文格調興。惟韓愈、歐陽修、曾鞏咨於故實而又不失格調。他或不顧也。吾黟方修志。檢此書詳書其後。以告志局諸君子之不空談古文格調者。一按此篇及尼菴議必十月回黟後所作。嘉慶黟縣志藝文云「庚午冬俞子理初自北還」一可證。吾鄉乾隆歙縣志、黟縣志、劉



海峯時爲學官，參與纂修。先生深惡空談古文格調，或不滿於兩志，故發其旨趣如此。先生文綿密，其所撰著，徵引繁博，端緒明晰。嘗謂「古作者賞論文字，專重謀篇。」（見頤正堂文序）此實稽古有得之言，非怯薄空談者所及知也。

嘉慶十六年辛未，三十七歲。

「所著文裒然成二冊，凡百篇。」（嘉慶黟縣志辛未吳甸華俞理初文序）按，卽後來所刻癸巳類稿，并無別有所謂文集者。

嘉慶十七年壬申，三十八歲。

冬至日作臺灣府屬渡口考。（類稿卷八）

嘉慶十八年癸酉三十九歲。

嘉慶十九年甲戌四十歲。

三月在北京拜斗殿寫會撰注輦方向程途書讀史方輿紀要後。（存稿卷六）歙縣程瑤田卒年九十。

鮑以文卒年八十五。

嘉慶二十年乙亥四十一歲。

二月初吉書人身圖說後時在休甯縣北門汪氏書館。（類稿卷十四）昏禮攝視議（存稿卷二）云「休甯有雲南人作令者士人家借官轎迎新婿令遇於街



答婿二十。(存稿卷二)文末未署年月。此年先生在  
休甯縣，意必目擊其事而作此篇。十月二日，書釋文  
後，未署書於休甯榮荊堂東窗。(存稿卷三)「左傳  
民之多辟，無自立辟。」見一處，辟重曰：「辟，傳見一處。」  
辟女子，辟司徒之妻，見一處，各加反切，承學苦不易曉。多辟  
當云同僻，立辟當云音璧，辟重當云同僻，辟傳當云同  
避，辟女子當云同關，辟司徒當云同壁。以此推之，辟王  
曰同僻，詩之辟王則曰音璧，辟雖曰同璧，如此則音義  
俱了，承學又得假借通用古法，是聞一知二也。陸氏偶  
未深思耳。」此雖無甚深義，而先生文句組織透切中



邊亦何可及。是年冬，先生在黔度歲。題積翠軒圖云：「洗桐栽竹日扶疎，積翠園林好著書。手把一篇風慢捲，清光澄澈滿衣裾。」跋曰：「嘉慶乙亥秋，立人先生病中作懷人詩二首，此其一也。原注：御題有積翠軒圖，多名人題詠。予跼蹉未題，愧負良友。是年臘盡，正變爲錄其詩於圖後。日月不居，形體遂遠，每過古築，輒有山陽鄰笛之感。御題大兄殷殷懷舊之意，念孝標重答劉侯書今日之情，正當奚啻也。理初俞正燮識。程君恩紱亦集御題兄所。程亦立人先生戚好也。」（墨跡藏胡敬庵先生處）立中按：孫學道字立人，黔縣人。存稿

卷十五有古築兩孫君傳、立人其一也。此一年先生均客休甯汪氏，意爲汪承霽延校其先人松泉詩文集。未得顯證，姑懸此說如是。姚鼐卒年八十五。

嘉慶二十一年丙子，四十二歲。

「在上元皇甫巷，歸安嚴鐵橋可均亦以夜郎傳爲言。」（存稿卷七後漢書夜郎傳後）

嘉慶二十二年丁丑，四十三歲。

嘉慶二十三年戊寅，四十四歲。

在阜陽聞人言棺以槨木爲上，往視之，乃槨木。（存稿卷十一木槨不應在釋草說）書儀禮集說少宰二篇



後、末署冬初阜陽書。（類稿卷三）晤嚴鐵橋於上元皇甫巷。（見存稿十二全三古至隋文目錄不全本識語）孫星衍卒、年六十六。

嘉慶二十四年己卯、四十五歲。

嘉慶二十五年庚辰、四十六歲。

撰俞氏世譜序（見譜前、從俞氏族人抄出）輯宋會要五卷。（類稿卷十二）按此書似未輯成、其手寫之稿不知尙在人間否。大抵因徐松言、從永樂大典輯出數百卷、遂爲之擱筆。徐氏書今日有刻本。夏歸自昭文縣（按、民國廢入常熟縣）撰汪秀巖千文音義彙



略序。(見遺文。汪名夢桂，黟三都黃陂人，歲貢生。原書四卷，僅存一二兩卷，抄本現藏立中處。)

道光元年辛巳，四十七歲。

由附監生中式第一百十五名舉人。典試者湯金釗、熊遇泰。(見崇祀鄉賢事述) 撰孫山江印譜序。(見

遺文) 中云：「道光辛巳五月，夏雨初晴，正燮坐山江

齋中言之。」然則此年江南試前，先生固在黟。山江名

廷冕，字冠賢，黟古築村人也。九月十五日，書廣韻後。

(存稿卷三)「唐書藝文志始有陸慈切韻五卷，今

提要引唐志云：陸法言廣韻五卷，唐志實無此文。……切



韻實用吳音、或孫恂<sup>②</sup>等依沈約改之。……法言家法極美。劉蕭大唐世說新語云、陸大同爲雍州司田、爲河東令、爲雍州司倉、大同闔門雍睦、四從同居。法言卽大同伯祖也。……李涪刊誤云、陸法言切韻、吳言乖舛、上聲爲去、去聲爲上。趙璘因話錄云、人檢陸法言切韻、謂吳人翻字太僻、乃不悉名賢事實。法言是河南陸、非吳郡人也。……或實望出吳郡。然祖居臨漳、仕居長安、考與兄弟同居臨漳、何能作吳兒語言也。一案、清儒於廣韻多有糾正、且刻不一刻、惟其家世、則鮮有鈎稽攷訂者。

道光二年壬午、四十八歲。

入都會試謁副主考（熊過泰）則曰「爾與我朱卷刻本我未見爾文也。」疑正考取中副未寓目。謁正主考（湯金釗）則又曰「爾與我朱卷刻本我未見爾文也。」駭問故曰「爾卷監臨屬副主考宜細閱此卷。」副疑且怒置不閱。揭曉日先拆爾卷見黟縣人問曰此徽商耶。予曰若是黟縣俞某則今之通人也。副主考幡然曰然則中矣。其實我兩人均未見爾文故欲一讀耳。」（見戴熙習苦齋筆記。惟誤記先生之名爲廷燮而又誤科目爲壬辰。）京邸題程曉芬舅氏月舫圖卽送令子尹耕南歸五古一首。（詩稿卷二）先生舅氏昆季凡



七、（見有恆心齋文集卷八軒羽府君傳）四見詩稿。  
一、晚芬月舫圖。二、舅氏振羽小照成問答體七截二首。  
（卷同上）三、透徹陔舅氏之任卽題其囊琴圖五古  
一首。（卷同上）四、奉題舅氏雲翔小照五律二首。（  
卷同上）句云、鄴架曹倉外、卽指其藏書也。（此詩墨  
稿藏立中處見影印。）雲翔字軒羽其孫名錫書字松  
韻有敦和堂書目著錄七萬卷。（見黟縣三志藝文李  
文森敦和堂書目序）先生歿後二子懋瑩懋穎相繼  
下世、楹書數萬卷半歸敦和堂故著其淵源如此。三  
月二十日書後漢書夜郎傳後（存稿卷七）因蔡補梅、

嚴可均兩人言，更證明許慎非卒於建光元年辛酉。清儒於說文研討至精，則許君生卒年月亦不可不論定也。九月初七日，撰地丁原始。（類稿卷十二）按康熙五十一年，納丁於地，確爲清初一大盛事。而先生陳古證今之學，亦不偏於訂正古義，誠通儒之識也。同日，作關帝專輯後識語。（存稿卷九）九月十六日，加書鈿尺等語於書舊唐書輿服志後。冬十二月，廣督阮宮保六十壽引集香山文句。（存稿卷十五）低一格案語云，一道光壬午冬十二月，京都多作壽文寄廣東者。因看正定李寶巨碑有王士則名，檢香山集見白



公以正月二十日生，亦宮保生日也。旅邸夜坐，因集此文。宮保爲余座師之師，適未出淨本，亦以語有狷激。漢陽葉年丈取去，塗改用之，乃極和平。韓愈月蝕詩，鄭亞會昌一品集序，盧仝、李商隱集均存之，見文章異同有法也。小除日，記於黟縣會館。」

道光三年癸未，四十九歲。

道光四年甲申，五十歲。

道光五年乙酉，五十一歲。

道光六年丙戌，五十二歲。

在京師，爲程春海、祁春南校御纂春秋左傳。阮元程公



春海墓志。一次年（按前文屬道光六年。）調湖南學政回京，詔充春秋左傳纂修官。……及奉詔刻春秋左氏傳，與祁公共議，推本賈服，不專守一家之學。又存稿卷首附刻崇祀鄉賢事實，一手成官私巨書，如欽定左傳讀本云云。而黟縣人黃德華爲先生同時後輩，所著竹瑞堂詩抄十八卷，同治三年刻本，卷一哭俞理初先生詩句云：「經受春秋動至尊。」原注：「道光二年，欽定春秋左傳讀本，係先生恭校。」記年似誤。七月二十五日，通州舟中作文選注引書字識語。（存稿卷十二）九月朔，夏鎮舟中作文選自校本跋。（卷同上）



「舟中讀文選，所記爛然於眉上行間，四十日始畢。此是出京，由通州坐船，經山東，至皖北之夏鎮。該鎮爲南北衝道。七月二十五日至九月朔，爲三十五日。云四十日者，舉成數也。原校文選爲汲古閣六臣注本，現藏立中處。茲將余跋，遙錄於後。」吾邑俞理初先生所校文選，其跋見癸巳存稿卷十二。予十餘年前在一舊家買得汲古閣六臣注本文選一部，有朱筆點勘，一至十八卷，眉上行間爛然殆遍。餘卷亦始終不懈，校補奪文誤字甚多，心知必通人所爲。但書法端謹，鈎點跨勒，無縱筆疾書之跡。且當時見俞先生手書不多，疑爲過

錄本。頃韓俞先生年譜，列批校本書目，取舊藏此書，反復審驗，則躍然喜曰：「十餘年夢寐縈懷者，固在吾篋衍中。」擁米啼餓，挾纊號寒，予之愚昧不學，抑何可笑。輒摘錄存稿中涉文選詞句者，比而觀之。文選自校本跋（存稿卷十二）：「西都賦視漢書多衆流之隈，汧流其西。」校本：「本傳無衆流之隈兩句，此注亦不言汧。」又薛綜東京賦注曰：「高昌，建城二觀名也，有注而賦文無此觀……則賦文昭明刪之。」校本：「今東京賦無此，可知選有刪句。」文選相沿誤字。（存稿卷十二）：「顏延年赭白馬賦序，軍獸趨迅，注云：庚中丞昭。」



君詞曰……冰原斯代馱。顏庾同時，未詳所見。今按此隋以前相傳兩誤字也。顏賦是軍駙，言副馬多字，亦作馱而誤爲馱。庾詞是駮。一校本「此駮字疑是駙字，言儲趨迅之馬。隋唐時此文誤作駮耳。庾詞是駮。」又賦序疇德瑞聖之符，注云「疇昔也」。今案「疇通醕，解爲上天報享之報也。」校本「疇非昔也，與醕通，言報之也。」文賦注書後（存稿卷十二）「他日殆可謂曲盡其妙，注云他日觀之，近謂委曲盡文之妙理，其說難通。蓋本文係謂他日殆可曲盡其妙，謂字傳寫者倒之耳。」校本「當是謂他日殆可注，非言他日或能之，謂字隋唐本

誤衍。」其他相同者甚多，若一一錄出，可以案紙。至校正文，注奪誤指補，字畫俗繆，又非淹博宏通，深於說文者，卽依樣過錄，亦必錯妙百出。然則爲俞先生道光六年九月朔夏鎮舟中所校之本，鑿然無絲毫疑義。書無題跋印記，每冊首頁有松韻所藏白文方印。松韻氏藏書淵源，詳見道光二年題舅氏雲翔小照詩下。插架七萬卷，大半俞氏巾箱，流傳有緒，尤佳證也。或謂書無姓氏，圖記亦可疑。蓋俞先生治學校勘，亦爲集證工作之一，等於劄記屬草。予所藏批本書蔡傳禮記集說及胡氏藏晚年校改本癸巳類稿，均未署姓氏年月。以彼例



此可以釋然矣。是年黟縣建考棚先生勸捐鉅款旋游京師不居其功知縣呂子珏稱其忘名雅量（見崇禎鄉賢事實）

道光七年丁亥五十三歲。

作門客正義（存稿卷四）先生年二十餘卽出遊以所學客達官貴人傭書爲活介乎門客之間故集證古今門客賢不肖與禍來之無端用以自警而詔人。除樂戶丐戶籍及女樂考附古事（類稿卷十二）此亦清之善政。自三代至明惟宇文周武帝後晉高帝金元及明景帝於法寬假之而尙存其舊餘皆視爲固然本



朝盡去其籍、而天地爲之擴清矣。」按存稿卷十二野  
獲編目錄書後、「野獲編向覓其書甚難、今得刊印本。  
」此書姚氏校刊於道光丁亥年、上兩篇文中徵引此  
書甚多、故系於此年、雖不中不遠矣。詩韻辨字略跋。  
未署云、「此板刻於紫陽書院、今無賣者、忽得一本於  
長沙市上、歸繙閱、因述其所見如此。」丁亥六月。」然則  
此年先生又在湖南矣。先生之表弟程友石以是年  
卒於黟。（存稿十五程友石說文類求序）  
道光八年戊子、五十四歲。  
道光九年己丑、五十五歲。



九月在黟。蘿摩別墅詩抄附錄云、己丑重陽、莫階屬正  
變校訂、至半癡贈畫詩止。律詩多秀逸、七言長篇直似  
北宋大家。朱滄湄先生謂其風格出塵、得之天授、不虛  
也。是日半癡約登高、因事不果、并記。〔蘿摩別墅詩抄  
黟人汪承恩莫階著、道光二十四年刻。〕

道光十年庚寅五十六歲。

河帥張侍郎自黃河出海、夜泊開山、詩次韻五古一首。  
句云、「庚寅夏五月、海壖親鼓汰。」又和張河帥送  
銅鼓焦山歌。句云、「是時焦山秋正爽、江干初落芙蓉  
花。」是送銅鼓必屬九月。又云、「我共銅鼓住五月。」

是先生到張督署必在五月。既有前次韻詩可證，由五月至九月，恰五個月也。又云，「公肯放我早歸去，先訪公鼓江之涯。」南歸必過大江，經焦山也。又張河帥喜雪元韻，庚寅臘月立春前三日也。七律一首（三詩均見詩稿卷一）第二首無年月，以前後事年月參證得之。蘿摩別墅詩抄，「俞理初孝廉歸自河帥張芥航先生幕中，過訪陽羨，作此餞之。中有句云：應聘情難已。」原註，「時張公聘修行水金鑑。」真佳證也。原詩未署年月，亦未及時景。意是年歲暮，自張署回黟省親，道過宜興，先生母程氏時年七十二矣。

道光十一年辛卯五十七歲。

「辛卯正月過揚州。」（見存稿卷八書五代史纂誤後）是去臘回黟度歲正月復由黟過揚州赴河督署。四月二十七日張河帥惠紗葛七律一首。（詩稿卷一）冬彭家馬頭舟中作黃大王傳。（存稿卷十三）按自庚寅五月至山東除歲暮過宜興回黟本年正月復出此兩年均在河帥張署爲偏纂續行水金鑑一百五十六卷。予未見其書頃見一北平舊書店書目標此書爲俞正燮著。喜先生勤劬纂輯之勞猶未湮沒而余鈞稽年月又得顯證彌足樂也。



道光十二年壬辰五十八歲。

二月十六日、京平作七律一首。（詩稿卷二）意自山東河署入京、應陳碩士侍郎之約。故句云、「橐筆仰瞻雲彩煥。」四月二十五日、史記孔子世家後識語。（存稿卷九）計六千餘言、分別甄錄、作專史者當取法焉。冬、館新城、陳碩士侍郎所、爲校顧氏方輿紀要。（癸巳存稿張穆序）

道光十三年癸巳五十九歲。

春闈下第、王藻商諸及門孔繼勳、邱景湘、吳林光、陳金爲刻癸巳類稿十五卷。（見癸巳類稿王藻菽原氏序）



（歙程侍郎恩澤爲定其篇第序之。右癸巳類稿十五卷。吾友黟俞君理初所著也。理初負絕人之資，篤好讀書。自識字積髮素，寢饋凡四五十年。其善於始也能入其眇於終也能出。叢籍城擁，手繙繙不輟輟，輒大半成誦。地人名稱事回穴數載，極見某冊某卷某篇行語卽中，是謂能入。萃昔賢往事，判黑白，搖筆纚纚千萬言，某可据，某可勘，某不可憑，某宜斟也。一篇中計疊簡不勝舉，使起昔賢議往事亦領，是謂能出。出入之際無精心卓識果力，則徇博而支，徇斷而歧。宋後逮有明，豈乏博見強識，則絢虛卓，紕實用，恆若斯也。惟識足以徹千古。



之部、辯足以息萬喙之爭、富足以會古今之通、明足以察真僞之溷、然後縱橫勃窣、底於是乃已。故治經貴一也。繆牽於注、疏則隘、畔離於訓、詁則野。援證典確、葺甲新意、皆陶鑄於秦諸書、漢諸儒斯得之。治史貴紛也。讀未終卷、遂持論、則陋。讀一史未他及、遂持論、則塞。正窮乃稗、稗窮乃注、注窮乃金石。全史醞釀、歧說旁溢、斯得之。尤善言天象、暨日官法、以爲泰西法積精、然豈三代秦漢人所豫解。以某時法衡某時象、是非犁然。則三代秦漢人不能委其過。尤善言地輿、說方域、以爲中外同軌、不道險。今昔異履、不詳憲。惟殊方遐國、人所忽、必當



察。乃至掌故之巨、名物之細、聲詁之雅、七緯三式、釋典道藏、素靈之冊、景教之碑、諸儒橋舌、方皇者、引稱首首、如肉貫莢、絲在櫛、則又非常量所測識者也。加以受性方直、僞書誣古、必辨、魏晉儒改故訓、蔑先儒、必力辨、邪醜正否、嫉賢必覷、縷辨於戲、古心哉。古人哉。凡理初手成宏鉅書、不自名者甚夥。年過六十而聰強、審密不憊、其著作未可涯。此冊斷自癸巳歲、故曰癸巳類稿。余爲定其篇第、覆讀之、甚愜也。爰就所窺及者述之。其諸廣遠、以俟大雅。道光十六年秋日。一按癸巳類稿程侍郎有兩序、一作於十三年、所謂「今年春、王菽原館文分

校禮圖得一卷，以爲必有著述。出圍識理初，卽索其文梓之。此序係十六年俞先生入京覆讀補作。（見程侍郎遺集棗花寺賞牡丹分韻賦詩）以其詳述學術範圍，功力最爲洞澈，故遂錄之。癸巳題陳登之罷讀圖。原稿珍字下雙行注「君祖凝齋公集有記平糶事。」廿時人寶應宋塏詩。原稿師字下雙行注「畸人尊甫。」刻本詩稿不應刪。監江寧府都酒務記天禧二年八月，少府監鑄甘氏藏詩。以上三詩原稿在劄記中，二首先先生自加密圈，與罷讀圖詩隔一葉，又同見刻本詩稿卷二。九月望，天津舟中補記輯五代史記注始末。



（存稿卷八）是出京回黟矣。十一月十九日，看定  
盒文集。（立中藏古今體詩，初開樣版，尙未列卷數。）  
題護葉內一詩，文能接連難，接連後能斷更難。余苦詩  
文綿密，以是喜定菴手筆，謂之文場毅士。癸巳十一月  
十九日，理初記。定菴他日自覽之，必謂理初譏其不通  
也。奈何。下鈐出入大吉白文方印，并一似存字押案，  
出入大吉係漢銅印，見高鳳翰印譜。手寫劄記中有三  
處亦鈐此印。又集中僞鼎行詩批眉上「此詩不可存」。  
然則先生與龔定菴文字之交，似非泛泛矣。十二月  
二十九日，毋程氏卒，年七十五。以目眚，不肯留遺容。（

見道光十七年題五弟見初行看子及俞氏家祠中木主。

道光十四年甲午六十歲。

是年嚴鐵橋與徐星伯書云「去冬及今夏屢見理初。」又存稿卷十二全三古至隋文目錄不全本識語「春夏間兩見其本於嚴州鐵橋官舍。」是先生春夏間在嚴州也。

道光十五年乙未六十一歲。

兩湖總督林則徐聘纂湖北通志書成典博詳明（見存稿附刻事實）十二月在黟爲孫茂之題畫冊五言

七言古各一首。（畫藏立中處見補遺詩。）

道光十六年丙申六十二歲。

三月在京師。程侍郎遺集卷五丙申三月下浣邀陳雪  
巖先生俞理初黃鐵香溫如心孫柳君集棗花寺看牡  
丹分韻得寺字詩。書黃大王傳後。（存稿卷十三）  
丙申十月十日與新城陳淮生行臨清堰上謁神像  
用唐衣冠似宜改依禮制。又謁天后祠有睡像以爲當  
用火居道士住持道士婦承值則人神均安。過兩壩三  
間得兩神佑。余於辛卯冬作大王傳今六年始至其祠。  
因記所見於此。





道光十七年丁酉六十三歲。

正月十八日、撰程友石說文類求序。（存稿卷十五）

客兩湖總督林則徐幕、爲參訂其先人舊稿、校訂海國紀聞。（見林則徐海國紀聞序） 祁寯藻侍郎視學

江蘇、爲校宋本說文繫傳。（見予所藏劄記原序稿）

五月初五、讀元詩、在漢上。七月初四、讀青箱雜記、

抄數行。八月二日丁未、在江夏。（同見手稿劄記）

道光十八年戊戌六十四歲。

修涿學記、代潘侍郎作。（原稿見手寫劄記錄爲遺文。

）張石州龜硯七古一首。道光戊戌吳紅生舍人



以乾隆丙子閏重九尊祖畫筵詩冊屬和七律一首。  
憶家園梅樹戊戌五月京城作五古一首。喜王棻友  
至黟縣會館閒話五古一首。何子貞分冊索書作此  
五古一首。捉蠶七古一首。補鞋七古一首。代李  
雲舫壽座師潘中堂五律四首。（按以上詩均依手寫  
劄記次序又見詩稿卷二其代李雲舫詩未刻見遺詩。  
）此年一公車在都。至十月碩士侍郎之公子淮生  
假以資斧乃得南歸。因與偕謁祁淳甫學使學使厚  
飲之約其春初復來。（張穆癸巳存稿序）  
道光十九年己亥六十五歲。

正月訪祁學使於江陰。……爲學使校寫三古六朝文目及存稿副本。七月學使邀赴金陵言於制府聘掌惜陰書舍教。（見張穆癸巳存稿序）全三古至隋文目錄不全本識語。（存稿卷十二）此嘉慶乙亥以前全三古周秦八代文目錄也。實陽湖孫淵如觀察之力。時歙鮑氏欲爲刊於揚州而不果。……歸安嚴鐵橋廣文同人籤寫裁貼成之。丙子及戊寅兩晤鐵橋於上元皇甫巷相與檢文及目因言文已大備。然文選顏延年侍宴曲阿後湖詩注七命注均引越絕書伍子胥水戰兵法內經有大翼艘中翼艘小翼艘廣長丈尺之文應補入



周伍子胥文。又多引莊子。爲今書所無。應彙尋莊子逸語。補入周莊周文。太平廣記載異文。記任升之藏鍾山壙銘。見唐書儒學郭欽悅傳。言大同四年七月十二日己巳。任昉得銘。爲東漢建武四年三月十日庚寅葬。閱五百十二年。六千三百十二月十八萬六千四百二十日而墮。其文奇譎。似左傳絳老人。應補入東漢闕名文。抱朴子有內外篇成書。此例不收。其自序則收之。文選江文通詣建平王上書。注引抱朴子軍術。有大將軍用九宮三五之法。文及篇目皆本書所無。應補入晉葛洪文。同人以爲然。丙子後。鐵橋復搜校古書及金石稗官。

其文眞實可據者，乃能補至十分之一。……日照許印林司馬出所攜金石拓本，彼此相勘，或改補一兩字，相視大樂。……己亥春，於江陰李申耆山長處見此目錄，爲乙亥以前目，又無三古及秦目。然卽此本所類聚，能得其時朝制大典章、山川形勢沿革風俗及古人衣物舟車、飲食好惡之眞，已可爲有用之書矣。……因錄存此，既可自成一書，他日挾此過湖州城東驥村，謁鐵橋，乞其書以補此目，尤易爲力。此目經數寫，如漢中山靖王聞樂對人人能誦者，當時實已入編，而此目遺漏。如此類，俟他日從鐵橋目補。此時多留淨紙，以爲他日快意縱



筆地也。己亥十三日。」按讀此可知吳山尊謂爲孫淵如所纂未爲無因。（楊守敬跋全上古三代秦漢三國六朝文跋）十月撰校刊宋本說文繫傳序。（原稿藏立中處見影印在譜前墨跡。）

道光二十年庚子六十六歲。

四月十二日卒於江寧惜陰書舍。（有恆心齋駢文卷四及俞氏家祠木主張穆序以爲卒於五月誤。）葬一都深坑。長子懋瑩字慈方有恆心齋集卷十云「懋瑩篤學有父風……甲辰春在京師兄叔父來始知昨秋卒於杭州。」然則嘗是卒於道光二十三年癸卯。



次子懋穎字懷方生卒年月不詳。元配王氏諱發弟。  
繼配萬氏諱嬌。生卒年月不詳均與先生合葬。

校記

①母：當作「母」。

②孫恂：當作「孫恂」。

③妙：當作「繆」。

④未：當作「末」。

⑤偏：當作「編」。

⑥畸：當作「時」，見上文。



儒藏

俞理初先生年譜

# 譜餘

先生東門賃舍迤北沿溪而上有一書店先生在籍時輒往店中買書厚訂整齊。今其後人猶藏韻書一種極普通之本。內缺一頁手書端楷補入并鈐名印。其所藏數萬卷半歸程氏敦和堂。憶予幼時在程氏見舊刻大學中庸一厚冊朱墨爛然殆無隙地爲先生所批校者。據老書友汪殿榮所說及予目證。

先生精占經及天宮書。黟城北門外跨溪有一石礮往往徘徊其上仰觀乾象一歲豐歉喜爲鄉人預告。據故老傳說。所撰黟縣山水記每出遊回籍時輒偕葉有廣程驥等分



儒藏

俞理初先生年譜 譜餘

日往遊、非一時所作。其文如水經、每每點綴一二短句、而山脈水流、映帶生動、輒成絕妙之文。葉程兩氏又長於輿地、故尤徵精確。雜采山水記原文及葉氏後人所傳說。

元和朱駿聲氏爲黟學博、喜與先生商討舊聞、予藏答朱氏撰文名柬一紙、足見兩先生過往論學之密。黟爲窮山小邑、同時竟有兩通儒、佳話流傳、真足爲山川增色。據予所藏俞先生手書名柬及各家傳記。

先生家貧、性介、縉紱之入、僅敷買書。浙江王蔭槐令黟時、除日就先生商略舊學、索債者躊躇戶外。王令密使從者至縣署取償、不令先生知。據黟縣三志。

吾鄉雖僻陋，當日風氣，家道殷富者喜購書，延攬通人涉覽。古築孫氏居敬堂，客先生時尤多。予所藏畫冊，先生稱爲茂之六弟者，卽其後人也。據題畫冊及先抑齋師所述。

黟同時學力與先生相等者，僅有汪南士先生。所輯七家後漢書、英吉利攷略、十三經校勘識語，有刻本外，餘稿恐已散失。今杏墩胡氏藏先生晚年校改癸巳類稿，內有南士先生批注多條，皆當時面相質證者。相傳兩先生同舟赴江南試，以背誦經史或時憲書爲笑樂。據校改本癸巳類稿及黟兩先生傳。

從遊之士，同邑如湯球氏，輯有十六國春秋、晉書輯本、程

式金氏有說文類求。再傳弟子程鴻詔氏著有恆心齋集。其所著均流傳甚廣。而黃德壽、王以寬一以詩鳴、一以雜著稱。均嘗奉先生教訓。雜采其已兩篇及冬人傳略所述淵源。

譜餘補二條見黃仁實先生見聞信筆

諡縣俞理初先生王受禮訂試總裁爲歙曹文正公振鐸、儀徵阮文達公元文、這夙慕先生名、必欲得之。每遇三場五策詳贍者、必以爲理初也。及榜發不見名、遍搜落卷、亦不得、甚訝之。文正徐取一卷曰、此殆君所謂佳士乎。吾平生最惡此瑣瑣者、已擯之矣。撒彌封驗之果然。

先生生平酷嗜書。夥有富人家宅於鄉、名曰居敬堂、蓄書



儒藏

俞理初先生年譜 譜餘



萬卷。先生歸輒詣觀，孫爲授餐焉。一日入城，見衙役新葺一宅，供張清雅。詢之，則曰：孫某富家，今兄弟析產，失和，將訟於官，設以待之。先生聞言，心戚，卽回孫氏，以狀告之。且陳不和之害，事竟得罷。

# 詩文補遺

四養齋詩稿據程鴻詔氏跋「夫子之詩散佚多矣此僅有存者。」檢程侍郎集卷五丙申三月下浣邀雪醺先生俞理初黃鐵香溫如心孫柳君諸君棗花寺看牡丹分韻得寺字則先生亦應有詩顧未見今僅據予藏畫冊爲先生所題五七古各一首逡錄之又代李雲舫壽詩四首從手寫劄記中錄出文六篇一一注其采自何處輯佚補遺固後學之責也癸酉冬王立中識。

## 題畫詩一



備藏

題畫詩二

壽座師潘中堂代

汪子秀千文音義彙略序

孫山江印譜序

俞氏家譜序見譜前

重刊宋本說文繫傳序見影印墨跡

涿學記

墨白銘

# 遺詩

題畫

乙未十二月爲  
茂之題畫冊

一石如象鼻橫枕大江濱。踞石誰氏子。無乃太古民。磴道穿石腹。上與塔院鄰。下聞瀕洞聲。波磔起鱗鱗。問渡人多暇。意與蘆葦親。我知風起處。此地杳無塵。端坐任談諧。何勞遠知津。布帆祝無恙。不問越與秦。從知心太平。耽翫及良辰。

題畫

乙未十二月題  
奉茂之六弟

碧梧新洗新筠脫。松枝短短穎見末。知道春深萬昌榮。醜石呈嬌綠苔活。此圖風格近百年。細意肖物色新鮮。寒冬



儒藏

俞理初先生年譜 詩文補遺

披幘硯方凍。忽覺生意滿眼前。尋芳近識家山好。那忽悠  
悠涉長道。掩卷佇思。一迫然。天涯何處無芳草。

代李雲舫壽座師潘中堂

錄自手  
寫劄記

瑞靄澄霄漢。榮光壽宇敷。三天嫺禮樂。一德協唐虞。霖雨  
蒼生祝。篇章衆士模。清名從及第。慰望在都俞。

鮮臺非養望。愛敬願難勝。聖許雲山暇。天教福祿膺。崢嶸  
支八柱。壽愷作三朋。龜錫符羣望。都由瑞氣凝。

內省樞庭重。平章素望優。辛嘗褻密勿。臣不耀謀猷。肅穆  
風行遠。寬和德舉輒。卽今休養意。公惠足千秋。

小草蓬萊植。曾承雨露偏。爲郎慚落拓。著錄記周旋。北闕

龍光溥，南門壽曜躋。蟬螻同忤頌，德廣及垓埏。



儒藏

俞理初先生年譜 詩文補遺



# 遺文

## 千文音義彙略序抄本

子秀先生素通法家醫家言其排類精密由天性然也正  
燮少與共席硯獨知其詩文以爲隱秀幽折時入逸品嘗  
戲語曰吾能屈詘自世閒安能從汝巢神山先生弗以爲  
忤也庚辰夏正燮自昭文歸昭文有周君少霞者以知音  
名雍正間辨文字於舌齟脣喉持之甚堅吾邑孫君蒙葉  
君有廣亦持此義若共一喉舌者予欲以質之孫君蓋葉  
君已歿而子秀素攻此學則吾不知也適子秀病予省視  
之亦未一言及此及先生歿始見此書以音相從而叶之



附之字音皆從其類。予審覽之始知此爲有用之學。此書行而小學聲音可以一歸雅正。子秀眞可謂愛素好古之士哉。惜向者與語之淺也。子秀病時猶懇懇於是書。字蹟倚邪參錯。若不勝目力者。且云所收未全。此眞實語也。然非經始之人則無從補之。顧其例顯白。覽者得其意。或偶有所觸。日益一字。或月益一字。此則邢劭日思誤書之意。而子秀此誤留於人間。不失爲完書也已。嘉慶庚辰九月。同里俞正燮拜手書。

孫山江印譜序 見嘉慶臨縣志

刻印用繆篆。謂官印也。其法或以疊文。或彼此糾結。使茂

美。私印則用小篆，亦有參以繆篆者。西漢官印多五字，東漢始不用土德之說。今所傳得官印，多東漢以後章也。大約鑄字端重肅穆，可用爲篆法。近人得漢魏瓦當，其篆文增減出入，似亦繆法，而悉佳妙，過漢碑頭篆文遠甚。山江愛素好古，輯所得公私銅印二百餘方，自漢時似繆非繆，以迄元時畏吾兒文，糾繆奇怪，以石臨之，盡其妙於方寸分矩之中。至刊漫處，亦畢肖，可謂奇作矣。吾郡刻印者，向宗程穆倩，與浙分派。程握刀意思圓厚，似岐山石鼓。自巴君子藉、孫君雨茗互獎勵，以漢法遂融浙派。雨茗令子濬川尤善鉤廓，篆隸能逼真。今墓有宿草矣。雨茗爲山江族。

兄濬川則從子也。道光辛巳五月、夏雨初晴、正燮在山江齋中言之、輒慨然撫此卷、不無前不見古人、後不見來者之思耳。

涿學記

代潘侍郎從手  
寫劄記錄出

某某視學畿甸之三年

丙申至戊戌

涿人士喜學宮工成、以熙

起之情請于州牧、刻事樂石、屬其文於督學使者。使者以爲涿于京府、其衝繁、州民樂儒風、士通時務、其固然也。溯儒澤之盛、源于先儒漢九江太守盧君子幹。今以戴禮王制、文王世子、學記、儒行、大學、古人立教承學、規制其留遺至今、得以因革損益、各臻明備者、康成鄭君實從盧君所



備藏

俞理初先生年譜

詩文補遺

叙略行世。所謂禮記者注之。然則官于涿土及涿人士景仰先哲。皆能深思古人所以立學之意。敬愛保護之。埽除修葺墳壘。無使傾圯。涿于學。視他州縣宜爲易。官于涿者。以儒爲治。生于涿者。文章根經訓。制行以古人爲則。其於修學之舉。衆視爲當然。又非徒爲好義而已。國家制度美備。立學溥而遠。學田學祿。爲費多矣。工程不賦于民。學宮輪奐之後。若無須橐鼓也者。涿牧趙君庭椿久于其任。政成民和。師儒亦勉率厥職。士民故能敬業樂羣于其所當爲者。樂爲之如此也。君子學以致其道。涿士之游于學。居于學者。內本鄉先輩大儒盧君傳經之意。以端其志業。上

體朝廷教士敦本務實以善其身修飭其行昌大其文學豈非涿俗之美而賢牧及爲師儒于此者之所屬望歟先是學宮將議修前兩廣制府盧宮保坤翰白金千兩涿人士皆以爲當因而輸錢赴工集事甚易此鄉先生懿行宜爲表著者宮保故九江太守之系裔於此益見涿人士不忘彝訓而先儒有後祿如涿盧氏之比尤可使務學者知所觀感興起矣。

墨臼銘

原器藏黟縣碧山汪氏

啓賢汪翁墨臼永保無斁翁生萬曆時卒于康熙庚戌孫曾守彝訓保門戶敬藏遺器道光三年邑後學俞正燮謹



儒藏

俞理初先生年譜 詩文補遺



爲題識且作銘。

潘谷采烟自我作故膠麝之融投以萬杵。有隱君子碧山  
搆宇抄藉巾箱琢形璜琥積墨能罄遺經克序式念勤勞  
鼎來簪組惟白有朋孟峯當戶。

# 退菴自訂年譜

清·梁章鉅 自撰

郭 齊 校點

楊世文 一審

李文澤 二審

清光緒元年刻本

《退菴自訂年譜》，清梁章鉅自撰。清光緒元年福州梁氏刻《二思堂叢書》本。

梁章鉅（一七七五—一八四九），字閔中，又字茝林，晚號退菴，福建長樂（今屬福州市）人，清經學家。嘉慶七年進士，歷官禮部主事、軍機章京、禮部員外郎及知府、布政使、巡撫等。官餘不廢著述，於經學有《論語旁證》、《孟子旁證》、《夏小正通釋》，於小學有《倉頡篇校證》，於史學有《三國志旁證》、《國朝臣工言行記》、《樞垣紀略》、《退菴隨筆》等。此外精考據，擅詩文，其他著述尚多。

此譜爲章鉅自撰，記至道光二十四年（一八四四）七十歲止，記仕歷及家事、著述、間及史事，有一定史料價值。此譜紀事較明晰，文字亦簡潔，大抵可書者已無餘錄，而已書者似有可刪，如尋常遊歷交往、私宅修築始末之類。章鉅卒年七十五歲，譜記至七十歲，尚闕五年事蹟未續成，後人亦無補作者。

退菴自訂年譜

退菴居士系出安定梁氏、名章鉅、字閣中、又字蒞林、晚年自號退菴。由泉州宋丞相文靖公派下、分居福州長樂縣南鄉之江田里。國初遷居福州城中。自前明迄今十五傳、皆爲郡縣學諸生不斷。河間紀文達公督學閩中、以書香世業扁旌吾間。乾隆四十年乙未七月初六日、生於福州淳仁里。時先考翼齋公上公車未回。是年先叔父九山公成進士、入翰林。翼齋公諱贊圖、字斯志、又字翼齋、行二。乾隆戊子、與同懷第九山公同舉於鄉、考補內廷咸安



宮教習。

門下士。濰縣劉鵬翔拜填諱。

丙申二歲。

丁酉三歲。長房伯兄虛白公。

初名功。改名際昌。

入縣庠。

戊戌四歲。虛白伯兄爲發蒙。先妣王太夫人自課之。

己亥五歲。十月先大母林太淑人棄世。是年翼齋公教習

期滿引見。以知縣用。回里卽丁憂。

庚子六歲。在家讀書。先考自課之。

辛丑七歲。先考授徒於經院巷彭宅。隨往讀書。

壬寅八歲。先考授徒於開元頭林宅。隨往讀書。

癸卯九歲。先考授徒於楊橋巷蔣宅。隨往讀書。始學作小詩。是年同懷弟章垺生。

甲辰十歲。先考授徒於鹽法道德清戚公署齋。閏三月。先妣王太夫人棄世。太夫人少以孝稱。在室時。嘗割臂肉療父篤疾。先考爲作傳畧紀之。

乙巳十一歲。先祖天池公棄世。公弱冠卽爲名諸生。以耆儒宿學教授里中五十餘年。值八十壽。紀文達公有文祝之。文載公集至是考終年八十二歲。是秋先考爲廈防郡丞。漢軍劉公延請課子。隨往讀書。福州距廈門五百里。是冬以





臺灣林爽文滋事，軍興孔急，道梗不得歸。

丙午十二歲，仍在廈門廳署，始學作八股文，並隨先考偕

同里先達鄭蘇年

光策

何實齋

西泰

林于川

雨化

張燮邦

經邦

諸公徧游厦島各巖洞，復泛海覽鼓浪嶼之勝。時厦

門洋船叢集，商賈殷賑，仙山樓閣甲於南天。聞近日井里

蕭條，大有今昔之感矣。是年，長房三兄曼雲公

初名雷，改名運昌。

入縣庠。

丁未十三歲冬，隨先考回福州，移住新美里，與九山公同居。從虛白伯兄學舉子業。



戊申十四歲。學使者雲間陸耳山師錫熊甄別生童。余以第九名童生錄送鼇峯書院肄業。山長爲孟考功瓶菴先生超然都講卽虛白伯兄也。

己酉十五歲。春隨先考往仙遊金石書院讀書。秋與四房四兄澤卿公雲銑同赴長樂縣試。受知於漢軍王弼齋師佑郊錄取第二名。

庚戌十六歲。與三兄曼雲公同在鼇峯書院二賢祠讀書。辛亥十七歲。受知於丹陽吉渭厓師夢熊以第一名取入長樂縣庠。是年隨同邑陳茂真師士偉讀書於觀音橋齊

氏之漱芳軒。

壬子十八歲。隨外舅鄭蘇年師讀書於洗銀營趙氏之紅玉齋。是秋鄉試。卷備而不薦。

癸丑十九歲。仍隨蘇年師。始學作詩賦雜文。是年。四兄澤卿公入縣庠。

甲寅二十歲。隨林暢園師茂春讀書於洗銀營陳氏之鳳

池書屋。是秋鄉試。與虛白伯兄、曼雲三兄同舉於鄉。座主

爲歙縣程蘭翹師昌期、仁和關晉軒師槐、房官爲涇縣吳

虛谷師濬。

乙卯二十一歲會試薦而不售。房官爲鄱陽胡果泉師克家。遂留京過夏考取。景山官學教習。是年澤卿兄舉於鄉。

嘉慶元年丙辰二十二歲會試薦而不售。房官爲山右李石農師鑒宣。五月由運河回閩。七月患瘧至重陽始到家。冬至前一夜而止。歲杪鄭夫人來歸卽蘇年師長女也。

丁巳二十三歲授徒西門街劉宅。

戊午二十四歲授徒南營姜宅。章埴弟入縣庠。是冬先考以知縣選期將到呈明不願外任選得汀州府甯化縣學。



教諭、挈章埶弟赴任、而命余上公車。

己未、二十五歲。會試、薦而不售。房官爲吳縣吳少甫師楫

萱。同房曼雲三兄遂成進士、入翰林。六月回家、仍在蘇年師館中課文。

庚申、二十六歲。大兒逢辰生。輯東南嶠外書畫錄二十卷、自爲序。

辛酉、二十七歲。會試、以九山公爲內簾同考官、回避未入場。與大挑又不得、乃就補 景山教習。

壬戌、二十八歲。會試、以二甲第九名成進士。座主爲紹文



達師、鉛山熊謙山師

收

、浦洲玉研農師

贊

、大庾戴可亭師

均元

、房官爲高陽韓湘帆師

掄衡

朝者、入選第二名、因

受知於大興朱文正師

珪

、大庾戴文端師

衡亨

、長沙劉文

恪師

樞之

、浦洲英熙齋師

和

、那繹齋師

彥成

、萊陽初頤園

師

彭齡

、浦城祖舫齋師

之望

、引

見以翰林院庶吉士用。

教習師爲黃陵帥仙舟先生

承瀛

。是秋、聞先考甯化之訃、

跣踰南奔。由江西取道汀州、入甯化。計署中視含殮者、惟

章垣第一人、痛哉。

癸亥二十九歲。正月、始至甯化學署。四月、扶櫬回福州。從



苦山中編輯翼齋公遺詩文兩卷、行狀一卷、又輯家譜四卷。

甲子三十歲。鄭蘇年師終於鼇峰講席。與同門友沙縣陳名世同校刊西霞文鈔兩卷、爲之序。吾師遺文、此其一斑也。

乙丑三十一歲。二月、服闋進京。散館、以二等第五名引見、改部主事、籤學禮部、入儀制司行走。是秋、因病請假回籍。在部時、輯南省公餘錄四卷、謝薌泉先生振定爲之序。嗣後拓爲八卷付梓。

丙寅三十二歲。家居輯長樂詩話八卷，自爲序。

丁卯三十三歲。掌浦城南瀟書院講席。秋，挈季生華文游

武彝，有游記及詩紀之。祖舫齋師陳恭甫編修壽祺各爲

之序。

戊辰三十四歲。仍赴南浦講席。秋，爲本省撫部張蘭清先

生師誠延入幕中，爲撰擬頌冊及奏御文字，並校勘所進

遺書數十種，各加按語，如四庫書提要之例。

乙巳三十五歲。仍赴南浦講席。輯東南嶠外詩文鈔若干

卷，陳恭甫爲之序。



儒藏

退菴自訂年譜

庚午、三十六歲、仍赴南浦講席。輯夏小正通釋四卷、南浦詩話四卷、皆祖舫齋師爲之序。

辛未、三十七歲、復入張撫部幕、與陳恭甫分纂 御製全史詩註六十四卷。是春、爲先考妣合塋、祖舫齋師爲之誌銘。事畢、仍赴南浦講席。校補倉頡篇三卷、選輯閩文典制鈔四卷。是年、次兒丁辰生。

壬申、三十八歲、仍赴南浦講席。秋後回家、開藤花吟館、集里中諸名流、觴詠其中。有藤花吟館書卷、陽湖李申耆邑侯兆洛、歙縣程春海侍郎恩澤並爲之記。

癸酉三十九歲。仍赴南浦講席。與鄭松谷鵬程、林夢懷軒

開二親家重游武夷。又與全生徵蘭游漁梁萬葉寺。志乘

所謂天下十大名山之一也。是冬挈眷進京。在浦城祝東

巖親家昌泰有斐園中度歲。

甲戌四十歲。三兒恭辰生於台庄舟次。八月抵京。進署銷

假。仍在儀制司行走。是歲由運河北上。滯居漕艘中百餘

日。取舊讀昭明文選筆記之件編錄而增益之。是爲文選

旁證之權輿。自是每年趨公之暇輒涉筆焉。

乙亥四十一歲。同劉芙初、吳蘭雪、陳石士、李蘭卿謁翁覃



溪師爲蘇齋詩翁子者三年。是夏聞四叔父九山公之訃。公諱上國字斯儀又字九山。乾隆乙未進士。歷官翰林科道。洊至太常卿。終於廣西學政任所。陳恭甫銘其墓。

丙子四十二歲。兼精膳司幫辦掌印。是秋考選軍機章京。以第一卷引見。記名。是冬入宣南詩社。胡墨莊侍御

承珙、潘功甫舍人

會沂

各爲之記。輯春曹題名錄六卷。

丁丑四十三歲。四兒映辰生。秋與顧南雅

蕓

龔季思

守正

二同年游西山。有詩紀之。又與陳石士編修

用光

陶雲汀

給諫

樹

王北堂明經

宣齡

游昌平。有文紀之。

戊寅、四十四歲。入直軍機。是秋，扈日、游醫無閭及松杏諸山。以校勘科場條例被議，降一級留任。旋以扈從議叙加一級。

己卯、四十五歲。三月，扈蹕東陵、南苑。公餘，偕

同人坐山輜登雲寺。又於月夜上古中盤飲，至曉晨始

下。人直各有詩鈔。是冬，以覃恩誥授奉直大夫，誥

贈先考如章鉅官，先妣王氏爲宜人，封妻鄭氏爲宜人。

庚辰、四十六歲。扈蹕灤陽，加一級。又恭送睿廟梓宮，

加一級。又恭迓覃恩兩次，各加一級。是役恭逢睿廟





升遐、變生倉猝、前無故實可稽、樞廷直務填委、而禮臣隨  
扈者、堂官僅黃左田、大宗伯鉞一人、漢司貞僅章鉅一人、  
奏疏文移、責無旁貸。時樞臣禮臣皆日數召見、斟酌典  
禮、體大思艱。余以一小臣、往復其間、哀苦之餘、益增凜懼、  
益不敢休息者、徹數晝夜。自禮部堂屬官續到者數人、乃  
始分任其勞、藉免隕越云。九月回京、兼祠祭司行走。是冬、  
以覃恩、誥授中憲大夫、晉贈先考爲中憲大夫、先妣  
王氏爲恭人、誥封妻鄭氏爲恭人。  
道光元年辛巳、四十七歲。五兒敬辰生。二月、以補授主客



司主事引 見仍在儀制祠祭兩司行走。禮曹四司至是乃徧歷焉。三月、扈 蹕易州、以恭襄 山陵大典議叙、加隨帶二級。四月、以考試差引 見。六月、由軍機大臣以行走勤慎、議叙、奏准卽升員外郎、先換頂戴。十一月、以補授儀制司員外郎引 見。是年、充 大清通禮館纂修、又充內廷方畧館纂修。又以與同人分校遼金元三史地名人名官名、余分得金史全部、又分纂西域圖志、未成書。壬午、四十八歲。由禮部堂官以才具練達、克稱厥職保舉京察一等。二月、由吏部引 見。奉 硃筆圈出、交本部堂

官查晉。復加才識精明、辦事老練、堪勝外任考語。引見  
記名、以繁缺道府用、仍加一級。閏三月、授湖北荊州府知  
府。次日、具摺陳謝。召見於乾清宮西房。五月、挈眷出  
都。六月、莅荊州任。是月、卽奉檄兼護荆宜施道、兼管荊州  
鈔關監督。先是、所屬監利縣與沔陽州民以爭水相仇殺、  
官不能治、大府檄予馳往查辦。乃先以詩歌代爲文告、勸  
諭之、又爲親莅水濱、議清界址、兩境士民悉服、其患遂平。  
公餘、編輯樞垣紀畧十六卷、朱詠齋同年士彥爲之序。蓋  
前數年在樞、直時稿本至、是始彙次成書云。

癸未四十九歲。擢授江南淮海河務兵備道。五月，挈眷由大江順流東行。六月，至清江浦，莅任。輯江漢贈言二卷，皆楚省僚衆士民送行之作。黎湛溪河帥世序爲之序。九月，以霜降安瀾議叙，紀錄二次。是冬，以覃恩，誥授朝議大夫，誥贈先考如章鉅官，誥贈先妣王氏爲恭人。誥封妻鄭氏爲恭人。

甲申五十歲。以前在方畧館校勘金史書成，由軍機處奏准從優議叙，加一級，紀錄二次。九月，調署江蘇按察使，駐滄浪亭行館。有滄浪亭題詠兩卷，張蘭渚先生、林少穆尙



書則徐各爲之序。十月、以霜降安瀾議叙、紀錄二次。十一月、回淮海任。值高家堰失事、勞勞襄辦者三閱月。有上歲小農河師規乞免調任淮揚道書、上呈使文秋潭、汪瑟菴廷珍二尙書請修復堰圩二隄書。

乙酉、五十一歲。春、管理盤運漕糧總局。五月、調署江蘇按察使。七月、又調回盤運漕糧總局。九月、將滯漕二百萬石全數盤運、渡黃北上。是役請撥銀一百一十萬、至是竣事。計節省銀三十二萬。奏人自督部河帥以下皆甄叙有差、遂擢山東按察使。先是、制河二大府銳意治河、方議挑關

孟兩灘以取道。又議改上流海口以利運。又欲開王營減壩以洩漲。悉係淮海所轄地方。余皆力陳其不可以去就爭之事。遂不果。迫余去任。始紛紛與辦矣。是年大兒逢辰登鄉薦第二名。

丙戌五十二歲。進京謝恩。蒙召見三次。賜克食二次。二月抵山東任。十一月調補江西按察使。未行。兼署山東布政使。擢江蘇布政使。輯古格言十二卷。湯敦甫協撰。金釗、劉次白中丞各爲之序。

丁亥五十三歲。抵江蘇任。輯東南棠蔭圖詠三卷。皆山左





僚衆士民送行之作。朱蘭坡同年珩爲之序。是役順途登泰山。莅任後督同李葛峯太守景峰修治泖湖一月而竣事。旋請籌款挑濬吳淞江。卽於是冬興工。督同陳芝相太守鑒往來催查。次年夏竣事。

戊子五十四歲。以挑濬吳淞江議叙加一級。修滄浪亭工竣。記而碑之。輯滄浪亭志四卷。又建吾宗伯鸞高士祠。記而碑之。輯梁祠紀畧二卷。朱蘭坡爲之序。是歲以覃恩誥贈先曾祖砥峯公爲通奉大夫如章鉅官。先曾祖妣林氏爲夫人。皆章鉅以本身妻室應得封典呈請上賜者也。

誥贈先祖天池公暨先祖妣林氏先考暨先妣王氏亦如之。

己丑五十五歲九月撫部陶雲汀官保奏請護理江蘇巡撫官保入覲之缺也輯吳中唱和集八卷作者二十一人皆壬戌同年之在吳與過吳者之詩自爲之序又作小滄浪七友畫卷刻石滄浪亭壁朱蘭坡爲之記。

庚寅五十六歲八月奉命護理江蘇巡撫陶官保擢督之缺也十二月復奉命護理江蘇巡撫盧厚山官保坤擢督之缺也是年始徧游吳下諸山各有詩冊畫卷紀之。



儒藏

退菴自訂年譜

辛卯五十七歲。江淮大水成災，流民蔽江而來，每日以萬計。乃率屬捐廉，出示募捐，一面給船咨送，一面設厰留養。計自初秋至冬，孟三月餘日，資送出境者六十餘萬人。自初冬至次年春季，在厰留養者四萬餘人。復自捐棉衣萬襲，以爲厰中禦寒之具。於三月末，陸續資送北返，沿途頗有頌聲。何竹菴郡丞士和爲作目送歸鴻畫卷，高兩農舍人澍然爲之記。

辛卯五十七歲。修復練湖陂壩。是冬，回空軍船藉以無阻。又籌款奏請興挑孟瀆三河，未竣事而去。編梓亡友程春

廬府丞

同文

遺詩四卷題曰密齋詩存爲之序。

壬辰五十八歲二月奉

命護理江蘇巡撫程梓庭中丞

祖洛

擢督之缺也計余官大江南北歷觀察廉訪旬宣並

四權撫篆前後凡八年有餘江省吏才最盛余歷任所薦

舉守令不下數十輩皆執弟子禮甚恭而如陳芝楣蘇鼇

石廷玉劉次白趙竹泉

炳言

皆不數年開府持節以去此

外如額斐農

騰伊

王香湖

青連

兩方伯俞陶泉

德淵

李石

舟

兩瑞

兩都轉王槐午

錫蒲

李碧山

廷錫

兩觀察李葛峯

景嶧王善舟有慶陳星垣

經

三大守或以故或以病去皆



儒藏

退菴自訂年譜

實不愧循卓之稱。尤往來於余心不釋云。是年四月因病奏請開缺奉 旨俟林則徐到任後再行開缺回籍調理。五月鄭夫人携家先行。六月林少穆抵蘇遂卸撫篆。挈映兒登舟。因建溪水淺小住浦城。輯葑江別話四卷。皆江南僚衆士民送行之作。八月回福州進黃巷新宅。是歲吾鄉秋禾爲風雨所傷米價驟貴而臺灣逆民陳辦滋事臺米不能內運民間蓋藏空乏衆心惶惶。因建議致書大府力懇奏請借撥江南漕米十萬石。程梓庭督部入 旨准行。於次年青黃不接之時由海船運到鄉里便之。是年修葺

宅右小樓榜曰黃樓與同里諸耆舊以詩酒相往來輯三山唱和集十卷。

癸巳五十九歲先室鄭夫人棄世爲撰事畧梓行之劉次白中丞高雨農舍人各爲之傳林少穆尙書爲之墓表輯江田梁氏詩存九卷自爲之序是歲修葺宅左小園榜曰東園分爲十二景有詩紀之。

甲午六十歲輯退菴隨筆二十卷自爲之序此書先爲關中文人所刻後至桂林復加增刪擴爲二十四卷賀耦庚中丞長齡序之。





乙未六十一歲。集詩社諸君子、在做廬設局、勸捐義倉穀、價忙碌者數十日而後集事。五月奉召入都、挈逢兒、映兒束裝就道。至揚州病瘧、留滯月餘日。八月由運河北上。舟次輯北行、酬唱集四卷、皆同里知好及大江南北僚、士民贈行之作。陳芝楣中丞爲之序。八月杪抵京、遞摺銷假。蒙召見一次。次日卽授甘肅布政使。復蒙召見二次。並賜克食。於重陽日挈逢兒、映兒赴甘肅任。順途游華山。

丙申六十二歲。甘肅庫中前因辦理軍需、有漏卮銀七萬



兩經手者半已離甘、部中屢行查詰、督部不知所爲、余殫  
五日夜之勤、設法補苴完結、上下同官及離甘各官皆德  
之。正月、調授直隸布政使、以留辦計典、遲至三月杪始  
成行。途次、接奉擢撫廣西之命。五月抵京、遞摺謝恩。  
蒙連日召見六次、賜克食五次。卽陛辭出京、挈子兒、  
敬兒赴廣西任、兼署廣西學政三閱月。以奉查馮贊勳揭  
恭楊時行一案、據實奏覆、奉旨嘉獎、議叙加一級。輯宣  
南贈言二卷、皆曰下同人話別之作也。途中、舟過衡山、在  
船窗中飽觀一日、有詩紀之。冬、奉賜福字一方。

丁酉六十三歲。輯論語集註旁證二十卷、孟子集註十四卷。秋監臨廣西文武兩闈。並會同丁自菴學政善慶考選拔貢。廣西文闈積弊多端。其最甚者。每科闈中輒派兵六十名列坐於明遠樓之上下前後。名爲稽查彈壓。而鎗替傳遞之弊。卽伏其中。甚至有能文之舉人。身穿號褂。於樓上起草。交他兵順遞號舍中。毫不費力者。余旣採訪明確。乃排衆議革除之。並附片奏明立案。士林感之。是科三兒恭辰舉於鄉。修復署東銅鼓樓。成銅鼓聯吟集兩卷。又於獨秀峯下重建玉誦堂。爲詩紀之。遠近和者百餘家。冬。

奉 賜福字一方。

戊戌六十四歲。越南使臣入貢。照例於節堂款宴。作畫冊紀之。校梓文選旁證四十六卷。阮雲臺師朱蘭坡同年各爲之序。蓋二十年精力所萃。至是始成書云。輯 國朝臣工言行記十二卷。冬奉 賜福字一方。

己亥六十五歲。監臨粵西文武兩闡。是歲次兒丁辰與胞姪齊晟同舉於鄉。四兒映辰入縣庠。輯制藝叢話二十四卷。朱蘭坡及楊芸士明經文蔚各爲之序。冬奉 賜福字一方。



儒藏

退菴自訂年譜

庚子六十六歲。監臨文武鄉閭，並會同學政考選優貢。輯  
樞聯叢話十二卷。陳蓮史方伯繼昌爲之序。是年始徧游  
桂林諸山，謫成長卷紀之。冬奉賜福字一方。

辛丑六十七歲。二月，聞廣東喫夷滋事，帶兵至梧州府防  
堵。梧州界連東粵，匪徒乘機嘯聚。余力行團練之法，境內  
帖然。奉旨，選將調兵，送砲協濟東省，並准楊誠村奏贊  
芳浴取鐵椿木排芻束，兩旬間悉辦，迎無悞。旋調授江蘇  
巡撫，卽回桂林。往來得飽看陽朔山水，亦忙中勝緣也。五  
月，挈家登舟，由湘江、荆江順流而東。七月，莅江蘇任，卽帶



兵赴上海縣防堵。時裕魯山督部謙奏准寶山口商船一  
概不准進港、以防夷匪混入、合縣商民洶洶、幾至罷市、縣  
令束手罔措、關道遽欲辭官。余卽日據呈批准進港、一面  
具奏人心始安、歡聲雷動。又與陳蓮峯提戎化成協力練  
兵、練砲、收撫巨姦。自吳淞江至寶山口數十里、刁斗森嚴、  
軍民安堵。值浙江鎮海失陷、督部計至、因兼署兩江總督  
及兩淮鹽政二十餘日。適奉辦理糧臺之命、遂回蘇州。  
先是、恭奉明旨、飭各省督撫保舉所屬道府以下各官。  
余莅蘇雖甫三月、而僚屬半係舊知、卽據實以所知奏薦。



不及一年而黃石琴

思彤

游歷方伯但雲湖

明倫

坐升都

轉王觀庭

用賓

練笠人

廷璜

各擢太守中外咸稱得人焉。

十一月疾作卽專摺陳請開缺調理送篆交程晴峯中丞

喬承

接辦是歲逢兒成進士以兵部員外郎卽補。

壬寅六十八歲正月引疾摺回奉 旨准其開缺調理並

奉 賜福字一方二月挈家登舟本擬回閩因驟聞浙東

哄夷鴟突大帥失機錢塘江口戒嚴不敢前發遂回帆北

渡揚子江寓居揚州張氏園者三月有餘日與阮雲臺師

謝蕉石同年

學崇

黃右原比部

與

及余嫻楊竹圃方伯

質

劇談而已。五月杪聞夷船已進岡山口，復倉卒挈家登舟，渡江而南，徑達蘇州，由浙江回閩。蓋六月初三日，舟過丹陽。初八日，夷兵已陷京口矣。六月杪抵浦城，復聞噍夷要在福州設立馬頭，已經疆臣奏准。城中士民惶惑，有紛紛逃避之意。不得已，暫駐南浦，借宅而居焉。忙中輯楹聯續話四卷，巧對錄四卷，皆自爲之序。

癸卯六十九歲，購花園衝荒地一區，起造新宅。左有方池半畝，遂環池畧綴屋宇，榜曰北東園，以別於福州之東園也。四月進新宅。八月回福州省墓，小住二十餘日，仍回浦。



城。爲恭兒點定勸戒近錄六卷、爲之序。

甲辰七十歲。自訂年譜、又輯稱謂拾遺十卷、自爲之序。

# 張介侯先生年譜

馮國瑞 編撰

郭齊 校點

楊世文 一審

李文澤 二審

民國二十四年鉛印本

《張介侯先生年譜》一卷、附錄一卷，馮國瑞編撰。民國二十四年鉛印《景慰廬叢刻》本。

張澍（一七八一—一八四七），字時霖，一字伯瀾，號介侯，又號介白，甘肅武威人。嘉慶四年進士，歷官貴州玉屏、四川屏山、江西永新知縣，治事簡易而持法甚嚴。遊蹟半天下，長於姓氏之學，工詞章，兼治金石，留心關隴文獻。著有《姓氏五書》、《續黔書》、《秦音》、《養素堂集》，又輯刊《二酉堂叢書》。

馮國瑞（一九〇一—？），字仲翔，甘肅天水人。嘗學於清華園，與劉盼遂同學相好。後嘗佐戎幕於湟中者數年，棄官歸。

此譜乃由劉盼遂始議其端，而國瑞獨力成之者。年月事蹟下，以引原始材料為主，敘述不多，足可徵信。其引文亦較簡要而不冗贅。末附譜主論學書數通，皆其代表之作，頗見功力。然觀全譜，所錄細行尚嫌瑣碎。所列時事，往往有不甚相關者，如十歲邢澍、洪亮吉成進士之類。其人首魚之類怪誕，亦不必載也。

# 序

憶昔丙寅丁卯之際，與馮子仲翔共學清華園。時有任公、觀堂、寅恪、辛平諸師，剛主、子馨、芸圻、侃如、子植、懷斌，了一、書舫、欣安、彤伯諸友，相與昕夕摩挲，橫書辨難，亦或放懷騷雅，裁牋唱酬，儼然同隊之魚。初不識人世間有習繳澤虞之變，寄志三古上，營日九域外，此亦人生之極樂也。無何，仲翔返覲西河，旋佐戎幕於湟中者數年。余則匏繫微祿，戡影京門，性又疏嬾，遂成睽隔。去年秋，仲翔忽携一介行李，翩然過存，蓋已弃官高蹈，謀遂讀書夙願。爰下榻於余百鶴樓之東序，契闊談讌，昕夕相守，爲樂不減在清華時。夜永酒闌，君往往致歎於勝朝嘉慶學術之隆，而慨夫秦隴之無人文教之失揆，未嘗不展轉歔歔而思所以湔祓之者。予則出予新箸段王三先生年譜，似以段王暨張介侯相與瓜葛故事，曰：此寧非關隴人邪？其學其行，悉當時諸顓頊所敬慕，而推爲南服所未曾有者。此固一代石師，將俟於後學之表彰者。君迺瞿然而起曰：有是哉！是固余小子之責也。





夫在西寧日、曾得張公手校二酉堂全書、眉間行裏、鉤乙補苴、丹鉛殆遍。雖先妄檄汰、然就中菁英、要已暗識無遺。又獲邢雨民守雅堂文集、凡與介侯往復之作、亦猶數見不鮮。亟宜纂爲年譜、以彙橐羣材、俾勿墜地。是亦陝甘文獻一大事業也。獨期發篋陳策、若養素堂全集、姓氏書五種、二酉堂叢書等、鱗次駢前、咸供驅遣。而又旁蒐秘笈、兼及墨本、凡數閱月而介侯先生年譜告成焉。因持以示盼、遂曰：此編造述顛末、唯子稔知、盍序數語以發之。予曰：孟子居不云乎、誦其詩、讀其書、不知其人、可乎。是以論其世也。此蓋晚近年譜學之界義矣。君生與介侯同鄉里、其流風遺沫之服襲者應多。而讀書五車、行路萬里、落筆千秋也。則又無不與同。是介侯行年之繫、詎孰有宜于君者。然則是編能得介侯之真、足以信今而昭後者、又何疑焉。抑予別有說者。張公以乾隆辛丑誕于武威、而爲振世之豪。却後一百二十年、而君降于天水。太歲復值辛丑。據星禽家言、或不無上天之陰陽與眷顧西土者存乎其間。惟余則謂仲翔之鴻博崎嶇、六法嫻

于張索政事配乎破羌又非介侯之所能牢皋者矣。丙子仲春同學弟息  
縣劉盼遂序。



儒藏

張介侯先生年譜 序

# 序

有清一代治漢學者盛稱乾嘉海內翕然從風國家倡導於上疆吏開府率多學人氣類相求故成就之偉超越前代關隴夔處邊陲明季宋學較盛。亭林入關與二曲山史學行砥礪志士苦心別有所在其學風未能灌滋於西而甘肅又孤懸西鄙得書不易師承墜緒窮鄉僻壤輒墨守一先生說不能見其大勢使然也介侯崛起武威早負盛名弱冠之年登巍科受知於大興朱石君<sub>珪</sub>儀徵阮芸臺<sub>元</sub>與高郵王伯申<sub>引</sub>之金壇段懋堂<sub>玉裁</sub>棲霞郝懿行<sub>蘭皋</sub>嘉興錢衍石<sub>儀吉</sub>臧在東<sub>琳</sub>諸人相問學上下議論視爲異人使其留京師久竭泰半心力於述作之林其成就當不止此然以學人宦游江南垂四十年從政治學兼營不廢以狷介之性疾惡如仇終不能俛仰隨俗浮沉百里莫遂志事其治學務矜博大於輿地姓氏譜牒造詣特深以彼其才生及盛世獲徧交當代學者騰達京華漫游江湖樸學華辭兼長並茂巍然在乾嘉大師之列而清代關隴學者介侯允



儒藏

張介侯先生年譜 序

爲大宗矣。綜其平生所著述，都數十種，如千卷。里中後學至舉其姓字而或茫然，其遺書流傳日漸散鈔。予居西海時，嘗得其手校本二酉堂叢書，增補鈎乙，頗見完善。今來舊京，新獲多種，介侯遺書粲然略備。嘗欲爲之重校而合刊之，以餉士林，猶未暇也。適息縣劉盼遂君甫輯經韻樓續稿，又爲引之，先生作年譜而合刊之，輯逸之心油然而生。歲暮天寒，山居無事，輯其年譜，參以他籍，其學行大端略見于茲。其與段王郝臧諸人論學之作，尤犖犖可傳者，以未能確定其年月，因附錄其後。民國二十四年長至日，馮國瑞序於紅葉山莊。

# 張介侯先生年譜

天水馮國瑞輯

先生名澍，字伯淪，自號介侯，甘肅武威人。祖德，字誠一，厥性嚴毅，好面折人過，戚鄰皆畏敬之。有難事，輒來問策畫，與之決嫌疑，分利害，各厭其意而去。先府君行述 養素堂文集卷三五父應舉，字聘九，行三，生于乾隆十三年七月

二十七日。時加丑涼州府學增生。世居武威，事親篤孝。親疾，額神求代，嘗穢別差劇里之士人，以比庾子真。親沒，弟求析產，止之不可，則與以田上腴者半。他器物稱是。未幾盡，欲析君所有，則又與之。盡則又與之。凡七析而無以食，乃授讀自給。猶時時與弟共所有。弟沒，殯乃已。故所識劉文洵家富，中落而瞽。君爲謀居食。於審眎瑤函得方，療其目，復明。冬暇立館外，一人跼泣請曰：「母死矣，無以斂。」君遽脫所衣裘畀之。已乃知其母死久矣。君曰：「是屢假貸，弱于顏爾，不足怪也。」母臧，貤封安人。娶於張，封安人。元奮

勇將軍吳誠後。後入明而易姓。故無同族嫌。子四人。長濂。次洵。漳。俱殤。女

弟二人。適孟適蔡。

張君墓誌銘  
衍石齋紀事卷十

乾隆四十六年辛丑。先生生於武威里第。

是年。朱珪年五十歲。段玉裁四十六歲。邵晉涵三十八歲。洪亮吉三十五歲。郝懿行二十四歲。阮元十七歲。王引之十五歲。

乾隆四十七年壬寅。二歲。

乾隆四十八年癸卯。三歲。

乾隆四十九年甲辰。四歲。

乾隆五十年乙巳。五歲。

乾隆五十一年丙午。六歲。

居武威。

蘭州黃河清數百里。

乾隆五十年間。有人自蘭州來。言黃河清數百里。家大人命樹詠之。



儒藏

張介侯先生年譜



詩曰、黃河清、聖人生。聖人生、天下平。滔滔濁流、忽如鏡明。誰投寸膠、千里激泓。是爲聖天子之德、而川后輸誠。養素堂詩集卷一

乾隆五十二年丁未七歲。

居武威。

從劉星五先生受學。

名作垣、字星五、武威縣人。乾隆丙子舉人、辛巳進士。宰安徽舒城縣、善折獄、多惠政。歸里後、嘗掌教

酒泉書院、旋主講、涼州天梯書院。敦學格遵先正矩矱、以理醇辭雅爲的。

樹年方稚、從之受業。先生奇愛之、病其筆端縱橫、常曰、子才信佳、而文軼法度、非時藝也。會學使章桐門先生將按臨、先生謂樹曰、子熟文選、亦讀律賦乎。樹對曰、未。先生曰、子急取律賦讀之。學使至、可考古也。樹乃取家所有新賦湧雲全部讀之、六日而熟。請先生命题作之。先生賞其藻麗、復訾其奔放。已而學使至涼、樹以幼童與試、名列第二。先生大喜、謂樹曰、子毋謂賦佳而被其甄拔也。學使憐爾幼、故提獎之耳。

劉星五先生傳  
文集卷二四

乾隆五十三年戊申八歲。

居武威。

憶澍八歲時舅始病亡侍安人往弔其居在北門外于家灣去城二十里所既至哭奠畢舅氏留宿一日偶與安人至後院見中室設祖宗像貌皆高鼻大顴危冠珥貂有書湖廣行省平章政事、中書左丞相者有書佩金虎符大將軍者有書佩珠虎符大將軍者有書佩三珠虎符大將軍者如此凡數十適舅氏幼子趨過安人呼而止之語澍曰爾舅氏家在前朝通顯多以武功著所藏誥命尙夥今爾舅業農田日廢諸子竊惰家益落慮年老且抑鬱奈何言之淚纒纒下澍時亦哭失聲不知何心之所感也

先安人母氏遺事述  
文集卷三五

後值端陽節日正午安人方在厨蒸棗糕澍引几啟窗見後院一紅裳女子揚袖翩舞顧予而笑欲取木樨擊之倏忽而隱語安人曰是有鬼安人曰何也語之故安人曰非鬼也鬼則白晝何能見形亦非



備藏

怪也。此室居數年殊清謐，並無變異。蓋紅裳屬火，火陽也。今正陽之月見之，月又陽也。然而爲女子，乃陰也。夕當慎火。至夜果竈突煙起，壁中木柱然，膊膊作聲，急水灌之，乃息。凡安人之見事明而析理精也如此。同前

乾隆五十四年己酉九歲。

居武威。

母氏張卒。

嗚呼。樹之違母氏，蓋自九歲至今矣。同前

母張氏，元駙馬高昌王之裔。君九齡失母，讀書過目輒記，文章鉅麗。

傾一時。

張介侯墓誌銘  
衍石君紀事續錄九

乾隆五十五年庚戌十歲。

居武威。

幼愛離騷，豔深悲正則忠。詩集卷四

謁三閭大夫祠

邢樹洪亮吉成進士。

乾隆五十六年辛亥十一歲。

居武威。

謁韓武烈公。

憶樹十一歲時謁公于里第所以獎許之者甚至。勅贈提督軍門巴

圖說武烈韓公傳

文集卷二四

乾隆五十七年壬子十二歲。

乾隆五十八年癸丑十三歲。

居武威。

乾隆五十九年甲寅十四歲。

居西安。

是年舉于鄉。

乾隆甲寅我世父侍講府君偕漢軍蔣公典陝西試得君驚歎目爲



儒藏

張介侯先生年譜

異人。張介侯墓誌銘

朱石君題續黔書詩。張生天下英。胸羅武庫富。十四歌鹿鳴。

乾隆六十年乙卯十五歲。

居京師。

不孝澍自甲寅登鄉薦以後。即在京師肄業。先府君行述 樹初入

都邵二雲先生勸學經史。養素堂詩集目錄 明年澍來京師。與儀吉相善

也。張君墓誌銘 三月憶介侯始見予水賦千言。欣賞之。即弟友余。

張介侯墓誌銘 序侯養素堂詩集 君鄉舉出我世父漆林先生之門。故予幼而

識君。稍長。偕君爲文課。今君集中擬淳于越請封建及氣論諸篇。皆

嘗同作。間效韓孟聯句。押強韻。爭奪戲難相樂也。如是者五年。同前

君性亢直。疾惡如仇。好責善。朋友間人多畏君。張介侯墓誌銘

從管韞山先生受業。

乙卯之歲。執贄追隨。公見我文。擊節驚奇。稼軒豪氣。同甫雄詞。評澍

有辛陳之風 譽延人海名噪一詩。祭管錕山侍御師文集卷二八

撰春秋時人名字釋十二篇。

余十六歲時在都作春秋時人名字釋數篇。文集卷三十二

嘉慶元年丙辰十六歲。

居京師。

是年邵晉涵卒。

嘉慶二年丁巳十七歲。

嘉慶三年戊午十八歲。

居京師。

會試蹕留久貧甚而館鉅公家。主人出其內人夜擲蒲。君使其戚譙讓之。卒以讒去。又館臧家橋。主人召優娛客。君怒又去之。張介侯墓誌銘

事績  
墓九

嘉慶四年己未十九歲。





居京師。

成進士。

嘉慶四年，仁宗始親政。是歲也，天下貢士錄用中外官倍於曩時。其通經術、能文章者，得人尤盛。時論者以擬康熙、乾隆朝兩制科，殆無愧云。而武威張君介侯，年甫十九，博聞麗藻，才氣無雙，一時驚以爲異人。張介侯文集序最後，南昌熊侍郎枚請教其孫常綽。是歲第進士入翰林，充實錄館纂修。同前

按己未會試，朱珪爲正考官，劉權之、阮元、文寧爲副。聖經室嘉慶四年己未科

會試後序

總裁爲大興朱文正公、長沙劉文恪公、長白文遠皋先生、

儀徵阮文達公，同考歷城汪東序先生。（中略）阮仲嘉瀛洲筆

談云：武進張皋文、高郵王伯申、閩縣陳恭甫、德清許積卿、桐城馬

魯陳、棲霞郝蘭皋等皆治經，多所著述也。閱爾昌王伯申年譜

十月，請假省親，有乞假歸省詩。

十一月抵武威。

澍已未館選後十月請假省親于十一月杪抵家侍先府君夜坐園

鑑

庭訓述文集卷三五

聘九先生是年有庭訓八則一論講漢學勿厭薄宋儒使人省惕以檢束身心二論改過三論商鞅焚書之罪四論孔孟講恕之說五論漢儒以土神爲智水神爲信之道六論剛字七問馬宛斯釋史引孟子文甚備澍述十餘條至廣韻引孟子曰六十四黍爲一圭句聘九先生辯駁甚核八論張巡雷萬春事詳庭訓述過予家漕訪舅氏後裔有詩自註于幼時曾見大樞藏元時封勅詰命今無存者又曰有舅氏疏姓名國發年六十餘賣豆腐爲生曾以食我

偕何梅生

承先登寶融臺有詩詩集卷一

嘉慶五年庚申二十歲

三月自武威入都



儒藏

張介侯先生年譜

嘉慶庚申三月余白家將還京供職四月抵青門。遊華山記 文集卷九 同岳

一山震川舍人游大小雁增有詩。偶病肝鬱友人朝邑王葵圃茂

才言玉泉院邃幽清敞可避囂曷遷彼靜養疾當速痊余曰善乃於

四月中旬膏車造山麓稅於前院。遊華山均有記。文集卷九

冬至京師。

客冬還朝得與二三君子論藝敷衽致足樂也。和荅陸草序 文集卷四

嘉慶六年辛酉二十一歲。

李廣銅印歌少司農阮芸臺元夫子屬作章甫和之。詩集卷二

四月散館改外職。

君之改外也朝論惜之。文集錢序 讀山海經得詩五十八首。詩集卷二

七月選得貴州玉屏。

同鮑雙五桂星白小山銘兩太史同年游陶然亭有詩八月十五夜

同宋芷灣湘黃季侯鳴然李侖圃初白小山銘覺羅桂香東芳趙穀

士在田諸同年小集庶常館以一年今宵明月多分韻得一字有詩。  
詩集卷二

十月出都赴玉屏任。

予辛酉冬赴玉屏任出都之日同年友賦詩祖餞者咸以古良吏相  
期許。(中略)而湯敦甫君勗茲尤直諒敦篤虛予事吟詠而廢案  
牘也贈章有一語贈君須記取莫因噎用規違戒良友之言不啻章

佩矣。

扣絃吟草序文集卷四

王伯申引之同年黔中典試歸遇於龍岡道上。

詩集卷三

余初至黔見市錢猶肉好完具厥後省局私鑄小錢不可用余上書  
署藩臺董觀橋前輩言之。(中略)旋司局某告病坐擁巨萬將入  
都爲質部也。官銓續黔書卷六

是年章學誠卒。

嘉慶七年壬戌二十二歲。



備藏

張介侯先生年譜

履玉屏任。

玉屏邑東一里高峯峭壁，疊石千層，儼若牙籤萬軸，橫亘江左，則萬卷書巖也。余既不得讀中秘書而來此，何敢薄民社爲粗官。但一行作吏，此事遂廢。每當敲撲犯慮牒訴裝懷之時，登臨舒嘯，坐擁萬卷，不啻南面百城，而塵容俗狀俱爲之一洗，是亦罍窶之至樂也。萬卷書巖

續黔書卷四

抵任後，遣輿安迓府君，行至襄陽，患日晡，不能前進，乃返

家街。

先府君行述文集卷三五

野鷄坪追和楊升菴先生韻詩曰：坪上桃花又

杏花，春光爛漫眼麻茶。蠻方不作春婆夢，剩有新詩記歲華。玉屏

田中書榕著黔苗竹枝詞二十四首，不分種類，隨意鋪叙。余嫌其禁暇日作此，每種一首，事多或二三章，共四十首，分註其下，俾覽者有考。詞不必工，姑紀其實。

五月，自省返署。十二日，由潯陽解舵抵羊坪，有詩。

七月，謁三閭大夫祠，爲文以弔之。文集卷二八



滇撫初公彭齡過縣從者索金則扶之百。又筭布政使僕催丁銀者公文上幕府辨是非若師教弟子上官雖多爲優容心弗善也。集文

錄序

爲吏政事修明令行禁止然性亢直時時責善於長官。

清史列傳卷七

三 有捍水議曰玉屏雖叢爾邑爲黔門戶扼楚咽喉形勢據其衝要而城濱大江每多水患勝國天順二年隆慶三年天啟元年屢被潰決入國朝康熙二十七年五十九年及乾隆元年二十一年四十四年並遭洪流居民蕩析近者值雨澤浸多水輒至康衢余承乏之三月陰霖日久無江暴漲驚濤潰薄水不入闔者僅尺許心甚憂之蓋江流自清浪入熊谿城西有獅子峯據江口水無所泄其怒北有鎮平玉屏兩山作障則水不得不折而東而城當其衝下流則書巖蓮峯隔江夾峙倚岸既狹疏瀉未易勢亦逾奮迅倘山潦衝溢則水必不能毆山以行而與爲難矣是吾無止水之防而非水自潰其防也吾無容水之地而非水據吾之地也移城以避之則費巨費巨則



庸愚駭。委城以與之。則殃民殃民。則蒼昊怒。且如國家設有司之謂何。暇日步郊坰。相地勢。思有以捍之。議自北門至館驛。取江中巨石砌之爲塘。高一丈。仍於土石堆積之處掘之。以濔江身。俾廓而有容。用工不過百人。爲期不過一月。則居民可免淪胥之患。陽侯不得憑汎濫之威矣。文集卷十七 及爲吏政事甚修。漢軍張文敏公時在

黔。最知君。

文集卷十七

輯扣舷陞草有序。文集卷四

調署遵義。

使署遵義。治盜徒黨盡。文敏贈詩。君和答。諷以獎拔廉吏。退語於儕

曰。爲上官惟此最急。

張介侯墓誌銘

遵義幅員遼闊。統轄十三里。

每里十六甲。煙火輻輳。地勢險阻。其民桀驁詭譎。染場會之餘習。而里甲多巨猾。值趁虛日。輒聯外來。覲客擄掠錢貨。以爲常。余代庖之日。吏民初以余之少也而易之。然積聞其在玉屏聲。觀望不敢動。然



予之治盜以虛不以實。每見同寮有獲盜者、輒毀折支體、飲以鹽鹵、瞋其目、竊傷其酷、而卒莫之能戢者。賊以爲法盡於是、吏亦以爲法盡於是、役亦以爲法盡於是、且議其忍也、而不肯捕盜。因是益熾。余則不然。受事日、召集里甲、訊其素鴟義者、斥之。選立愿慤、嚴諭之以杜絕飲博、謹守堡寨。其容留匪類者、皐無赦。其有警而不協力、禽者、皐無赦。其有被盜而匿不報者、皐不赦。惟里甲倍償。而又於邨鎮關津、通衢僻路、布令以威刑懼之。於是乃不用捕而用儻。非不用捕也。蓋捕則疏、儻則密。捕則真盜或走匿、而役以局外者當之。巨盜或遠颺、而役以鼠竊者塞之。儻則囊橐何氏、鳩聚何地、黨羽何人、起發何期、過抵何許、灼然在吾之心目。而又虞儻役之給我也、復擇役之誠諳者規之。耳目既廣、聲色不聞、彼宵小者以爲吾之疏之也、乃稍稍露跡。而儻之者旋至、迅發役捕之、罔不獲。其聚集多人者、親率役捕之、罔不獲。值趁虛之期、微服往察之、伏壯役於側近、有肆斂者、即禽

之罔不獲。役有不用命及賄脫賊者，痛懲之，責令倍償其失。恭命則重償之。其渠賊吳賴、額賽、曹操、把地王等，以次就擒，無良之徒各恟駭，懍懍疑余之日出而網羅之。四張也，乃大沮散，遁於桐梓、正安、綏陽等處。後遇桐梓令衛君天民，問曰：子其以鄰國爲壑乎？余曰：子甘爲逋逃藪乎？衛未有以應也。紀治盜文集卷三四

是年，張臯聞惠言卒。

嘉慶八年癸亥，二十三歲。

二月，署廣順州。

予於癸亥之二月，攝篆是州。遊白雲山記文集卷七

暇則進諸士，校論文藝，

率皆條流紛糅，訓辭樸塞。由其采掇陳言，罔知晉學也。乃倣古人讚

學，勗學勸學，厲學之文，爲茂學篇以詔之。文集卷十七

五月，鎮遠霪霖，無江暴漲，上流夾岸人居，墻鷄牢豕悉被沖汎。鎮之漁咸飛櫂爭取，忽洪波卓立，盤渦雷轟，見一巨魚人首，長徑丈，鬚鬣



殷紅衝網駛去。趙子海自鎮遠來親見爲予言之。

人首魚  
續黔書卷七

偕宋西樵簡

明府李春塢

孝廉游雪崖洞有詩。自註

時余已  
引疾。

廣順州四十里有羅永葦爲建文帝避跡之所有詩。

貴陽府城外

謁武鄉侯祠有詩。

謝病後得京華友人書猶以功名相勗賦詩報

之。詩集卷四

余引疾閒居（中略）時屆初秋炎都襄埃旻寓滌氛

遂乘輿步出陸廣門石逕紆曲形似書字寒谿沙衍靜無漚漫遠樹

空碧哀蟬激響恍助予之鄉思。（中略）偕游者予弟淑也。

遊黔  
山記

續黔書卷四

治事以嚴胥役咸憚其威而博學多聞待士極爲寬厚治教之流及

今州之耆老猶有津津而道者。

道光二十六年  
廣順州志職官志名宦

至玉屏宋西樵簡

明府留飲即席賦詩三章志別。自註

余家小至而  
市路資已罄

宿水次月餘西樵慨借良  
金並遣役護送乃抵黔省。

冬解玉屏組返里。

納姬人謝氏。

姬氏謝貴州貴筑縣籍。癸亥冬余解玉屏組返里姬始歸余時方十歲性聰慧稍長工鍼黹善桴飪佐家婦承堂上歡昕夕惟謹。姬謝氏墓誌銘

文集卷二六

過洞庭湖阻風望君山舟中望岳陽樓邕湖舟泊獅子灣均有詩。詩

集卷四

是年錢大昕卒。

嘉慶九年甲子二十四歲。

元月應漢南講席聘。

過馬嵬驛經五丈原岐山縣道上過鳳嶺至青橋驛均有詩。抵褒

城之日天氣晴霽山間景物雅可游目騁懷輿中有詩三首。詩集卷五

澍抵漢南五閱月矣肄業諸生習氣尙爲循謹惟讀腐庸時執不讀經書澍嚴立程限俾各讀經時勗之以經訓爲言歷代經師授受源





流洎漢魏唐宋諸儒說經異同之梗概。學侶似皆樂聞。而苦於無書。輒爲浩歎。澍行篋所携之書亦無多。擇資性聰慧者。付十三經注疏。與之閱。日來稍有頭緒矣。上方葆嚴撫軍師書文集卷十四

六月十五日。讀黔書成。凡八卷。

（上略）今采掇方俗爲黔中紀聞。以田霞綸先生箸黔書。改曰續黔書。次其言爲序。以正鴻筆麗藻之君子。續黔書自序 去官掌教

漢陽。乃有餘財。刊其所著續黔書。送張介侯序 黔山樓初集稿本

秋。留別漢南書院諸子。有詩二首。

返里省親。

惜別曲贈家玉谿。美如孝廉詩曰。君臯比。我求仕。可能父母歌樂只。

我驪駒。君惜別。莫作兒女泣嗚咽。丈夫相見會有期。防身短劍蟠蛟螭。意氣直欲陵蒼曠。孰能坐守遠山眉。在山泉水原可慕。出山小草未爲誤。魯恭棠茂果何人。黔南有我甘棠樹。君乎尙乃紆青袍。有如



鴈隼伏奇毛。順風何日辭蓬蒿。與爾銜杯一洗萬古之牢騷。詩集卷五

案美如武威人。嘉慶戊辰翰林。工繪事。在倪黃間。有遺詩未刊。  
嘉慶十年乙丑二十五歲。

潼關渡黃河。孟縣謁韓文公祠。均有詩。

至京師。

秋雨新霽。偕何梅山承先庶常自橫街步至黑窑廠。遂登陶然亭。小  
飲聯句。詩集卷六

南征。

以家計艱難。旅游大江南北。

先府君行述文集卷三五

葉縣李西巖賓明府留

飲署齋。

至武昌。有制府來樂府。自註。

將翁先生節制兩湖南三月。致修民和。過赤壁至安慶。謁余忠宣公祠。次練

武昌見所刊詩官冊。病其冗俗。爲作錄七章。庶幾傳之可久也。

過赤壁至安慶。謁余忠宣公祠。次練

忠烈韻弔之。自皖口赴廬州、抵蓮花潭、值祀竈聞爆竹聲、欬然起鄉思。過舒城縣、廬州道中、均有詩。

嘉慶十一年丙寅二十六歲。

春至廬州謁包孝肅公祠。全椒道上和韋左司寄全椒山中道士元韻。全椒汪孝廉寶以和高青丘梅花詩見示、索和、走筆次之、有詩九首。

至揚州謁阮芸臺

元

撫軍師

時先生丁憂在家。

詩曰、豈尋察戰到揚州、爲

謁維摩上選樓

師築文選樓於所居。

漢代畫圖縣四壁、蜀岡泉水滄三甌、敢言

經術宗先鄭、亦愧文章遜大劉、冉冉年華將四十、切雲冠敝尙雲游。

其二曰、南方學者未能先

師寄那釋堂制軍信曰、張子介侯經學文詞、南方之學者未能或之先也。

愧負

師言亦赧然、日月何分微顯看、鳳麟遮莫譯書傳、安于果敢曾相信、

胡廣中庸未是賢、自問年來腸似雪、羊頭馬脯詎輕縣、揚州雜詠

十五首。隨宮舊蹟董太傅祠均有詩。



儒藏

張介侯先生年譜

至鎮洋、月夜泊京口、望北固山、偕師芑堂承祖明府游惠山。至蘇

州游虎丘、遇家船山問陶前輩、晚歸寓舍共酌。詩曰：歸來話舊各淒

然。如此頭銜共謫仙。夜半鐘聲何處寺、明朝好訪孝廉船。錢衍石孝廉來蘇、向

未得見、擬同訪之。衍石係船山年姪也。三首之一、詩集卷七。自姑蘇買舟、訪錢衍石於嘉興之

梅里。時嘉慶十一年二月二十九日也。距別期八年矣。嗚噫、未已、仲

紙聯句得六百字。同錢寶甫昌齡太史、陳妙士詩庭進士、錢衍石

儀吉孝廉游南湖、登煙雨樓。三月初一日、謁錢漆林先師墓。杭

州與錢衍石孝廉游西湖、孤山看梅、謁于忠肅公祠、游靈隱寺、吳山

頂觀錢塘江。至長興、題邢佺山樹桓上草堂圖、有邢侯履越紐治

行今第一。家山縈清夢、畫倩營丘筆句。留長興縣官署三日、將返吳

門、錄別佺山明府詩、絲羽叫芳春、鴉岡偶踏塵。逢君天下士、數我眼

中人。觀象追甘德、佺山著有三經釋天。十尋源說庫鈞。又著有兩錄。詞流今代盛、

意折是經神。二首錄一復至蘇州、晤閻雨田登雲明府。縣人、乙丑進士。



過無錫寄懷秦蓉莊震鈞夫子時觀察濟東泰武舟泊武進訪管絨若世銘夫子故宅過鎮洋登金山頂放歌同洪稚存亮吉前輩均有詩。

春莫至金陵朱意園藻太守主講松江余自秣陵買舟訪之值其赴蘇州仍促權來吳門。至上海舟過太湖均有詩。詩集卷七至池州烏沙夾舟中望月有詩。

### 三古人苑成。

今歲南游金陵將返江夏逢天之暑思心潭潭舟滯水濱頗羈無友竊念列國族姓備于春秋而幽平以前略不多見乃自義皞下訖共和刺取經史傳記中古人之姓氏附以事蹟都爲一書名曰三古人苑時嘉慶丙寅太歲在游兆攝提格余月池州舟中書。三古人苑自序文集卷四至武昌湖口曉起過九江南康小孤山望廬山滕王閣百花洲訪蘇雲卿遺趾豫章重九欲偕彭峴麓良翁編修游滕王閣雨甚不果均

有詩。欲去南昌、阿鏡潭。應麟猶滯興國縣未歸。賦詩留寄。至漢陽

旅寓舍。懷岳一山。震川舍人。金印之殺明府同年督運楚船。駐夏

口。余自豫章返權印之館。我餐我聊。成四詩。用志感懷。偕金印之陳

鹿苹二明府登晴川閣。有詩。詩集卷八

撰南征記。

余于庚申。疑作乙丑之冬。由湖北之江西。之安徽。之揚州。之蘇州。之浙江。

幾覽南紀之半。風晨雨夕。塊獨無朋。乃錄所經歷。以資觀省。借中書

之禿管。消客子之光陰。援据未能博精。摘詞復不清典。知有愧於曩

哲。或不病于費時云爾。南征記序文集卷四

嘉慶十二年丁卯。二十七歲。

正月初三日。自夏汭返里。

留別金印之明府。舟次樊城。土人言襄郡南門外有唐漢陽王文貞

公故園。乘橈往訪之。有詩。詩集卷八

嘉慶十三年戊辰二十八歲。

居蘭州。

主講蘭山書院。

係應積觀察郎阿蔡小霞廷衡方伯之聘有富積蔡啟文集卷十五

介侯師主講蘭山疏從之學師訓及門以經史爲宗詞章次之。（下

略）馬疏跋詩集卷二十六

五涼舊聞成凡四十卷。

往予主講蘭州書院譚菽之餘銳心文獻纂五涼舊聞四十卷網羅

放失頗資考證。叢書自序

涼州爲金天奧區自漢武開辟刺史宣化名賢誰起。洎五代割據張

氏四世忠晉多士翳薈鬱若鄧林往籍可按已。隨唐之際尙多偉人。

迨宋元則荒僮已甚。我朝文教覃敷玉關以西靈序莘莘涼州甲科

鱗次不絕人文蒸上而讀書士夫莫規遠大鄉賢之品高學茂堪爲



藏

張介侯先生年譜



師範者、不惟不率、而叩以姓氏、或且曹如。余懼前哲芳徽日就蕭落、而學侶媵修、罔知攷鏡、因於翻閱所及、輒著錄之。物誕事奇、擴益見

聞、亦雜記焉、用以祛末學之陋云爾。

五涼舊聞自序  
文集卷四

某於乙丑之歲赴選入都、（中略）卻返閭里、于茲四年矣。罕漫寡學、猥竊皋比、（中略）竊念炎劉以降、李唐而還、關隴學術、厥有杜陵田生、易紹駢臂、而楊政董遇、能廣其傳。長安許商、書受平當、而皇甫梁柳、復繇其緒。詩則韋賢馬融、而細君班伯、善治齊魯。禮則賈護段肅、而田儻尹毅、專精喪服。以及張敞、孔嘉之春秋、周生、梁覲之論語、楊泓、樂佑之孝經、杜林、樊光之小學、莫不師承有法、嘉惠士林。今也士耽美詬、無意典常、焚書而舞、有似王壽、上章以驅、實類柳津。經籍道息、良用慨歎。（下略）

與陸平泉前  
文集卷十四  
張學使書

西寧黑番不靖、白大撫承

續華

新自廣威來、知狀爲予言之。那繹

堂成師奉命參贊西寧戎事、賦詩郵呈、成青海曲四首。西寧大

捷志喜四首、寄呈那繹堂師。詩集卷九

錢儀吉成進士。

嘉慶十四年己巳、二十九歲。

居蘭州。

甘肅大旱。

有苦旱謠。

秋、送那繹堂

資成、鐵冶亭保

夫子出塞、均有詩。

按、即征準噶爾事。

十一月、解館歸里。

初五日、薊解館、叩辭鈴閣、旋家省覲。出臯蘭、西行一日、見塗間多有窮民、携老扶幼而西去者。至莊浪道中、則益多。時值大雪、朔風淒緊、車中人擁裘坐、肌尙起粟。見有以雙籠盛男女擔之者、又有以肩荷兒女、瘁瘵者、又有老翁媪、盤躑于泥沙間者、又有小婦女、纖足不能



儒藏

張介侯先生年譜

行、拄杖依枯樹憩、間有舉止安雅、如士夫家容狀者、而鵠形鳩面、敝衣藍縷、類乞丐者甚多。或掃落葉枯枝、支釜石上作炊。或探囊取乾糲、釜鑿冰和咽之。亦或枕襖被酣睡。又或歎息哽咽、如不自勝、無慮數十百也。(中略)迨抵涼城、滿衢皆餓莩、街市廟宇不能容、復有衝寒赴肅州安西州者。澍竊念吾夫子胞與爲懷、以民之被旱又被霜也、急請帑金百萬兩、且修城垣、以工代賑、是其爲民謀者良厚矣。而民竟受累如此、必承辦有司不能仰副德意、因循稽延、以致老弱填死溝壑、壯者散而之四方也。古人有言曰、拯饑戒遲緩、戒拘文、戒遣使。(中略)故敢以所見者呈諸左右、祈哀憫之而補救之、不勝大願。上那釋堂制軍師書文集卷十四

是年洪亮吉卒。

嘉慶十五年庚午、三十歲。

纂輯河西舊事。詩集卷十

有書西夏天祐民安碑後。文集卷九

有還轅

集多鄉里贈答西塞金石故實之作。詩集卷十

入都補官。

留別同邑諸君子有詩。起病赴選、例合告近。先府君行述文集卷三五訪陸

平泉。以莊學使於三原、即席賦贈、陸和之。

嘉慶十六年辛未三十一歲。

朱石君珪相國師以五言題續黔書、依韻和呈。

至通州署、夜雨、念同邑諸君子方在棘闈、輒作長律、兼摭鄙懷。通州署補過堂前有蘭數本、春夏之交、憔悴如病、棄置牆隅、久不省視。忽爾猗猗吐馥、挺花、作詩慰之。

出都赴泰州襄試。

將南行、奉別廉維堂善詹事、宋芷灣湘白小山銘史望之致候、吳美存其彥編修、王伯申引之學士、吳荷屋榮光蘇樸園兆堂侍御、王楷堂庭紹比部、盧厚山坤樞曹、家棠邨業南農部諸同年、有詩。山東

大旱有賣牛行。舟泊京口阻風陪文遠皋寧閣學夫子暨諸同門登金山。

至泰州試院中秋遇雨有詩。余隨遠皋師校泰州畢將謁百制師于金陵仍自瓜步洲出時十月江風寥厲朔雁鳴空問榜人此去焦山幾許榜人曰過談家洲十餘里即是遂張帆往。遊焦山記文集卷九返通州。

蕭南李家樓河隄潰決兩江總督奏辟赴工。

文敏奉命塞李家樓決河奏請君管科場祛宿弊幾盡。文集錢儀吉序輯諸葛忠武侯文集成凡十一卷。

河工効用之暇編輯諸葛忠武侯集百菊谿師許爲刊本因呈四詩。  
詩集卷十二

按蜀志本傳諸葛氏集目錄二十四篇凡十萬四千一百一十二字。晉書陳壽傳壽纂蜀相諸葛亮集奏之即蜀志二十四篇也非獨裒



### 河隄工竣。

其文並其言與事而亦載之。隨志、諸葛集二十五卷。唐志二十四卷。中興書目、亮集十四卷。後二卷錄傳及碑記。其前十二篇章句頗多，字數乃少。明王士禎集武侯全書二十卷。楊時偉以王書蕪累，更纂諸葛忠武全書十卷，亦無采擇。本朝朱璘輯諸葛武侯集二十卷，遂寧張鵬翮之忠武志全襲之。庸俗詩文，盈汙篇牘，侯之著作反多遺漏。張氏又增白浮鳩一詩，乃吳人苦孫皓之暴而吟者，亦混簡編，其疏可知。澍搜采散逸，較諸本增益倍蓰。編文集四卷，附錄二卷，別纂諸葛故事五卷，都爲十一卷。

編輯諸葛忠武侯文集自序  
文集卷四

李家樓河合龍，用宮保百菊谿師平海元韻以頌丕績，以志歡懷，有

詩。自註曰：

二十一日合龍後，忽風雨大作，鴻波激蕩，西大壩陡熱，十餘丈大壩復坐熱六十餘丈。督率在工各員鳩集民夫，風

雨中晝夜搶堵，隄工乃得穩固無虞。

將入都補官，留別百菊谿制府師，有詩。

嘉慶十七年壬申三十二歲。



三月至金陵。六月初六日自江寧登艫往蘇州有述金陵雜詠四

十首。詩集卷十二 仲秋錢儀吉爲序諸葛忠武故事。紀事稿卷三

至京師。

以勞叙選四川屏山。清史列傳卷七十三

嘉慶十八年癸酉三十三歲。

朱石君珪相國師留宿澄懷園侍坐夜譚。詰旦引見畢師命早飭同

坐者爲蔣馨園子蒲少司空有詩。自註曰。時問師向竹君先生所藏

失之矣。

楊孺人卒。

至漢南入蜀過紫柏山朝天嶺牛頭山弔平襄侯姜伯約均有詩。詩集

卷十三

二月抵屏山任。

月之朔日曹虛谷自京旋奉誦手書承問蜀中山水人物風俗並詢



澍宰邑如何設施。捧簡鵬然敢以意對。(中略)澍抵任後首緝盜  
 賊懲蠹役而犯無不獲。次釐詞牒拏訟棍而情無不輸。熟章峭澗參  
 而用之不專尚武健也。時復頒布教令導以人倫論以天理誘以惠  
 言懼以威刑頗多嚮化者。雖民情浮動而民氣直賴無俯張之習少  
 兜夔之風擾而馴之其感革自易易也。(下略)  
復鮑覺生侍郎書  
文集卷十五

前在屏山任時于境內病涉之處相度地形踵司險故事于下谿建  
 安濟橋于研井谿建洄瀾橋于結髮壩建鎮螭橋皆戒飭董事者無  
 蝕無竄僱工旭卉俾民免揭余之虞。(下略)  
大足縣修東郭虹橋記  
文集卷七

屏山東門外五里有龍關依山佩江勢極雄壯惜久頽敗余作今日  
 修之刻石爲銘。  
龍關樓銘  
文集卷二七

是年錢大昭卒。

嘉慶十九年甲戌三十四歲。

四月初二日府君自涼來蜀自安邊驛迎迓至署凡不孝所以折獄

弭盜劭農課士府君靡不訓示周詳事事以實惠及民寬厚慈良爲

主不孝得以遵循率由獲免讐郵者實賴府君之教也

先府君行述文集卷三五

樹性嚴毅審案不無譙讓呵責府君誨訓五則一論政平訟理寬厚

之道二論爲官恃明之害必將之以虛持之以公三論眞文人無相

輕之理四論實心行政激揚士類五論剛柔

詳庭訓述文集卷三五

雷波裸夸出巢滋事

是年張問陶卒

嘉慶二十年乙亥三十五歲

余蒞任之二年夸人自化林羅三谿至東寧烽火相望乃刻期選徒

給銃矛發餼糧往堵旋即退去幸無擾我疆場從此邊城晏閉牛馬

布野父老緩帶稚子咽哺共安耕鑿之天不知風鶴之警苗且舞羽

城可不葺是亦守土之厚願也

（下略）修西寧堡記文集卷七

四月二十八

日自縣赴叙州舟過龍關渡金沙江同鄔南莊均

參軍楊秀三佩芝

明府段景濂上舍游涪翁谿黃魯直安置戎州時至叙州有弔

黃樓詩詩景卷十三五月有祭章桐門相國師文。

調署興文。

是年段玉裁、楊芳燦、洪震烜、章煦卒。

嘉慶二十一年丙子三十六歲。

二月抵興文任。

初二日由水路之興文任。

余以僕遯攝篆此邑于讀法之餘披覽志乘知為余風樵、張楚黃諸君所新修。嘆其條目義例簡而不素符往詰紀載之體。適紳士問序

于余輒書此應之以質諸知言者。重修興文縣志序

二月子阿多生。

兒生於嘉慶二十一年二月二十一日。亡兒阿多墓銘有文昌宮

記。文集卷八



重修屏山縣志。

屏山縣志目錄序述分星野

縣志可不紀分野而屏山實屬湖府全境故作之。

建置疆域形

勝山川職官學校選舉風俗人物列女邊防木政土司流寓藝文十

六志。

至成都登南樓有詩。自註曰

七時力暇對旁人語布

同賀仲選登舉判官

游薛濤井有詩。

詩集卷十三

六月奉扎查拏江西逆犯朱毛猓。

自省垣泛舟赴戎州塗中苦熱嘉定烏尤山尋郭景純爾雅臺遺趾。

立秋後二日憩珠江岸均有詩。

詩集卷十三

返城都試院夜雨和李竹雲

傳杰

明府元韻秋日同樊蘇邨

泰照磨登

洄澗塢蘇邨先返獨游薛濤井季秋游杜工祠均有詩。

詩集卷十三

冬母袁安人返里。

五妹年及笄將出嫁蔡氏乃偕母袁安人歸涼每寄信蜀中戒以居



心豈弟毋恃明察。不孝謹守之、勿敢忘。

先府君行述  
文集卷三五

沈學詩爲刊諸葛忠武侯文集四卷、附錄二卷、故事五卷。

昔在丁卯歲、石殿撰琢堂先生由渝郡守觀察同商、行有日矣、小駐錦官、偕學詩遍游城南諸勝、謁武侯祠、憩於別室、學詩慨然於侯之精忠絕學、至今在人心口間、而文集一編、迄無善本、是亦好古者之所歎也。先生欣然曰、子有志乎。吾爲子成之。因出其篋中舊刻武侯文集以授。然是刻也、爲明人所輯、既非全本、而斷簡駁文、前後相望、意欲重爲補苴、未暇也。丙子冬、從溫江量移成都、歲時祠祀、必至侯廟、心忤忤焉、思踐前諾、適與屏山張大令介侯言之、介侯曰、樹蓄此志者十年矣、凡歷於目者、與侯相涉、即劄記之。今則裒然成集、子盍爲我謀災梨棗也。余亟索而讀之、爲文集四卷、附錄二卷、故事五卷、攬拾排羣、皆有原本、旁見側出、考證不遺、而後世依托附口口口悉芟而去之、其爲體也、瞻而通、整而潔、忠武有知、當引爲隆中畏友矣。



因付諸劓剕以諗世之樂談侯事者。

沈學詩諸葛忠武故事補遺

嘉慶二十二年丁丑三十七歲。

旋屏山任。

余昔宰屏山著篆陳某貪酷病民民大憤臬余旋任控者數千牒又攫財逼死十六人命賊贏巨萬恐余之揭之也則揭端通稟爲先發制人之謀迨余據實通詳則大府洞駭刪改情節蒙混入奏而其黨實繁咸信猖焉磨牙欲噬君時爲御史聞之恐余受羣小之毒螫也欲以其原案上聞。

王少愚傳文集卷二十五

其任屏山以署任貪黷事上揭

大府駭然議調署他缺勒署者休致以息事。澍曰瘴惡舉賢上官職也某不敢與聞且不願因案調繁。(下略)

清史列傳卷七十三

解任赴成都聽勘。

總督先公難之緩其事。署令亦訟君乃爲一奏以上皆聽勘。君所執持牢而訟君者無有也則遷延不決以固君。(下略)

張介侯墓誌銘記事續編九



儒藏

張介侯先生年譜

奉旨、陳某革職、不孝解任質審。府君知不孝之爲民也、寓書訓以處

事權變、不激不隨之道。

先府君行述文集卷三五

賀仲選登舉判官邀樊蘇邨

泰照磨石泉一鈞刺史董芝庭家孝廉暨余集北郭外武侯祠爲泛

舟之游。重九日、呂星泉兆麒刺史招集同人賞菊、均有詩。

詩集卷十四

（上略）予時在京師、聞其事、知羣小雖善搏噬、必不能傷君毫毛、以

君自立有素信之、而君於是時方載酒携客、探宕谷幽勝、披榛營陟

駿騏、尋前人銘刻、訂析歌詠不休、亦足以知君從政之優而獨立無

所懼也。

文集嘉興錢儀吉序

冬、蔣制軍蒞蜀。

會蔣公代至、事乃白。

張介侯墓誌銘紀事續編九

案定、陳某論城旦、不孝免議

入奏。

先府君行述文集卷三五

四川總督爲澍座主、甫入蜀、即具疏舉劾、屬吏

震悚、澍上書言其徇情市恩、如所舉某守賊、某令但佞佛耳。

清史列傳卷七

三（上略）蔣公默然退、又上書、其狂直如此。

張介侯墓誌銘紀事續編九

有

代蔣制軍成都府重脩錦江書院記。

文集卷八

嘉慶二十三年戊寅三十八歲。

正月十五日蜀典成凡十二卷。

目錄堪輿人物、居寓、宦蹟、故事、風俗、方言、器物、動植、著作、姓氏十一類。

嘉慶十七年歲在壬申春大吏請于朝續修通志。越二十一年丙子冬書成。先是二十年乙亥之陽月余被檄署興文卸篆才畢適苦河魚乞假六旬養疴叙郡。困憊之中精神遐漂心勦形瘵靡所濟集聊欲繫志陳編以消駒景。竊念蜀邦文獻近世煙塵古也有志炳靈載英游目所及涉想所經輒用箸錄佐以援證毛滂之得惡贈友朋迨秋閑赴省志已刊布展閱鶩然嘆其掌錄之繁富也遂取所輯覆加審眎闕略宏多不復增益名曰蜀典以質鴻彥非以爲糾繆非以爲補遺。錦里新聞既漸成式岷山異事或幾台符聊備庸部之故實資

儒林之公議云爾。蜀典自序 春日游五桂山。

檄署大足。

六月抵任。

嘉慶二十三年六月趙君及葦奉調廉差委余署其篆相見謂曰縣

志前此奉檄修顧余心弗慊未付槩子盍爲之更纂余諾之既而取

眎其藁則缺漏冗俗如其所言案牘之暇輒作數紙代趙及葦重修大足縣志序

文集卷五 修孔廟工竣有碑記。文集卷八 余自六月來署此篆值大比年

士子赴秋賦念歲入甚夥以濟田餘欸錢八百餘緡歸入書院從此

書脯優厚冀得堪經師人師者以訓迪並給諸生膏火俾有激厲異

日或有端士茂才出其間亦守土之幸願也遂飭齋長黃性周劉宏

洲等修理講堂書室整齊潔肅青衿並誦于斯揖讓于斯變嫫媿之

習成鄒魯之風其尙勉副予期望哉。大足縣修葺堂書院記 修單

石鋪旌善橋東郭虹橋工竣有記。文集卷七 八月重修漢相諸葛



忠武侯樓有記。重九日、偕友人游南禪寺、至玉泉觀、有記、並得二

詩。有書宋徽宗手詔碑後。文集卷一九署大足幾六月、而本任趙君回

任。先府君行述卷三五本任趙君時、以唐仁德劫案將屆四參限、部議

飭回本缺。呂君墓誌墓文卷二六十月八日、遊寶頂山、有記。文集卷八歲行盡矣、

余將卸篆、官舍清寂、重游三清洞、遣興摩挲宋刻、倍增感吁。口占二

詩、鐫石以志游跡。十二月二十六日大雪、游玉皇觀、有詩。詩集卷十四

委署銅梁。

接府君手諭、言明春來蜀、聞之甚喜、擬於冬月遣人往迎。先府君行述文集卷三五

是年、孫星衍卒。

嘉慶二十四年己卯、三十九歲。

正月初五日、余卸篆無事、聞北山有佛灣、瑯鐫法象、儀態俶詭、意或

有殘碑斷碣、沈霾于蔓草荒煙、遂往尋之、有記。文集卷八一有書唐昌州

刺史韋君靖碑、畫維摩石像碑後。文集卷十九十六日、呼蔡少尉峻峯



雲再游寶頂山有記。文集卷八

春抵銅梁任。

銅梁邑東五里有羅喉山。余履任後，公事稍簡，<sup>⑩</sup>將游焉。有記。文集

卷七

調辦秋闈。

至成都。

胡竹塘光環明府邀余同沈松渠學鑑、張黼暉錦二明府游杜少陵

草堂，有詩。詩集卷十五

大足縣志成凡八卷。

刊本丁氏八千卷樓藏有此書。國朝張澍題時王松撰。

（上略）旋移署銅梁。公餘亦載筆數月，復調辦秋闈，未竟也。揭曉後，棲遲廨邸，人事粲皦。夜雨挑鐙，乃得成稿。按大足置自唐乾元元年，屬昌州。光啓元年徙州治大足。宋曰昌州，昌元郡治。元州縣俱廢入合州。明洪武四年復置，屬重慶府。今見其山川雄厚，土地沃衍，古利



儒藏

張介侯先生年譜



廢寺碑碣宏多。當日一浩穰區也。第宋時黎伯巽之靜南古志弗存。徵文考獻率從闕如。洎本朝康熙二十五年。榮昌令兼攝大足縣事。史君彰稍次舊聞。彙爲一帙。乾隆大五年。邑令李君德續修之。曾見史藁。所謂存什一於千百也。而李志亦復簡略無體。余之所纂。不知於黎氏何如。以眎史李三家。或有逕庭乎。書此以復及葺。尙其糾余謬焉。重修大足縣志序 文集卷五

署南谿。

有南谿縣修文廟碑記。文集卷八

九月。聘九公卒於里第。

君卒於嘉慶二十四年九月二十五日時。加辰年七十有三。張君誌銘

記事發十遺著有真知錄四卷。先府君行述 文集卷三五

丁憂解任。

嘉慶二十五年庚辰。四十歲。

三月自成都返里。

二十九日自成都西歸。賀研齋太守楊文泉得賀明府餞送諸

葛祠前。惘惘不忍別。有詩。新都弔楊升菴先生。郎當驛晨飮後逢

花曉亭杰太守自京赴重慶任。劍閣遇雨。度白衛嶺。過桔柏渡。飛仙

閣。至寧羌州。有詩。渡沮水。白馬河。至沔縣。謁諸葛丞相祠。有詩。詩

集卷十五

抵武威。

劉星五先生卒於里。

迨澍自蜀屏山歸。而先生歿矣。年八十有二。著有周禮匯解。左傳闡

義二書。大抵采宋儒之說。而參以本朝諸家。于方靈皋尤爲服膺。其

言平實堅確。不尙新奇。可傳也。劉星五先生傳文集卷二四

僑西安。

歲在庚辰之七月。仁宗睿皇帝升遐。四海遏密。我夫子以梁益總制



儒藏

張介侯先生年譜

馳奏哭臨梓宮得旨允請。(中略)惟時澍宅憂在陟旌節戾止隨

衆樞謁。(下略)送將驛堂制軍入都序文集卷六

子阿多殤。

以暑痢殤于二十五年七月十九日。

十月初二日卜葬于長安小雁塢前園隙地。五兒阿多墓銘文集卷二六

是年焦循卒。

道光元年辛巳四十一歲。

五月二酉堂叢書成凡二十六種版藏二酉堂。

司馬法吾鄉隋州邢雨民太守曾輯是書采之浙中文字多錯謬仍有闕漏係氏星衍所采遺脫尤多余爲補而正之以授學侶。

司馬法自序 子夏易傳世本賈逵左傳解詁詞刻 趙岐孟子章指詞刻

刻 趙岐三輔決錄皇甫規司農卿集張奐太常卿集段熲太尉集諸

葛亮丞相集另刻 周生烈子侯瑾漢皇德傳應劭風俗通姓氏皇篇詞刻

甫謚帝王世紀詞刻 皇甫謚玄晏先生集詞刻 摯虞決疑要註詞刻



辛氏三秦記、三輔舊事、三輔故事、劉昫十三州志、劉昫敦煌實錄、

刻段龜龍涼州記、涼州異物志、西河舊事、<sup>⑬</sup>諡歸西河記、段國沙州記、

陰鏗詩集、李益詩集、蔡邕月令章句、以下八種聞人通漢石渠禮論、

郭舍人爾雅註、譙周五經然否論、蜀才易註、崔靈恩三禮義宗、孫毓

毛詩異同評、劉炫杜注規過、按三秦記、西河記、涼州記、沙州記均收。入八千卷書目三秦記又有知服齋本。

（上略）慨念前賢著述日就堙沒、乃搜輯關隴作者、肇周秦漢及

於隋唐、凡得二十四種、即籍非鄉邦、其書闕佚、世所鈔傳、亦爲摭掇、

凡得十二種、輒以謏聞、疏通演釋。（中略）旋僑青門、肱篋隩几、舊

所丹鉛、殆將淄蠹、念昔劬錄、叵令銷殘、付諸剗剔、藉質里儒、匪以示

海內羣雅也。叢書自序夏日長無事、取陝西通志閱之、於人物遺

漏頗多、就所記者各系以詩、備異日續修者采補、亦有志所已載而

牽連詠之、成關輔人物詠、凡六十二首。鮑覺生桂星少司空寓伊

弟珊滄碧大令、大荔官署、余自省訪之、覺生出游華草、見示輒酬四

詩。

姬人岳氏卒。

有悼岳姬詩四首。自註

姬以兒阿多病。思不已。又曰。小女亦病。思

送文遠皋師赴衛

藏。

輓浙閩總制方葆巖

維甸

師均有詩。

詩集卷十六

冬十一月。沈學詩重刊諸葛忠武全集並補遺一卷。板藏成都武侯祠。

庚辰。介侯以憂歸。辛巳。學詩亦奉諱。閒居得以游心簡冊。乃出介侯

重校本。次爲補遺一卷。附刻於後。而廢其版於侯祠。使好事者咸得

就而讀之。（中略）平湖沈學詩識。

諸葛忠武故事補遺

道光二年壬午。四十二歲。

春。歸里釋服。

過長武。大雪。登六盤山。示郇和尚。有詩。

詩集卷十六

四月。旋西安。

自陝復入都。

至京師。

家芒園

紹先

兄自粵解餉至京、相見無幾時、即送赴粵海關大使任、

有詩。

夏說文引經攷證成。

（上略）余于道光二年入都需次、寓錢衍石侍御宅。長夏無事、乃取說文所引各經、疏通而證明之。因知古人傳授、各守師說、而不肯倍、非如後世之羈雜衆論、紛紛聚訟、莫能畫一。爰序而藏之、以示子弟、非敢以質淹雅也。說文引經考證自序

八月、姬人謝氏卒于西安。

按先生西安寓齋在關中書院西邊和樂巷內。據叢書存版圖記、庚辰秋、丁先大夫艱、返鄉里、窀穸。眷屬僑陝、姬規畫內外事、辭如也。今道光壬午春、患咳嗽、內熱。醫診曰虛勞、藥之。姬善珍攝、幸平安。立秋後、漸思飲食、竊喜可就痊也。候變症、延至八月初九日辰時溢逝、



儒藏

張介侯先生年譜



屢生子不育。卒年二十九歲。亡姪謝氏墓誌銘  
私營痛恨。

道光三年癸未四十三歲。

讀錢衍石

儀吉

農部配陳恭人聽松樓彙家書內有言及余消息者

知衍石之時念我也爲之惘然有詩。自註

君時扶杖太恭人極南旋。

六月輓文

遠皋幹師有詩。自註

道光三年六月初十日歿於後藏大臣任所。

自京返陝。

八月將出都歸秦留別錢衍石農部鮑覺生宮詹有詩。途中有詠史

詩一百二十首。

詩集卷二五

道光四年甲申四十四歲。

至京師。

三月有送王鶴汀給諫歸里序。

秋日過家業邨

業南

太守寓閒話

讀其詠史之作有詩。

潘石生

搢奎

考功欲作武威耆舊傳余慙慙

之頃已屬草喜而賦詩。自註

予許爲刊刻。

憶在都門時與余飲次忽長



歎。余問君何事不懌。君曰：以子之精心果力，著書當可傳。以子之直氣嚴情，筮仕實不合。余曰：入世不諧，良自知之。著作有聞，得毋貢譽。君曰：不然。子經學諸書，余未嘗偏讀之也。姓氏五書，僅覽尋源，辯誤二種。經學、史學、譜學，一以貫之。前此未嘗有也。余曰：余自幼負志，恥爲文人，思爲吏，稍有樹立，冀附於古循良後耳。君乃大笑曰：子性方而不圓，大府有叵。子則愠於色，見於辭。人且齷子，子何能展所學。即如方葆巖、那繹堂、蔣礪堂，皆今所稱賢制府，而子屢上書責備，攻其所短。惟方葆巖喜君言，以爲直諒，而蔣與那固怒之矣。何況他人。余曰：有是哉。余知過矣。潘石生考功傳文集卷二五

道光五年乙酉，四十五歲。

五月，選得永新。

秋，出都赴永新任。

錄別潘石生 挹奎考功詩集卷十九

余選江西吉安府之永新，君送至

長辛店、聯牀話舊、終夕不寐。詰旦、阮余登車乃去。潘石生考功傳文集卷二五

抵永新任。

余履任後三月、君寄懷詩四章、懇懇以柔道爲勗。潘石生考功傳文集卷二五

有郭千里詩集序。代吉安守劉梅坪

是年、郝懿行、鮑桂星卒。

道光六年丙戌、四十六年。

署臨江通判。

春日、獨游百花洲、至南昌、重登滕王閣、文觀濤海、霍松軒樹清、二明

府邀游螺墩、有詩。詩集卷九有代文觀濤明府重修南昌縣志、霍松

軒明府鄱陽縣志序。文集卷五

（上略）夫縣志之最著者、蓋莫如吾秦矣。韓五泉之朝邑志、康對山之武功志、呂涇野之高陵志、胡可泉之秦州志、趙浚谷之平涼志、喬三石之耀州志、皆事核文典、有三輔黃圖遺意。然則志固貴乎蒐羅、



儒藏

張介侯先生年譜

而辭尚體要、又不專以鋪張爲能矣。(下略)

代編松文軒明府鄒陽志序

二月杪、買舟自南昌旋署、與盧海洲游白鷺洲書院。自吉安府

旋署、舟中大雪、均有詩。舟行赴省、連日遇風雨。龍谿有詩、自註、

時縣有水災、余巡視施賑。

謁文文山、謝疊山二先生祠。懷潘石生拙奉考功

有詩。

被議褫職。

余以前任欠隨漕道欸、褫職。

潘石生考功傳文集卷二五

道光七年丁亥、四十七歲。

書廬陵旌表王氏兩世孝子事實後。

代劉梅坪太守

六月、有福禹門廷尉

刻詞林海錯序。

文集卷四

冬、開復。

道光八年戊子、四十八歲。

春、補瀘谿。

道光八年、余開復、補授建昌屬之瀘谿。鶴城送別詩序文集卷六

四月履任。

戊子四月履任。入其境、山則犖确、水則瀨湍、田不沃饒、產不阜碩、而

士習民風頗爲淳樸、色爲之擇。重修瀘谿縣志序文集卷五

重修瀘谿縣鶴

城書院有記。瀘邑爲山國、士習舊稱淳樸。余履任之日、詢所謂書院、

則敗瓦殘椽、風雨不蔽。盡然傷之、急以庫存剡鍤屬傅林二生修理

之。去盱江之名而顏曰鶴城、紀實也。文集卷八

後又宰江西之

永新、瀘谿所至令行禁止、束吏胥、僉從救過不給、治盜擒伏如神、盜

屏迹。歲凶爲賑、民不飢矣。又念其寒而人與之衣、老弱皆爲區處、使

有所歸、其所施甚備。文集錢儀吉序

有勸民捐賑、正風俗、禁溺男女諸

諭。文集卷三四

秋、以漕事赴南昌。

有臨清日記跋。此吾師秦蓉莊先生守臨清日所記也。（中略）樹



儒藏

張介侯先生年譜

五〇一

于甲寅歲在先生糧道署、曾讀欽定臨清記略、日久忘其始末。今官江右、先生第四子衡洲以吏目分發豫章、貽以此記、爲書其後、不勝慷慨。（上略）文集卷三風角書、濟陽張稷若先生刪古今成說、釐爲八卷、棗行者也。余官江西瀘谿、以事赴省、于畢恬谿明府案頭見此書、借閱之、恬谿舉以相贈。（下略）張稷若先生風角書跋文集卷三四

道光九年己丑四十九歲。二月、自南昌返署。

石尤爲祟、舟滯水裔、岑寂殊甚。永懷故人、不能已已、成感舊詩二十

六首。詩卷二十

六月、移疾告歸。

越次年六月、移疾告歸、士民安余之拙而惜其去也、各爲詩歌以送

別。緬城送別詩序文集卷六

秋赴南昌。



有送顧鹿畦之浮梁任序。

文集卷六

九月母氏袁安人卒。

余丁先安人憂留滯松門。

潘石生考功傳文集卷二五

十一月姬人李氏卒。

室人李氏歸予十二載予宰江西永新階兒女自關中來任所。越二

歲予以前任欠道欵褫職旋開復補瀘谿縣缺。戊子四月抵署九月

送女至省于歸而病作。病棘而產男男存而身亡。時惟道光九年十

一月初一日也。

悼亡賦文集卷二

（上略）仲冬蔡吏目回敬誦鈞札善誘懇懇感載霑涕竝頒賜擘

經室全集暨宋建寧縣太守碑搨再拜祇受不翅百馮。此碑塵霾千

載金石諸家未曾著錄。今乃搜獲世所稀見。洵憶樂史寰宇記南寧

州刺史龔深南寧縣西有碑。南史驃騎大將軍龔雲陸涼州南有碑。

儻或搜尋應成鼎足。又諱澍購買皇清經解以擴見聞。澍于客歲向



盧厚山同年句得全部、披閱數四、沾溉良多。竊謂國初諸家首闢荆榛、批却導窾、足可研尋。沿及近時、遺其宏綱、拾其瑣屑、時有創獲、勦襲爲多。說文之學、段氏爲優、輕改原文、頗傷武斷。然許本流傳、脫譌不少。懋堂補正、厥意良勤。懷祖觀察精于訓詁、確鑿細密。伯申述聞、義多回穴。考其所有、似遜蘭臯。疇人之學、澍實未解。在昔遨游、維揚曾蒙訓以布籌、匆匆未暇、依然擣昧。五經算術、雖亦瀏覽、未能算固、負慚甄鸞。嗟自北學荒蕪、匪朝伊夕、賈馬經訓、既已闕響。班傳文辭、亦復息音。輒不自量、妄思吹灰、而欵啟咫聞、無裨大義。（中略）如謂周初之書、不用蒼頡時古文、言性本于中、不同佛之寂滅、論文以文、選爲正、而唐宋八家不足宗、論書法以北派爲正、而閣帖不足學、此其卓見高識、未經人道、真能發前賢之覆、啟後儒之蒙矣。（下略）

上阮雲臺制軍師書  
文集卷十四

此碑阮雲臺師節制雲貴、蒐得于陸涼州、澍

時令江西瀘谿縣、師並挈經室集寄賜、碑爲友人借去、分宜楊立之

大令赴滇買銅返豫章，以此碑裝潢成帙見贈，鵬喜過望。書宋建寧太守龔君

碑後文集卷十九

道光十年庚寅五十歲。

春游舟泊許灣，初夜遠望大仙嶺亭，均有詩。詩集卷二十

四月回瀘谿任。

迨赴省，大府不准引退，仍於十年四月回任。胡畫堂番錫秀才作

詩見貽，和韻報之。

六月刊鶴城送別詩。

（上略）自念五十之年，尙寄塵鞅，內負夙心，外慚良友，地若可入，吾

忍見宓子哉。暇日檢篋中詩錄而存之，付諸剞劂，聊以爲他日雪泥

鴻爪云。時六月之二十日。鴻城送別詩序文集卷六

重修瀘谿縣志成。

總目建置疆域城池公署學校賦役漕折鹽引形勢山川水利津渡

防守、鋪遞、風俗、物產、祠廟、寺觀、冢墓、古蹟、秩官、宦業、選舉、人物、列女、流寓、仙釋、方術、休咎、藝文三十志。

（上略）既事後取縣三志閱之，支蔓叢芳，漫無體制。深病之，急欲改修。而原任蒼梧大令董帷林君以其藁來，大都沿襲舊編，祇增益人物百十耳。唐杜佑有云：「言地理者，在辨區域，徵因革，知要害，察風土。」李吉甫云：「飾州邦而叙人物，因丘墓而徵鬼神。」乃言地理者通弊。至于丘壤山川、攻守利害，反略而不書。本朝萬季野斯同云：「著地書自有體要，或其人其事無關地理，不容闌入。」而張南軒謂脩志不可不載人物，典型繫焉，世教補焉。此則儒生之見，以此點綴郡邑志則可。伊昔通人之論如此，今予之脩此志也，亦不能不叙人物，而芟其贅疣，並刪其羣冒。尙覺太溢，嫌于仍貫，蓋猶有人之見者存也。然體例分明，事迹核括，不取燕書郢說，不爲鈎章棘句，庶幾有制裁矣。（下

略）

重修瀘谿縣志自序  
文集卷五

有脩瀘谿縣城議

文集卷十七



儒藏

張介侯先生年譜

解瀘谿任。

（上略）性情亢厲，表表樹風節。及官瀘谿，震懾豪強，奸民惡胥皆股栗，不敢逞。片言折獄，渙若神明。然持躬獨廉潔甚，始終愛民，有關利病者，無不爲也。瀘谿於明始爲縣，士或未習於古。樹重修鶴城書院，課以明經致用之學。又撰茂學篇以詔之。厥後都人士服習其訓，文

氣遂蒸蒸日上云。

江官續錄建昌府志卷一百三十一

道光十一年辛卯五十一歲。

去歲本縣重修邑志，人必徵實，事必傳信。凡鄉曲譖牒，造僞妄纂者，皆行芟刪。其時固未見萬曆十年陳葑石所脩初志也。今閱之，實于本縣之去取相符，可以知其精審矣。乃卸事以後，該紳耆等于人物志內仍添周迪、黃表、鄧璩、蔡苑諸人，又附益近時數十人，殊爲不解。

（下略）

諡瀘谿紳耆文集卷三四

至安慶。



過蕪湖、舟泊太陽河。

至金陵。

辛卯春、泊舟金陵、同譜陸君心蘭、方伯瞻園舍我。

寓瞻園記  
文集卷九

自金

陵赴揚州、舟過黃天蕩、大風、晤白小山、銘學使於揚州、偕胡雨香子

良水部、錢眉叔

壽會

大使游平山堂、有記並詩二首、題家芥航、井河

帥兄願游天下名山十圖、和芥航兄自黃河口出海、夜泊開山紀事

元韻、循淮岸行、入禹王宮、陶雲汀

制

制軍召飲清澗行署、同席者陳

學坡

廉訪贈俞理初

正鑒

孝廉均有詩

詩集卷二十二

四月、余來袁江、

訪芥航、河帥獲晤嘉興范吾山、觀察梧、傑人也、以尊甫楞阿先生歲

寒堂讀杜十八卷、囑爲更正、余披讀再三、乃把卷而慨然也、有跋

文集卷

集卷三四

五月、舟行京口、泊鎮江、重游吳門、有弔梁伯鸞文

文集卷二十八

舟過富陽縣、泊嚴子陵釣臺旁、有詩

詩集卷二十二

六月、自浙返江西、舟

至瑞洪、大風傾覆者數四、忽大波撼舟、上田塍、度閤、遂即潰敗、移行



儒藏

張介侯先生年譜



李至田中獲生全。有擬雨師與風伯書。文集卷十三 舟中憶三兒阿虎。

舟抵南康。東署郡守霍松軒。樹清 同年。詩集卷二十三 夏季過衢州有弔

龍丘葺文。文集卷二十八 輓鮑覺生桂星宮詹同年。蔣礪堂。攸銛 相國師。

至九江。舟行遇順風有詩。

至武昌。

余自豫章買權來武昌。訪盧厚山制軍。適劉默園觀察司鹽政于此。

一日劇飲。言渡蚶洋事。心日震蕩者移時。爲書其事。文集卷二十二 題劉

默園。肇紳 觀察蚶洋出險。錢江觸潮圖有詩。茲來武昌。未得一游黃

鶴樓。於其去也。詩以寄慨。寄盧厚山制軍舟中懷人詩十二首。

道光十二年壬辰五十二歲。

正月初八日。自南昌買舟西歸。

居西安。

丁繼母袁氏艱。歸途不出。張介侯墓誌銘 及再以憂去。喟然曰已。

矣。吾親已亡矣，猶欲折腰營升斗，以活妻孥耶。時年踰艾，竟不復出。  
家芥航井河帥兄引疾西歸，相見驩甚，呵凍賦詩四首。  
是年王念孫卒。

道光十三年癸巳，五十三歲。

道光十四年甲午，五十四歲。

居西安。

正月，芥航兄以癸巳除夕、甲午元旦二詩見示，即和其韻有詩。芥  
航兄爲余刊諸葛忠武侯集，用除夕元旦韻志謝。詩集卷二十三

四月十五日，西歸省墓。

邠州道中過周太王祠、平涼柳湖書院，至蘭州，均有詩。詩集卷二十三

抵武威。

有祭墓詩。

秋返西安。



備藏

是年王引之卒。

道光十五年乙未五十五歲。

居西安。

新正作東芥航有詩。芥航兄春日見過以疑事垂問。余亦罕漫用題羅漢卷子元韻聊以自嘲。

輓芥航河帥兄有詩。詩集卷二四

道光十六年丙申五十六歲。

道光十七年丁酉五十七歲。

居西安。

七月養素堂文集成凡三十五卷。版藏棗華書屋。

（上略）以暇日次第平生所作賦頌序記論辨之屬凡六百餘篇都爲一集而屬予序之。予嘗聞君之論文矣曰青與赤謂之文赤與白謂之章言色澤也。徒法言正論而無色澤何以爲文。蓋君之文宗旨



如是。又曰、文須氣清、氣清雖滿紙光怪、不失爲清。駢體散行一也、俗人歧視之、慎矣。故吾所定偶散不分、是職志耳。予觀古之作者、函雅故、通古今、得其源者、若建瓴輸水、方圓曲折、惟變所適、而皆出一情、何足分也。然非通識絕人、造詣淵奧、即此秘已難覩。欲彊兼之、亦弗能以爲。蓋必有復古之才如君、而後可及焉。君雖沈抑、未究厥施、而文章足傳於後。假令君不去館閣、游躋通顯、委蛇仰望、損其天性、而勲業或無所藉手、并不若州縣親民、猶時有所效、較其得失、宜何從耶。君可以忻然笑、快然自慰也已。（下略）  
文集嘉興錢儀吉序

道光十八年戊戌五十八歲。

居西安。

姓氏五書成。一姓韻、二遼金元三史姓錄、附以西夏。二姓氏尋源、四姓氏辯誤、五古今姓氏書目考證。凡三百餘卷。

楊桂山布政先爲刊尋源四十五卷、辯誤三十卷、版藏棗華書屋。

予與介侯交三十餘年矣。憶在京師時，年俱弱冠，而介侯已通籍，溺苦于學。予嘗就正所疑，必援經據史，辯論精嚴，每至夜分不倦。後介侯改官，爲黔中宰，而蜀而江右，余亦出守潮陽，不相見者二十餘年。道光辛卯春，余赴都北上，遇於張芥航河帥署，傾談竟日，知其著作等身，而多未刊行。嗣陳臬中州，介侯遠寄所纂忠武侯集、續黔書、蜀典並養素堂文集，皆宦游時所纂，而博雅閎深，運以精思，不意其政事之餘，文章精駭如是。又致書曰：襲撰姓氏五書三百餘卷，今欲擇尋源辯誤二種付梓，其助之貲，余不可辭。會余承乏秦藩，與介侯時相過從，亟索其藁本閱之，誠非林寶、韋述、鄧名世、鄭漁仲諸人所能窺見。即如我楊氏得姓之始，溯自周宣王少子尙父，幽王邑諸楊，後並於晉，因爲氏。又考仇池蜀中諸楊及魏晉以來冒姓改姓者，徵引諸書，既精且確，其他皆證以經史碑版，無紊無遺，使天下人各知其姓之所自，不致數曲而忘其祖，厥功偉哉。至辯誤一書，尤于讀史者



有裨益。戊戌夏日書將刊成，介侯謂余不可無言以弁其首，因不揣固陋而爲之序。道光戊戌夏五月下浣，北平楊振麟拜首。姓氏尋源

姓氏之不講也久矣。自今日而尋其得姓之源，辯其致誤之故，網羅列代之賢愚，別白三朝之氏族，攷證諸書之是非，不綦難哉。然而非難也，其難焉者，無讀書論世之識，無默識采真之才，但憑譜牒之私譏，未能實事求是也。或曰：自漢至今，姓書且溢數百種，豈皆嚮壁虛造，無所依據乎？余曰：余誠不知人之何以聳昧于姓氏而率易以言也。王符、應劭，漢世之通術也；賈希鏡、王僧孺，晉梁之鴻生也；賈執何承天、齊宋之博物也；柳沖、孔至、李唐之專門也；王伯厚、鄧名世、趙宋之名家也。所言姓氏略而不全，且多差僞，何況餘子？余之從事于此，曆有年所，較之昔賢，增益宏多，似少違鑿，不揣樸昧，用敢問世，庶幾通肉譜者正其失焉。姓氏五書自序

姓韻者，以姓隸韻，便于稽攷。如柳燦、姓氏韻略、張九齡、曹大宗、姓源



韻譜、黃邦俊姓韻譜、陳湘韻林。余此書自皇古以至本朝、自帝王以至庶賤、自中華以至蠻夷、罔不蒐羅。然古今之人衆矣、焉能備載。凡史有傳、祇道其略、或書其傳外之事、或攷其名字之殊、地望之差、而家譜之失實、志乘之傳誣、亦爲之覈辯。至于怪僻奇偉之姓、靡不甄錄。凡得姓五千一百二十又九。內新補之姓五百又九。刪除非姓者七十又六。

姓韻  
自序

中國之姓、其易知者也、尙有不可知者、何況于外域。魏拓跋、秦乞伏、涼禿髮、夏赫連、燕慕容、周宇文、原書有解、故士夫知之。若遼本無姓、至阿保機取世所居里爲姓、轉爲耶律、又轉爲移剌、譯語則劉也。大姓蕭氏與后同族、通婚姻。然姓少、易尋緒。若金之始祖蒲指、出自新羅。至阿觸胡依完顏部爲姓、譯語爲王、而有白姓、黑姓之分。宗室內族之殊、其制書名不書姓、則有猝難辨者。惜完顏劬女直郡望姓氏譜不傳、弗能悉其崖略。至元、則更難爬疏矣。據史、太祖姓奇渥溫、而



楊子器宮詞注則云世祖姓李兒只斤。陶宗儀述蒙古色目人姓禁詳反不紀奇渥溫何耶。各傳或稱姓或不稱姓或似姓而實名或似名而實姓。雖由宋濂王禕等作史草率未曾參攷實于繙譯有所不解故糾紛僭錯如此。國朝秀水萬循初孝廉著元氏姓略粗具梗概未能精審。西夏元昊自宋仁宗寶元元年僭號至寶慶三年爲元滅傳十世凡二百五十八年之久。本姓拓跋唐賜李宋賜趙然徧鄉不常傳于中國者多非其實或以部落爲姓或又不然良由僻遠荒陋事不稽古戎言侏儻莫能究詰矣。余之爲三史姓也依據本史兼采當時人之著述稍有增益其所不知則仍闕如。後之君子尙其補正是所望也。三史姓錄自序

草木祖根山祖崑崙江海祖源不此之求是謂昧厥元譜牒家以百數孰能昌言。天神靈而生子地廣厚而資始人殷殷而受氏或爵或邑或山或水或字或名或冒或徙不得其真知爲誰之考妣同一姓

而出殊同一郡而望區數典而忘祖籍談焉免其擲揄豈不悲夫史氏作傳但憑家譜朝代差互官位僭午以祖爲孫以子爲父攀援公卿厭薄卒伍拓跋之臣著洛陽之士輕改其宗不翅毀其栗主俎豆馨香鬼神其吐炎黃之胤嗣子似之精苗列邦之胄緒異域之枝條絲而賦蕃而椒繡而續茂而雕雖英賢之傳堙信爲華胄之遙遙吹律而定五音自軒皇而非今今世已爲絕學呂才恟疑于乃心烏知京房之卜卦指李星而分袞然避仇而匿跡亦參養而受恩荷國寵而榮賜移偏傍而更番嫌尊諱而改易奕禩仍復其牆垣余爲此書必溯其初士夫各有其冠裙農氓各有其耰鉏商賈各有其珠貝工匠各有其繩樞離之不可瓦合合之不可瓜分如淄澠之不混如絲絮之不棼將以尋源于星宿庶私乘之可焚（下略）姓氏尋源自序

姓氏曷爲有誤也。自姓氏書誤之也。一則質其疑而創誤也。一則踵其謬而沿誤也。不爲之辯必且一誤而再誤也。然有不得不辯者。明



儒藏

張介侯先生年譜

辯之足以有辯也。亦有不必要辯者。稍辯之。不勝其辯也。顏師古曰。私譜之文出于閭巷。家自爲說。事非經典。苟引先賢。妄相假託。無所取信。寧足據乎。是唐時已如此。迄今日。則更誕妄矣。余之作辯誤也。亦曰。使讀史者論其世。不可不知人也。使作譜者敬其宗。不可誣其祖也。豈好辯哉。以誤故也。姓氏辨誤自序

姓氏書夥矣。而精審者殊少。或闕略不備。或差謬失倫。往往而然。余所見宋元明諸書。蓋無一可依據者。因襲陋說。觸目皆是。不勝彈摘。惟漢魏六朝人所著。頗爲的確。然其時姓少。易于推求。惜其簡篇散佚。不得全文。無由知其梗概也。今就著錄之見于諸史志與行于當世者。采先儒之成說。加以臆見。評論其得失。而附之末卷。古今姓氏書目攷證自序

道光十九年己亥五十九歲  
居西安。

春和楊桂山

振麟

方伯雪詩。即次原韻。

詩集卷二四

（上略）夫介侯氏之爲此也，弱冠從事，皓首成書，四部之鉛槧，九州之金石，以及二氏之藏，百官之名，貢舉簿，城旦書，虞初說之屬，罔不周覽。宦游黔蜀久，又客吳楚秦魏，攬轡中原，交其賢豪，朋游覩記，若所部士民，往往請觀家牒，輒爲掌錄，以爲既博，不可不擇也。折衷於古人，若子政之世本，仲遠之姓氏篇，有輯有補，並爲之注。林鄧之書，復爲之勘會，其勤且精也如此。始，君未入蜀，予見其藁本五巨冊，積數十萬言，錄副藏之。後數年，再見京師，裨益者五六倍。予笑曰：卷帙繁重若是，君宦日貧，何以行世？君曰：諾，吾將更之。於是比物而錯辭，釐文而析類，既踵舊體而盡列之，補前未有五百餘姓。（中略）蓋又十餘年乃成，則自關中抵書大梁。按此時錢主大梁書院。曰：子許吾序久矣，毋負諾。然吾去官來，無以食，誰爲剞劂者？會楊桂山布政至，善其書，先爲刊行，尋源四十五卷，辯誤三十卷。（中略）乃其爲之之難，成之復不易也。文由博而約，體由合而分也。惟予知之詳，遂書之以詒。



後之讀是書者。姓氏五書錢儀吉序

是年陶澍卒。

道光二十年庚子六十歲。

道光二十一年辛丑六十一歲。

居西安。

楊桂山振麟方伯引疾還里作詩送之。詩集卷二四

有思錢子詩五首。

詩集卷二四

道光二十二年壬寅六十二歲。

居西安。

養素堂詩集成凡二十六卷版藏棗華書屋。

道光二十三年癸卯六十三歲。

居西安。

正月介侯先生次第其所爲詩二十六卷成屬序於予。予於介侯著



儒藏

張介侯先生年譜



書至是歷四五序、累數千言、而猶未已也。昔人序友朋書、未有若是多者。然介侯著書、非予序不出、必不求他人序、或自爲序、或遂無序、其篤嗜予至此、而予亦何能已也。介侯自早歲計偕上國、其仕宦每得邊遠、又壯游東南、度江而觀海、所不至者、閩粵耳。識天下士甚衆、而予先後居京師、從四方賢士大夫游、亦不後。乃今言數十年交舊、介侯惟予、予惟介侯。然則序介侯詩、固莫予若。(略)自後往來不多見、然見必有詩、亦時以郵筒相誚、畚垂五十年矣。(略)且君籍涼州、東而家於秦。我家秀州北、而客于魏。秦魏壤相接、隔太華相問訊。雖簡牘中語、神飛意動、若相聞聲於茲、又七年矣。然猶有未快。今且以全詩開予、使我得盡聞介侯數十年之警欬、若言笑一堂也。此予所以尤樂爲介侯序也。介侯之才、囊括千古、其氣一世無所屈、凌紙勃發、多爲俗目駭怪。或以唐宋格律繩之、輒不得以爲疑。而予獨見其有望古遙集、湛深幽抑之思、與夫奧峭詭蕩之風致。吳歛越謳、愴



悽窈眇之音節。蓋有近於騷人之哀怨者。舊嘗讀其黔楚間作。懷賈悼屈。往往而然。予之得於介侯詩者。在此。書以寄之。介侯宏達。以五十年老友。其知我也夫。詩集嘉興錢儀吉序

輯詩小序翼成。

（上略）愚以世儒之廢棄之也。因從事于斯。凡毛傳、鄭箋、孔穎達疏。以及宋人呂氏祖謙、嚴氏粲、范氏處義、蘇氏轍、黃氏櫟、李氏樗、曹氏粹中、王氏應麟及國朝顧炎武、陳啓源、徐文靖諸人論詩有與小序相發明者。咸采輯之。姜伯嚴炳璋以序首句爲子夏作。下皆漢儒附益。隔一字書之多所斥駁。大抵沿宋蘇轍、明朱謀瑋、張次仲、朱朝瑛之餘論。不足爲據。其詮釋有明確者。亦時采之。至明郝敬、何楷雖多新說。擇其與序附離者入之。若子貢詩傳、申培詩說。本係豐坊僞作。無如淺人信從。莫解其非。惟毛氏奇齡駁斥無遺。亦附錄焉。蓋所以章其叛序之罪也。至三家詩說。暨劉向說苑新序列女傳、班固白虎

通賈誼新書、董仲舒春秋繁露、與小序相出入者、搜香備載、耿耿之

見、亦加按語別之、藉正世之揜羣雅者、小序翼題辭  
文集卷三

道光二十四年甲辰、六十四歲。

居西安。

輯萬物權輿。

秦音成。

（上略）予于長夏無事、刺取羣書爲秦隴人口吻者、割記之爲一編、

曰秦音、亦謂吾秦人之語云爾、秦音自序

道光二十五年乙巳、六十五歲。

道光二十六年丙午、六十六歲。

道光二十七年丁未、六十七歲。

五月丙戌、卒于西安。

十月某日、葬某原。

嘉興錢儀吉爲譏墓誌銘。記事類聚九  
清史文苑傳有傳。清史列傳卷七十三



儒藏

張介侯先生年譜

校記

①詩：當作「時」。

②張臯聞：當作「張臯文」，參本譜嘉慶四年己未條。

③讀：當作「續」，見本條下文。

④錄：當作「留」。

⑤隨唐：當作「隋唐」。按本譜「隋」字多寫作「隨」，此後不再出校。

⑥論：疑當作「諭」。

⑦場：當作「場」。

⑧城：當作「成」。

⑨「工」下當脫「部」字。

⑩筍：疑誤。

⑪大：當作「十」。

⑫「皇」字當屬下句，作「皇甫謐帝王世紀」。

⑬諭：當作「喻」。

⑭服：當作「不足」。

⑮偏：當作「徧」。

①⑥年：按文例，當作「歲」。

①⑦階：當作「偕」。

①⑧人士：當作「人士」。

①⑨殆：當作「始」。

②⑩數曲：當作「數典」。

②⑪按，原譜此段文字編排失當，似宜移于「道光十八年戊戌」，歸入論《姓氏五書》一類。



儒藏

張介侯先生年譜



# 張介侯年譜附錄

## 與郝蘭皋戶部同年書

嚴風朔雪之時、訪閣下于齊東會館、入其門、落葉滿階、升其庭、積塵盈几、聞書聲琅琅可聽、則閣下方詠諷古經也。頃之、閣下自內出、被敝羊裘、狀穀穀然、弟乃深歎閣下之溺苦于學、而不以貧爲病也。然閣下雖嗜貧、而弟則淚泫泫、心焉痛之。旣而見同照嫂夫人、方以爾正疑事詰難、弟雖勉強酬答、亦幾辭窮、則又羨嫂夫人之學、經不勌也。歸來慨懷不已、擬牋自咎者久之。頃聞錢恬齋方伯同年不日入都、與衍石侍御商之、當向恬齋言、爲銷書百部、稍可以爲日用之需。又知閣下天素高亮、不肯向人乞憐。此弟與衍石之意、與閣下之貞介無損、亦可爲者。恬齋爲政明敏、操守廉潔、邇來甚佩服、閣下必有以應之。願勿卻、以副友朋之意、爲禱。承示荀子補注、大致精確。弟蠶管所及、輒爲改正七條。未審是否、尙祈教之。弟日來患腹泄、友人勸戒飲、未能從、仍浮大白、終日酣暢、而河魚竟逃。此神農子儀以來未有之奇方也。閣下聞之、當爲啗噉。

## 與郝蘭皋戶部書



一昨承示大著山海經箋疏傳爲校正謬誤。謝念此書校勘者自雲臺侍郎師而下共十七人皆碩學淹通自必精密無疵。況以謝之陳椽馳逐未嘗廋歷于學其何能有一得之補乎。日來披尋一似仍有罅漏尙待補苴者。如南山經援翼之山多蝮虫郭注虫古虺字。箋疏引說文云虫一名蝮虺以注鳴是虫虺非一字與郭義異。說文當作虫一名蝮蛇下虺字係後人竄改者。句餘之山郭注句章餘姚因此爲名見張氏地理志。箋疏以爲張晏按太平寰宇記引張敖地理志當是張敖西山經崇吾之山有獸如禺而文臂豹虎。箋疏言獸兼有虎豹之體故被是名。按博物志所言本是虎僕毛可爲筆故辭人呼筆曰虎僕御覽引字有譌不足據也。北山經決決之水中多人魚。箋疏謂鯢字古省作兒兒从儿卽古文人字上闕脫止存下人字。按以此人字係兒字闕脫其上何下句嬰兒兒字不闕脫耶。史記有人魚卽今之孩兒魚也。此不必改者。中山經太山有草其葉如萩郭注萩亦蒿也音狄。箋疏謂萩當爲萩萩亦當爲萩字形之誤。余正蕭萩郭注云卽蒿按萩字是不得作萩萩是梓木類。余正蕭萩本宜作萩觀郭注皆云蒿可知作萩者是海外北經北方禺彊郭注字平冥水神也。箋疏謂平冥禺彊聲相近平冥卽禺京禺京卽禺彊按禺京禺彊平冥均爲水神各自一人猶之重黎吳回祝融皆是火官不得合爲一人。然謂禺京卽禺彊尙可以

京與彊通如鯨魚作鱣魚也。禹京爲禹號之子，禹號爲黃帝子，則梁簡文所云禹京爲黃帝孫者相合。若平冥，則少昊子脩也，焉得合爲一人。海內東經，潁水出聶都東山，箋疏謂潁水一名豫章水，郡縣俱因水得名。按水經注，豫章以木氏郡，蓋水亦因郡縣得名也。大荒東經有羲和之國，有女子名曰羲和。箋疏言，帝嚳次妃嫫母氏女曰常儀，大荒西經又有帝俊妻常羲，疑常儀與常羲爲一人。按常羲當作常儀。呂氏春秋，羲和占日，常儀占月，顯係二人，不得云常儀卽羲和也。老童生祝融，箋疏引大戴禮帝繫篇，老童娶竭水之子，謂之高緇氏，產重黎及吳回。按竭水之子驕福，一作驕既，見世本。又作嬌極，見漢古今人表。大荒北經，深日民之國，盼姓。郭注云，限絕深，黃帝時姓也。按王會解有白深國，自古文鼻字，見說文。是自深卽鼻深，亦卽日深矣。箋疏以黃帝子有滕荀姓，疑盼姓或滕或荀，此說非。戴民之國亦盼姓，又豈譌文乎。又訂譌卷內崇吾之山有木，員葉而白，柎云經文柎當作拊，此說非。柎與跗通，奪足也。經文作柎不錯。黃帝是食是饗，郭注，所以得登龍于鼎湖而龍蛻也。訂譌云龍蛻二字譌。按宜作靈蛻，御覽作靈化，亦通。積石之山有石門，河水冒以西流，郭注今在金城河門關。訂譌云門字衍。按門字不衍，當在今字之上。三危之山有獸名猼猼，訂譌云猼當爲獒，猼當爲猼。按獸名有不從才者，如牴牾，磳磳，嬾嬾是也。如猼作猼，則



微宜作微，不必作樊也。有鳥其名曰鵠，郭注扶猱則短。訂譌云：當爲扶猱，則死。按猱與獸古字通。車攻詩之搏猱，漢人作搏獸。有川在尾上，郭注川，鰕也。本不誤。訂譌云：川當爲州。按川穿也，卽鰕也。鰕，穀道也。今正之。白州，燕亦當作川。余續黔書川字說最詳。番條之山，滅水出焉。郭注音滅，損之滅。訂譌云：郭注音滅，則經文不當作滅。未審何字之譌。按經文當爲咸字，如漢咸宣之咸。庄亦音滅也。金星山其木多彫棠，訂譌云：彫疑當爲彤。按草有彫胡，木不當有彫棠。子必非彤字。實惟川之九都。郭注九水所潛，故曰九都。訂譌云：郭注潛字誤。按潛宜作渚，渚聚也。又或作瀦，瀦亦聚也。故孟諸一作孟都。嘉榮服之者不羣。郭注音廷，搏之廷。訂譌云：當爲脰，脯之脰。按郭音似引古語，宜从之。古廷字本有定音，見匡謬正俗。女兒之山，多閑藥，麋麋。郭注：猱毛豹脚。訂譌云：猱當作猱，豹當爲狗。按猱宜作猱，卽猱豹也。不當爲猱。言毛似猱脚，似豹耳。凡此數條，雖于書之大體無關，然閣下精心果力，尙有此失，則信乎著述之難也。樹所言儻有違鑿，仍希大雅正之。

### 與王伯申侍郎書

春杪枉奉手畢，並大著經訓述聞、廣雅疏證二種，數月來讀之，知閣下掣經擲義，高据買服之堂，函雅詰文，上摩係李之壘，昕夕尋味，愁眼靡已。某性欸啓，雖亦瀏覽經



說及近時講說文諸家之書、而簿書執掌、卒卒無暇、不得搢心揖志、紬繹意蘊、輒擲卷而起、發視肉之嘆也。曩歲作姓氏五書、內有姓氏辯誤二十六卷、討論前人言姓氏之僞錯者、妄自謂精密、而閣下經義述聞中頗言及姓氏、往往與愚說不合、竊又自疑其說之未必當、恨無由面質之于大雅也。茲略舉數條言之、冀得是正爲幸。述聞云、國語黃帝子十二姓有依、當作衣。廣韻引姓苑有衣姓、而依字不以爲姓。按山海經、大荒國北毛民之國依姓、是古有依姓也。蓋衣爲殷姓之後、齊人有之、見鄭康成禮記注、高誘呂氏春秋注、依則黃帝之後、各不相蒙、豈得曰衣誤爲依乎。唐書孝友傳梓潼有依政、可證已。廣韻于姓氏遺漏甚多、不得以其不載、遂謂無依姓也。又左傳有倭人費、國語有倭人回、倭人當卽府吏胥倭之倭、倭人蓋以職役爲氏者。述聞言古無倭人之職、倭人宜作寺人。按廣韻姓纂皆以倭人爲複姓、故管子亦作倭人費、豈皆譌文乎。漢書藝文志有孔子倭人圖法三卷、是倭人古有之矣。又左傳之棠君尙、述聞云尙爲棠邑大夫、則是縣尹、君當作尹、猶言箴尹、沈尹、連尹耳。按楚之箴尹、沈尹、連尹、廐尹、宮廐尹、馬監尹、陵尹、郊尹、王尹、工尹、玉尹、秀尹、羊尹、監尹、囂尹、環列尹、皆以所職爲官名。今云爲棠大夫、則宜稱棠尹。沈諸梁亦葉縣大夫也、則稱葉公、何未有稱葉尹者。君公者、蓋當時尊顯之通稱耳。又孔子弟子壤駟赤字子徒、



家語、英賢傳皆以壤駟爲複姓。按左傳魯有邱工師駟赤，則駟赤連文，蓋用周穆王八駿之赤驥也。名字詁亦以壤駟爲複姓，失之。又左傳之邱昭伯，世本人表作厚，檀弓邱又作后，風俗通作邱。蓋邱后厚古字皆通。述聞以爲邱與后異，且謂水經注誤邱昭伯爲叔孫昭伯。按左傳季氏與邱氏門，鷄呂氏春秋亦同，則邱昭伯卽叔孫昭伯明矣。且世本鄭注檀弓，高誘注呂覽，韋昭注魯語咸以邱昭伯，木后敬子竝出于孝公惠伯鞏之後，詎得以邱后爲二姓乎？又國語大戎樹惇，韋昭注言大戎太性敵，樸本是誤解。述聞則云惇字當屬下讀。大戎樹者，先國而後名，猶云邾婁顏耳。樹惇者，其姓名也。通鑑注樹敵城在曼頭山，此周穆王時大戎樹敵居之，因以名城。周書涼州刺史史寧云樹敵，貨真二城，吐谷渾之巢穴也。水經注作樹積，魏書地形志作殊積，戎方之音異耳。凡此數端，雖于經義無關，然實事求是，則閣下之說或有未諦當者，敢獻其疑，並望恕其直而教之，以所未聞焉，則幸甚。

### 與臧在東文學書

一昨承貽令祖玉林先生所著經義雜記三十卷，日來讀之，歎其筆精鄭學，摛擊王肅，卽文字沿誤之處，亦考核堅確，真北海之功臣也。某最欸啓，雖以時繙古人經說，而少入仕塗，鴻網無暇，不能究其訓詁，矧能擗大義耶？然其書亦似有引用僻錯及



豎謹未稿者。如我將詩云、我將我享、維羊維牛、而以爲本作維牛維羊、羊與享韻、牛與右韻。箋云、我奉養我享祭之牛羊可證。謝按、此說大非。周禮羊人曰、積共羊牲、設積柴祭天、則供羊牲實柴也。先柴而後獻、故維羊文在維牛之上。將者、奉羊以供柴。享者、獻牛以供祀、此典禮之序也。烈文詩之白羊徂牛、先言羊亦如此。若鄭箋言牛羊者、辭例如此、不足據以定經文也。盧子幹逸文條有云、北堂書鈔引周植酈文周誅云、自酈未成童、著書十餘則。按漢書酈炎字文勝、此作文周、誤。周植宜作盧植也。又鄭莊公寤生、從史記難生之說、亦未是。且謂寤與牾字通借、寤生者、謂牾逆而生、交午於產門、久不得下、故姜氏驚也。此殆未知南燕公孫夫人生慕容德之事故、有此解。又謂寤而生當喜、何反驚。是又不知前秦姜氏生苻洪之事也。不寤城條從顏師古之說、謂寤城以差次受功賦也。按何邵公注、若今以草衣城、此詁最確。蓋方城之時、適值淫霖、以草覆之、可免崩禡。仲幾不肯、故責其無尊天子之心。與齊語管仲言相地衰征之言本不相涉、不得援以爲證。如魏之劉馥爲揚州刺史、孫權攻合肥城百餘日、時天連雨、城欲崩、於是以苫葺覆之、是其事也。左傳云、孟懿子會城成周、庚寅、裁宋仲幾不受功、乃執仲幾以歸。據左氏說是方城、公羊說是已城。然古人工功字本通用、不受功者、言方城之時已立木、而仲幾不肯隨衆董工也。其不肯董工

奈何。當時值雨，衆欲養之，仲幾不從，故執之。必以爲差功賦，未必古義如此。又足下拜經堂日記以段干木爲姓段，以呂氏春秋有干木富於義之句，遂以應劭風俗通之說爲是，殆不知古人之語例也。古人複姓多連下一字稱之，故孫叔敖爲叔敖，公牛哀爲牛哀，司馬遷爲馬遷，東方朔爲方朔之類，不可枚舉。如段干木爲單姓，則段干朋、段干綸、段干崇、段干越人，豈皆兄弟行乎？況史記明云：老子之子名宗，宗爲魏將，封於段干。高誘國策注：段干，姓，綸，名也。三輔決錄云：段干木之子隱如入關，去干字爲段氏，則段干之爲複姓審矣。足下好學深思，閱覽多聞，顧於此稍僻，諒未嘗留意於姓氏之學也。儻不謂然，祈賜正爲幸。

### 與段茂堂大令書

懋堂先生閣下。某于奔走衣食，應酬棟樑，時獲親渠範，頻年積懷，藉以稍舒，爲之慰此。猥荷不鄙，獎謨獎許，過情則又慚甚。一昨晤章子卿，述先生之言曰：他人考據之文，高者爲注疏，其次則語錄。介侯之作，辯論精確，所不待言。熊熊其光，魄魄其氣，置之闇室，不燭而明，時罕備者。某聞之，抑又疑甚。竊念先生鑽擊說文，作爲箋注，既精且博，實爲汝長功臣。而經韻樓集學宗賈鄭，筆邁任溫，久爲某所熱服。茲乃擊節于鄙文，殆學黃公而過者也。日者同謁姚姬傳前輩，歸寓瑟居寂寞，獨游靈谷寺散賞。



瞻誌公容吾鄉人也。出飲功德水，頓滌塵袪。憩盤石上，有鹿子二，倚徙中林，見人不驚。因嘆人生勞勞攘攘，不如鹿之野性自適也。然此尙隣城市，若深山邃谷，茂林豐草，鹿之生其中者，餐神芝，飲清泉，戴角肉，享麋壽，其樂更襄羊也。今先生蟬脫簪黻，唾棄腥膻，亮節高風，良足嘉尙。而又鴻包經訓，釐定聲音，頤情丘壑，眷戀友朋，異日必有白鹿依辛繕之講堂也。某梠雙已挂，不再話別，輒爲此書，貢諸左右，仍冀良誨，以開區霧。俟解把筆，請益負墻。

與錢衍石郎中書

前所假戴東原先生毛鄭詩考正內作詩時世表，閱之多有僻錯。如鄭風出其東門，野有蔓草，漆洧孔穎達謂厲公時詩。厲公復位在釐王之世，而戴氏表繫在惠王之世，此不確也。又唐風蟋蟀序言刺僖公，僖公卽釐侯，鄭康成謂當共和之時，而戴氏表繫在宣王世，此不確也。又陳風宛丘序言刺幽公，東門之杌序言幽公淫亂，鄭康成謂幽公當厲王時，而戴氏表繫在共和世，此不確也。又曹風侯人序言刺共公，鳴鳩孔穎達謂共公時詩，下泉序言曹人疾共公，共公當襄王頃王之世，戴氏表專繫之頃王世，此不確也。又正大雅文王大明，孔穎達謂成王時作，戴氏表繫在文王時。又緜思齊皇矣三篇，皆言文王之謚，咸文王後作，當亦在成王時，而戴氏表亦繫之。



文王此不確也。如下武。文王有聲。孔穎達亦謂成王時作。而戴氏表亦繫之武王。此不確也。又魯頌鄭康成謚謂僖公薨。國人美其功。季孫行父請命于周而作其頌。箋疏以爲作于文公之世。而戴氏表繫之僖公時。亦復不確。某因原本小序暨康成孔穎達說。別爲考定。似較東原說爲有據。恐仍有誤謬。望足下更正之。

與朱香初論寧山詩字音第一書

讀大著不勝熱服。而有愚意所未安者。敢質之。按寧山之寧。通作萇。其得名以池有千葉蓮萇也。宜从胡瓜切。讀然。白虎通云。萇之爲言穫也。則萇作變化解。又讀戶化切。詩意用萬物成熟。可以得穫之解。而仍依胡瓜切。似宜改正。又按莊子齊物論山林之畏佳。劉註云。畏佳。猥僻尖角處也。則畏字當讀仄音。蓋畏字卽畏。畏又同猥。猥作鄔賄切。則畏字自宜從同。又按說文雖字註。蟲名。似蜥蜴而有文。逸周書王會篇云。兪人之雖。馬孔晃註。雖馬一角也。爾雅釋獸。雖卽鼻而長尾。註似獼猴而大。山海經註。雖似猴。鼻向上。尾四五尺。是雖爲蟲。爲馬。雖則爲犬。今之所謂仙猴也。而傳引業宰天台曰。妄以雖爲雖。而于氏述記之。亦疏矣。詩用雖字。卽本聞奇錄。似未確審。異苑云。錢塘杜明師夢有人入其室。是夕謝靈運生。旬而卒。亡家送靈運於杜治養之。十五方還。郤故名客兒。注云。治音稚。奉道之家。靜室也。方藥地謂治乃處字之轉。



聲吳人今猶作此語。茲作平聲亦非。若砵字古厲字也。說文引深則砵可證。砵崖赴壑遲句作平聲用失之。儻用作久字更誤。檮昧之見望財擇焉。

與朱香初論字音第二書

來書依白虎通解等字仍作平音。然風俗通云等變也。萬物成變由於西方。又云等者等也。萬物滋然變化於西方也。等亦作變化解。原詩等生乃績不句實與應氏之說合。當作戶化切讀。又據莊子註謂畏卽畏。按畏與嵬異。爾雅石戴土謂之崔嵬。詩陟彼崔嵬皆從山下鬼不從畏。嵬有三切。一烏回。一魚回。一五回。並音魏。說文云嵬高不平也。從山諧鬼平聲。若嵬則卽賄切。又于鬼切。音硯。硯山高下盤曲貌也。其于非切者音威。乃山名不與山形同解。嘗讀王延壽靈光殿賦。嗟我罪嵬。嵬字作五罪切用矣。未聞嵬字作魚回切讀者。尙書民明威。古文作民明畏。威字乃衛包據馬融本改者。尙書字舊多違異。畧舉堯典言之。如宅喁夸作居郁夸。寅賓作敬道。允釐作信飭。庶績作衆功。方鳩作旁聚等類。不能悉數。皆馬遷借文意相通之字轉相訓釋。正不得以居郁敬道等字卽作宅喁寅賓音讀也。則古文畏字于畏佳之畏訓釋不同。似難爲援。又佳字今入支韻者。讀職迫切。宜作佳麗解。楚詞大招。嫫修滂浩。麗以佳只。曾頰倚耳。曲眉規只。滂心綽態。姣麗施只是也。又作夫不鳥解。古有十三佳之

韻則佳爲戶圭切。若從古兮居奚切，則入齊韻。若從倉回切，則入灰韻。來書據集韻，謂崔與卒同。按爾雅卒者厓巖，鄭康成所見本則作卒者崔嵬，故於漸漸之石章箋云：卒者崔嵬，謂山巔之石也。而毛傳亦云：卒，崔嵬也。是古人以崔嵬訓卒，不謂卒卽崔字也。若卒同崔，則爾雅之文犯矣。且釋文卒有子恤才戎二反，韻會爲昨律切，說文云從山卒聲，顯與崔字音切不叶。是集韻言同崔者妄矣。愚意畏佳之佳，自宜從倉回切，入灰韻。若子雲甘泉賦所用雍雍字，相如上林賦所用雍雍字，係上聲徂隈切也。以爲然否。

### 興朱香初論字音第三書

愚謂經師以崔嵬訓卒，卒非崔者，以古人制字雖多相通，而字之本義要不可沒。來書舉似嶇、嶇、嶇、嶇等字，按說文嶇字，徐鉉曰：俗作嶇，非是。而讀謳音者，集韻訓爲窵深下貌，是嶇、嶇本非一字。而崔卒實兩字，故張衡西京賦：嶇嶇崔卒，則分用之。崔若卽卒，賦宜如詩南山用崔崔可也。嶇字從青得聲，故可通嶇，亦通增。卒則從卒得聲，難爲崔矣。巖、岳雖通，而岳爲山厓連屬形，巖則岸也。增韻謂石窟曰巖，亦通。故虞翻之間稱傳巖爲聖人窟也。巖又爲古文險字，傳巖、漢地理志作傳險，說文同字異訓者，以此考之，集韻其讀音元自分晰。于佳字云：遵綏切，讀嘴平聲，與崔同。崔崔、





高大也。又佳祖誅切。音澤。山貌。莊子齊物論。山林之畏佳。是集韻于遵綏切者。引詩之崔崔。于祖誅切者。引莊子山林之畏佳。本不相蒙。鄙謂罕讀平音。如詩小雅之山豕。罕崩。鮑照蕪城賦之罕若斷岸。皆讀如摧是也。又謂佳字入灰韻。亦職追切。蒙不謂然。考古韻支分五支六脂七之八微十二齊十三佳十四皆十五灰十六哈。又分十八尤。別收十三魂。別收八戈。又別收去聲八未。別收去聲十六怪。爲界甚嚴。佳之在支。爲職追切。在灰。爲倉回切。猶灰韻之胎入支。爲他飴切。在本韻則土來切。才字入支。爲前栖切。本韻則昨哉切。哉字入支。爲將黎切。本韻則祖才切。來字入支。爲陵之切。本韻則落哀切。臺字入支。爲田飴切。本韻則徒哀切。皆辨別豪芒。不容假借。若謂佳字入灰。亦職追切。則入齊韻。將不當居奚切乎。選者。段若膺與戴東原言。支佳一部。齊皆灰一部。之哈一部。漢人猶未嘗假借通用。晉宋以下。乃少有出入。迨中唐之功令。支脂之同用。於是古之截然爲三者。罕有知之矣。從知古韻部限既嚴。而音切自不能相混也。且今所通行之韻。乃宋平水劉淵之韻。並非沈約韻。沈四聲韻一卷。唐時已不傳。來札所摘之嘶躋提齊等字。謂自齊韻來。際睢窺透等字。謂自灰韻來。按此等字。疑皆劉淵合併一百七十部韻時所合併者。蓋齊灰韻皆自支韻分出。不當云自齊灰韻來也。又言佳之與佳音義判然。字體亦異。疑楚辭之用爲泛濫者。



考古佳與佳無二字也。今體乃後人改之以識別。如王石、王字祇是三畫，隸始加點，以別帝王字。當時兩字原一，誰又讀考工記王人爲春秋之王人者。歟而論之，畏字古雖通作威，而考工記之畏，鄭康成讀如秦師入隈之隈，是依弓簫附閒解，讀平音，亦入灰韻。枚乘七發以畏隈同押可證。而崔字係倉回切，乃爲崔嵬之崔。否則嵬字爲烏回切，而崔字爲職追切，則不得爲雙聲矣。又意畏佳者爲崔嵬二字之或體也。畏卽嵬字，佳卽崔字，二字均在灰韻斷斷矣。

與朱香初論字音第四書

昨論佳字入灰韻，宜從倉回切，幸不爲大雅所訶。因知鉅製佳字，避離字之複文，用借叶也。夫借叶則何不可之有。然古支韻不止通微齊，且通歌尤。其借叶者，要皆用之詩賦歌謠諸古體。昔蕭山毛氏著古今通韻，識者嘗其病卽在通字。是作韻書尙有畫界，不可越畔也如此。浮山愚者曾謂畏佳爲崔嵬之或體，其說良是。蓋古字多省文，如石鼓文其魚佳可，風雅廣逸註佳可，讀作惟何，是惟字亦可省作佳也。愚故主之。若楊用脩謂崔嵬卽爾雅之翠微字，傳授有不同，其說無據。來書謂崔嵬字止訓山之高大，與莊子本文不合。按莊子山林之畏佳，下句卽大木百圍之斲穴也。夫大木有斲穴，山亦有斲穴，而山有畏佳，大木斷無畏佳。林字本屬帶說，不以畏佳字

分貼。如禮言大夫不得造車馬。造字就車說。不容連馬。經中此類甚多。蒙叟之語。與此一例。是劉註僂僻尖角者。尙合。而郭註謬矣。故集韻兩引莊子。皆訓山貌也。若兼山林說者。子雲甘泉賦所用之雍雍。相如上林賦所用之雍。變爲是。然雍係徂僂切。雍係卽委切。變係鳥毀切也。謂莊子之畏佳。兼指山林未爲的確。謂郭註勝劉註。取去亦未精審。又謂佳佳本一字。說文不當分爲二。似未會其通而攷之。按說文有不應分而分者。如鼓鼗鬲鬲之分爲二。鞠鞠鞠鞠之分爲五。企企跂跂之別爲四。踏又有蹇蹇。蹇又有蹇。徐本覲復有脈。踐有銜。棧。漚漚。雙從。兩吁。重出。變擊訛。媽。汜。源。竝見。娒婉何分於婉。采保互引古文。皆複字也。是叔重妄分者夥矣。何疑於佳佳之重出乎。且古經並無今佳字也。世所傳者。又非許氏之舊本。則佳佳二字之分。其爲俗師附益。斷斷無疑。如甲乙。燕乙。魚乙。同一字而妄分爲乙乙兩形。殊爲回穴。亦如吳本有等音而造吳。角本有祿音而造角也。靈均子雲辭賦之祖。每以佳麗之佳。押入支韻。正自可據。蓋佳本訓鳥之短尾者。古人字少。借爲佳麗之佳。用之寔久。後人乃昧其本義。亦字學之一厄也。王王古本一字。說文云。王象三王之連。一其貫也。而徐註乃謂王中畫近上。王三畫均。夫帝王之王。一貫三爲義。二者。天地人也。上畫爲天。中畫爲人。下畫爲地。今謂中畫近上。則舉人而附之天。離乎地。非惟昧字形。且失



字義矣。董江都但云古之造文者，三畫而連其中，謂之王。卽許祭酒本是辨別字形者，亦未嘗如徐散騎說也。晉語改玉改行，荀卿作改王改行。周禮九嬪職云，凡祭祀贊王蠶。註云，故書玉爲王。荀鄭皆先於許氏者，則後人之加點，實以王王易混，加點別之。若有近上正均之分，人卽短視，亦能辨之，何庸加點乎？子才精蘊，要是附會鼎臣與陽冰不可爲據。若云均作三畫爲乾坤之乾，亦非。羅長源云，班固以天竺卽乾竺，蓋梵語竺乾爲竺天也。而升菴索隱，敬甫總要載三象乾以爲卽天字。自昧古文者，謂卽乾字，遂使然不得爲川，轉而爲坤，又復爲巽，不知然三斷音坤，然連乃川字也。又按白虎通之所云生筆，卽生化也。言生之者至是化也，不然少陰用事而萬物生筆，非其實矣。四月純陽而葶蘆死，十月純陰而蕎麥生，以有一陰一陽之潛伏也。若秋則肅殺爲令，萬物擊斂時矣。竊謂蘭臺之說，亦卽信厚說也。萬物由華而實，則其物化矣。化而爲實，乃可以穫。故班曰成熟，應曰成變，無二解也。若引蓮蓬，則宜從胡瓜切。

校記

①子：疑作「乎」。

②經訓述聞：當作「經義述聞」，見本條下文所述。

③謚：當作「謚」。

# 馮柳東先生年譜

清·史 詮編撰

郭 齊校點

楊世文一審

李文澤二審

民國間烏絲欄抄本



《馮柳東先生年譜》一卷，清史詮編撰。民國間烏絲欄抄本。

馮登府（一七八三—一八四一），字柳東，號雲伯，又號勺園，浙江嘉興人，清經學家。嘉慶二十五年進士及第，歷任福建將樂知縣、寧波府教授，轉象山知縣。精經學，著作甚富，其要者有《石經考異》、《石經補考》、《三家詩異文疏證》、《十三經詁答問》及《石經閣文集》等。

史詮，譜主門人。觀譜中載有嘉慶十三年撰《三家詩異文攷證》成，「屬史生詮校錄」；道光二十一年臨終作書，以著述數種「屬史生詮校錄，共九卷，蓋爲付梓計也」之事，則詮蓋嘗問學於登府者。

此編分紀年、時事、出處、詩文雜著四欄，爲史表形式，尚稱簡明。其總體內容雖不豐富，然時事欄有與譜主無關係可不列者，出處欄有日常細行可刪者，而譜主字號、爵里、家世卻未登載，可見其未能盡善也。

馮柳東先生年譜

紀年

時事

出處

詩文雜著

乾隆四十八年

正月十一日公生。

癸卯一歲。

四十九年

甲辰二歲。

五十年

乙巳三歲。

五十一年



儒藏

馮柳東先生年譜

丙午、四歲。

五十二年

始入塾、目數行下。

丁未、五歲。

五十三年

封翁游山左。

戊申、六歲。

五十四年

已解四聲、祖愛之課罷、攜街頭

己酉、七歲。

買月餅餉之、戲謂之買月吃云。

五十五年

庚戌、八歲。

五十六年

辛亥九歲。

五十七年

从周潛溪先生游、與周桐北、史竹

壬子十歲。

南、屠梅西、友為梅溪四友。

五十八年

癸丑十一歲。

五十九年

甲寅十二歲。

六十年

純皇帝禪位。

私學為文、下筆崢嶸有奇氣。



備藏

馮柳東先生年譜

乙卯十三歲。

嘉慶元年

與張堯民、朱寄園交。

丙辰十四歲。

二年

館徐氏破樓為童子師。凡六年。

和鮑洋飲夕陽詩有餘暉猶為好山

丁巳十五歲。

而就空處焉。

留句人呼之為馮好山。

三年

秋月封翁赴省試榜。

館徐氏始赴童子試。

摘錄經書中訓詁異同著五經精

戊午十六歲。

登浙江舉人第。

義四卷後為人竊去。

四年

純皇帝崩。仁宗即位。

館徐氏。是年補博士弟子員。

己未十七歲。

五年

館徐氏。

著石經問詩略第一卷鼓餘草編

庚申十八歲。

年自此始。

六年

館徐氏。是秋薦卷。

辛酉十九歲。

七年

館徐氏。是秋食餼偕吳思亭天

壬戌二十歲。

香庵採宋梅。

八年

梅卿夫人來歸。

館徐氏。

癸亥廿一歲。

九年

館徐氏。



儒藏

馮柳東先生年譜



甲子、廿二歲。

十年

館楓溪、風氏有楓溪雨餘晚步

乙丑、廿三歲。

寄溪上諸友詩。

十一年

居家。

丙寅、廿四歲。

十二年

居家。鄉試房備訪張堯民田居。

丁卯、廿五歲。

十三年

歲試一等三名、劉金門學使謂

戊辰、廿六歲。

其文得大家氣息。

十四年

至高郵刺史椒園兄官廨科

己巳廿七歲。

試一等名學使為周蓮塘先生。

十五年

是年長子改之生。今改

孤山謁林處士墓鄉試荐卷。

漢石經考異成用昌黎石鼓詩韻

庚午廿八歲。

名啟源。

孫星衍先生為書石經閣篆額。

紀之。

十六年

館曹氏綠杉野屋歲試一等四名。

習中郎飛白分書兼畫紅蘭精

辛未廿九歲。

是冬移居古錢洞。

石刻摹鍾鼎篆文。

十七年

二月初五日梅卿夫人卒。

館綠杉野屋科試一等四名經解

著梨花館悼亡詞多未刻郭頻伽曰

壬申三十歲。

夫人著有隨月樓詩詞稿。

閨屬二名學使蓮塘先生。

能含句意于一時融情景于兩等。

十八年

清明日屠梅卿夫人于

館綠杉野屋是秋荐卷。

三家詩異文攷證成振堯氏為之序。



儒藏

馮柳東先生年譜

癸酉三十二歲。

祖穴旁九月、種牧豕祀

屬史生銓校錄。

閏、皇子等共擊之皆

贈孺人亡室李氏權厝室銘。

就擒十月、劉清平策

諸縣逆匪。

十九年

四月十六、偕墨緣兄之秦郵、修午汨

甲戌三十二歲。

舟楊柳灣、越晨吳江、過太湖至

無錫、今蔡甥蘭、蔣金樓曉望。

二十年

二月、探梅天香庵、秋至崑山、寓李 著石經閣詩略第二卷閒居草。

乙亥三十三歲。

氏亦園。



廿一年

夏公弟松甫卒。秋張

館馬小眉五千卷室。秋鄉試薦

著唐石經誤字辨一卷成刻種芸

丙子卅四歲。

堯民中式舉人旋卒。

卷不售。

詞二卷于崑山梅花溪漁唱紫述花

館休物集也。

廿二年

春封翁至京會試被

赴江蘇試觀察之招下榻虞山使

仲夏輯曝亭外集詩五卷并為之序。

丁丑卅五歲。

放北等候選教諭。

署之辛峰一角樓試公深加器重時

又著石經閣詩略第三卷北符前草。

偕斌公過拂水山莊至琴川又晚發京

口存高閼寺邵伯隸懷謝太傅過

高郵渡江寓海岳懷宋襄陽歸

舟江望金陵遂自來興至丹陽下船。

廿三年

封翁館馬小眉五千

四月十七日偕曹魚山、蔣魚正、陳德齋、著論古貢疑二卷、校張孝廉堯民

戊寅、卅六歲。卷室。

黃子芳、冷損藥法可愈、徐博山遊、通集。繪前塵十幀圖。

虎邱、已泊錫山、偕諸同人至漪潤堂、

試第二泉。主僧出觀王孟端、溪山漁

隱圖及鐵太常竹爐。旋登金山寺渡

河。五月廿三日泊東林、開任城、登太白酒

樓。六月七日、至張秋。七月、以廩生貢

入成均。八月、應北闈鄉試中、七十一名。座

師為禮部尚書、後至翰林、辦大學士山



儒藏

馮柳東先生年譜

陽汪文端公諱廷珍吏部右侍郎

湘潭周公諱系英署兵部左侍郎後

官都察院左都御史諸城劉文恭

公諱鏞之房師翰林院編修麻城

袁公諱銑。

廿四年 封翁家居。

正月十九日發同李孝廉杏村過 著石經閣詩略第四卷北游後草。

己卯、廿七歲。

垂虹橋、石帶詞所云第四橋也。遂 又有懷人詩七絕四十首。

謁三高祠、阻雪呂城、雪霽曉發

陰平驛、渡陶溝、宿中山店、謁孟



廟至都會試下第出都。午日還家。

新拓園上春重游。試觀察幕觀商

丘。與爵商乳商。商飲仲爵。都歸教。

減太山宮鼎。侯鴻燈。諸葛銅鼓。新

莽大范泉。

廿五年 三月 日封翁以疾

正月北行。紅華埤題壁。過郭城。傾著石經閣詩略第五卷。北游三阜。

庚辰廿八歲。

庚卒于家。是月。公次子

蓋亭渡沂水。出北城遇雨。歷車城。自為序。于孺河舟次見史。史山改才

辛兒生。四月二十七日。

龔城徂徠山。遂同莊格鳴。吳咸家藏墨蹟。自詩略第一卷至五卷。

睿皇帝崩。今上登極。

勳吳珩馬世芳諸孝廉登岱謁。是年刻于崑山。徐孝廟同年為序。



儒藏

馮柳東先生年譜

岱廟及羊太傅祠。花朝宿張夏。

望泃南諸山。夜行古城。遇雨。車覆河。

間過新城。和方子春趙北口詩。入禮。

閣中。七十五名進士。座師為經筵。

講官。太子少保。戶部尚書。後官東。

閣大學士。叙縣廬文。公諱蔭溥。

經筵講官。禮部尚書。調任戶部。致仕。

富埜黃文公諱鉞。兵部左侍郎。經。

縣吳公諱培芳。工部右侍郎。滿州。

善公諱慶房師翰林院編修侯官

林公名春濤。殿試二甲第三

一名。朝考十五名引見改額

翰林院庶吉士。武英殿協修官。

到官三日即得封翁諱音星夜

制副至家。

道光元年

覃恩。敕授高祖、祖、父

居梅里村。讀禮重修宗祠續修

輯清芬集八卷。國詩話附于後輯

辛巳三十九歲。

儒林郎翰林院庶吉士、

宗譜族黨中有貧乏者咸周恤

續嘯書亭外集詩一卷。北宋嘉祐

并貽贈高祖母、祖母、

之初清芬祠以祀里中前輩詩人

石經攷異成。刪前種並詞二卷合

母太安人。

之無後者、無至春秋祭之。又仿通籍後重訂、仍得二卷、日花墩

崑山王孝廉學浩、

永中恤慶會、與同志捐輸、以郵琴、正劉宮保日、琴正集有白石之

睡作夕園圖。

其首而全其節。

清室、無夢窗之質實。例之字、

于中仙梅溪為近。

二年

是年、林少修官浙省

節廉橋訪沈監村、築畦墓、偕金

著小稿、李詩錄、第一卷、暫假集。

壬午、四十歲。

按察使、修和靖先生墓、

又、張文之、標、李文明、經、富孫、遇

冬、題竹垞太史手書、紀吳湖棹歌

重建巢居閣。

孫馬小眉設祭清芬祠、又同人汎卷。

丹至三李祠、檢、歸、飲、小詩、

繪圖紀事。謁劉宮保於昭文



儒藏

馮柳東先生年譜

官番即送歸西江。初夏游龍

井、冷泉亭、瑞石洞、丁仙閣、詣蹟尋

吳山寶成寺。元至治二年所建。

麻葛葛刺石佛。

三年

趙遂樓為浙閩制

二月服闋還京。試筮珎先生招。

著小鵝亭詩錄第二卷五

癸未、四十歲。

府縣平水為福建

同宗國博璿令弟、法禮部良公

堂春夢集。金屑石餘錄成。

巡撫沈小湖為八閩

子、延舍人福旂釣魚臺。初夏、

朱椒堂侍御題詩于卷首。

學院。

座主盧南石招同方比部周

儀、周吏部清、許吉士有韜馬



儒藏

馮柳東先生年譜

吉士疏諸同年集飲寓齋已待

漏庶常館時補試散館廷試

正大光明殿迎駕後恩賜

茶餅題為仕官惟賢才賦名列第

一等十五引見以知縣用選授福

建將樂縣向來庶吉士散館一

等無改縣今者先生安之既

得還請假歸省座主黃左田

題以園圖送行且以前著堂齋



集及畫品畫友驟相贈。抵家始

知母病甚。偕許淳齋妹、賀少庵

弟侍奉湯藥。衣不解帶。累月

無倦意。

四年

臺灣械匪滋擾。治平

正月。母病痊。親朋皆勸駕。先生以母

秋刑前所刻石經閣詩略五卷之七

甲申四十二歲。

予中丞渡海。治平不待

老艱于迎養。意欲引退。母趣使治

為玉堂分韵集。共詩七十二首。刪小

定風蝶也。舊制重臣渡

裝曰。此恩命也。勿以我故而憚行。

攜李厚詩錄兩卷為南劍種花

海先奏明。內府頒左

但作好官。我服食俱適矣。遂捧

集。共詩六十三首。總名拜竹詩堪

旋白螺而後行。中丞不

檄偕姻伯何杏江妹。賀許淳齋子

詩存。初集自此始。

待繁而竟無風濤之患。改之自宜。瀧厓大宋太史蓮花老漁。

觀音諸聖聖圖。謁趙公慎。時中丞後。

官制府。孫文靖公爾準。文為推重。見

其向所著書。益知學有根柢。顧謂

賓僚曰。此荆玉南金也。方之孔松陽

無愧色焉。三月抵任。君念受主恩。

沐憲眷。矢勤矢儉。而以除暴安民

為先務。下車。即訪地方。檢點械治之。

民大悅。時大府方擬行聯甲之政。因過



儒藏

馮柳東先生年譜

召甲兵、按戶稽查門牌、一月而里為  
之肅然。常于午夜微服潛行城中、  
門多虛閤、少鍵者。會、今盜賊潛踪、  
外戶可不閉矣。邑有婦楊氏者、撫  
孤守節、族黨利其資、強使嫁、率里  
豪會夜奪去之。氏矢死不屈、乃閉  
置山中、兩晝夜絕粒不能死。君廉  
得其情、捕治之、婦獲金節。楊甲  
被竊、証其鄰張二、以烟具為



証獄既成矣。君詰之曰：豈有宵伏  
行竊而從容帶烟具乎。一語而服。  
江西民黎良材因竊犬嫌証余  
光祿花會事。案連百餘人。前令已  
下牒紛紛拘人。君白其寃。悉縱  
之。所全甚眾。人稱馮青天。沙建寧  
者。與貢生袁生茂因借貨不還。  
控其佔改地骨。經前令審勘。不得  
實。後沙率眾攻袁子。赴縣呈懇。沙

糾黨逆截于路、刀傷之幾殆、前令  
予之完。君甫往任、即勘其地有沙  
氏界牌、在指控表佑界外。其所稱  
骨鏹、乃言荒冢無考者也。沙服之、  
而案遂結。視事未久、民畏之如神、  
明愛之如父母。君猶以學校為念、  
于是首創清俸、並勸諸紳士捐貲、  
修書院及古名賢祠。事甫集而  
家書到、得母病耗、即移疾乞休。



五年

新疆張格爾叛。

制府愛其才，不令去。除中丞自臺返。

君復請中丞慰之，備至。屬小湖學使勸

留之，終以母老，決歸計。詳三上，始得允爾。

時細兵將與呈大府，借寇恫一戰，以慰民

望。君力阻之。去之日，父老挾杖道，至

有泣下者。自三月至五月，却家僅七

十二日，而政績卓然。福州龍巖同年文齡

撰金溪德政碑序，勒于石，遂引疾歸。

家居。冬至日，送周潛溪先生暨令子。論語異文疏證六卷成，補遺二卷續。



桐北葬。又送朱梅屋寄周父子盾。其室補遺二卷。屬史生詮校。錄以定刊。于師友也如此。十二月十四日。奉先太史營本。李香子先生為之序。刊三家詩葬于縣心橋祖穴之東。并為老母營疏證。

嘉慶中。盾室中得靈經。高二高八寸。

凡七層。上銳下豐。形似徽然。是年以母

年老。吳詩改教。因首句圓。難置花

石。日奉板輿。以為娛。繪以圓八詠圖。

後學使桐城姚勇青為之記。八詠

者。興奉軒古靈源。拜竹詩堪一采。

山柳界小橋亭、酌史后、把酒

茅屋也。

六年

新疆平。三月、女景生。家居、秋、圍成、月、自為之記。著西域平定雅及消夏錄一卷、風懷

丙戌、四十四歲。

以子年陽子痘。

光太史遺像于后、學使新城陳碩詩補注一卷、楚雅二卷、金唐詩未備

士為志、重葺、驅舟、以鄭蓋額懸之、書目一卷、小詞仙館、言十卷。

復舊觀也。

七年

春、孫平叔制府奉命重理、夕園、將梅數本、梁球淵著夕園集、共詩九十首、編、鄭、硯

丁亥、四十五歲。

閱兵至當湖、惠教水有史山后一林、以詩易之、園後得詩一卷、冬、刊清芬集八卷、為何烈

資。六月、女南陽子痘。二泉、鑿為小池、王蘭泉司寇、女立傳及重修慕書亭記。



儒藏

馮柳東先生年譜

之孫紹基以郎露硯歸先生乞

為尊甫羨溪上舍立傳。時呂筠

庄同年宰秀水倡捐重修縣書

亭。屬其事。陳玉生同年以江蘇書

院諸生文屬定。

八年

寒食前一日宿三洲漁庄。清明日吳

淞歸遊西湖。夏重游海嶠。孫制

府許保奏復為縣令。辭之。即

延興修福建鹽法志。九月十七

刻鋪敘跋後福建鹽法志三十卷

戊子四十二歲。

日陸萊厓刺史邀余戴湘園修撰、成。

張詩舲農部、黃大令宅中、彭大令

宗公、郭仲和太史、沈夢塘孝廉集

西湖之苑在堂、又于尚書席上觀

左旋白鵝、書成、復留總修通志、

而已、選授益府教授矣。

九年 史問山為福建學使。

在閩、重五公宴、即事作詩、呈志局、著玉臺書史、八卷、刻海嶠重旂

乙丑、四十七歲。

諸同人、并東陳恭甫、林少穆、兩輩、集詩、鈞船笛譜詞、孫文靖日、鈞

于三山市上、得楊玉環雙魚鏡、張船笛譜、婉約如玉、田清虛如石



惟孝同年以黃主田舊業硯持贈乃  
帝。物諸作雖樂府補題何以加  
十硯之一也。又于六月得見玉帶生于湯  
馬。夏復審仇山村無弦琴譜  
總我輩龍處。

為補輝詞一闕及玉田伯雨仲舉  
八閩垣焉。臘月十日改創休謀  
韵于八閩志局。望日用咸和四年軌  
硯跋高麗金石文後。又有象山重葺夏  
王廟碑記。

十年 孫宮保開其至郵。月、上己、送舍人遠孫招同嚴厚民西  
廬寓。四八歲。張大錫卒。秋。瘞景女、  
湖水北樓禳飲。時將赴甬東教授、  
書四月、跋洪武寶鈔拓本、為張天  
登錢梅溪論石刻論語、存經大學

荆女年兒于大父塾旁。

以母壽逾古稀，不任舟楫之勞，仍不錫立家傳。做柳子厚獨孤申叔墓

復就養，居弟少庸善為侍奉，至春

嗣州周鳴威史大執朱墨林昌壽

至，因其教士之法，以胡安定為宗，每

昌衡曾科于後。

月親課其文藝之高下，以激厲之，而

復發其德行通誼，以經學及詩古文

辭，不僅舉業而已，志翕然悅服。

夏校錄天閣書五十種，以備闡志

無訪。

十一年 少子南生及長孫柳

官南東。象山縣尹童立成請修

為象山縣者毛大鵬立傳。毛言



儒藏

馮柳東先生年譜



身卽四十九歲。孫生于田二官舍。

縣志。初兩夜夢還家。七夕檢用

子童侯求財。姓以子執術之術。侯曰。

江乞假歸省。初冬童至用。

古無生而立傳者。越自時。則大鵬

死矣。其好名之過。近于賤士之所

為。是烏可使其無傳耶。乃為傳

之云爾。盡刊石經七種。七種者。漢

魏晉唐南北宋。國朝也。四月十四

日。聽泉于清風橋下。家山縣志

二十四卷成。

十二年 陳芝楣同年新羅方伯。官用東。善吳仲倫至詢古文。隨時徐身廣為刻金石總例。李昶林



儒藏

馮柳東先生年譜

壬辰五十歲。

陳遂史張沂元張詩

倡捐建宜郡

文廟多士分任

為刻論語異文疏証于粵東保

於並得監司。

秋楚狂

親為督率。

趙金龍海寧。

徵阮公索石經補攷三家詩疏補刻

于經解續編。編海日江風集詩

八十首。刻月湖秋楚二卷。李香子先

告。近日大江以南競尚倚聲。然辨

音審調者。或拙於修辭。口吟舌書者。

或昧其意義。二者交謬。後者水之

僂。石鼎云。如雲孤飛。去留無跡。

不惟清虛。又極曠足。讀月湖秋楚。

十三年

秋、豫楚大水、瘟疫

官南東。觀文信國歲如意及西編學易庵初集輯浙西後六家詞

癸巳、五十一歲。于痘。

湖僧所藏藏真草書千字文。十卷、極里詞輯八卷、列浙江詩錄

得元康碑、旁有五十泉文并一魚四卷。

金形乃漢制也。十月初五、以事至象

山宿余氏山居。

吾亦云然。夏、跋唐河青王寺常住田碑。九月、跋唐陽華墓志、又作

松屋王君墓志銘、見山樓記。

十四年

官南東。文廟工竣、學使姚公答史桐軒論孟子疏書、刊石經閣

甲午五十二歲。

書丹記其感令中丞劉公題請藏 文集八卷。

欽加品銜。五月十三假歸。與園省母。

弟從廣為作紅衣釣師圖。

十五年

林少穆擢中丞。

官南東。得姜西溟所藏神唐神

以三家詩屬劉子燧補輯。編學易

乙未五十三歲。

龍蘭亭及永和九年十年碑。時

庵集。石士陳學使為題署中。庵

于燈下課兒孫讀。夏日林少穆中

曰學易。并為說進。以鹿洞之學。故

亦書訊近況。并惠詩扇。

名之。

十六年

阮雲臺大學生致仕歸

官南東。正月二日生辰。招同人復初

編漫興初集。集有六哀詩。謂李

丙申五十四歲。 侯徵。

九庵小飲。春曉。調寄忠毅祠。五月。

起林贊善。四季高京兆。黎見山大



儒藏

馮柳東先生年譜

武林軍事，謫居國方，忘憂與辛。今，李汝白孝廉方子春司訓吳，  
味金仙詩，諸處文是時，伯璠方伯淵，述之太守也。

東麓寮中，吳太守非魚，深存示

力辭未就，長假歸拜先德。

十七年 洪筠軒州判卒。

官南東院，梅未書示，極還翠

編漫與二集，春標未宗，與國散

丁酉五十五歲。

屏桃花之國，新舊復初九，廣得五

畫，蕭焦山書庫詩以送之。

周五年，無跡為視。

十八年

官南東。

編漫與三集，拜竹詩堪詩存十卷

戊戌五十六歲。

自此終。三山林春簿序。著谷間春

十九年

陝東冠廣東少修督兵

官南東十月于蕭然山舟中跋武

十四經詰問卷成編示悅集是

己亥五十七歲。

兩廣。

林注內振綺堂所藏示錄。

為拜詩堪續集第一卷。方履錢同

二十年

林則徐監成伊犁平漢匪

官山東。

年始宋惠卿書真草考經。

三家詩遺說八卷成。編秋船集自

庚子五十八歲。

入定海。

是年至明年春止。著竹外詞一卷與

曜亦甫書六月跋漢三公山碑。

廿一年

詔授林公四品官。之明州

春官南東少修以書來論造炮之

二月。撰十二客者傳并贊。上已月跋晉

辛丑五十九歲。

辦軍事。春夷歸定海。

法後又囑取范氏天閣兵書參究。

永紀九年。十月十七日。勉起作書以

舒厚庵年定海縣夏。雖身為冷官。猶不忘王事也。其送

玉堂分韻集十二客者集物集石經



儒藏

馮柳東先生年譜



林公調河二效力、表節

後三。

友人歸詩云、故園若問馬都尉、為問文續集屬史生詮校錄共元春、  
道談兵似牧之、蓋通其實也。至秋、蓋為付梓計也。

兩度俸滿、道府無舉堪膺民社、奉

文督省驗看。途中略血數口、遂告

假回里。既而聞宣郡失守、病遂日

甚。至十月二十五日晚、頻呼老母不

止、歎泣而卒。年五十有九。

# 劉孟瞻先生年譜

(日本)小澤文四郎編撰

郭齊校點

楊世文一審

李文澤二審

民國二十八年鉛印本

《劉孟瞻先生年譜》二卷、附錄一卷，日本小澤文四郎編撰。民國二十八年北平文思樓鉛印本。

劉文淇（一七八九—一八五四），字孟瞻，江蘇儀徵人，清經學家。嘉慶二十四年優貢生，候選訓導。研精古籍，通貫群經。尤精《左傳》，尊崇古說，力闢杜注之鑿。輯《左傳舊注疏證》，撰《左傳舊疏考證》八卷，有名於世。其他尚有《讀書隨筆》、《青溪舊屋文集》、《揚州水道記》等多種。

小澤文四郎，日本上野人，一九三七年遊學燕京。

中國人之年譜成於外國人者實不多見。是編篇幅不小，詳悉是其特點。如詳引原文，詳列時事，凡與譜主有過從者皆出小傳，盡力搜羅，述事必詳注出處等。此有利有弊，一則考按多，甚便讀者檢覈；一則眉目欠清，文字繁冗，不免令人生厭。附錄太雜，凡譜主親屬子孫之傳狀墓銘皆列其中，似無必要。然異域學者克服語言障礙、資料限制，成此一編，已屬難能。傳增湘序稱其「自屬稿迄於成書，爲期不越一載，而取材必賅，隸事咸允。顏黃門所謂櫟括有條例，抉擇窮本原者，殆足當之矣」。況其時正值抗戰伊始，作爲敵國學者，熱心中國文化，亦可貴也。

是譜原爲鉛印本，文字錯謬較甚，原本附有《劉孟瞻先生年譜校勘記》（今省稱「原校」），今重刊剗改，原本誤字、倒字並據《校勘記》釐正，不復出校，脫字、衍字等則逕入卷末校記中。

俯之世講。古人去歲曾覆一紙。諒已

鑒入。比維

侍奉舅福著述日增。為頌。淇現為岑大校刻

輿地紀勝及朱武曹禮記訓纂均約于春

夏間可以竣事。終日碌碌。未遑自理。舊業每念

英後勤于編集。深為健羨。為語玩澄



儒藏

劉孟瞻先生年譜 手劄

尊甫上有長編、

未能繼述盛業、不佞高郵父子專美於前、是  
所望也。劉都轉子、慈氏秀才、深嗜金石、  
昨持琅玕祥三級浮圖碑見示、紀年元象、  
亦係東魏時物。碑銘居士趙姓、係元代人、不  
知碑石在否。如內志代拓數張、分贈兩人。沈君、常山金



儒藏

劉孟瞻先生年譜 手劄

石老如有輝文、心華抄示。沈君書能代光一節  
更如。近來邑中曾訪得新出土及舊有  
者若干種。

見和、二卷。當此奉市、即頃

待安、云一。

文洪致首。



焚楨十兄同年並下、可接

並下手書、得悉

起居無恙。嗣托孟唐大兄帶回一札、想已經

賜覽。弟自北來、一路同孟唐行止、抵寧笑語、不知山徑之

苦。孟唐故長者、奕甚平、然每與奕輒自謂為手、雖連負

不為屈也、其可笑可如此。弟造服孟唐之學、與只為人之

質、辟玉於奕、終不之許、是又弟之倔強也。孟唐之學有



儒藏

劉孟瞻先生年譜 手劄

實下手工夫、第心佩之。至前在途、後及

天下、近日為毛鄭之學、第聞之危、喜夫之非毛、正也。第累年

究心毛故、今始通其什八。其餘出處、尚有未敢詳者。

至下書成、不可不先示一讀、庶以啓弟之苦心也。茲將毛鄭詩

譜敘錄呈

是正。別有毛鄭詩翼、宜日鄭家到場、並乞

斧削。元儒有言、前人之失、吾知之、吾之失、吾不能自知也。

惟

大正董而正之。並候。

文安。不宣。

再

愚弟丁晏頓首。十月初一日。

端臨先生。惠述。嘉祐友人。或見遺書一冊。茲以贈訪。如有印本。乞  
賜一部。為感。又及。毛部詩譜。郵致。閱後。仍呈。玉照。兄。察核。要復。白。

劉孟瞻先生年譜序

有清之世、文治昌明、學術號為極盛、治經者咸能守師法、通故訓、精研博辨、盡埽宋元以來空疏駁雜之弊。其風尚肇於康熙、洎乾嘉而名儒輩出、塗分流別、著述迺冠絕於一代。蓋乾嘉諸儒尊依漢詁、凡所為書、義例精密、更張舊釋、補失匡違、董理之功、遂軼晉唐舊疏之上、閭、秩、良、尚矣。儀徵劉孟瞻先生、文淇崛起於嘉慶之季、沈思博誦、貫通群經、尤致力於春秋左氏傳、嘗



謂左氏之書久為杜征南所晦、鄭康成、賈景伯、服子慎之古義雖孔仲達不能復辨、乃鈎稽鄭賈服三家佚注及近代諸儒補注、精校詳擇、為左氏傳舊注疏證。凡杜氏所排擊者、糾正之、沈沒者表著之。訖、年載厘寫長編、其功未竟、世深惜之。厥後傳於伯山、毓松、再傳於恭甫。壽曾續纂至襄公四年、而復輟筆。然一經相承、三世傳業、天下學者固歸伏久矣。日奉小澤文四郎介余及門、孫子書以所輯孟瞻先生年譜見眎、請序其端。夫自古英賢才俊、



其勛業文章垂著於世者，後人企念風徽，猶為旁徵傳記，廣采遺聞，著為譜錄，用寄其景仰之忱。況孟瞻先生世承素業，厲志窮經，身名不顯於當時，撰述足傳於來葉，承學之士習其遺書，曰而攷其行實，溯其師友交游，為之論定生平，藉以窺尋前輩進德脩業之軌，其所係寧不鉅哉。願年譜之作，大抵出於子姓或門人故舊，以其蒐采便而閤見詳也。今小澤君以東瀛隼士來學我邦，慨慕先儒，創編茲譜，則輯錄之勛，捃摭之艱，自什倍於常。



倫。然自屬稿迄於成書，為期不越一載，而取材必賅，隸事咸允。顏黃門所謂彙括有條例，扶擇窮本原者，殆足當之矣。憶昔訪書江左，先生故里頻歲經游，而遺稿莫尋，流風頓寂。頃聞小澤君渡江，弔古稅駕蕪城，乃得躬造舊廬，締交賢裔。高山仰止，夙願幸償。雅尚清風，欽慕靡<sup>①</sup>。爰於年譜之行也，欣然命筆，所不辭焉。歲在己卯三月，江安傅增湘撰。

# 自序

有清三百年學術、曠古盛業。國初、顧黃閻王諸家定其丕基、惠戴段王極盛、乾隆、嘉道之交、阮伯元優游宦海、宰學海、詰經、造就甚衆。夫揚州之地、長江南迤、淮瀆北控、運河縱走、物豐人傑、且當交通要衝、文人墨客往來甚殷、容甫石臞稱盛于前、伯元休致回里、延儒好文、大振于後。劉孟瞻先生文淇、少俊異、與同郡劉楚楨先生寶楠友善、有揚州二劉之目。先生雖應試不售、未周遊天下、而天下之士過從此地者、皆願與交、而並郡士流亦斐然各欲有所造述、與先生道義切磋、相得益彰、治經校史、學冠江淮、當路鄉黨靡不推重。子伯山亦文筆騰蹕凌厲、排突前哲、孫恭甫紹述祖業、曾孫申叔名振海內、不幸咸短命矣。丁丑季秋、余負笈燕京、竊謂欲覘當時揚州之學派、應先詳悉先生學行、乃試編先生年譜。然而編年譜之事、似易實難、其難在搜采資料之難期完璧。聞先生



儒藏

劉孟瞻先生年譜

自序

畢生大著春秋左傳舊注疏證八十卷存于滬而今不可寓目。其讀書隨筆二十卷不知存亡尤爲憾也。又若夢陔堂詩集、黃春谷念樓集、劉楚楨菴集、梅蘊生舍是集、王句生等所載之唱和應酬詩、關於先生事迹雖多然先生所撰青溪舊屋詩集僅一卷概不能確核其年月。其他若先生與校之四書說苑、孫彥之、秋槎雜記、劉迪九等多難推定其年代而先生所注南北史燬于兵燹今不可以知其體裁矣。知其難而爲之者亦嗜尙所在不能自己耳。江安傅沅叔先生暨鹽城孫蜀丞先生及橋川子雍先生憐余不敏出示秘笈拳拳提撕始得脫稿。乃逐錄清本質之通人余意所存謬承許可乃不自揣度授工付印惟博雅君子教正是幸。昭和十三年戊寅七月後學日本上野小澤文四郎謹識于北京朗日廬。

校記

①「靡」下當脫一字。



儒藏

劉孟瞻先生年譜 自序

# 劉孟瞻先生年譜卷上

日本上野 小澤文四郎編

乾隆五十四年己酉 一歲

十月二十三日申時先生生於揚州諱文淇字孟瞻。通義堂集卷六先考行略（以下通義堂集簡稱通集）籍儀徵居邗上。青溪舊屋文集叙（以下簡稱青集）名屋云青溪舊屋又顏云光照堂。

按先生四世孫劉容季師穎氏僑居天津寄余書云青溪舊屋在揚州城內運署東圈門東寒家數世均居此宅。

劉氏先世居漂水。

高祖春和國學生始由漂水遷揚州。以次子

原作長子守備君起寅貴贈明威

將軍。青集卷十先府君行略



按先生子毓崧伯山所撰先考行略通集卷六長子作次子。劉寶楠楚楨所撰清故優貢生候選儒學訓導劉君墓表念樓外集卷二作長子、丁晏儉卿所撰皇清優貢生候選訓導劉君墓誌銘劉容季氏附錄作次子。劉容季氏來書云起寅公係春和公次子。按明清諸記傳無劉起寅者。

曾祖起泰國學生祖暉與其從兄儒林君墮占籍儀徵補博士弟子。

劉容季氏來書云自六世祖魯凡公嗽始占藉儀徵但久居揚州並未在儀徵卜居。

父錫瑜、懷瑾一字琢齋。乾隆十四年己巳六月十四日生業醫昆弟六人、伯仲早卒。三伯父錫章僑居鹽城四伯父錫璜補郡文學出嗣儒林君後。六叔父諱令聞。青集卷十先府君行略時父四十一歲。

母凌氏江都處士驥女年二十五歸于劉。青集卷十先母凌孺人行略凌



曙曉樓姊、藝舟雙楫卷八劉國子家傳時三十三歲。

姊適同縣附學生員陳傳洛。青集卷十先府君行略

陳傳洛行實未詳。按續纂揚州府志藝文志傳洛著有春軒漫筆、延禧堂集等。

五十五年庚戌 二歲

五十六年辛亥 三歲

二月五日寶應劉寶楠楚楨生。寶應劉楚楨先生年譜

按劉寶楠字楚楨別號念樓寶應人父履恂補授五河縣儒學教諭楚楨其幼子與先生友善有揚州二劉之目。行實著述詳于姪曾孫劉氏詩孫所編寶應劉楚楨先生年譜。

五十七年壬子 四歲

十一月六日旌德姚配中仲虞生。藝舟雙楫卷八清故文學旌德姚君傳

按、仲虞至揚與先生交、力攻漢學、尤嗜漢易。著有周易姚氏學十六卷、周易通論月令二卷、琴學二卷等。藝舟雙楫卷八有傳。

五十八年癸丑 五歲

五十九年甲寅 六歲

六月二十日、江都梅植之、蘊生生。青集卷十清故貢士梅君墓誌銘

梅蘊生傳詳道光二十四年。

是年、儀徵汪穀小坡生。青集卷八文學汪君傳

汪小城傳詳道光八年。

是年、山陽丁晏儉卿生。續碑傳集卷七十四

按、丁晏一字拓堂、山陽人。道光元年舉人、卒於光緒元年、年八十二。所著書四十七種、凡一百三十六卷。已刊者爲頤志齋叢書。續碑傳集卷七十四有傳。



儒藏

六十年乙卯 七歲

是年丹徒柳興恩致叔生。續碑傳集卷七十四

按興恩原名興宗丹徒人。早歲至揚與先生交。受業於阮雲臺。初治毛詩。後復闡穀梁大義。卒於光緒六年。年八十六。著有穀梁春秋大義述三十卷、周易卦氣輔四卷、虞氏逸象考二卷、尚書篇目考二卷、毛詩注疏糾補三十卷、續王應麟詩地理考二卷、羣經異義四卷、劉向年譜二卷、禮儀釋宮考辨二卷、史記漢書南齊書校勘記、說文解字校勘記、壹宿齋詩文集等。續碑傳集卷七十四有傳。

嘉慶元年丙辰 八歲

出就外傳、居貪力學。

按先生出就外傳者當始此。自撰先府君行略。青集卷十云、每自塾歸、必督課盡一燭、率以爲常。時值屢空、親串有勸令廢讀者、府君堅執不

肯。又自撰先母凌孺人行略青集卷十云、文淇少時出就外傅歸、家君督課、母室或無燭、恒默坐聽誦聲以爲樂。又云、文淇初入學、有小姓某饒於財、欲得以爲婿、陪奩許千金。家君在秦州未歸、親串多勸母許之、可以救貧者、母不允。某遣人婉言再三、終不能得。

二年丁巳

九歲

就外傅。

三年戊午

十歲

就外傅。

四年己未

十一歲

就外傅。

五年庚申

十二歲

就外傅。



備藏

六年辛酉 十三歲

就外傳。

七年壬戌 十四歲

肄業梅花書院、主講洪梧、仍困窮勉學。

按、自撰先母凌孺人行略青集卷十云、時洪桐生先生主講梅花書院、文淇往受業。人或勸令文淇訓蒙、可少得脩脯、以佐朝夕。母以學未成、不許。文淇每自書院歸省、家或斷炊、輒鬱邑累日。母則諭以專心讀書、勿以家事爲念。從桐生先生學凡四年、而後授徒餬口焉。又按、四書典故、毀洪序云、予昨歲主講梅花書院。此序作於嘉慶十二年丁卯秋、則桐生之去講席、當在嘉慶十一年丙寅、故繫之此年。

按、徽州府志人物志云、洪梧字桐生、一字植垣、歙虹源人。兄朴、榜皆先卒。親喪哀毀幾絕、廬於墓側。人稱其孝。早歲入泮、選拔貢生。歲庚子、高



宗南巡召試、賜舉人、授內閣中書、時稱同胞三、中書。庚戌成進士、改翰林院庶吉士、授編修。典浙江鄉試、得人爲盛。奉敕同纂修全唐詩、出知山東沂州府、時又稱同胞刺史、慈和詳慎、恤民愛士、有蒲鞭自辱之風。歸、主講安定梅花書院、弦誦不輟、造就甚衆。著有易箴二卷、賦古今體詩最富、藏於家。

八年癸亥 十五歲

學于梅花書院。

九年甲子 十六歲

學于梅花書院。

是年始識涇縣包世臣。慎伯

按、藝舟雙楫 卷八劉國子家傳云、江淮間有篤行君子曰懷瑾劉君者、嘉慶甲子、余再至揚州、識凌曙曉樓、以識君及君子文淇孟瞻。曉樓蓋



君妻弟也。孟瞻時年十二三，穎敏誠樸，善讀書，余尤愛之。慎伯傳詳咸豐三年。

十年乙丑 十七歲

學于梅花書院。

十月九日，平定張穆石州生。張石州先生年譜

按張石州先生年譜云：初名瀛暹，字誦風，一字石州，又字蓬仙，別署季洩、季翹、惺吾、月齋，晚號靖陽亭長，山西平定州人。卒於道光二十九年十一月九日，年四十五。著有顧閣年譜二卷、蒙古游牧記十六卷、魏延昌地形志二十卷、北京人文科學研究所藏稿本首三卷、月齋文集八卷、詩集四卷等。

十一年丙寅 十八歲

始設帳授徒。

按、自撰先母浚孺人行略青集卷十云、從桐生先生學、凡四年而後授徒、齒口焉。

是年梅花書院主講洪梧退職。四書典故原洪序

十二年丁卯 十九歲

受知於會稽莫侍郎、與薛傳均子韻同補博士弟子。

按、莫侍郎名晉、字錫三、一字裴舟、別署寶齋、會稽人、官倉場侍郎。阮伯元聘主戴山書院講席、重刊黃梨洲明儒學案。生於乾隆二十六年五月五日、卒於道光六年四月八日、年六十六。國朝耆獻類徵卷一百十、國史列傳卷三十五、碑傳集補卷三有傳。

按、先考行略通集卷六云、嘉慶丁卯、受知於會稽莫侍郎、取入縣學。又按、自撰文學薛君墓誌銘青集卷十云、予與君同居郡城、又以嘉慶丁卯同補博士弟子。



儒藏

劉孟瞻先生年譜 卷上

薛傳均傳詳道光十一年。

十三年戊辰 二十歲

是年始從友人所借得毛詩疏手自繕寫。春秋左傳舊疏考正序

先生好詩。包慎伯勸令治毛鄭詩。因識包世榮。季懷

按藝舟雙楫卷二十九弟季懷學詩識小錄序云。戊辰秋。乃攜季懷至

揚州。世臣出遊久。多識前輩得讀書之要領。揚州士人常過從者。輒以

所聞授之。而江都凌曙曉樓至誠篤。曉樓之甥儀徵劉文淇孟瞻尤穎

慧。時歛洪桐生先生主講梅花書院。善世臣甚。世臣所許可者。輒召入

院。膳給之。使與其養子敏回子駿甥閔宗肅子敬共几席。世臣以曉樓

熟禮記。遂與之言鄭氏禮而使治之。孟瞻好詩。遂使治毛鄭氏詩。季懷

與孟瞻同業。子駿年最少。而神解驚絕。尤相善。已而旌德姚配中仲虞

在江甯。聞季懷之說治漢易。族子慎言孟開亦從季懷受詩。先後來揚

州而丹徒汪沆、芷生治毛氏、甘泉薛傳均子韻治許氏皆善。季懷朝夕與砥礪，相勸以力學。包世榮傳詳道光六年。

十四年己巳 二十一歲

家計稍裕，始免揭債。

按自撰先府君行略青集卷十云：自六十後，家計稍裕，始免揭債。有餘，即以周窮乏。

十五年庚午 二十二歲

十六年辛未 二十三歲

十七年壬申 二十四歲

是年，門人薛壽生。

按薛壽字介伯，晚字斡伯，揚州江都人。初師事梅蘊生，後乃受經於先生。晚年南皮張之洞淑經心書院聘斡伯主講席。卒於同治十一年四



儒藏

月二十七日、年六十一。著有續文選古字通二十卷、讀經剖記二卷、學  
詁齋文集二卷、外集二卷、詩集二卷。劉壽曾恭甫爲作傳、載在續碑傳  
集卷七十九。

十八年癸酉 二十五歲

是年娶甘泉黃紹堯女秀貞。時秀貞年二十一。通集卷六先母黃太孺人行  
略

按、外祖黃公家傳通集卷六云、紹堯字峻封、一字稱船、國學生。生於乾  
隆四十七年正月二十五日、卒於道光十二年二月十八日、年六十一。  
孫女素芬、毓崧繼室也。

十九年甲戌 二十六歲

歸安王侍郎歲試揚州、擢先生置一、等第一、補廩膳生。通集卷六先考行略  
按、王侍郎名以銜、字署冰、號勿庵、歸安人、官禮部右侍郎。生於乾隆二

十年辛巳十一月二日卒於道光三年十二月年六十三。續碑傳集卷八有傳。

二十年乙亥 二十七歲

二十一年丙子 二十八歲

始於薛傳均所識汪穀。青集卷八文學汪君傳

二十二年丁丑 二十九歲

是年洪梧卒年六十八。

按群玉堂日鈔生日自嘲有句云行年六十五春秋此書爲桐生甲戌年稿故丁丑爲六十八自明矣。

七月庚戌撰祭洪桐生師文與包世臣翟慎典凌曙包世榮薛傳均等致祭。

青集卷十

祭文云維嘉慶二十二年歲次丁丑七月庚戌包世臣翟慎典凌曙包世



儒藏

劉孟瞻先生年譜 卷上



榮、薛傳均、劉文淇等，謹以清酌庶羞之奠，致祭於桐生夫子之靈而言曰：嗚乎！喬柯墜葉，秋陽匿曜。怪鵬書占，靈蛇夢告。金鏡孰投，赤丸曷效。寂寞黃墟，悽愴元校。緬惟夫子，經師人師。保直五夜，出守一麾。著作在朝，政績在沂。史臣華袞，邦人祝尸。汲黯辭官，文翁主講。五百學徒，三千都養。飲食教誨，誘掖勸獎。如何奄忽，遽遊泱泱。廣廈一空，泰山安仰。世臣薄遊，滯迹邗水。屢辱行滕，頻蒙倒屣。播諸鉅公，期以國士。說甘於肉，言莫逆耳。北海薦禰，荊州識李。我謁都門，公游蒿里。杖履竟違，飯含未視。將誄先生，責在後死。慎典不材，輟駒促局。執友情敦，同館誼篤。馬帳聽經，鄭門著錄。偶焉窺豹，輒許折鹿。先業屢稱，後嗣是勗。頻年客遊，今茲歸復。擬謁講筵，詎登僊錄。哀憤填膺，涕泗盈掬。曙生窮巷，獲侍禮堂。執竿漂麥，挾策亡羊。拔我聞闥，置我宮牆。深憐孤露，非分揄揚。兼校劉錄，略涉曹倉。忍辭淮浦，愁泛衡湘。楓林閃黑，梁月昏黃。永隔顏色，痛絕肺腸。世榮單寒，從兄問學。龍門



撰履、鑪堂抱樵。猥以碌碌，猶承瑤琢。親授一經，躬御三爵。小善則揚，微疵必索。三益是獎，寸心轉作。寢疾幾時，問安猶昨。云何悲吹，不聞警鐸。傳均束髮，側聞德馨。請業南閣，問字雲亭。奇觚握素，汗簡削青。薦之宗匠，謂能詰經。時荷折柬，滋慚叩筵。常憐屈蠖，不辭燭螢。悲風弗弗，涼雨冥冥。云何輟瑟，不啟重局。文淇驚鈍，未能遠驚。退飛若鷁，不遷如鶩。恭承誨言，稍知警悟。弄筆解頤，廢書逢怒。飄飄祥風，載沾雨露。烈烈震霆，頓撥雲霧。哀哉長辭，逝焉莫遏。恩鏤寸丹，悲纏尺素。嗚乎。魂衣在座，遺挂在室。防有舊交，翻無弔客。淚冷荒苔，聲淒秋蟀。所冀齊美，端賴二難。競秀華鄂，齊芳蕙蘭。魂魄攸託，骸骨未寒。高春一逝，朝露遂晞。相嚮而哭，如無所歸。莫以濁酒，侑以荒辭。靈來彷彿，魂兮有知。嗚乎尙饗。

翟慎典涇縣人行實未詳。

凌曙字曉樓，一字子昇，江都人。生貧力學，爲塾師。愛先生穎悟而教之。

爲先生舅氏問治經方法於涇包慎伯。受益沈欽韓小宛。與劉逢祿申受友善。受知阮太傅元。卒於道光九年五月。年五十五。著有四書典故六卷、春秋繁露注十七卷、公羊禮疏十一卷、公羊禮說一卷、公羊問答二卷、禮論一卷、群書答問二卷、儀禮禮服通釋六卷等。先生爲刻蜚雲閣凌氏叢書。藝舟雙楫卷四有傳。

二十三年戊寅 三十歲

二月二十三日。子毓崧伯山生。續碑傳集卷七十四

是年與劉楚楨交。同訪包慎伯於小倦遊閣。

按自撰劉楚楨江淮泛宅圖序。青集卷四云。吾友寶應劉君楚楨就館郡城於嘉慶戊寅。攜家來揚。又念樓集卷六暫園吟序云。戊寅予徙郡城。與劉孟瞻交。時同訪包慎伯於小倦遊閣。

秋與劉楚楨、薛子韻、楊季子等泛舟湖上賦詩。

按、念樓外集卷一云、秋日、偕薛子韻傳均、劉孟瞻文洪、楊季子亮泛舟湖上有作。

楊季子名亮、甘泉人、與先生友善。咸豐三年、粵匪陷城、絕粒死、年五十七。著有蒙古道里考、圍城日記、世澤堂詩文集等。續纂揚州府志有傳。

二十四年己卯 三十一歲

是年、與劉楚楨及丁儉卿同拔取優貢生。時學使爲蕭山湯敦甫相國。

按、先考行略通集卷六云、己卯科、蕭山湯相國拔取優貢生。是科所取之六人、相國持擇極慎。先於歲考時面試經解、深許先考爲樸誠績學之士、特諭學師補舉優行、遂膺斯選、公論以爲名實相副。

按、丁儉卿序楚楨詩文集、念樓府君行狀所引云、嘉慶己卯之歲、余以優行貢成均、同舉者揚州劉孟瞻、劉楚楨。學使蕭山湯文端公並重其學行、薦於朝、當時有二劉之目。二君既與余同譜、孟瞻長余五歲、楚楨



長余三歲、交久且敬。淮揚相距三百里、書翰往來、皆以問學相切劘。每至大比之歲、聚首省會、朝夕過從。或公車同行、講貫無虛日。孟瞻著書滿家、四句外、即不應科目、以明經老、歸然爲江左經師。

按湯相國名金釗、字敦市、一字勛茲、浙江蕭山人。嘉慶四年進士、官光祿寺卿。生於乾隆三十七年十一月二十三日、卒於咸豐六年四月十九日、年八十五。賜諡文端。續碑傳集卷三、國朝先正事略卷二十四有傳。

二十五年庚辰 三十二歲

二月上旬撰左傳舊疏考正序。

序云、六朝諸儒說經之書、百不存一、使後人畧有所考見者、則以唐人正義備載諸儒之說也。然唐制試明經、一依正義、非是黜爲異端、遂使諸儒原書漸就亡佚。故昔人謂唐人正義功過相等。世知孔冲遠與諸儒刪定



舊疏非出一人之手。又永徽中就加增損，書始布下，知非孔氏之舊。至於舊疏原文與夫孔沖遠等所刪定，于仲謐等所增損者，雖復覺其踳駁，概謂無迹可尋。近人有以舜典、武成、呂刑疏中每引大隋，謂非唐人之語。然僅此孤證，於全書體例未嘗細爲區分。文淇質性驚鈍，年二十始從友人所借得毛詩疏，手自繕寫。後乃得十三經注疏，依次校勘，朝夕研究，竊見上下割裂，前後矛盾，心實疑之久矣。近讀左傳疏，反覆根尋，乃知唐人所刪定者，僅駁劉炫說百餘條，餘皆光伯述義也。文十三年傳其處者爲劉氏疏云：「討尋上下，其文不類，深疑此句或非本旨。」蓋以爲漢室初興，捐棄古學，左氏不顯於世，先儒無以自申。劉氏從秦從魏，其源本出劉累，抑注此辭，將以求媚於世。此疏未著何人之說，無以知爲光伯語。及檢襄二十四年傳在周爲唐杜氏疏云：「炫於處秦爲劉，謂非邱明之筆。」豈韋唐杜不信元凱之言，則前疏爲光伯語顯然可見。襄二十九年傳爲之歌頌疏云：



成功者、營造之功畢也。天之所營在於命聖、聖之所營在於任賢、賢之所營在於養民。民安而財豐、衆和而事濟。如是則司牧之功畢矣。故告於神明也。劉炫又云、干戈旣輯、夷狄來賓。嘉瑞悉臻、遠近咸服。羣生遂其性、萬物得其所。即功成之驗也。此疏似前爲唐人之詩。及檢詩關雎序頌者、美盛德之形容、疏文義與此大同。惟刪去劉炫又云四字。據詩疏知此疏皆光伯語。據此疏知詩疏皆非沖遠筆也。約舉二端、足見唐人剽襲之跡已然。按孔氏左傳疏序云、其爲義疏者、則有沈文阿、蘇寬、劉炫。沈氏於義例粗可、於經傳極疎。蘇氏則全不體本文、惟旁攻賈服、使後之學者鑽仰無成。劉炫於數君之內、實爲翹楚。然聰惠辨博、固亦罕儔。而探頤鉤深、未能致遠。又意在攻伐、性好非毀、規杜氏之失、凡一百五十餘條。習杜義而攻杜氏、猶蠹生於木而還食其木、非其理也。然比諸義疏、猶有可觀。今奉敕刪定、據以爲本。其有疎漏、以沈氏補焉。旣云據以爲本、原非故襲其說。又



序以旁攻賈服爲非、而疏中攻賈服者正復不少。豈孔氏既斥其非、而復躬犯其失。光伯亦攻賈服、非止蘇氏。序稱辨博寡儔、即指疏中駁正賈服者。光伯之疏本名述議、隋經籍志及孝經疏云、述議者、述其義疏議之。雖指孝經述議而言、其餘詩疏及左氏傳、光伯皆名述議、應亦述其義疏議之。然則光伯本載舊疏、議其得失、其引舊疏必當錄其姓名。而或引伸其說、或駁正其非。永徽中、將舊疏姓名削去、襲爲己語、使似光伯申駁唐人。唐書孔穎達本傳云、本名義贊、後詔改爲正義。今左傳疏閒有刪改未盡、言今贊者、隱元年、襄元年、二十年、二十年。即是義贊序所謂特申短見者也。其言今贊、皆在舊疏之後而別爲一說。又疏凡云今刪定、知不然者、斯則沖遠之筆、與序奉敕刪定之言合。其無刪定之文、必是光伯原本。足知勦襲舊疏、斷非沖遠之意、而出於永徽諸臣之增損也。又按唐會要云、貞觀十二年、國子祭酒孔穎達撰五經義疏、馬嘉運駁正其失、有詔更令詳定。會要不載詳定年月。

據孔氏序云、至十六年、又與前修。永徽三年、詔太尉趙公忌無等穎達本疏人、更詳審、知爲貞觀十六年。

仲證等就刊正。四年進之、頒於天下、以爲定式。然則沖遠受詔刪定在貞

觀十二年、更令詳定在十六年。<sup>②</sup>沖遠卒於十九年、而永徽中諸儒考正

僅及一載、期限更促、乖謬宜多。宋端拱間、孔維表上五經正義云、孔穎達

考前代之文、採衆家之說、用功二十餘年、成書百八十卷。是乃未經考詳、

失其事實者也。或又謂疏中每引定本、易繫辭引定本二條、書禮各數條、毛詩、左傳所引最夥。定本

出於顏師古、則疏爲唐人之筆可知。近世諸儒咸同斯論。按顏師古本傳

云、帝嘗歎五經去聖久遠、傳習寢訛、詔師古於祕書省考定、多所釐正。是

師古原有定本。然漢魏以來、校定書籍者正復不少、即如北齊郎茂于祕

書省刊定載籍、隋蕭該開皇初奉詔與何妥正定經史、劉焯傳云焯與諸

儒於祕書省考定羣言、是齊隋以前皆有定本。詩關雎序故正得失疏云、今定本皆作正字、襄二十

三年傳中、鮮虞之傳羣爲右杜注、傳羣中、鮮虞之子。疏云、俗本多云中、鮮虞之子、今案注云、傳羣中、鮮虞之子。若傳先有子字、無煩此注。故今定本



皆無。皆之詞也。疏中所云今定本者當係舊疏指齊隋以前而言。必知非  
非一本之詞也。疏中所云今定本者當係舊疏指齊隋以前而言。必知非  
師古定本者其驗有十焉。禮器匹士太牢而祭謂之饗疏云。盧王禮本並  
作匹字。今定本及諸本並作正字。熊氏依此而爲正字恐誤也。據此是定  
本乃在熊氏前。檀弓并經葛而葬注。既虞卒哭乃服受服也。疏云。皇氏云。  
檀弓定本當言既虞與喪服注會。云卒哭者誤也。文王世子諸父守貴宮。  
貴室疏云。此貴宮貴室總據路寢。皇氏云。或俗本無貴宮者。定本有貴宮。  
據此是定本亦在皇氏前。其驗一也。襄二十七年傳。皆取其邑而歸諸侯。  
諸侯是以睦於晉。疏云。古本亦有不重言諸侯者。今定本重言諸侯。劉炫  
云。晉宋古本皆不重言諸侯。不重是也。劉炫豈及見師古定本。而以定本  
爲非。其驗二也。詩疏多引定本集注。集注乃梁代崔靈恩所作。若唐人引  
師古定本。不應定本集注並列。而定本反在集注之前。其驗三也。師古但  
定五經。未聞更校公穀。宣十七年左傳疏引穀梁定本作晉郤克眇。衛孫

良夫跋。公羊疏云案舊題云春秋隱公經傳解詁第一公羊何氏。今定本則升公羊字在經傳上。退隱公字在解詁下。未知自誰始也。則是公穀皆有定本。其驗四也。孔穎達傳與師古同。受詔撰五經正義。今疏中有以定本爲非者。夫豈師古自駁其說。其驗五也。顏之推家訓云。齊侯疾遂疔。世間傳本多以疾爲疥。俗儒就爲通云。病疥令人惡寒。變而成瘡。此臆說也。今左傳疏云。今定本亦作疥。若謂師古所定。則是數典忘祖。其驗六也。匡謬正俗云。襄五年。楚公子王夫字子辛。今之學者以其字子辛。遂改王夫爲壬夫。此與庚午不相類。固宜依本字讀爲王夫。此書亦師古所作。其定本應與之同。今左傳疏作壬夫。不云定本作王夫。其驗七也。又師古本傳云。詔師古於祕書省考定。既成。悉詔諸儒議。各執所習。共相非詰。師古輒引晉宋舊文。隨方曉答。人人歎服。帝因頒所定書於天下。定本旣已奉敕頒布。正義豈能復議其非。其驗八也。舊唐書云。貞觀七年。頒新定五經於





天下。永徽四年，領孔穎達五經正義於天下，每年明經依此考試。是則二書並行，不聞以師古定本載入正義，其驗九也。陸德明卒於高祖末年，貞觀四年，師古始受詔考定五經。詩、兔爰箋云：有所操戚也。釋文云：操七刀反。今作躁，與定本異，與箋義合。魚麗傳云：草木不折不芟，斧斤不入山林。釋文云：定本芟作操，草刀反。陸氏不見師古定本，釋文乃兩引之，且爲之作音，其驗十也。凡此證驗，易爲討覈。定本既非師古書，則疏安見盡皆唐人筆耶？今一依孔氏序例，細加析別，得若干條，釐爲八卷。其餘易、尚書、毛詩、禮記諸疏，猶將次第考正。庶冀六朝舊疏稍還舊觀云爾。與青集所載

小異

春赴京朝考後就職候選訓導尋歸。通集卷六先考行略

按劉楚楨江淮泛宅圖序青集卷四云：余自嘉慶庚辰一遊京師，即杜門不出。



夏自都南還與丁儉卿偕。

按附監生丁君妻劉氏墓志銘青集卷十云文淇於庚辰夏自都南還與晏偕時晏年才二十五歲長身瘦削如不勝衣而議論古今風發泉湧詢其學之所自則對曰吾母四十歲始生晏生十三年而先君子見背晏出就外傳抵暮方歸吾母已先立戶側漏下猶不爇膏火俟陳書几上始然燈常謂讀書自有用處毋亟亟求名晏之稍有所成不爲俗學所汨沒者皆吾母之教也余時心儀之。

再按儉卿與楚楨手札橋川子雍氏藏云楚楨十兄同年足下前接足下手書得悉起居無恙。嗣托孟詹大兄帶回一札想已經賜覽。弟自北來一路同孟詹行止抵掌笑語不知山徑之苦。孟詹故長者奕甚平平。然每與奕輒自詡高手雖連負不爲屈也。其可咲如此。弟甚服孟詹之學與其爲人之質厚。至於奕終不之許。是又弟之倔彊也。孟詹之學有



儒藏

劉孟瞻先生年譜 卷上

實下手工夫、弟心佩之。至前在途談及足下近日爲毛鄭之學、弟聞之色喜。夫鄭非毛匹也、弟累年究心毛故、今始通其什八。其餘出處、尙有未能詳者。足下書成、不可不先示一讀、庶以啟弟之蓬心也。茲將毛鄭譜叙繕呈、是正、別有毛鄭詩翌容、日郵寄到揚、並乞斧削。元儒有言、前人之失吾知之、吾之失吾不能自知也。口惟大正輩而正之、兼候文安、不宣。愚弟丁晏頓首。十月初一日。再、端臨先生著述彙於友人處、見遺書一冊、茲無从購訪。如有印本、乞賜一部爲感。又及毛鄭詩譜鄙敘閱後、仍呈孟詹兄覆核。晏復白。

是年女汝士字仲博生。<sup>③</sup>劉容季氏勝錄劉壽曾所撰亡姑國子監生田君妻劉孺人墓誌銘

道光元年辛巳 三十三歲

二月、撰舅氏淩曉樓所著公羊問答序。

序云、昔春秋一經、親授子夏、公羊六傳始著竹帛。秦燔書而行口說、漢崇儒而立學官。鄒夾二氏俱亡、佚於建武。嚴顏兩家均淵源於董相。瑕邱屈而學聿興、張湯傳而道益顯。其由博士爲丞相、以經義斷庶事者、賢良三策、決獄十卷、不啻爲之指南、導以先路。厥後鄭衆舉十七事、賈逵作四十條、咸難公羊。以崇左氏。而張霸乃授樊侯之書、何君復述李育之義。竊悲二創覃思三闕、守羊弼緒說、依子都條例、三科九旨、以經之七等六輔、以緯之。墨守之稱、良不誣矣。學海之譽、諒非徒爾。世不能考其聲音訓詁、與夫典章制度、但詆其爲漢制法、以緯汨經、幾何不以春秋爲司空爰書、邵甫爲公羊罪人乎。乃若汜毓釋疑之篇、劉兆調人之作、欲殊塗而同歸、究南轅而北轍。然則隋志所云公羊之學至晉但試讀文、今殆絕無師說者、其信然已。舅氏曉樓先生專治公羊、謹守家法、嘗以董子之書合乎聖人之旨、深悲其生見嫉於主父、沒被詆於劉蘭、又其甚者、謂繁露之名取象



古冕玉杯之例殆等連珠、厚誣古人、貽誤來學、乃注春秋繁露十有七卷。昔毛公出守北海、康成爲其郡人、故其箋詩、不忘崇敬。此則懷蛟徵夢、下馬名陵、式祠堂于舊治、想聲歎於遺書、斐然之思、不能自己者也。又以公羊舊疏不著撰人、言例雖詳、考禮則略、遂乃覃精研思、遐稽博覽、著公羊禮疏十一卷、禮說一卷。馮君章句、旁通禮經、靡信漢議、獨理何氏、方諸前賢、如合符契。若其暴桑周狗、伏雞博狸、大義無關、議小斯在、僂疾黨所、歸上繫行、咸屬方言、俱非雅訓、亦必疏其由來、爲之左證、作公羊問答二卷。荀慈明之問徐欽、王愆期之答庾翼、昔有其書、今存其目。舊疏自爲問答、茲編蓋仿其例。凡以導揚古義、遵守舊聞、文淇賦質、樛昧莫測、涯淡猥忘、謏陋重荷、謹諉。但乏孝綽之奇作、未許同遊。試元幹之藏書、或堪授讀云爾。是序青集未收。

三月以前校姚仲虞周易疏證十六卷。

按宋翔鳳記於包季懷序後云、乃更參象爲疏證十六卷。每卷脫槩必與孟瞻校之、諸君討論之。書成而季懷序之、可謂極友朋之樂矣。包序見作於道光元年三月。又按周易疏證十六卷、仲虞後自改爲周易姚氏學。

是年劉楚楨以其先人行狀及遺書來請銘。

按念樓集卷八皇清登仕郎國子監典簿顯考劉府君行狀見作於道光元年十月既望。而秋槎雜記載先生所撰劉迪九先生墓表云、道光元年月日、寶應劉寶楠楚楨以其先人行狀及遺書來請銘。

二年壬午 三十四歲

正月、包慎伯贈先生以光照堂匾額。

七月、應省試赴金陵。

按別號舍詩序青集卷十一自注云、壬午、以錄遺故赴金陵、稍早。



八月二日、按、壬辰所作別號含詩自注在省聞母病、星夜奔歸。是日、母凌孺人卒、年六十六。三日抵家、母棄養、僅得視含殮。青集卷十先母凌孺人行略是年、作先母凌孺人行略。青集卷十

行略云、母姓凌氏、先世泰州人、明御史公諱儒之後也。祖太學君諱鸞、始遷于郡城。父處士君諱士驥、母張孺人。處士君性淳篤、里中稱長者。張孺人生育繁、家貧無傭、常躬自操作。母十歲許、習箴、<sup>④</sup>暇即提挈弟妹、代張孺人之勞焉。年二十五歸于劉、嘗以不逮事舅姑爲恨。家君有姊嫁於陳、無子。既寡而歸、母每事諮之而行、族長先皆稱曰賢。家君以醫自給而不責謝於人、生計日窘。母秉氣素弱、幼既多疾、值家計之艱、凡飲食烹飪、衣服煩澗之事、咸取具於一身、以故身益多病。生子一、即不孝文淇。女一、適縣學生陳傳洛。文淇少時出就外傅歸、家君夜督課、母室或無燭、恒默坐聽誦聲以爲樂。每逢試事、率解衣質錢、以資行李。文淇初入學、有小姓某



饒於財、欲得以爲壻、陪奩許千金。家君在泰州未歸、親串多勸母許之、可以救貧者。母不允。某遣人婉言再三、終不能得。母之明大義而不苟取類如此。時洪桐生先生主講梅花書院、文淇往受業。人或勸令文淇訓蒙、可少得修脯以佐朝夕。母以學未成、不許。文淇每自書院歸省、家或斷炊、輒鬱邑累日。母則諭以專心讀書、勿以家事爲念。從桐生先生學、凡四年而後授徒黜口焉。母嘗戒以非束修所入、不得妄取。非文字之友、不得妄交。文淇謹受之、不敢忘。然德業不進、其負吾母之訓者固已多矣。近歲家稍裕、粗免飢寒。母精神亦漸康強。而外家多故、時聞張孺人與在室兩妹又相繼下世。母以是戚戚、無一日歡。母之血氣於是始衰耗矣。嗚乎痛哉。歲壬午、母年六十有六。秋間、文淇赴省試。母食飲起居如平時。七月二十八日、忽得吐瀉疾、憊甚。然神明不衰。文淇之姊歸視疾、問所苦。母曰、無所苦。但此疾恐不起。姊與文淇婦黃氏泣請遺命。母惟囑文淇凡事小心謹慎、



及文淇之子必令讀書而已。文淇於八月二日在省聞母病，星夜奔歸。次日抵家，母已於初二日棄養。不孝僅得視含殮，嗚乎痛哉。生不能養，病不能侍湯藥，歿不能視屬纊，其尙何以爲人哉。謹撮舉生平崖略，泣血以書，敬求當代碩儒哀而賜之傳銘，則世世子孫感且不朽。謹狀。

是年包孟開爲先生母撰劉母淩孺人家傳。廣英室遺稿

按包孟開名慎言，行實諸書所記未詳。先生文孫恭甫跋其廣英堂遺藁一卷云：先生爲皖中宿學。道光乙未舉於鄉，屢上春官不遇，客游南北數更府主，以名義自檢飭。困窮不閱，授經以終。先生早歲之學最深於詩，嘗條舉鄭氏實翼毛而正義誤說者十餘事。中年以後，兼公羊以禮記中庸爲春秋綱領，欲取公羊義疏證中庸，而未有成書。惟取兩漢書歷志所述殷歷作公羊曆譜，以正杜氏長歷之謬。又博采漢唐以前說論語者，斷以己意爲論語溫故錄。於丙部書最著管荀二家，嘗擇其

切於身心世用者、甄錄成書、自謂出方靈臬節本上。今惟曆譜暨溫故錄有傳鈔之帙、餘悉佚不可見。其生平客揚州最久、與寶應劉孝獻先生暨先大父爲道義交。孝獻著論語疏、先大父著左傳舊疏考正、皆采附先生之說。又云、咸豐辛酉、先君子裒集先生遺文、得十二篇、付壽曾編寫。云云。此遺藁中有與先生論左氏舊疏書及與先生論史記周世家書二篇、而生卒未詳、要卒於咸豐辛酉以前也。

是年劉楚楨爲先生母撰劉母凌孺人靈表。念樓集卷八

三年癸未 三十五歲

八月撰鶴汀詩鈔序。

序云、寶應劉君幼度以名孝廉司鐸五河、赴省歸、將之任、道過郡城、出所爲詩示余。余素不工韻語、然竊聞古人作詩之旨矣。詩者、志之所之也、在心爲志、發言爲詩。哀樂之情感、歌詠之聲發、故讀其詩而知其人。若務爲



藻績專事浮夸、無憂時感物之思、斟酌陶情養性之助、積軸盈篇、有平大雅。君孝成性、哀樂過人、以其所畜發而爲詩、質雅沖和、纏綿往復。阮步兵之詠懷、陳拾遺之感過、彭澤思親之作、少陵憶弟之篇、自然流露、情見乎辭、讀者可以知君之志矣。予與君季弟楚楨交最深、楚楨博學工詩、嘗輯寶應舊詩、搜采之勤、不遺餘力。君雅不欲以詩鳴、所爲詩不自收拾、因楚楨請之力、乃從群從及門弟子所藏、弄者鈔錄得若干首。君謙雅之量、爲如何也。

按鶴汀詩鈔爲楚楨兄寶樹字幼度者所著、見娛景堂集。此序青溪舊屋文集未收。

是年與黃承吉、春谷相識。

按自撰夢陔堂文集序、青集卷六云、及聞汪孟慈言、先生著有讀周官記、讀毛詩記各若干卷、於是嚮往倍切。時先生遠宦粵西、無由親炙。比

自粵歸、孟慈又入都中、尙以不得階主、未敢造次請謁。而先生忽偕梅蘊生過訪、因招同羅茗香、劉楚楨、王西御、吳熙載、王句生常集、筌園爲文酒之會。暇又至余館中、縱談今古、輒移晷刻。自癸未至壬寅、歷二十一年之久。

又按黃承吉字謙牧、春谷其號、江都人。與焦理堂、循、李濱石、鍾泗、江鄭堂、藩等同郡友善。當時有江焦黃李四友之目。嘉慶乙丑進士、官廣西興安縣知縣。生於乾隆三十六年十一月七日、卒於道光二十二年七月三日、年七十有二。著有夢陔堂詩集、夢陔堂文集、夢陔堂文說等。又刊族祖黃生所撰之字詁、義府二書碑傳集補卷四十九有傳。

是年、楚楨復徙家儀徵。青集卷四劉楚楨江淮泛宅圖序

四年甲申 三十六歲

九月、沈欽韓爲先生撰左傳舊疏考正序。幼學堂文稿卷六



序云、義疏之學、六朝尙矣。百川並流、盡以唐人正義爲壑谷。迄今惟皇氏一家、傳自海島、眞贋莫辨。其他則姓名僅見、條貫無存。若二劉之於詩書、左傳、皇熊之於禮記、所載較多。然揜其菁華、訾其糟粕、棄若弁髦、淪於朽蠹、豈不甚可惋惜哉。初唐之世、碩儒凋盡、詞藝盛行、故瀛洲觴咏、彌覺風流。容臺講論、便成鄙倍。孔冲遠等奉敕撰定五經正義、以昏耄之年、膺刪述之任、觀其尙江左之浮談、棄河朔之樸學、書易則屏鄭、春秋復廢服義、尤專護前非、自阿私好、攻擊鄭服、不遺餘力。而杜氏之學、顯然窮屈者、不容置喙。於是崔靈恩<sup>⑥</sup>、衛冀隆、劉光伯等、譏言新義、或不挂於齒頰、或顯肆其雄黃。加之坐糜宮廩、愧少發明、且吹毛求疵、剝肉爲創、撥其所駁之短、以誣彼短襲、其所解之長、以矜已長、篇幅之內、割裂顛倒、剽竊搏揜、豈惟范氏襲華嶠之書、實同顏籀攘漢書之解。至馬嘉運等所糾撻、永徽中所增損、不過因疵謬難掩、稍用文飾、何能有



加於貞觀。何嘗有諍於沖遠。乃覲然居其名爲絕智之學。以昧天下之目。鋼學者之聰。豈非儒林之恨事哉。吾友劉子孟瞻慨然發憤。暇乃博究經史。檢尋文句。得其脈絡之隔闕。枝葉之未尋。前後之不相稱。新故之不能掩。其聰明辨決。若易牙之嘗水。庖丁之解牛。夫乃投隙抵巇。顯豁呈露。未去葛龔之姓名。已詭法盛之撰述。而沈之義略。劉之述議。隱然若古碑之洗剔。至沖遠等竄定之小智。乾沒之鄙心。其亦難逃於然犀之照也已。余嘗泛濫於宋人之學。見陳祥道、鄭樵之徒。其攻擊鄭孔。本皆鄭孔之所駁。其引仲己義。即亦鄭孔之定論。哆然笑之。此其圖回鈔略之義。即效法唐人。常恨天壤間。實事求是之學少。橫竊大名之人多。劉子年壯學富。於實事求是之志。甚博且勤。此所著。所謂象之一牙。鳳之一毛。足知其非凡品。他日必能發揮先儒之蘊。啟闢後生之智。余又樂俟其成書也。此序與刻本左傳舊疏考正所載小異。



按沈欽韓字文起，小宛，其號江蘇吳縣人。嘉慶十三年舉於鄉，道光三年選授安徽寧國縣訓導。生於乾隆四十年，卒於道光十一年十二月二十日，年五十七。著有兩漢書疏證七十四卷、左傳補注十二卷、考異十卷、三國志補訓詁八卷、釋地理八卷、水經注疏證四十卷、韓昌黎集補注四十卷、王荊公詩補注若干卷、文集注若干卷、范石湖詩集注若干卷。他若陳祥道禮書、王施查三家蘇詩注、王昶金石萃編、隨手糾謬、積成卷帙。又有幼學堂詩集十七卷、文集八卷、藝舟雙楫卷十一有傳。是年寶應喬德謙循吉來訪先生。

按自撰寶應喬君傳，青集卷八云：歲甲申，君存楚楨于儀徵，道過郡城，猥辱先施，得陪几杖。

是年議聘汪小城女爲子毓松婦。

按亡妻汪孺人墓志銘通集卷六云：一日先君至其家，小城先生呼孺

人出拜、年甫七歲。先君見其舉止端莊、歸告吾母、議聘爲子婦。又云、孺人生於嘉慶戊寅十月初五日未時。

五年乙酉 三十七歲

冬、楚楨赴瓜洲曲江亭、得邑人劉春浦玉璽齋遺稿。因先生與楚楨及薛子韻校錄說經之文。念樓集卷五璽齋遺稿序

年末、舅氏曉樓疾中風。

按、曉樓所撰禮論後序云、客歲十二月二十九日、曙自他歸、中途中風甚危、數日少可。此後序蓋作於道光六年二月二十日也。

六年丙戌 三十八歲

九月十八日、包世榮卒、年四十三。

按、世榮族兄包慎伯所撰行狀、藝舟雙楫卷四云、安徽涇縣人。道光辛巳舉人、揀選知縣。又云、君性雖佚蕩、然以廉隅自勵。揚州四達之鄉、士



人爭銜鬻以微名利。君旅舍於是且二十年、常閉戶不通人事。遇績學敦行之先進、則以弟子行自處於聞人華士蔑如也。然善資友以自淑、甘泉薛傳均子韻、儀徵劉文淇孟瞻、旌德姚配中仲虞、族子慎言孟開四人者、皆務實不近名、博洽有文采、君子之徒也。與君志趣如一、講貫至久、故論交爲尤篤。又云、九月初二染時疾、初十日、語其室人曰、吾不起矣。蓋父幼子以累卿、吾女已許仲虞、葬後即歸姚氏、童養之。卿撫長子至六歲、以屬仲虞、撫次子至六歲、以屬孟瞻、爲吾教誨之、必得成立、卿尙不至茆老無依也。其室人泣請留書爲託。君曰、孟瞻、仲虞與吾爲道義交二十年、非岐視生死者。是後遂不復有言。以道光六年九月十八日疾革、著有學詩識小錄十三卷、毛詩禮徵十卷、毛詩禮徵季懷卒時未有大名、或云詩禮徵文。

楚楨由儀徵遷揚州。青集卷四劉楚楨江淮泛宅圖序

是年楚楨師喬德謙字循吉卒。年五十五。念樓集卷八清故修職佐郎候選儒學訓導喬先生墓表。楚楨屬先生作傳。先生撰寶應喬君傳。

傳青集卷八云。君名德謙字循吉。寶應人。高祖萊舉康熙己未博學鴻詞。官翰林院侍讀。與靳文襄公爭議海口奪官。直聲著海內。曾祖崇修。用人材辟召。既見。以疾固辭。授銅陵縣教諭。抱道自重。士林模範。君少承家學。博通典籍。言必遵經。動必守禮。雖未膺祿仕。而時時以人心風俗爲憂。勤懇懇。稱道不倦。人見其出於至誠也。亦頗有所感悟焉。嘉慶丙寅丁卯間。會稽莫侍郎晉督學江蘇。深器君。歲科兩試皆第一。十赴省試。僥得復失。僅充歲貢。未展其才。年踰六十。猶藉授徒以供饘粥。人咸惜之。君處之泰然。無幾微不平之色。道光紀元。勅直省大吏舉孝廉方正之士。鄉之士大夫以君名應詔。君固辭不獲。時霍丘張先生鼎爲訓導。主持名教。深以所舉得人。亟上其名于督撫。吏胥廉君貧。遂格其事。而飭地方別舉。君聞



之笑曰、固吾志也。鄉人以舍君別無可以當之者、亦不復有所舉報。夫以國家旁求之詔問一舉行、主者固宜慎重遴選、以光大典。以余所聞、躁進之士先結納其搢紳、又以重賞啗胥吏、大吏亦忽不省察、濫廁薦牘者有之矣。君固有所深恥而不肯爲者、即得焉、亦豈足爲君重。顧吾異夫君之鄉人、獨持正不阿、固有以見人心風俗之厚、抑亦君所以感之者深耶。君好讀書、而著述甚少。嘗爲不食牛說曰、不食牛肉、今人概指爲釋氏之說、不知先王之道、常人皆不得食、即有位者亦不易得食也。禮王制曰、諸侯無故不殺牛。玉藻曰、君無故不殺牛、亦謂諸侯也。故謂祭祀及賓客饗食之類、平日所食惟豕、朔月加以羊。玉藻所謂朝服以食、特牲三俎、朔月少牢五俎四簋是也。天子之大夫與諸侯同、外此惟孤卿祀以特牛、大夫雖祭祀、不得以牛、惟用少牢、祇以盛葬奠之故、加一等。雜記所謂卒哭成事、祔皆太牢是也。士祭並不得用少牢、惟以特牲。庶人則魚殮之薦而已。大



夫士助祭於公、頒祭肉、或得食牛。公食大夫及大夫爲聘使者、士爲介、主國饋餼、或得食牛。天子耕籍田、庶人終于千畝。王歆太牢、班管之。庶人終食、或得食牛。周禮牛人、軍事共其犒牛。此行兵之禮、非常法。然亦當犒而後犒也。舍此數者、皆無從得食。且所謂牛者、豢于犒筴、監門養之、非耕牛也。即求牛索牛、亦非耕牛也。耕牛不殺、律令自有明文。今人屠牛列肆、漫無顧忌、是天子所用之大牲、庶民以爲常膳、天子所不食之耕牛、而庶民食之、其悖禮害義甚矣。反謂不食牛肉、惟浮屠之說爲然、不亦僥乎。即有不食者、亦多爲因果之故、而不知先王之道、本不得食也。又爲四豆約曰、昔費制軍刻譚少司寇五簋約、將以變化風俗也、其意良善。惜考之不精、而卒不能行也。蓋簋是盛黍稷之器、若盛餽饌者、止可謂之豆。爾雅木豆謂之豆、竹豆謂之籩、瓦豆謂之登。今之碗碟、皆登類也。借名曰豆、自可、豈可謂之簋乎。又所謂五簋者、亦殊有辨。詩曰、於我乎、每食四簋。又曰、陳饋



八簋。玉藻曰：諸侯朔日四簋。易曰：曷之用。二簋可用享。公食大夫禮。上大  
夫八簋。下大夫六簋。周禮掌客：簋十有二，皆以耦。數言之。所謂鼎俎奇而  
豆偶也。夫學者之於聖經，猶居官者之於律令也。當群言龐雜之時，徵  
之經則定矣。考之禮，牛羊豕爲太牢，惟天子得用之。羊豕爲少牢，諸侯大  
夫得用之。若士，則惟用豕。以士之吉禮言之，士昏禮陳三鼎於寢門外，豚  
一、魚一、腊一。其豆則醢醢二豆、菹醢四豆。此皆吉期所用。若納吉、納徵，則  
脯醢而已。脯以菹醢，以豆。士冠禮脯醢，鄉飲酒禮脯醢。今人尋常宴會皆  
用八豆，是行上大夫之禮矣。若有喜慶，則用十豆，是駕上大夫而上之矣。  
況所謂庶羞者，又不止葵菹羸醢之謂耶。夫古今時地雖殊，人心則一。試  
熟味論語與其奢也寧儉之語，及檀弓國奢示儉之說，可以行禮矣。今約  
有喜慶事，則用士昏禮醢醢二豆、菹醢四豆之例。若尋常親朋聚會，則用  
鄉飲脯醢之例。若欲增加，則以四豆爲斷，不可再增。蓋少牢賓尸，簋豆不

過四也。皆根據禮經、無鑿空之談。君之弟子劉君楚楨於君卒後致書於余曰：吾師操履篤實，不欲以文辭見，所作多不存稿。此其錄板以勸俗者爾。今檢敝篋，僅存此稿，雖不足以盡吾師之學，然其矜細行、慎小物與殷勤牖俗之意，即此亦可窺見一二。大懼湮沒，並此無傳，乞錄而存之。余慨末俗澆漓，士一登仕籍，感大吏之知，樂其勢位，有所沾丐，執弟子之禮甚謹，甘冒明禁而不恤。至少小所從受業者，發蒙振瞶，具有啟迪教誨之德，非薦舉一日之知比也。願忘其所自，不復省識，甚至反脣相稽，以所學蓋其師。今楚楨于其師之遺文寸楮片札，猶珍惜保護若此，可不謂賢乎哉。楚楨每爲余道君之學行，余心儀久矣。歲甲申，君存楚楨于儀徵，道過郡城，猥辱先施，得陪几杖。君儀狀古樸，言詞簡拙，清粹之氣益然流露，望而知爲讀書好道之君子也。別甫一載，君以疾考終於家。楚楨既銘君墓，復具狀踵謁作傳。余嘉楚楨不忘其師，又與君有一日之雅，故義不獲辭，爰

述其崖略俾後之纂邑乘者有所考焉。

按楚楨所撰墓表云卒年五十五。先生所撰傳則云年踰六十。

是年方申母卒方申以行狀屬先生作傳。青集卷八方節母家傳

方申傳詳道光二十五年。

七年丁亥 三十九歲

是年戴清靜齋卒年六十六。青集卷八戴靜齋先生傳

是年與薛子韻、柳賓叔、包孟開等校包季懷所著詩禮徵文。

按包慎伯所撰詩禮徵文序藝舟雙楫卷二云今年春撰集遺書檢得致仲虞書稿有曰學詩八年自謂有得奮然欲述詩禮原鄭一書今編次粗就殊不足發明鄭氏僅徵舊文供制舉家撫拾而已覆閱之令人慚慙而家伯氏以爲不可焚棄俟異日之刪定足下若見此稿本殆當鄙夷不以齒於吾黨也。蓋季懷之深於詩而不自滿假者有如此。然孟



瞻孟開反覆其書、僉謂援引淹通、實足導來學之前路。故原季懷本意、名之曰詩禮徵文、先校而梓之。其藁草紛糾、鉤勒拉雜、間有繁複待芟、統類未一之處、則子韻孟瞻、賓叔孟開共有事焉。仲虞遠在旌德、相距且千里、將來郵寄成書、如指摘疵類、當更正者、削楮以從、固季懷之意也。道光七年六月十九日、從父兄世臣書。

舅氏凌曉樓臥病董子祠、先生代授陳立學。

按、自撰句溪雜著序、青集卷六云、乙酉春、先舅氏復家居、閉戶著述、精公羊春秋、兼通鄭氏禮。卓人復從受經、飫聞緒論、斐然有著述之志。洎先舅氏臥病董子祠中、令卓人問字於余。余學殖荒落、於先舅氏無所肖似。而公羊禮服之學、卓人蚤得其傳。

陳立字卓人、又字默齋、江蘇句容人。道光辛丑成進士、由庶吉士改刑部主事。累官雲南曲靖府知府。梅蘊生授以詩古文詞、曉樓孟瞻授以

公羊春秋、許氏說文、鄭氏禮。著有公羊義疏七十六卷、爾雅舊注、白虎通疏證、說文諧聲孳生述、句溪雜著各若干卷。生於嘉慶十四年五月二十一日、卒於同治八年、年六十一。續碑傳集卷七十四有傳。

八年戊子 四十歲

六月、梅蘊生爲先生父撰劉琢齋先生八十壽序。嵇庵文集卷二序云、劉君孟瞻與余同里、年長於余、學粹而品醇。余嘗以文藝請益、因得拜其尊人琢齋先生而聞其懿行。先生少孤貧、棄儒業醫、精經脈藥石之術。雖資醫爲生、而不與市醫爭利。鄉人之患疾瀕危者、日盈其門。先生惟疾是視而意無他、故技日益精、活人益衆而無補於貧人。或爲先生勸曰、以公之術、稍涉於利、將豐其家而逸其身、無難也。先生笑謝之。孟瞻生而聰慧、穎悟過人。先生自悔失學、督課甚嚴。孟瞻及冠、博通經籍、游學宮、試高等、以學行受知督學湯公、貢太學、得以束修校書。





之資養其親而先生益頽然老矣。余與孟瞻遊，每晨夕登堂親杖履，見其色愉如也，聽其言藹如也。古所稱篤行君子，託小道以隱其名者，殆先生其人耶。然後知孟瞻植學敦品之由，皆效於其親者然也。由是觀之，天之畀吉人者，常出世人耳目之外，而其人之得天厚者，其存心尤非世人所及窺。夫以先生之遇之窮而術之善，倘與流俗爭短長之利，吾未見其無所得。而天之所以康強其身，以畀其子孫者，或有所靳焉。人有以一行之善而蒙其福，鄉黨且艷稱之。矧夫陰行其德哉。然則天之報先生者，豈有量也。先生以今年夏六月爲八十誕辰，孟瞻將先期爲壽，命余屬文。謹就素所聞見者言之，以侑觴焉。

秋與友人梅蘊生、劉楚楨、包孟開、薛子韻、柳賓叔、門人陳卓人等偕赴金陵，同寓應試，不第。

按：嵇庵集卷五步孟瞻別號舍詩元韻自注云：戊子省試，余與孟瞻、楚

楨、孟開同寓。

至是始與楚楨等爲約各治一經、加以疏證。先生任左傳、楚楨任論語、陳立任公羊。

按陳卓人序論語正義云、道光戊子秋、立隨劉孟瞻、梅蘊生兩師、劉楚楨、包孟開兩先生赴鄉闈。孟瞻師、楚楨先生病十三經舊疏多踳駁、欲仿江氏孫氏尙書、邵氏郝氏爾雅、焦氏孟子、別作疏義。孟瞻師任左氏傳、楚楨先生任論語、而以公羊屬立。

又按劉恭冕撰論語正義後序云、及道光戊子、先君子應省試、與儀徵劉先生文淇、江都梅先生植之、涇包先生慎言、丹徒柳先生與恩、句容陳丈立始爲約各治一經、加以疏證。先君子發策得論語。

試後與子韻、孟開、賓叔等游金焦山。

按嵇庵集卷四哀二友詩自注云、戊子秋試後、子韻及孟開、孟瞻、賓叔



儒藏

劉孟瞻先生年譜 卷上

游金焦山余以病足先歸。

因楚楨有疾得與其族人劉鞏又曾相識。

按自撰直隸州州判劉君墓表青集卷九云戊子余與君叔楚楨同寓金陵君來視楚楨疾乃得相見又曾傳詳道光十八年。

冬汪小城疾篤先生面訂兒女締婚之約以慰其意。

按亡妻汪孺人墓志銘通集卷六云道光戊子冬小城先生疾篤以孺人姻事未定爲念先君遂面訂締婚之約以慰其意包慎伯先生特書於小城先生墓碑。

又按清故文學汪君之碑藝舟雙楫卷四云君娶於母黨生一女而歿君葬之西郊金匱山君甚愛其女孟瞻有子毓崧岐秀善讀書君雅屬意孟瞻故知之及君之亟也告和求爲其子婦君聞而笑曰孟瞻厚我憐我而及我女耶。

十二月十日汪小城卒年三十五。撰文學汪君傳。青集卷八

傳云君姓汪氏諱穀字小城其先歙人六世祖國儒遷於揚州曾祖諱煒祖諱詩伯韜光抱璞隱德勿耀父諱錚始隸籍儀徵以歲貢生中式嘉慶六年舉人揀選知縣績學敦品鄉黨矜式君資性淳篤天才卓犖甫冠補縣學生赴省試者三既不遇復以疾遂棄舉子業疾八年而卒時道光八年十二月十日也得年三十有五君齒稚于余五歲所居至近然自丙子歲始於薛子韻所相識君潛心經籍鑽研甚勤其爲文儻傑廉悍力追古人顧不以予爲不材每削稿即就點勘又常以經義質問反復辨論無忤容倦色家至貧恃館穀爲生其發篋誦讀也恒於夜呶唔之聲率達旦遂以此得咯血疾友朋勸其小輟君諾之然少間仍誦讀如故君素工書求者頗夥及見涇包慎伯先生授以筆法遂肆力北朝碑刻一變妍媚之習時好者轉嗤笑之而君信之愈篤其勇于遷善不恤人言類如此又好與



地之學、于歷朝地志諸書、鉤稽同異、辨析源流、手寫爲圖、瞭如指掌。當食、猶以手指畫形勢。稍有不明晰者、吐哺執卷、詣友人審問、必得其通而後已。今世有科舉速化之學、皆以通經學古爲迂。君以羸弱之身、又久不與試事、此豈有所爲而爲之。顧好之如此、其篤也。君天性孝友、生平無子弟之過。雖抱沈疴、猶力疾授徒、以束修所入潔白養母。然家無僮僕、病中所需藥餌、皆母氏躬治之。君以是自疚、而疾日增劇。及疾革、顧謂諸弟、惟以久病累母爲恨。然則君固以勤學死、而所處之境、又足以促其死焉。重可哀已。君慎交而誼最篤、同儕有所不得、君苟知之、雖力不能助、然必代爲之謀、得則喜、否則惆悵累日。忽忽若有所失。身死之後、親故無所訾議、弔哭皆哀。夫以君之行義學術、無愧前修。使天假之年、其所造必不止此。必將有以自見于世。而奄遘痼疾、綿歷歲時、病中著述多未成書、中道殂謝、有志未就。古人所爲太息于非特無所遇於今、又將無所傳于後、而重致

傷悼於命之不可知也耶。余既恨識君之晚，重以杜門養病，罕能極友朋晤語之樂。父深悲君資志以歿，車過腹痛，不能已于言，而尤恐余言之不足重君也。嗣子寅壽雖在襁褓，然岐嶷有知識，他日能讀父書而聞君未竟之業，庶幾君之祉有所施已。

九年己丑 四十一歲

五月二十六日，舅氏凌曉樓卒，年五十五。藝舟雙楫卷四國子監生凌君墓表，先生攜其子鏞歸，而仍延方申端齋課讀。

按文學方君傳青集卷八云：余舅氏凌曉樓重其爲人，命其子鏞師事之。道光己丑，舅氏卒。時鏞方八歲，余攜之歸，而仍延君課鏞讀。方申傳詳道光二十五年。

八月八日，先生附曉樓於祖墓，與配范氏合封，以表墓之文屬包慎伯。

按國子監生凌君墓表藝舟雙楫卷四云：君繼患風痺，養病於董子祠。





之南偏道院，遂以道光九年五月二十六日卒於寓廬，年五十五。鋪雖始戲，哀慕如成人。劉君卜以是年八月八日，祔君於雙墩北原之祖墓，與范氏合封，又圖所以不朽者以屬予。

八月二十日，薛子韻卒於福建督學使者內閣學士新建陳用光汀州校士行署，年四十一。藝舟雙楫卷四清故文學薛君之碑。

按先生所撰文學薛君墓志銘，青集卷十云：卒年四十二。梅蘊生作五君詠，嵇庵集卷三以齒爲序，以戴蔚華爲首，次薛子韻，次孟瞻先生，次劉楚楨，次王西御。丁儉卿撰薛子韻傳，願志齋文鈔亦云：卒年四十二。以子韻之歲爲多於孟瞻先生。然包慎伯所撰清故文學薛君之碑作卒年四十一，清史列傳卷六十九亦同。按念樓外集卷一秋日偕薛子韻傳，均劉孟瞻文，洪楊季子亮泛湖上有作自注云：是日子韻三十初度，而此詩爲楚楨三十以前之作。楚楨三十，恰值嘉慶二十五年，若以

子韻卒年爲四十二，則其三十初度固嘉慶二十二年，是楚楨莅揚之前年也。故知其三十初度在嘉慶二十三年。然子韻與先生相若，即子韻卒年四十一也，未知孰是。

薛子韻喪至自閩，先生檢遺篋，得閩游草一卷、文選古字通疏證十二卷等書，與楚楨、孟開約纂輯繕副，以付其家。

按：故清文學薛君之碑，藝舟雙楫卷四云：陳公慎於殯之禮，留疏證六

卷

按：即子韻所著說文答問疏證。

稿本，而遣使護喪歸揚州，厚資其葬。儀徵劉文淇、孟

瞻檢遺篋，得舊讀十三經本，集錄其丹黃手勘之語，約可廿卷。文選古

字通疏義

刻本作疏證

十二卷，草創未卒業。孟瞻與寶應劉寶楠、楚楨、子族

子孟開約纂輯繕副，以付其家。云：道光二十年，先生刻文選古字通疏證。二十六年，刻閩遊草。

十一月庚戌，祭薛子韻，撰祭文。青集卷十



儒藏

劉孟瞻先生年譜 卷上

祭文云、維道光九年歲次己丑十一月庚戌、謹以清酌庶羞之奠、致祭於文學薛君子韻之靈。嗚乎。如君之學、江淮所少、如何命蹇、含光弗耀。如君之年、存者實多、而遽歿、謝、傷哉。則那。君之嗜學、如蟻慕羶、少喜駢儷、玉溪樊川、及宗許鄭、鉛華盡捐、爲學日益、執心愈下。訥訥不出、世無知者。命宮磨竭、少樂多憂、憂無可告、傷哉。遠遊。矯矯陳公、士林之表。君參蓮幕、推襟送抱、說甘於肉、欽爲國寶。君感其遇、襄校盡誠。凡試古學、君爲之程、傳抄紙貴。閩嶠知名。與君厚者、方爲君喜。謂君生平得一知己、如何奄忽。遽聞君死。古人有言、名者公器、慎毋多取、爲天所忌。君不近名、名亦未廣。胡爲天忌、遽歸泉壤。某等投分、迴異等倫。淡而彌旨、久而益親。憶昔餞君、慘不忍別。千端萬緒、莫可言說。繼念歸期、約略三載。合併有時、愁顏少解。詎知此別、遂成永阻。凶問乍來、泣涕如雨。亦有同志、赴試海陵。途人奔告、行哭失聲。旅櫬言歸、家童護奠。孤舟單旆、魂魄猶戀。君之遺書、閩中已刻。更謀

不朽刊詞伐石。嗚乎哀哉。賦才則豐。賦命何薄。百緣未了。斃斃焉託。嗚乎哀哉。入君之戶。不見容儀。有肴在筵。有酒盈卮。平生不忘。神其來思。嗚乎哀哉。尙饗。

十年庚寅 四十二歲

是年與沈欽韓有書往復。

按幼學堂文稿卷七與劉孟瞻書云孟瞻足下惠書拳拳雅意勤屬死灰欲然不佞少壯時亦欲希風竹帛並角英俊既伏處家巷遂爾闊絕及來窮山如入蠻左似人者喜思與足下及慎伯諸君宏度高論揚推古今發揮經史莊諧雜陳引觴稱快何可得乎近日工夫想益茂密承云讀通鑑第二過猶不能記憶益歎歷甘苦不欺人之學也但熟復而深思之總其治亂興亡賢姦消長之故究溫公平日言不用而身退發憤爲此翼人君感悟之大旨神宗置此書于睿思殿朝夕省覽追思安石之誤有意用公與呂晦叔次則



備藏

參究形勢、戰勝攻取之術、又觀其刪潤史文、光景一新、可以通達事理。若遺文軼事、姓名瑣瑣、雖撰述者猶不能枚舉前輩、適夸記聞之敏而已、非通人所尚也。新舊唐書異同優劣、不佞亦頗多疏記、不暇卒業。大約舊書之長、能謹守史館之成書、自開成以溯開元、歷代通才碩學所修撰、文順辭達、有聲有色、本無庸改作。宋子京妄人、乃欲以箴劄小材、破碎鉅製、涂抹青紅、顛倒錦褐、蜚喉刺眼、彌形醜拙、遂使詔誥之文無一完備、奏疏之條有網無目、刺取小說、墨一漏萬、此不足論矣。歐陽後入史局、歷志成於劉義叟、世系表假于呂夏卿、洵有可觀。他則疎謬難數矣。禮志起訖、咨嗟歎息、中取開元儀注填塞、于沿革制度、儒官疏議、皆芟落無存。藉非通典、會要、冊府元龜諸禮部及舊禮儀志、粲然備列、得以稽考、不幾盲聾學者之耳目乎。選舉、百官、凌躡倒置、如開元禮、三禮諸科、吏部、兵部、常調、齋郎、冬薦之制、俱不叙。侍中、中書、令、本、正、三品、爲



兩省長官。故以他官參預機務者。謂之同中書門下三品。大歷以後。始升爲二品。新志直云二品。則前此制度不幾紊乎。諫議大夫與給事舍人並正五品上。大歷二年。中書門下侍郎並升正三品。兩省遂無四品官。會昌二年。從牛僧孺等奏。升爲正四品下。新志直云中書門下侍郎正三品。諫議大夫正四品下。又十六衛本無上將軍。舊志于十六衛惟列大將軍。而于後總舉貞元二年九月添設之勅。史家體例之慎也。新志直冠上將軍從二品于大將軍上。新志叙左春坊庶子云。凡令書下。則與中允司議郎等畫諾。考六典云。凡令書下于左春坊。則與中允司議郎等覆啟以畫諾。亦猶門下省覆奏然後畫可也。會要貞觀十九年。詔皇太子。凡處分論事之書。太子並畫諾。左右庶子以下著姓名奉行。則畫諾者皇太子。非庶子等官。玉海亦承新志之誤。食貨志云。凡授田者。丁歲輸粟二斛。稻三斛。謂之租。丁隨鄉所出。歲輸絹二匹。綾絁二丈。



布加五之一、綿三兩、麻三斤。非蠶鄉則輸銀十四兩。謂之調。按通典、會要、陸宣公奏議、舊唐志並云、凡授田者、丁歲輸粟二石、謂之租。丁則隨鄉所出、歲輸絹、絕綾各二丈、布加五分之一、綿三兩、輸布者麻三斤、謂之調。通典所言尤爲明了。云絹、絕各二丈、布則則二丈五尺、輸絹、絕者綿三兩、輸布者麻三斤。此即有蠶之鄉、或絹、或絕、每家只取二丈及三兩、綿也。新志混而一之。馬端臨疑爲太重。今細尋其意、不過謂無粟者以稻三石當粟二石、無絹、絕者以麻布當絹、絕。修不顧體例、掉弄筆端、使人不辨耳。其云非蠶鄉輸銀十四兩、攷唐制錢不踰嶺而南、銀不用嶺以北、或蠻、侏所出、妄爲附益。其敘鹽課錢法、尤雜亂無次。若無冊府等書相證、不能得其頭緒。爲良史黷沽如此。緣歐陽少習詩賦、本無學術。中從尹師魯學古文、目短視、性不耐記誦、見聞不及二劉之半、故試手多舛。足下猶以史筆謹嚴推之、未免震秦之餘威也。竊以爲一代信



史、先務明白詳贍、而後求其文章議論。故三長不可缺一、尤不宜付諸  
文士之手。彼欲借題馳聘、則如歐宋之弊、反不若拙者之謹守故紙也。  
舊唐紀雖病其煩、然元和以後、號令文章、粲若星羅、以視新紀、其有無  
孰輕孰重乎。不佞十餘年來、得失自知、所恨不能歷算、至此輒憤憤、其  
他事理、皆能根究。所著漢書疏證、左傳補注、水經注疏證、昌黎、半山二  
集注、三國志補注、范石湖集注、駁王施查三家蘇詩注、皆攻故記之謬、  
發新聞之秘、非好與昔人索鬪也。理之所在耳。大著容破一月之功、爲  
足下贊述。尊舅爲劉逢祿輩所誤、溺于公羊、獨足下餘波不染、誠爲卓  
犖。稍有異同、不妨相參。全唐文佇望裝訂、賜觀即隨孟開去、繳價。夏秋  
暑濕、一家瘡疥、苦毒萬狀、浸淫及老夫矣。惟以時珍重、不盡區區。  
按先生與沈欽韓第一書、文集未收。

先生復書論左氏杜注、並屬爲舅氏曉樓所撰公羊禮疏作序。

按與沈小宛先生書青集卷三云小宛先生閣下文淇驚鈍無似于學問之途未窺涯涘。然側聞先生緒論及拳拳誘掖之盛心稍知感奮不敢自棄。前歲得尊箸左傳補注已錄副本披尋再四竊歎左氏之義爲杜征南剝蝕已久先生披雲撥霧令從學之士復覩白日其功盛矣。覆勘杜注眞覺痼痼橫生其稍可觀覽者皆是賈服舊說洪稚存太史左傳詁一書於杜氏勦襲賈服者條舉件繫杜氏已莫能掩其醜然猶苦未全。文淇檢閱韋昭國語注其爲杜氏所襲取者正復不少。夫韋氏注除自出己意者餘皆賈服鄭唐舊說杜氏掩取贗證頗多竊不自量思爲左氏疏證取左氏原文依次排比先取賈服鄭君之注疏通證明。凡杜氏所排擊者糾正之所勦襲者表明之其襲用韋氏者亦一一疏記。他如五經異義所載杜氏說皆本左氏先師說文所引左傳亦是古文家說。漢書五行志所載劉子駿說皆左氏一家之學。又如周禮禮記疏



所引左傳注、不載姓名而與杜注異者、亦是賈服舊說。凡若此者、皆以爲注而爲之申明。疏中所載、尊著十取其六。其顧惠補注及王懷祖、王伯申、焦理堂諸君子、說有可采、咸與登列。皆顯其姓氏、以矯元凱、冲遠襲取之失。末始下以己意、定其從違。至若左氏之例異於公穀、賈服間以公穀之例釋左傳、是自開其罅隙、與人以可攻。至春秋釋例一書、爲杜氏臆說、更無論矣。文淇所爲疏證、專釋詁訓名物典章、而不言例。其左氏凡例另爲一表、皆以左氏之例釋左氏。其不知者、概從闕如。杜氏以經訓飾其奸邪、惠定宇微發其端。焦里堂六經補疏、以杜氏爲成濟一流、不爲無見。然以杜氏之妄並誣及左氏、則太謬矣。近今爲左氏之學、未有踰先生者。文淇鑽仰有年、草稿粗就、期以十年之功、或可成此。但學識擿昧、尙希有以教之。至新舊唐書考證、向亦粗具條目。垂諭殷殷、敢不黽勉。俟左傳卒業、即肆力爲之。先舅氏曉樓先生所著書、最精

者莫如公羊禮疏、誠如來教所云。但此書博引舊說、無所引申、恐後人有襲取之者。極知先生不喜公羊、然先舅氏一生勤學、非先生孰表章之。倘能賜序一篇、幸甚。伏乞鑒察、不宣。

按此書云先舅氏曉樓卒在道光九年五月二十六日、而沈小宛則卒在道光十一年十二月二十日、故以此書繫諸是歲。

十一年辛卯 四十三歲

秋與楚楨應試赴金陵、不第。因賦別號舍詩、以示楚楨。青集卷十一

別號舍并序云、辛卯秋賦與楚楨同寓金陵、計前後省試已十一次、與楚楨同寓亦五次矣。相約此後閉戶著書、不復應舉。因仿陳亦韓先生作別號舍詩、索楚楨同作、以堅其約。

四十年華轉瞬間、秋風廿載鬢先斑。名山自有千秋業、從此歸來只閉關。壯歲齊名說二劉、白門同載幾經秋。知君亦自甘樗散、好向江湖覓釣舟。



陳亦韓名祖范、亦韓其字、又字見復、江蘇常熟人。康熙十五年五月二十日生、乾隆十九年卒、年七十九。著有經咫一卷、掌錄二卷、文集四卷、詩集四卷。名陳司業集、以其晚年見授國子監司業故也。國朝先正事略卷三十三有傳。按文集卷四自序云、至四十八遇改元恩科、夏舉於鄉、秋貢於禮部。鄉先達有欲翼而起之者、足忽蹇、不與殿試、遂歸。明年爲甲辰正科、私自揣念、年力向衰、才智無敢當、途豈須一我、而必支離巖其間哉。本無溫飽之心、徒自勞苦、奚爲者。咄休矣。勸行者苦口、大都謂浮圖將合尖、泛海已傍岸、豈有止理。予曰、及今尚可止、過此則義不當止、勢又不得自止。既已拒外論、堅持己意、於是似履華匪之濱、混迹耕漁、新舊生徒、裹糧相從、吟社諸先翁、月一譙集。又詩集卷二聞報後作云、詰朝多士慶彈冠、鷗鵬同時揮羽翰。我爲昔年頻別足、天衢學步尙盤跚。時有足疾。登科好語口流涎、劣得親嘗味淡然。祇爲素無溫飽志、翻



愁身世更牽纏。失莫憂思得莫歡。世途無水自波瀾。陳郎面目元如故，  
不受時人洗眼看。又出都是日。殿試云題名浪逐看花伴。去國還同落  
第人。辛苦爲山功欠簣。歡欣對酒味沾脣。禁廷清切延多士。寒柳飄蕭  
送病身。到處雲泉吾有分。觚棱回首在高旻。先生仿陳亦韓作別號舍  
詩義可見矣。

按青集卷十一附載劉寶楠孫應科柳興宗諸人和章楚楨之作與念  
樓集卷三所載小異。

念樓集卷三辛卯九月同孟瞻應省試孟瞻作別號舍詩見贈依韻奉  
酬云壯歲聲華伯仲間。蕭蕭都見鬢毛斑。十年贏得頭銜在。收拾殘書  
返故關。時將望天涯王粲竟依劉。時應江叢菊花開兩地秋。遲我湖  
干垂釣處。夕陽亭畔弄珠舟。孟瞻買田北湖相約村居此志今猶耿耿

孫應科和作青集卷十一云見孟瞻楚楨別號舍詩有感於中因步其



儒藏

劉孟瞻先生年譜 卷上

韻幽情久付白雲間。十二年中鬢更斑。慣說不來今又到，只因無計掩柴關。余壬午省試後作詩云：除是兒曹能接武，一鞭重指白門山。生平敢說氣吞劉，江上相逢又暮秋。老我尙餘豪興在，海天同泛釣鰲舟。

按再續高郵州志卷四人物志云：孫應科字研芝，廩貢生。壯年折右肱，猶復鈔錄不輟，遂於經學。其所輯四書說苑，足與其先世易宗集註、檀弓論文並傳。嘗榜其居曰書窩。暮年寓居寶應。縣治南有八寶亭久圯，應科掘得舊碑，募貲重建。著有半吾堂文鈔，又輯孫氏事蹟遺詩爲猶存集。

柳與宗和作青集卷十一云：辛卯鄉試改期九月，余有疾未赴。孟瞻以別號舍詩寄示，爰仿楊雄反離騷之例，作憶號舍詩答之。即次原韻。廣厦新修千萬間，去歲新修號舍。輶車絡繹走斑斑。險余已屬七科謫，余自丙子至戊子應省試已七次。風雨蕭條臥故關。無端二豎若虔劉，辜負闌場九月秋。羨爾雄

文光射斗良宵應夢日邊舟。

十二月二十日沈欽韓卒年五十七。藝舟雙楫卷四皇清敕授修職郎安徽寧國縣學訓導沈君行狀

是年撰文學薛君墓志銘。青集卷十

銘云君諱傳均字子韻揚州甘泉人。予與君同居郡城父以嘉慶丁卯同補博士弟子同肄業梅花書院師事欽洪桐先生相善也。先生藏書至富、獎掖後進無不至。側聞緒論始自慚聞見舛陋相勉爲根柢之學、遂相約購書。積三載各得書五七千卷、有無相假閱是非相質難者且十年。君既博覽羣籍強記精識於十三經注疏及資治通鑑功力尤深、凡反覆十數過、注疏本手自校勘發明毛鄭賈服之說、其魏晉諸儒不守師法者概置焉。讀史則研究治亂得失之故於遺聞瑣事亦記誦靡遺、而大端尤在小學、于許君原書鉤稽貫串洞其義而熟其辭。近今小學家推嘉定錢氏大



所及其從子站、金壇段氏玉裁。君謂段氏時雜臆說，錢氏較精審。大錢文集內有說文答問一卷，深明通轉假借之義。君博引經史以證之，成說文答問疏證六卷。又嘗以文選中多古字，條舉件繁，疏通證明，爲文選古字疏通義一書。甫草創，未就卷第。予每研藝，至偏旁疑似、音韻傳訛者，必以質之君。君廣引證佐，隨方曉答，檢書探核，悉如所言。蓋君之肆力而深於古，先所成疏證錢氏之書，乃其一孔，而非君學之盛也。君沈潛而謙退，不以所能自衒。十赴省試，輒報罷。歲科試亦屢抑，鄉人鮮有知君者，而好學之志未嘗少挫。君嘗語余曰：富貴不敢期，但使有暇讀書，則願足矣。蓋聞造物之篤材也，常有所偏，至是以優于遇者，絀于學。老師宿儒常靳之祿利之途，然至如君之恬淡，求布衣蔬食終其身，以盡心于學，而亦卒不可得，則又何故哉？君家素裕，自君之知讀書也，忽中落，藉授讀以餬口。童蒙十餘人，環坐斗室，率頑劣，呶呶呌耳騷心。君抱書危坐，丹鉛不去手。至生

計日迫、無以給俯仰、乃就學使者聘、遠遊福建。府主閣學新城陳公用光好善而重士、見君所著說文答問疏說證、恨得君之晚、以質制軍金匱孫公爾準、孫公歎爲絕作、亟令小史錄副。嗣按臨汀州、君猝感熱疾、卒于試院。實道光九年八月二十日也。得年四十有二。閣學厚殯之、遣使護其喪歸、而留疏證稿本、板行閩中、將以還朝時過揚、授其孤孝釗。嗚呼。君素性閒曠、依人非其所樂。以處境爲生人極艱、始決絕去鄉里。然所學既見知于府主、而閩中賢士大夫交相引重、是宜有以稍發舒其志意、而鬱抑恒不自得。半歲中所得寄示詩辭、大都酸惻愴楚、余固已悲君之意氣早衰、而卒不意其遽至奄忽也。傷己然。君之家居墨墨、無以自見、其厚君者、又皆困躓無聊賴、不足以張君之學、而躁進之士每笑其迂拙、或至相引以爲戒。君即老死牖下、誰爲傳其書而信其學乎。則其可悼痛、更何如耶。君之喪至自閩、同人旣乞涇縣包君爲表墓之文、于學行世系具詳、余故叙

述交遊之舊與君之鬱鬱無可告者納諸幽以志余痛銘曰  
已矣子韻復何言賤近貴遠信前論身既歿矣名則存

按此墓銘志云閣學厚殯之遣使護其喪歸而留疏證校本板行閩中  
將以還朝時過揚授其孤孝釗而陳閣學序說文答問疏證有道光十  
一年八月既望之語按清史列傳卷三十四陳用光傳云道光八年八  
月提督福建學政十一年升禮部右侍郎則其過揚當在此年故以撰  
此墓志繫諸此歲

十二年壬辰 四十四歲

二月十八日岳父黃紹堯卒年六十一通集卷六外祖黃公家傳

春爲子毓松行納徵之禮通集卷六亡妻汪孺人墓志銘

秋因父琢齋有微疾不能赴試主考湯相國深爲惋惜

按先考行略通集卷六云道光壬辰湯相國三典江南鄉試亟欲得先



備藏



考卷以式多士。而是歲因先祖微疾，未能赴試。撤闈後，相國廉知其故，深爲惋惜。

疊別號舍詩舊韻。

疊別號舍詩舊韻并序青集卷十一云：壬辰秋，湯敦甫師復主試江南，凡三次矣。文淇以故未赴，因疊前韻藉述鄙懷。

風木悲深醉夢間。壬午，以錄遺故，赴金陵稍早。八月朔，驚聞先妣病耗，星夜奔歸，僅得視含殮。一經追憶淚痕

斑。鮮民十載傷心事，得失雞蟲了不關。

賦成六合不啗劉，爲我驚心落葉秋。每江南榜出，師聞洪被落，輒逢人道屈。此際桂堂勞摸

索，那知未買秣陵舟。

梅蘊生和作青集卷十一云：步孟瞻別號舍詩原韻。回首風簷幾萬間，

到來七度鬢將斑。虛名未得親先逝，不獨窮愁坐掩關。記曾儼屋與包

劉，忽漫分襟幾處秋。戊子省試，余與孟瞻、楚植、孟開同寓。辛卯，余丁外艱，孟開亦丁內艱，返里，惟孟瞻、楚植偕行。今年，楚

楨游幕皖江、抱疾未入場。天意蒼茫人事幻、對君心似泛虛舟。

孟瞻以尊人微恙不赴試。

按、嵇庵集 卷五所載和作與之小異。青集所收稍詳、故載于此。

閏九月、作送楚楨游保定詩。并序 青集卷十一

康熙乾隆間、揚郡先達如喬石林侍讀、孫邃人刑部、皆以爭河事、與當道忤、直聲振天下。近今河事亟於往時、楚楨每言及、輒慨憤不已。茲將就館保定、下屆甲午、就近應京兆試。於其行也、詩以餞之。質俚無文、惟期楚楨異日居得言之位、抒建白之志爾。時道光壬辰閏九月也。

自昔繁華地、冠裳雜還投。誰令恒產薄、翻作旅人謀。況復金隄決、真同澤

水流。

今歲八月二十一日、龍窩汎決、隄全黃入湖。

蒼生求奠定、草野敢忘憂。

欲別心難已、將行首重回。典型鄉袞遠、氣節布衣培。試挾陳琳筆、先登郭隗臺。終期致身日、莫忘澤鴻哀。

冬、撰楚楨江淮泛宅圖序。青集卷四



儒藏

劉孟瞻先生年譜 卷上

序云、吾友寶應劉君楚楨就館郡城、於嘉慶戊寅攜家來揚。道光壬午、還寶應。癸未、遷儀徵。丙戌、又由儀徵遷揚。九年之間、凡四遷。此江淮泛宅圖所爲作也。圖成、即屬余序。余諾之而未果作。壬辰冬、楚楨復攜家歸寶應、而獨來郡城舍館他氏。屢責前諾、余不可無以應之也。余弱冠後、與里中薛子韻涇、縣包季懷、包孟開、旌德姚仲虞、丹徒柳賓叔、泛覽經史。楚楨因余得與諸君交、相與切磋、爲友朋之極樂。未幾而季懷子韻先後奄沒。仲虞、孟開、賓叔又各反里門。惟楚楨營客郡城中、間移家與余鄰者且七年、朝夕相見、兩人相資益者實多。楚楨與余約各治一經。楚楨占論語、余占左傳。以論語皇疏多涉清玄、邢疏更鄙陋無足觀、而何氏集解亦採擇未備。左傳賈服舊說爲杜氏所乾沒者不少。唐人又阿杜注而攻賈服、皆爲鮮當。因各爲二書疏證。蓋爲是約十餘年、而未有成書。過從時、嘗以是爲款。顧楚楨奔走長途、浮家南北、又身羸多疾、其作輟也有故。余自嘉慶庚



辰一遊京師、即杜門不出、無僕僕道途之勞、身又強健、而亦無所成就。且楚楨編輯論語之餘、已成寶應圖經、漢石例各若干卷、博而有要、好古者已傳抄其書、余則左傳之外別無事事、猶時作時輟、此則重余荒落之懼者也。楚楨既誣諉作序、余因述曩時之約如此。雖非圖中之意、其亦楚楨意所欲言而感歎不能自己者歟。

是年、撰圩岸公修議。青集卷二

議云、江都洲圩之田皆係公岸、公修、惟東南鄉霍家橋、馮家橋地方馬圩、柏圩、嵇圩、謝圩、汪圩等處、岸係公岸、修不公修。查每圩之田多則六七百畝、少亦四五百畝、業主不下數十家、佃戶不下數百人、而靠岸之田隨岸綿亘僅一二十畝。一圩之岸保護一圩之田、係是公岸、理應公修。乃勒令靠岸一畝之業主承修、而離岸一畝者遂得脫身事外、法既不平、工遂不固。每于大汎之時、一遇破圩、則圩內數百畝之業佃皆責令靠岸之業主

搶修而本圩佃戶不做本圩之岸、反代外圩做工、以便高索工價。所需木料或有未齊、衆口沸騰、拆人屋柱。事定之後、責令業主賠錢、人數則無可稽查、工賬則開銷任意。且大水之時、取土甚難、溝內撈泥、皆係溼土、施工水中、補塞罅漏、何能堅固。工尙未完、岸又倒卸、修理數次、終致不保。洎夫水退、打岸樁木旋即被人竊去、下年保險、又須買木。故以靠岸一畝之田、用錢自數十千至百數十千不等。其中藉岸索詐者、不一而足。爭端既啟、訟事滋多。有己岸倒塌、界址分明、而牽令未倒之岸認費者。有工作甫完、水尙未退、樁木被竊、岸旋崩壞、希圖另做者。有深知圩岸之害、創爲買田不買岸之說、現業原業均不承管者。有大汎猝至、城中業戶未及下鄉、而鄉中各戶浮開工料、業戶不認、彼此爭執者。更有刁頑佃戶、將寬厚之岸內外鑿削、毀岸爲田、冬春內外種麥、秋間內岸種豆、以致堤岸愈形單薄、大汎時、藉包工作、以飽慾壑者。現在圩岸爭訟之事已屬不少、本年盛漲、



無圩不破。水退之後，即要施工，方能種麥。而冲刷日久，施工更難。若不定章程，竊恐爭訟之事無已時也。細詢鄉中老農，該處圩岸向來亦係公修。嗣以江水不大，每年春作，工力無多，遂令靠岸之佃就近承修。而佃戶以靠岸之田有柴草之利，亦皆樂從。後以水大工多，佃戶力不能任，始令靠岸之業主貼修。有主食佃力之說。自道光五年以後，佃戶亦不承管，遂令業主獨修。即有向衆理論者，而地棍串同莊佃，百端把持，牢不可破，以致靠岸之田有情願不要價銀，只圖免害而無人肯受者。有願納官糧不收田租，不管港岸，而佃戶仍不肯者。夫小民至愚，見近利而忘遠害。田不靠岸者，但知不認修岸之費。田多岸少者，亦謂彼此牽算，就少避多。而莊佃更以浮開爲得計。及至圩岸不保，同歸于盡，所得不償所失，而狃于積習，尙恬然不知變計也。欲興利者，必先除害。此害不除，不獨靠岸之業戶受累無窮，而年年失收，錢糧亦無所出，必至官民交受其病。似宜官爲出



示諭令公岸公修、並飭知該處有業紳士秉公安議公修章程、稟官立案、以除積弊而安生業、是亦弭爭息訟之一道也。道光十二年謹議。

十三年癸巳 四十五歲

十二月三日、丁儉卿母劉氏卒、年七十九。青集卷十附監生丁君妻劉氏

墓志銘

按、夫人劉氏、江蘇山陽人。乾隆甲戌進士、麻城縣知縣希向女、同縣文學丁君琮之繼室也。有子三人、易、智、晏。女五人、孫六人、壽徵、壽昌皆縣學生。師曾、壽祺、閩師、壽辰俱幼。以道光十三年十二月初三日卒、壽七十有九。將以次年十月十三日祔葬於縣東盧家灘之原。

十四年甲午 四十六歲

秋、應試赴金陵、不第。

按、戲作別席號舍詩、再疊別號舍詩舊韻序。青集卷十一云、余自辛卯

場後作別號舍詩、壬辰秋未赴省試、復疊前韻。甲午、乙未、爲及門牽率、不能堅守舊約。

與丁小研同文酒之會、謀刊江都韋佩金所著詩文詞集二十六卷。

按、自撰經遺堂集序青集卷六云、先是甲午、乙未間、余與小研比部嘗同文酒之會、每言先生全集副本久藏笥中、行將付梓。未幾而比部遽歸道山、茲事遂輟。

按、光緒江都縣續志列傳、卷二十一丁元模字鴻度、號小研、道光五年順天舉人、官刑部雲南司郎中。無幾、以親老乞養歸里、卒年四十一。又按、夢陔堂文集卷十丙申中秋書載酒堂事、小研之卒在於道光十六年中秋。

按、重修揚州府志卷四十八云、韋佩金字書城、西山其號、江都人、乾隆四十三年進士。深於地理之學、所著多散佚、惟唐藩鎮考三卷猶存。先



生序其詩文詞集。

是年爲汪孟慈撰江都汪氏兩孝子祠記。青集卷二

記云周禮族師之職月吉則屬民而讀邦瀆書其孝弟睦姻有學者春秋祭醕亦如之。鄉大夫之職三年大比攷其德行道藝而興賢者能者以禮禮賓之而獻其書於王。內史貳之以詔王爵祿。蓋古者論秀書升之典始于鄉舉里選故曰使民興賢出使長之使民興能入使治之。然則成周盛時孝弟睦姻之士皆使之治民無待於表門建祠也。漢代賜孝弟爵而不任以民事其制已漸不若古。又褒之而爵亦弗及或表其門閭或賜以束帛其所以磨世勵俗者豈能及古人之萬一哉。然自選舉之法旣廢祿利之途不出于此而孝子悌弟史不絕書亦可見孝弟出于性生不盡繫乎有所勸勉。況自明代以來建祠於學令有司春秋祭祀其禮等於瞽宗之祭焉此其教孝之意抑亦視古人有加隆矣。吾友汪農部喜孫之祖皇贈



奉直大夫兆初先生諱一元、暨其族伯祖伯高先生諱一崧、皆以孝請旌、得旨旌表如例、而農部復於北來寺買僧隙地、建祠山麓、顏曰江都汪氏兩孝子祠、既與僧立刹、復呈請有司立案、俾汪氏子孫不得索回香火之資、寺僧亦不得毀傷祠宇、寺存與存、永永無極。或謂農部曰、吾子有位於朝、於禮得立家廟、且兩孝子既祠於學、何又於寺爲。農部瞿然曰、禮、君子將營宮室、宗廟爲先、居室爲後。唐王珪不立家廟、致爲有司所劾。顧予薄宦京師、家無一椽之宅、建廟且有待、而郡祠啟閉有時、子孫不能常往、吾族伯祖又無後、予異日即有力營建家廟、而族伯祖無享祀之所、吾先祖亦慨然有所不樂、是以別建斯祠也。嗚乎、禮之以義起者、聖人弗禁。若農部所言、亦惡得而禁之也哉。祠成於道光十四年、農部屬予爲記。予因循述古今教孝之典、與農部所以建祠之意、以諗後之謁斯祠者。

汪孟慈傳詳道光二十八年。

是年李彥章蘭卿訪士於包慎伯。慎伯以孟瞻及楚楨、蘊生、吳熙載、王西御、王旬生對。青集卷十一和新城王文簡公治春詞自注

李彥章字則文，一字蘭卿，又自號榕園，福建侯官人。嘉慶戊辰舉於鄉，年方十五。辛未成進士，累陞內閣侍讀。出官廣西思恩府知府，興學尤力。癸巳十一月，權江蘇按察使事。丙辰，升授山東鹽運使。遽以積勞，於四月沾疾，五月遂卒，年四十三。所編四並堂唱和初二集、李蘭卿六種。北京人文科學研究所藏福建通志列傳卷三十八有傳。

吳熙載初名廷颺，以字行，更字讓之。江蘇儀徵人，諸生。師事涇包慎伯，極書法秘奧，篆隸行草皆臻妙品。又工詩畫，生卒未詳。續纂揚州府志卷十六國朝書人輯略卷十等有傳。

王西御名僧保儀，徵人。咸豐三年二月二十三日，林鳳祥陷郡城，毀其書屋，歸故里，從容賦詩七十餘首。八月間，絕粒死。著有秋蓮子詞三卷。

西御詩存、暫園集一卷、瓜雪集一卷、焦山紀遊草一卷、續纂揚州府志卷十三有傳。

王句生名翼鳳、西御昆弟、俱與先生友善。治經通左氏、客浙江學幕者十餘年。咸豐十年二月、杭州城陷、句生從容賦絕命詩、與肇慶府知程葆對綏於堂。著有舍是集八卷、聲遠堂文鈔四卷。碑傳集補卷五十有傳。

十五年乙未 四十七歲

三月上巳、李蘭卿招同桃花庵修禊、又同集載酒堂、以所題楹帖中畫了公事、夜接詩人、禪智尋碑、紅橋修禊十六字分韻。先生分得了字、各賦五古一首。

先生所賦五古一首、青溪舊屋詩集未收。按吳讓之小紅橋唱和詩冊跋通集卷七云、道光乙未、李蘭卿都轉官常鎮通海道、推署在揚、與紳



儒藏

劉孟瞻先生年譜 卷上



士寓公唱和、幾無虛月。是年上巳日、小紅橋修禊、會者十六人、同集載酒堂、以所題楹帖中畫了公事、夜接詩人、禪智尋碑、紅橋修禊十六字分韻。秦敦甫先生、思復分得紅字、程定甫先生、贊清分得事字、謝椒石先生、學崇分得智字、徐松泉先生、培深分得修字、張劍泉先生、銘分得公字、黃春谷先生、承吉分得畫字、阮梅叔先生、亨分得尋字、秦玉笙先生、嶽分得夜字、丁小硯先生、元模分得詩字、阮受卿先生、祐分得人字、梅蘊生先生、植之分得接字、吳讓之先生、廷翼分得橋字、潘小江先生、宗壽分得禪字、羅藹人先生、景恬分得禊字、蘭卿先生分得碑字、先君子分得了字、各賦五古一首。又各和王漁洋治春詞原韻二十首。

又和王漁洋治春詞原韻二十首。

按青溪舊屋詩集云、李蘭卿觀察、彥章招同桃花庵修禊、和新城王文簡

公治春詞。二十首

存六



平生師友卅年中、講院梅花樹樹紅。回憶沂州觴詠事、驚心彈指太匆匆。

歙縣洪桐生師由翰林出守沂州、解組歸、掌教梅花書院。每歲春花盛開時、邀諸生出游、一路吟詠之、聲不絕。屈指計之、已隔三十年矣。故人

幾處逐雲飛、憔悴年來見面稀。白馬湖光牛渚月、懸知沽酒典春衣。劉楚

植久居郡城、涇縣包孟開、旌德姚仲虞前此並客揚州、今各反里。

桃花泉水映霞紅、客館增修地數弓。一自南豐筵散後、禹公踪跡歎飄蓬。

寶山毛生甫、新化鄧湘泉諸君往年皆在曾賓谷侍郎節署居桃花泉軒中。曾公去後、幕客亦星散矣。

擊經薛漢困無涯、嗜學汪倫病可嗟。今日墓門俱宿草、春郊難認展痕斜。

甘泉薛子韻處困積學、曠徵汪小坡力疾著書、惜其俱不永年。

推袁敢自稱佳士、說項真教感故知。去歲觀察訪士於涇縣、包慎伯先生、以余及楚植、蘊生、熙載、西御、句生諸

君對。此際豐臺看芍藥、定婪尾念將離。時先生在都門會試。

西園學士稱豪邁、池館荒涼已化煙。今日歸舟重過處、鶯鶯燕燕總堪憐。

全椒吳山尊學士時昔寓西園、曲水時、文酒之宴極盛。今其地僅存遺址而已。

四月、黃春谷爲先生撰左傳舊疏考正序。夢賦堂文集卷五

序云、西漢傳經主於誦習章句而已、其訓故惟舉大旨、記說或非本義、但取通藝、不尙多書、此秦燔後經學之權輿也。逮後漢廣爲傳註、然後語必比附經文字、承句屬靡有漏缺。至魏晉而解義大備、此既傳後經學之宗會也。洎宋齊以降、則多取儒先傳註、條細縷釋、各聘辨釋、而疏學以興。浸及於隋、撰著弗輟。此既解後經學之要歸也。蓋古者徵實之詣、至是而大具矣。夫授經及爲傳註、惟主一家之義、疏則兼舉衆說、疏通證明、明傳註乃所以明經。故研覈之事日繁、而輔翼之功滋大。其疏曰義疏、曰講疏、亦專曰疏。然疏者、乃其一時著書之體、並非其書必名曰疏。故當時成書亦多謂之義。若以義配他字、則如義宗、義記、大義、雜義之類、即前代之誼也。亦有專名義者、若范歆、伏曼容、崔靈恩、孔子祛等之書、皆孤謂之義。其書大都疏體。如皇侃論語、禮記義疏、其梁書本



傳乃專稱論語、禮記義。沈重周禮、毛詩等義疏，其北史本傳亦專稱義。則義疏二字，可以分隸，不定以疏名書。是以當時凡稱某某爲義疏者，率通指體例，並非即其卷之命名。即孔穎達春秋正義序稱沈文阿爲左氏傳義疏、經典釋文亦云沈爲春秋義疏，王元規續成。而沈所著及元規所續書，乃名義略。又孔序謂劉炫亦作左氏傳義疏，而炫書乃名述議。議與義古字通用，如後漢書許慎撰五經異義，鄭元傳則作異議。即隋書炫本傳謂炫著論語、孝經、春秋、尚書、毛詩述議，而經籍志皆作述義。隋書非出一手，是以各書其志中孝經類謂王劭訪得孔傳送炫，炫因述其議疏者，即指炫所作之述議，議疏即義疏也。志文並未兼舉義議兩字。邢昺孝經疏采襲志語，而不達其文義，乃揣義議爲二，謂述其義疏議之非也。且志辭方謂炫序述己書，專伸孔義，由是乃與鄭氏並立，豈反主於取他本之義疏議之。蓋議故即義，即可見炫所著諸述

義或據發由己、或哀取損益、亦非必盡出一狀。若其左傳述義、就孔氏正義逆之、則必兼采舊說、錄其姓名、以分別引伸、駁正如吾友劉君孟瞻所云者。假令炫書而存、即謂炫以前諸儒之說並存可也。炫傳載炫著春秋攻昧十卷、春秋述議四十卷、而新唐書藝文志則載炫攻昧十二卷、又規過三卷、述議三十七卷。規過不見於隋書、蓋即從述議四十二卷分出、故述議止三十七卷。然亦可見歐宋之疏矣。至宋史藝文志、則載炫春秋述議略一卷、又春秋義囊二卷、或亦述議中展轉脫餘之帙、幾不可考。夫學者援後徵前、顧難傳信。又如隋志載春秋左氏傳杜預序集解一卷、劉炫注、而朱氏經義考乃不言注、竟似序爲炫作。設無左證、何以示諸後人。故就考敘炫書名、且致溷、遑問其餘。夫經賴傳註、以傳、傳註又藉疏義以傳。凡漢人傳註、其不繫以正義者、悉多湮沒。即賈服之春秋解詁、解詁皆是、足見疏學爲用至鉅。然人知正義功在貞觀、



而不知此學之貫穿明瞻。萃於南朝。執守精專。又盛於河北。當時南北分途講學。及會歸隋氏。二劉實經學之大宗。故如炫之述議。設非唐人刪爲正義。則其書可至今存。即炫以前之說舉可存。自有正義而後。炫書廢。而諸儒之說盡廢。且不獨疏家之說廢。即傳註之說之存于述議中者亦廢。然則唐人之正義。襲故冊而掩前編。乃唐人之過也。嘗慨左氏傳一書。凡杜氏以前之習爲此學者。其書皆廢于杜氏。凡孔氏以前之習爲此學者。其書皆廢于孔氏。何則。杜氏之書名曰集解。集解者。自必匯諸解而集之。乃其註中更不指系一人。其序內則以經傳集解之目。置於分經與傳數語之下。而與上文劉賈許穎反若相離。於是孔氏遂聳稱其集由經傳與何晏之論語集解不同。楊士勛穀梁疏亦如其說。然試問取傳附經。何名集解。文義不待再思而明。蓋杜意正以集解之名混於經傳相交。又復盡乳羣言。歸其釋例。藉以遏先儒而不覺。



專名之念重若沈碑、可想證也。故自集解行、而賈服諸家之書遂以日汨。此傳註之廢於杜氏者也。孔氏之書名曰正義者、蓋謂正前此之疏義、即前所云諸書之名爲義者、非空義也。其名奉詔更裁、意在不甘居贊。定名曰正、則必先有委棄前疏之心。故其例必守一家之註而不祔、然後可以進退衆義而不復更舉其人。至如禮記疏問涉皇熊、而體段嘗然不見。毛詩疏空言焯炫、而標著闕爾無聞。雖復肅毓時陳、崔盧偶掇、然疏中精義之出於誰何、祇成虛粕。又況左傳之顛倒彌甚矣。此固其臣之攘善、或亦其主之忌名。一紙蘭亭、尙圖專殉、可想證也。故自左傳正義行、而沈劉諸家之書遂以日汨。此義疏之廢于孔氏者也。然他經之有衆說、固不可廢、而春秋尤不可廢。蓋易與詩虛而有則、書與禮實而可憑、雖有異轍、未容離畔。春秋介虛實之間、一義之歧、眇易不斷。故其中大事、非可取決一家。乃自杜注出、而諸解盡亡、後人惟知有杜、



正義又例不破杜、然惟杜氏、輒即假傳以貢其私。其短喪之說、久爲前人警議。至其中釋弑君稱君、君無道稱臣、臣之罪二語、則吾友焦君里堂切譏之。雖舊註此說多同、不盡如焦所論、然杜每及是條、率爲深曲、非若出于無心。昔樂遜發杜違諒、抑有當、而其書弗傳。若非畸餘炫說、尙可僅見、規撻前言、則後人奉杜、將謂可懸諸日月、其義允協于春秋矣、何可訓也。孟瞻近著春秋左氏傳舊疏考正一書、鉤稽正義中所藏炫說及炫所采故義、逐爲釐出、使陳簡中混散覆匿之跡、朗若撥雲。凡昔之自有而無者、今復自無而之有、覈實之思、等於叩寂、可云用心之勤。即觀宋督弑君一則、杜謂稱督以弑、罪在督、而又以孔父爲禍及其君。夫弑君之罪、旣在督、則孔父無罪也。於此而猶文致之、豈不督之弑君、隱然翻列孔父首惡。此杜以爲稱臣、臣之罪者、其深曲尙如此。今孟瞻揭明正義公穀句下、應具駁辭、則必當有辭嚴義毅、足以令杜氏心

惛者。語雖不存、實可想見。正義削而去之、反空折劉之規過、責以阿謬、其亦奚辭。然則著此書以尋炫說、雖意不主于非杜、而春秋之大義躍如、不獨釋辭講詁之是區、繼絕存亡之可貴矣。夫杜氏左傳之癖、醇飫一生、豈遂遜慚前昔。正義葺經多彥、粹古鎔今、詎非精藝。惟察其所短、則不能盡予其長。且正義畫杜而袒杜、則杜氏雖短亦長。募人以毀人、則衆氏雖長亦短。又況泯其藉號、紊厥指歸、罔非短人之長、長己之短。平心以論、良復可喻。夫細注所以伸經、何形食蠹。信今斯爲傳後、豈預鳴蟬。竊怪當時既欲黜劉、又以爲本、及鬻之而督所從來、坐使用行之助、反喪于卽須臾、篋所開、致流爲疇孰、其於蟬蠹抑又奚如。就使刪定爲辭、意殊乾沒、而難杜申杜、是劉非劉、且概不知所屬、則其蔽已多矣。孟瞻敦愿樸學、非故發唐人之覆、訖以斬舊疏之眞也。舊疏明則傳註明、而經亦明。綴殘理缺之爲、不在自揭別論。蓋較諸陸傳二顧兩惠諸

家補正杜書尤爲能得其要。且此緒一出則使他端悉可類推。爰以訂  
六代流風不徒煥雅兩河舊宿自有典型。知人論世之衡於茲未墜行  
觀次第而暨於諸經也。

五月二十三日楚楨族人劉羣卒年五十八。青集卷九直隸州州判劉君

孫表

六月十三日李蘭卿招集嵐瀛書屋錢包慎伯之官江西先生題其捧檄圖。  
是日爲黃山谷補作生日以山谷詩淮南二十四橋月分韻各賦五古一章。  
先生分得十字。青集卷十一

題包慎伯先生世臣捧檄圖并序云六月十三日蘭卿觀察招集嵐瀛書  
屋錢慎伯先生之官江西即題其捧檄圖。是日爲黃山谷補作生日以山  
谷詩淮南二十四橋月分韻各賦五古一章分得十字。

離離百尺桐孤根常獨立。翩翩五色鳥弱羽常載戢。匠石不肯顧阿閣無



儒藏

由集未逢高岡鳴、空作爨下泣。神龍揚光輝、燭照靡弗及。萬物慶昭蘇、那復重淵蟄。童卯抱奇才、老始沾階級。花下奉板輿、去去勿烏邑。不見毛子節、爲親仕亦急。況今重守令、吏治君所習。勿嗟歲華晏、精力猶足給。胸藏萬斛泉、資深任注挹。慈祥夙在抱、詎肯如束濕。變常功須百、易業利必十。坤輿善承天、動闢靜仍翕。芻言用自慚、螢光空熠熠。所冀若谷懷、細流無不入。伫待善政成、雅歌吾能緝。

按、管情三義卷八云、六月十三日、余自都赴江西、取道揚州。同年李蘭卿、參章兵備招儀徵劉孟瞻、文洪吳熙載、廷璣王西御、僧保句生、劉鳳江都梅蘊生、植之集鈔關署爲餞、以淮南二十四橋月七字拈韻分賦題。茸城女士許定生淑慧爲余所作捧檄圖團扇以寵行者。

是夏、黃春谷寄書先生、滔滔二萬餘言、說述左氏傳字義四條。

按、夢陔堂文集卷四與劉孟瞻書云、月前三復大著、深佩闢微、使南北



朝之學不終見覆。即左氏傳之義可衆共尋意者。一見一否之泉於此而復挹也。其書近類樸遼實懷縈紆。不似蒐輯諸家。僅窮可見而已。近時金谿王謨集漢魏遺書功等匡續。服賈劉衛亦掇數編。然彼書循故藉之轍。庶幾守聞。此書伐正義之藩。斯云作者矣。僕因製序。併檢諸帙。在旁。五日忽雨。不果弔屈。適取顧氏一書折觀。觸有謾見於搦管抒臆。輒明四義。遽累多辭。良以鉤隱使之徑通。羈周務其隙泯。亟圖隅反。深謝棲磨。非可遺爲後塵。正以乞之先路。而攻石未錯。疑竇更滋。遂復就許君之單辭。窮諸籍之微義。申之浹日。又積萬言。夫其詰渥爲需。小大皆由天象。以淳爲淥。出入已盡。人爲一字之通。周乎覆載。而僕謂形聲之字。右旁匪直爲聲。斯解經無外之鑄局。爲說文未發之宦奧。蓋字從言起。言自性生。非耳喻何由結繩。不口區奚以類物。聖人制器尙象。百姓與知與能。莫不主之。若乃釋名所載。異字同聲。虎通之詮。隨文作義。



迴非斯術、夫豈達途。就使窺見一櫟、躐其寸際、而沿溯未極、辨認終疎。要以張梲爲萬帛之統綱、得筏即千航之津渡。會其體要、則可使解顏相助、聚訟胥捐。若更滌以方音、豈猶迷夫小學、而蹉跎暮齒、白駒之隙不留、猗違後生、馬牛之風奚逮。繭室自蔽、著書無成。雖欲紬繹、不可得已。乃者論深造、則聽者皆倦、導浮慕、則謀夫孔斯。又一握爲笑、振古如茲者也。足下前世光伯、後來道原、榆棗洽其功深、風雪互其氣厲。屬當前之樸學、豈非能賢。有如斯之顓門、所屈莫量。如何十稔、旣覲一筭、未傾、徒令懷伐木之實繁、歎漸醴於往昔。意如吾友其人者、不可復覲。然而山鍾川毓、鄉閭已謚名儒。日居月諸、堂室須登繼者。夫名物所證、乃闔闢之維模、範苟存、即方圓之本。由斯以況、則今之僑胥、非君其誰。罄折肱之良、援交臂之失、冀此時矣。且知言必先訓詁、識字豈外經綸。肩有替勝、顧而一輟。洵乎恃君爲質、勿以弁遺。亦云微子之故、非有

璞進。至于言之綦盡，則得易燭而規我也。草錄一冊，愧蕪蔓之甚，斷切教之。以下二萬餘言，實沾一卷略之。

先生答之。

荅黃春谷先生書 青集卷三云：春谷先生閣下，接讀手教，雅荷惓惓。維誦之餘，具見大君子實事求是之意，與誘引後進之心，迥非流俗所能希冀其萬一。大箸四條，旁通曲證，妙義環生，洵漆室之燈，迷津之筏也。文淇於左氏學，猶涉藩籬，未窺宦奧。書中所明四義，皆蓄疑久者。僖三十年傳：饗有昌歜，自正義謂此昌歜之音，相傳爲在感反，而人不知昌歜之歜當音觸。自玉篇以𦵏爲昌蒲菹，而人不知昌歜之字本當作𦵏，不當作𦵏。段氏玉裁謂昌陽氣辛香，以爲菹，其氣觸鼻，故曰昌歜。於歜字之本字本音，可謂明白了當。而又謂𦵏與𦵏可相假借，則猶爲玉篇所惑。先生謂觸之字起于蜀，蜀本有上觸之象，加角則爲角之觸，加欠則爲氣之𦵏。說文解𦵏



儒藏

劉孟瞻先生年譜 卷上

爲盛氣怒、正是觸之本字。觸行而歎始廢、可無疑于昌歎之歎當音觸矣。謂歎以菴爲聲、而即以蹙爲義、與昌蒲菴義了不相涉、可無疑于昌歎之歎本當作歎矣。謂歎在燭部、音觸、歎在屋部、音蹙、其變爲在感、徂感反、實方音展轉誤會。且假借之字、但取同聲、安有歎爲假字而反直據本字之義、居然訓爲昌蒲菴者。可無疑於歎歎之不能相假矣。昔人謂不通假借、而但泥古義、不可以解古書。愚竊謂但講假借而不明本義、亦未可以解古書。此類是也。宣十二年傳、晉人或以廣隊不能進、楚人基之、脫肩少進。馬還、又基之、拔旆投衡乃出。傅氏以基爲毒、直同囁語。杜氏訓基爲教、亦與情事不合。說文引作楚人卑之、黃顥說廣車陷、楚人爲舉之、此必左氏先師之說。惠氏九經古義亦從說文、而以傅氏爲非。至杜氏謂拔旆投衡上、使不帆風、前人從未有正其誤者。先生謂拔旆投衡自是兩事、拔投互文。去此兩物、則車輕馬便、乃可得出。若使置臥、則旆愈橫長、拖逼馬首、勢



更阻于帆風。車陷而不能進。正須多人助力。移舉車上。機礙重物。以爲釋卸輕便之地。即今時道路陷車之情狀。體會曲至。可謂物無遁情矣。至衡既脫去。恐人疑無從縛輓。則又引皇侃論語疏。見雖去衡。而輓亦可暫著于轅。正來教所謂鉤隱使之徑通。羈周務其隙泯也。襄二十五年傳表滄鹵。杜解滄鹵爲埤薄之地。正義引賈逵說。滄鹵也。鹵地必薄。意謂杜說同于賈氏文。淇竊疑之。說文。鹵。西方鹵也。是鹵正訓鹵。滄之爲鹵。古無其訓。卽滄可訓鹵。而鹵旣訓鹵。滄亦訓鹵。詞義重疊。無復文理。古人彥鹵並言。然東方謂之彥。西方謂之鹵。彥與鹵有分也。鹵並言。然鹵銜也。北方味也。大鹵曰鹵。鹵與鹵有分也。滄鹵同訓爲鹵。果何分乎。推原賈逵之注。當云滄鹵。滄鹵也。以鹵解鹵。而不解滄字。意謂滄與鹵對文。鹵爲鹵薄之地。則滄爲和美之地。以滄爲和美人所易知。故不言也。周禮草人彥。彥用黃。彥解彥。非訓彥。爲彥。注釋中每有此例。正義所載古注。經其刪節者不少。

此條滄鹹也三字、必非賈氏原文。其刪節處雖無可考、然按下文數疆潦、

賈逵以疆爲疆、槩堯堯之地、

賈讀疆其兩反、沈氏欽、韓謂字當作疆、不加土、

謂非疆即潦、并衍沃、

賈逵云下平日衍有溉日沃、每字各具一義、其餘賈氏無注、按山林藪澤、

京陵隰臯、每字異訓、人所共知、所謂規偃豬者、謂于豬水之地作偃

即

受之、町原防者、謂于豬旁平原之地作防以止之、

水。和人以豬畜水、以防止。鄭司農說豬防、以春

秋傳曰町原防、規偃豬、元謂偃豬者、畜流水之陂也、防、豬旁隄也、

偃豬原防雖非對舉之詞、亦每字各具

一義、何獨滄鹵二字同訓鹹乎、足知滄之訓鹹、斷非景伯之說、況叔重本

從賈逵受古學、篇中所引左傳、大都景伯之說、許冲序稱慎博問通人、考

之於逵、作說文解字、是說文解字一書皆折衷于景伯者、若鹹爲滄字本

義、許君即當據以入說文、今按說文于滄字下注云、滄、淶也、而不解爲鹹、

則鹹斷非滄字本義、若云假借、則與滄同音之字、如廣韻所載常倫切十

三字、亦從無訓鹹者、足知景伯斷不訓鹹也、顧亭林謂上下皆以二字成





文未解滄爲何等之地。而又引陸氏說謂滄鹵地宜鹹者則仍滄鹵不分。沈氏欽韓引廣雅云滄漬也謂疾鹵之地沾漬故賈逵轉訓爲鹹則亦未知滄與鹵對文也。先生謂滄爲沃土與鹵相反洵精確不磨之論。文洪又就景伯本不訓鹹申言之未知有當否也。成三年傳鄭賈人有將寘諸褚中以出杜注及正義皆不言褚爲何物。襄三十年傳取我衣裳而褚之杜解褚爲畜陸粲解褚爲衣橐本于集韻。集韻本于漢書南越傳注褚衣囊也。玉篇褚裝衣也字或作紵。一切經音義引通俗文曰裝衣曰紵。第言裝衣而不言爲何物則以褚爲囊橐者亦是望文生義。先生謂褚即厨後又加巾爲幘。古時對與者同音儲儲義虛褚厨義實亦通論也。至于既優既渥之訓妙于解詩形渥麗澤之文精于說易疾泮脰脂正鮑人之句讀訛謬凍漚沃盥駁晁氏之音訓混同語皆破的意豈索癢而篇中大指謂凡字云以某爲聲者必兼其爲聲之字之義不徒聲也。雖本說文某亦聲之



例而特推廣究之、尤爲前人未發之覆。所示左氏四義、文淇已摘入拙著疏証中、謹將原書奉繳。天暑、不敢上謁、惟爲道自重、不宣。

秋、應試赴金陵。青集卷十一、戲作別席號舍詩、舊韻序

是年、劉鑑泉守揚州、重先生之學、禮接甚恭。劉容季君勝錄、丁晏撰、皇清優貢生候選訓導劉君墓誌銘

按、劉鑑泉名源灝、鑑泉其字、永清人。道光三年進士、乙未出知揚州府。十六年九月、移任陝西督糧道署。續纂揚州府志卷八有傳。

道光十六年丙申 四十八歲

春、楚楨應試赴都、先生與友人餞諸湖上、賦詩送行。

楚楨將赴禮部試、同人餞諸湖上、賦詩送行。青集卷十一云、湖干設祖道、計偕赴春明。臨別更舉觴、贈言朋友情。強仕非晚達、待時期先鳴。立身有本末、守道關重輕。勿爲叔孫傳、希世博虛名。勿爲公孫相、曲學邀殊榮。願

君守素志、坐言起必行。通儒建樹遠、一雪處士聲。

按寶應劉楚楨先生年譜云、春自郡城赴都、同郡殷古農、劉孟瞻、梅蘊生、吳熙載、王句生、楊季子、餞於湖亭、賦詩送別。

時包孟開亦過揚、赴試、先生次蘊生韻、卽席書扇贈別。

包孟開慎言過揚、將赴禮部試、卽席書扇贈別、次蘊生韻、青集卷十一云、不暇忽忽唱渭城、好將吉語送君行。春風十里青油幕、老眼看花分外明。按嵇庵集卷六孟開過揚、赴禮部試、卽席書扇云、落梅風滿綠揚城、忽漫逢君又送行。應念故人淮海上、一時翹首望春明。此詩載在<sup>(15)</sup>於乙未之後、丁酉之前、故知爲丙申年作。

春、李蘭卿升任山東都轉、留揚候代、邀先生與吳熙載至樵署、纂揚州水道記。先生與吳熙載商訂凡例、先運河次兩岸工程、次兩岸諸湖。都轉盡出藏書及河工官牘有涉于揚州河事者、皆筆記之。凡三閱月、檢書幾及萬卷、方



儒藏

劉孟瞻先生年譜 卷上

事編輯、而都轉遽歸道山、斯事遂寢。青集卷五揚州水道記後序

按、夢陔堂文集卷十丙申中秋書載酒堂云、正月下旬、李觀察有奉遷山東都轉之會。又云、端午日夙興、忽聞有傳語蘭卿病歿者。又福建通志列傳卷三十八云、丙辰升授山東鹽運使、遽以積勞於四月沾疾、五月遂卒、年四十有三。

秋、迎亡故汪小城女爲毓崧婦。通集卷六亡妻汪孺人墓志銘

十七年丁酉 四十九歲

秋、赴金陵應試落第、以後不應試。

按、戲作別席號舍詩、再疊別號舍詩舊韻。青集卷十一序云、丁酉頭場、坐席號甚委頓。

是年、撰揚州水道記四卷。

按、自撰後序云、去歲閒居多暇、乃發篋檢舊藥閱之。時吾友劉君楚楨



所著寶應圖經久經脫棄其間敘邗溝變遷至爲詳晰。因師其意先爲運河考八卷凡八閱月而書始成。此後序見作於道光戊戌四月朔。按雖云爲運河考八卷而運河考即水道記刻本四卷也。

寄書阮雲臺論古地志。

上阮相國書青集卷三云前蒙示抄本宋揚州志五本其通州志一本內一卷所附雜詩皆係詠揚州者。考通州在宋爲靜海軍不屬揚州且所附詩詞又有元明人廁其間必非宋人原本其重修眞州志一本係嘉定時所修嘉慶揚州志云嘉定眞州志二十二卷今按抄本眞州志卷首有韓挺序係紹興眞州志序。府志載韓挺紹興眞州志七卷其書久亡其序僅見于此。又有永嘉黃氏序一篇係嘉定志序而志書亦未載。志爲嘉定時所作而呂真人祠堂記劉宰新翼城記放生池記皆寶慶間所作孫虎臣麗光園湖光亭記呂師龍重修學記乃咸淳間所作均在嘉定之後按隆

慶儀真志載嘉定真州志丁宗魏劉雲薛洪同修錄事參軍張端義補按府志真州幕官有張端義寶慶錄事隆慶志凡例又謂真之地乘宋嘉定有志寶祐有志寶慶寶祐皆理宗年號嘉定時所續載者或張端義所補歟。原本廿二卷抄本僅六卷載六合儀真事宋時六合隸真州故也。碑記二卷文章二卷城池一卷雜錄一卷碑記文章所載多府縣志所未載卽其所載者亦多刪節抄本均載全文又碑記文章均載撰人及書丹篆額姓氏年月後來府縣志皆削去書石者僅留撰人殊嫌未備真州當南渡後爲戎馬之地城池守備尤爲緊要城池一卷所載案牘之文甚詳府縣志亦多刪節其廣陵續志一本府縣志藝文均無其目按抄本惟揚志書板中載有紹熙廣陵志嘉泰廣陵續志遺書中載有紹熙廣陵志序一篇抄本誤作紹興廣陽志。嘉泰廣陵志序一篇紹熙廣陵志十二卷帥守鄭興裔命州學教授鄭少魏江都尉姚一謙所編鄭少魏序云奉撥蒐獵於磨滅散亡



之餘聚爲一書。鄭興裔識其後云、惟揚表裏江淮、號今巨鎮。乃闕斯文、異時但抄錄聞見、遇帥守視事之初、雜實於簿歷、登載不備、無足取信。乃屬郡博士鄭少魏、附邑尉姚一謙搜獵訂正、聚爲此書。據兩鄭君之言、則紹熙以前廣陵無志。府志藝文有晉陽郭廷誨廣陵志一卷、按書錄解題、廣陵妖亂志三卷、唐晉陽鄭廷誨撰。唐書藝文志作郭廷誨、惟揚志遺書內亦作郭廷誨。廣陵妖亂志、則府志書作廣陵志者非也。書錄解題亦載紹熙廣陵志十二卷、鄭少魏姚一謙撰。此書久亡。鄭少魏序謂凡所謂封域廣狹、道里遠近、戶口登耗、土地生毓與古今之人物碑銘姓氏名賢之述作歌詠、蓋亦稱備。鄭興裔云、事以類分、各有條目、凡十二卷、則紹熙志體例猶可想見。嘉泰廣陵續志即續此志爲之。趙師舜廣陵續志序云、閱郡圖志、遺略太甚、因屬臨江劉君昌詩會稗而續之、書凡六卷。又謂名賢之賦詠、樂石之鐫刻、文獻不足、姑撫其粗、以備後云。今抄本廣陵續志不載



撰人當即趙君命劉昌詩所編者。抄本六卷、與趙序合。御書詔敕一卷、碑記石刻一卷、上梁致語一卷、詩詞一卷、詩話詞話一卷、城池一卷、詩詞附儀真詩詞數十首、小序謂儀真爲淮左勝地、異時騷人墨客登眺於此者、皆能寄興高遠、發爲詞章、表而錄之、得數十首。以儀真爲淮左勝地、特載詩詞數十首。其實真州在宋爲建安軍、不隸揚州也。詔敕碑記詩詞各門多載嘉定、寶慶、淳祐、寶祐時事、而末卷附家坤翁寶祐城紀事詩、皆在嘉泰之後。按、寶祐志序謂前制參家寺簿坤翁嘗訂異舉遺、則嘉泰志中殆有家氏所續者。嘉泰志作于嘉泰三年、上距作紹熙志僅十四年、所續六卷、原不能多所增補。然志中載嘉泰以後事頗多、則亦非劉昌詩所編之原本也。嘉慶揚州府志云、寶祐惟揚志三十六卷、無撰人姓氏、舊志繫以鄭少微。按、鄭少微當爲鄭少魏。紹熙廣陵志乃鄭少魏所作、見于直齊書錄解題。寶祐惟揚志非少魏所作、舊志繫以鄭少微、誤矣。今抄本惟揚志



載有洪勳揚州府敘其敘略云賈公似道來制全淮爲言乘志軼書條貫靡竟盡爲董厥成勳不敢以諛聞諉戊午春成書若干卷戊午爲寶祐六年則勳所作之序爲惟揚志序無疑抄本作揚州府敘乃傳寫之誤洪序又云或表年以繫事或類從以別條訛者刊研闕者蒐補鋪觀往迹爰及邇年朝家建置州鎮興行人事物宜軍情敵變益以詳備亦可略見寶祐志之體例矣又惟揚志雜錄內辨證揚州沿革云兩漢迄陳揚州所統非今州境已詳于郡縣表又雜錄中小序云明辨以證諸實會粹以拾其遺亦與洪序表年繫事訛者刊研闕者蒐補之言合故知寶祐惟揚志爲淮南轉運判官洪勳所作無疑洪序不載卷數但云若干卷府志云三十六卷今抄本第六卷首詔令一卷子目二曰歷代詔札曰敕令次詞翰二卷子目三曰遺刻曰遺文曰遺書而遺書之末又附書板遺文之中以序表上書簡啟墓誌爲次亦與洪序或類從以別條合次詩詞一卷無子目。

次雜錄一卷、子目五、詩話一、詞話二、牧守雜事三、辨證四、拾遺五。次城池一卷、敘歷代及宋城爲詳。據雜錄序云、寶祐所錄、視舊略備。然而今昔之詞章、牧守之雜事、明辨以證諸實、會粹以拾其遺、或可以資好事者之美談、質傳聞之異辭者、僅不敢廢、故敘之以雜錄終焉。是雜錄當在卷末。抄本城池在後、誤矣。統按嘉定真州志及嘉泰廣陵續志、寶祐惟揚志三書、體例略相似、皆仿紹熙廣陵志爲之。雖非完書、然遺文軼事頗資見聞。又所載詩詞最爲詳備。大率隋唐以前本鮮于俊揚州集、有宋一代本陳洪範揚州後集、府縣志不載者多矣。今以隆慶儀徵志校嘉定真州志、以新揚州府志校嘉泰寶祐二志、其所失載及有刪節者、俱下一籤、謹將原書五本繳上、並貢所疑、伏乞誨政。又前日辱示中統史記、係以索隱散入每卷者、以家中所有汲古閣索隱單行本、抽爲校對、頗有異同、洵爲海內鴻寶。惜卷帙太多、不能一一互勘、留十日、畧爲緝閱、即行繳上。文淇所撰揚

州水道記現又錄一清本、作爲十圖、已托友人繪畫。先將書稿四本附呈鈞覽、並希削定是幸。

九月、阮雲臺撰揚州水道記序。

儀徵劉孟瞻明經文淇撰揚州水道記、綜吳越春秋、漢書地理志以下諸書、證明唐宋以前揚州邗溝山陽瀆地勢南高北下、諒哉斯言、非可以今日運河勢膠固于胸者也。而其尤爲確據者、則在李習之來南錄云、自淮陰至邵伯三百有五十里、逆流十四字也。今由淮安下揚州之水勢、如建瓴、愚者亦知北高南下矣。不知此水乃蓄高堰內、水至一丈八尺之高、偃底古淮身、更不知底幾丈尺、始能如此建瓴耳。古淮平流入海、更低于邵伯隄東下河地面。且天長江都甘泉諸山湖之水、又加入邵伯之水、挾江潮而趨邵伯、高寶射陽、安得不南高北下。所以漢志云江都渠水首受江、北至射陽入湖。云受江、非入江也。云北至射陽、可



見唐時南高北下也。又其辨證永和寶歷等年運道通塞及瓜洲瓜步水陸變遷博覽而又有識故皆精覈矣。凡地理書須以圖明之。此記當分繪古今多圖。孟瞻其更爲之而付諸梓。丁酉九月儀徵阮元識於京邸之節性齋時年七十有四。

是年毓崧入縣學。

儀徵劉孟瞻年譜卷上終

校記

- ①原校：「處士」之下脫「士」字。
- ②原校：「定在」之下誤衍「十」字。
- ③原校：「汝士」之下誤衍「字」字。「仲博」二字當爲注。
- ④以不：原作「不以」，據文意乙。
- ⑤桐生先生：原作「桐先生生」，據本譜嘉慶七年壬戌條乙。
- ⑥崔靈恩：原作「崔靈思」，據《梁書》卷四二《崔靈恩傳》改。
- ⑦原校：「丈布」之下誤衍「則」字。
- ⑧原校：「洪桐」之下脫「生」字。
- ⑨原校：「問疏」之下誤衍「說」字。
- ⑩原校：「楚楨」之下脫「嘗」字。
- ⑪原校：「藥定」之下脫「吟」字。
- ⑫原校：「見於」之下脫「是」字。
- ⑬原校：「夫孔」之下脫「多」字。
- ⑭其人其人：當衍「其人」二字。
- ⑮在：疑衍。



儒藏

劉孟瞻先生年譜 卷上



# 劉孟瞻先生年譜卷下

日本上野 小澤文四郎編

十八年戊戌 五十歲

正月刊行春秋左氏傳舊疏攷正八卷。

按包慎伯序學詩識小錄藝舟雙楫卷二云孟瞻去毛鄭而治杜氏春秋成舊疏考證十二卷。又楚楨所撰先生墓表云左傳舊疏考正六卷。然此時刊行者八卷。而毓崧所撰先考行略通集卷六亦云凡得二百餘條。蓋爲八卷。故其云十二卷或六卷者俱誤也。今歲四月余購得此書。中有汪孟慈喜荀方印。或即先生手貽孟慈者。果爾亦奇緣矣。附識于此。

四月朔<sup>①</sup>揚州水道記後序。



丙申之春、李蘭卿先生陞任山東都轉、留揚候代、邀余與吳君熙載至推署、纂揚州水道記。余與吳君商訂凡例、先運河、次兩岸工程、次兩岸諸湖。余分任運河及兩岸工程、吳君分任兩岸諸湖。都轉盡出藏書及河工官牘、有涉于揚州河事者、皆筆記之。凡三閱月、檢書幾及萬卷、方事編輯、而都轉遽歸道山、斯事遂寢去。歲閒居多暇、乃發篋、檢舊稿閱之。時吾友劉君楚楨所著寶應圖經久經脫棄、其間敘邗溝變遷至爲詳晰、因師其意、先爲運河考八卷。凡八閱月而書始成。客詰余曰、南北運河、緜亘數千里、子僅記揚州、抑何陋也。且欲治揚州運河、不當於揚州求之、必黃不入運、而後揚州之運河可治。自明已來、河道屢變、河患已亟、子區區述揚州沿革、又何裨乎。自吳溝通江淮之後、漢晉六朝雖有變更、然漕運略不藉此。洎唐高宗後、漕事歲益增多。開元十八年、裴耀卿條上便宜、謂江南送租庸調物、以歲二月上道、至揚州入斗門、即逢水淺、已有阻礙、須留一月已

上至四月已後始渡淮入汴。多屬汴河乾淺。請于河口置倉。使江南之舟不入黃河。黃河之舟不入洛口。代宗廣德二年。劉晏領轉運使。自揚州遣將部送至河陰。江船不入汴。汴船不入河。河船不入渭。江南之運積揚州。汴河之運積河陰。河船之運積渭口。渭船之運入太倉。是裴耀卿。劉晏已爲轉般之法。宋人于眞揚楚泗置轉般倉。殆卽效法唐人。唐李翱來南錄謂二月丙辰次泗州。見刺史假舟轉淮上河如揚州。庚申下汴渠入淮。經盱眙至楚州。宋樓鑰北行日錄謂淮陰六十里至洪澤。前去歐家渡極淺。借潮于瀆頭神。欲候酉潮而申初已應。開閘張帆。三十里過瀆頭。又三十里至龜山。以風大不可出淮。次日出淮。三十里至盱眙。渡淮至泗州。李翱謂由泗州假舟入淮。是至泗州換船矣。樓鑰謂到洪澤候潮乃開閘。是宋人於洪澤鎮置閘矣。蓋唐宋之時。淮與黃河絕遠。故江淮間無河患。明永樂間遷都燕京。平江伯陳瑄始改運道。隄管家湖。鑿通清河縣南之淮河。



接黃河口、爲運道出入。然慮黃河入運不免停淤、于是倣宋洪澤閘制、于河口建新莊閘、竝福興清江移風板閘爲五閘、互相啟閉。運河止許糧船、鮮船應時出口、都漕官遣官發籌、或三五日一放船、過盡口卽築塞。五閘鑰匙掌於都漕口之出入監之工部、其大小官民船悉由仁義等五壩車盤以出外河清江瓜儀口子。有敢私擅出入者、罪至重。夫平江雖爲直達之法、而必嚴其啟閉之制者、蓋慮閘制不嚴、黃必敗運也。其後官民厭車盤之艱、一皆由閘、而閘制遂弛、黃水日以浸灌、此非平江之過也。然平江自爲其巧而欲衆人之安于拙、其勢必不可得。今淮身淤墊日甚、策治河者能倣唐宋轉般之法、使黃自黃而淮自淮、任拙而不任巧、河患庶有瘳乎。余謝之曰、余揚人也、僅記揚事而已、他未遑論也。客退、余因述作書之緣起、而竝記與客問答之語、以爲後序。道光戊戌四月朔、儀徵劉文淇識。

是月、淮南同知姚瑩<sup>②</sup>赴臺灣任、姚石甫年譜先生與同人賦詩送行。

送姚石甫先生 鑒觀察臺灣。青集卷十一

臺澎眞奧區。復絕重洋隔。民情好鬪鬪。官務稱繁劇。惟公邀帝簡。超擢逾常格。朝乘通守麾。暮樹外臺戟。亮哉聖人聰。足使遠俗革。舊部聞公來。欣手加額。威惠必兼施。次第抒善策。鹽車昔困驥。蕩節今乘驛。飯生慙滫苴。龍門幸著籍。壯遊不獲從。離緒無由釋。歌謠訪閩疆。書函寄海舶。側耳聆政成。頌聲被金石。

按姚石甫名瑩。石甫其字。一字明叔。姚鼐之從孫。桐城人。嘉慶戊辰進士。官廣西按察使。乾隆五十年十月生。咸豐二年十二月卒。年六十八。著有東槎記略五卷。康輶紀行十六卷。寸陰叢話四卷。識小錄八卷。東溟文集二十六卷。詩集二十卷。名曰中復堂全集。吳嘉賓所撰求自得之室文鈔卷十有傳。

是月李方赤權守揚州。青集卷四送李方赤太守序



按續纂揚州府志、八卷李璋煜字方赤、山東諸城人、進士官部曹。道光十八年、任揚州府。慮事精敏、明察而不迫、慈和而能斷。尤以立品立學爲亟、下車觀風試士、會府試取前列之有造者教焉。常微行、求民之疾苦。邵伯埭立恤鰥局、董事者立修約以請、卒令舉行、並釐剔揚州恤鰥局影射諸弊。爲民課農桑、以敦儉樸、力挽侈靡舊習。聞士女有節烈行、亟爲表揚。又葺郝忠烈公祠、立蕭孝子後、訂史忠正公附祀之典、增祀伊太守於桃花庵之載酒堂、皆足頌廉懦立、興起風俗。調江寧知府、洊升布政使、丁憂去職。

閏四月、李方赤聞先生及劉楚楨經明行修與魏靜卿之孝義、榜示通衢、以式多士。

按、念樓公行狀劉恭冕撰抄本所引云、爲崇獎學行、以勸多士事。照得守令之官、化民成俗、是爲專責。而化民之術、先敷士行。勵士之道、因亦



多方。而於本郡樸學篤行、厚爲推崇、俾多士知所嚮慕、其機尤捷。本署府蒞任之初、稔知郡中寶應劉楚楨、儀徵劉孟瞻兩君經明行修、著書盈篋。昨於郡試之時、敦勉多士、執經問道、實事求是、以廣其傳。茲又聞儀徵魏君靜卿前仕嶺表、懋著循聲、以母病乞歸、不出里閭、侍奉維謹、衣不解帶者累年矣。夫通儒雅材、循吏孝義、天下之所罕見。茲乃接踵於吾郡。古之所稱經師、兩劉君足以當之。古之所稱人師、魏君足以當之。本署府皆親式厥廬、挹其丰采、聆其言論、敬禮有加焉。昔王文成公在江西時、因贛州致仕縣丞龍韜居官清謹、歸休貧乏、深嘉廉節、表示通省、令官吏歲時存問、量資柴米、無令用乏。特倣其意、表式宅里、樹之風聲、使爾多士有所矜式、亦步亦趨、無令三君子專美於前也。本署府暫時權攝、所欲爲者多不及爲、興利剔弊、恐亦託之空言、徒煩文告、教化不行、咎在太守。惟是欲挽民風、必以士爲之倡。欲敦士行、必以師儒



爲之鵠。此雖一日之間、可與郡人相勉於有成、而自幸得人之良多也。苟喻此意、漸摩既久、將見遠近父老子弟共相倣倣。是三君子之學與行足以啟迪生徒、激厲末俗、非守土者有術以潛移而默化之也。吾郡幸甚。斯文幸甚。此約。道光十八年閏四月二十九日示。

魏靜卿行實未詳。

夏、李方赤示先生以李西林先生知稼堂集及李松谿先生研錄軒詩集、先生撰兩書書後。青集卷七

代李方赤撰更正揚州府學名宦鄉賢祠木主記。青集卷二

記云、昔朱邑爲桐鄉令、既歿、桐鄉人祠之、此名宦祠之權輿矣。張良食采于留、後人于留城爲子房立廟、此鄉賢祠之權輿矣。自是以後、見于史冊者甚夥、然皆專祠、而非總祠也。明代始令府州縣學立名宦鄉賢總祠、有司春秋致祭。國朝亦因其制、豈非欲令諸生觀禮者以古人爲師而有所

取法歟。然守土者每視爲具文，而儒官亦弗之深考，或已列祀典而祠無其主，或祠雖有主而志無其人，或名宦誤入鄉賢，或鄉賢誤入名宦，或名雖彰著而無關乎本郡，或縣已他屬而仍贅列其人。其他官爵闕書、姓名誤寫者，尤不可殫紀。凡此諸失，各郡皆所不免，而揚郡尤甚。前守劉公源灝督率同僚捐修郡學，屬訓導陳君夢寶應舉人劉君寶楠攷定名宦鄉賢祀典。會劉公升任去，斯事遂輟。今年夏，余權守斯郡，陳君以前事詳請立案。其應移祀鄉賢者，曹憲、孫馨、張方平、桑喬、蔣應奎、黃瓚、王軌凡七人。應移祀名宦者，婁師德、李德裕、韓琦、晁補之、宋庠、陳瑄、熊尚文、馬從龍、馬文升凡九人。應補入名宦者，謝安以下凡若干人。應補入鄉賢者，臧旻以下凡若干人。其官爵姓名訛脫者，俱已改正。惟有應撤之主，或以有舉莫廢爲疑。余案文王世子，凡釋奠者必有合也。鄭注云：國無先聖先師，則所釋奠者當與鄰國合也。又云：有國故則否。鄭注云：若唐虞有夔龍伯夷，周



有周公、魯有孔子，則各自奠之，不合也。疏云：此謂諸侯之國，釋奠之時，若己國無先聖先師，則合祭鄰國先聖先師，謂彼此二國共祭此先聖先師，故云合也。若己國有先聖先師，則不須于鄰國合也。當各自祭，故云有國，故則否。夫先聖先師苟有其人，猶不必借資于鄰國，況名宦鄉賢尤當各從其故，不必借才于異地也，亦明矣。名宦中如王安石應移祀通州，鄉賢中如海州之徐瑒、六合之陳融、如皋之胡瑗、無錫之杜鎬、天長之朱壽昌、通州之錢嶧以下十三人，應各移祀其鄉。何遜、海瑞、王守仁未官揚州，汝南應曜、千乘董永皆非揚人，文天祥停留真州三日，不得謂流寓，均應撤主。余謹據禮正之，既飭學別立檔案，復作記以諗後之人，俾有所考焉。

七月朔長孫壽曾

恭甫，一生。劉容季氏謄錄。

是月李方赤卸事去，先生有送李方赤太守序。青集卷四方赤權守揚州前後六月。青集卷四桃花庵展上巳會序。

序云、道光十有八年夏四月辛亥、坐補常州府知府諸城李公權守揚州。至秋七月戊申、公卸事去、莅任才百有二十日。而下車之始、即值郡試、凡三十日而竣事。公乃大署其門曰、凡生童來謁者、門吏隨時通報、毋少稽留。以故懷藝求見者踵相接。公優加禮待、談藝之餘、訪問地方利病、有當興革者、立見施行。其爲民謀也、如謀其家事。其誘掖董率也、如慈父母。嚴師保之教誨其子弟、慈祥而齊慤。父老讀公告教之文、歎爲數十年所未見。向之市豪爲民害者、累足屏息、惟恐公之廉知。即其甚黠者、亦匿迹鄉曲、不敢顯然犯公之禁令。甫及一月、頌聲四起、而公顧歉然不自足曰、凡吾所欲爲而未及爲者甚多、即吾所已爲而爲之未慊吾意者亦甚多。吾方自愧不暇、而又何頌焉。嗚乎、古稱循良之吏、其所設施者必相其緩急、次第以布之。舉凡重農桑、興學校、懲奢侈、禁游惰、緝盜賊、清獄訟、其施之也有本、其爲之也有漸、類非旦夕所可奏功。以公深於經術、達於治體、令



得久於其任、凡所欲爲而未及爲者、皆得有所展布、而不難斷至於古之人、宜乎公今日歎然有所不自足也。然而民已謳思不能忘、非公至誠有以感人、烏能深入人心而使人戀戀若是。先是代者未至、民宣言曰、公實授揚州矣。或曉之以坐補者必俟原缺、則又曰、新太守至、公留揚幫辦矣。愚民無知識、好爲議論、率多可笑。然而揚人愛公之意、不可謂不厚矣。古之郡守有實惠及民、民不忍其去、於其受代也、詣闕乞留、或數十人、或數百人、不憚千里、相率而至、上之人亦每從其所請。後世人心不古、或有涉於詐僞者、茲制遂革。今觀揚人愛公之切、令古制得行、其有不褰裳而思借寇者哉。雖然、公之所以曉吾民者、諄切詳盡、民即不能留公、果能奉公教令、以善其身、則無異公之常在揚也。文淇辱公之知、於公之行也、不敢爲華辭、謹述揚人戀公之忱、與公之嘉惠揚人而歎然不自足者、庶幾有當於公意也夫。



八月、李方赤再權守揚州。

按續邗雅八章序念樓外集卷一云、太守李公七月受代、旋復攝篆、庀舊政而加勤。

先生與友人重刊郝太僕褒忠錄六卷。

按續纂揚州府志卷五祠祀郝忠烈公祠引李方赤記云、公諱景春、字和滿、起家縣教諭、歷官至房縣知縣。時張獻忠亂於房、公守城力盡、與一子一僕同被執、以不屈死、聞、遂贈公太僕、敕祀於鄉。蓋江都有祠之始也。又云、公之賢、後輯公守戰之烈、爲褒忠錄六卷、其書尙存。郡人黃觀察承吉、王刺史彥和、魏明府廷瑜、程指揮光治、劉孝廉寶楠、劉明經文淇、楊上舍亮復、釀金刊之以行。

先生寄書黃春谷論郝太僕褒忠錄。

按先生與春谷書青集不收載之、春谷與孟瞻書見于夢陔堂文集。卷

代李方赤撰重刻郝太僕褒忠錄序。青集卷五

明贈太僕卿郝公祠在揚郡西郊蓮性寺右其祠舊額曰忠節。余考郝公在明季時未經贈諡其曰忠節者蓋鄉人私諡而舊志以爲贈諡誤矣。國朝乾隆四十年詔舉勝朝殉節之臣核議予諡於是公與鄭公爲虹得諡忠烈。當公之守房縣也外援俱絕力盡而死其孤忠大節媲美睢陽自宜褒揚節義以風厲天下。顧公死之後幾及一載其長子明龍馳驅數千里控僉戎馬之中哀求贈卹又有同里張忠節公爲之左右督師揚嗣昌始爲題請建祠贈諡而易名之典猶闕如焉。然後知我朝旌表明季殉難諸臣其曠典爲從古所未有也。余葺公祠宇因易其舊額而額之曰郝忠烈公祠既已爲之記矣其褒忠錄一書乃公子長君所輯後漸零落。乾隆乙酉如臬姜君忠恭重謀剞劂桂林陳文恭公爲之序而未果竣工。至丁未



秋公之六世孫梅謀於其友捐貲付梓始克告成。郡人李君斗豎舫錄所記之褒忠錄即此本也。其細目詳載豎舫錄中。惟袁繼成所作之祭文雷士巖所作之傳豎舫錄皆以爲杜補堂作則李君之疎也。今距乾隆丁未五十二年而其板又亡失過半存者亦漸漫漶不可識別。郡之紳士醵金重刻余既於記中詳載諸君姓名刻既成復爲書其緣起而因以歎世之托文字以傳者猶或有時湮沒惟表揚忠節者其文字必不可得而湮沒也於是錄之刻信之矣。

八月中旬劉楚楨爲琢齋撰善士劉君記。念樓集卷六

十月李方赤復受代已大吏命公留後委以他政。念樓外集卷一續邗雅

### 八章序

先生致書黃春谷論洗冤錄並告以李方赤受代。

按先生與春谷書青集不收之。夢陔堂文集卷六送太守李公序云道



光戊戌孟冬十日、劉明經書來、啟視、則示以太守李月汀先生所致原書。書首與明經論洗冤錄、固刑名家言、要惟經生、尤得其意。吉甫讀斯語、輒益仰先生學識之異、政治之茂美也。竟讀、則見先生將驅五馬、麾白鹿、過還省垣、眷戀此地士民風、乃鄙人芻蕘縞紵之獻、夫吉欲申聞、見以志愷澤久矣。

是月、先生代李方赤撰洗冤錄辨正序。青集卷六

前漢書薛宣傳、遇人不以義而見痕者、與瘠人之罪鈞、惡不直也。注、應劭曰、以杖手擊人、剝其皮膚、腫起青黑、而無創瘢者、律謂痕瘠。所謂律者、漢律也。意古必有檢驗之法、與律例並行。顧其書多不傳、傳者以洗冤錄爲最古。宋孝宗淳熙元年、浙西提點刑獄鄭興裔創爲檢驗格目、上之于朝、頒下諸路。宋惠父又博采諸書、增以己見、名曰洗冤集錄、後世刑名家奉以爲金科玉律。嘉定錢少詹事養新錄謂輟耕錄記勘釘之法、而以爲叔

聞。然此錄已先有之。又謂此書屢經後人增改、失其本來面目、唯初刻爲可貴。嘉定羅木夫先生爲詹事之婿、宏通博雅、得元刻宋淳祐本、以校正今本。凡若干條、名爲洗冤錄辨正。余通籍後、服官刑部、充則例館提調、且十年、深知此事之難遇、有名法家古書善本、必多方假抄。今得先生是書、亟爲刊布、以廣其傳。嘗讀晉書刑法志、謂在昔前漢著律、凡六十篇、世有增損、錯揉無常。後人生意、各有章句。叔孫宣、郭令卿、馬季長、鄭康成諸儒、十有餘家。魏明帝下詔、但得用鄭氏章句、不得雜用餘家。蓋古大儒精於律令、以茲事任大責重、故以治經之法治之、析其章句、正其訛脫、如此之詳且盡也。況推鞠大辟之法、自檢驗始。此書所關、尤非淺鮮。吾願良有司各置一冊于座右焉。

此月阮雲臺休致回籍。雷塘庵弟子記卷七

是年撰李西林先生知稼堂集書後。青集卷七



道光戊戌夏、諸城李公權守揚州、以震澤張君履所撰西林先生家傳見示、復以知稼堂集授讀。詩凡六卷、大都未通籍前及家居需次時所作居多。人或以先生宰邑佐郡之所設施未盡見于詩爲憾、文淇竊謂即此可以知先生爲政之勤也。夫人於少小之時耽于吟詠、積數十年之學力、其所得於詩者既深、一旦膺民社之寄、於布政暇時作爲詩歌、以吟詠其情性、是豈遽有妨於政。然宰劇邑、佐大郡、案牘之繁、日不暇給、而掬三寸弱翰、號召賓友、以風雅自詡、吾不知其於仕之道果能自信其優否也。先生捷南宮時、詩名動公卿間、而服官之後、捐棄不爲、故集中無在河南時詩。然而先生之宦績未嘗不可於少作見之。自蒲臺至興濟、題苦水云、涼燠燥濕、天宇寬、未審何方宰彈丸。水土異宜、方多端、習慣何有行路難。則勤恤民隱可知也。奉答座主金少伯云、捧檄奚妨晚、逢年恐未優。艱難添閱歷、樸訥避呀咻。則淡于榮利可知也。某令詩競爲市儈作、冰山甘與儒冠



爲禍水、則傳所謂發奸摘伏、激勸諸士者信已。看菊云、高閒差稱花標格、肯把寒香媚要津、則傳所謂以正議屈國泰者信已。嗚乎、士之有志于古者、當其跼伏時、激昂感慨、舉生平之抱負寓之于詩。及其居官任職、得尺寸之柄、可以行其所學、而考其所爲、顧不能與其言相應、甚至決裂破壞、與曩昔所言者適得其反、求如先生之政績與詩能一一印證者、有幾人哉。然則先生所以能自重其詩者、固有在矣。爰題末簡、以誌仰止之思云。

又撰李松谿先生研錄軒詩集書後。青集卷七

太守諸城李公以尊甫松谿先生詩集授讀。先生少孤、有至性、事母湯太孺人備極色養、終身如孺子慕。嘗受學于仲兄扶風君、仲兄歿、哭之、遂得咯血疾。年已及艾、嘗夢仲兄授讀時景況、覺而賦詩。今集中所載是也。蓋其孝友之篤、出天性而一無所矯強如此。官知縣時、甚著循聲。太孺人卒于衡水任所、喪具幾不給。士庶醵金以贖、乃得還。及罷任羅山、後令以倉



穀虧數不肯受代、紳士聞之、爭先輸納。去之日、持酒肴相餞者百里不絕。視前史所紀之循吏、何多讓焉。夫孝友循良之儒、其蘊于性情而措諸踐履者、本原深厚。由是發爲詩歌、即涉學稍淺、人猶將重其人而寶其詩、矧以先生之性耆藏書、兼好金石、其詩於和平冲澹之中、尤具典雅新穎之致、則其爲人所寶貴者、又當何如耶。太守莅揚半載、振興文教、釐革敝俗、父老歎爲數十政所未有。今讀先生是集、乃知太守之文章政事、所以令揚民思慕不忘者、其來有自云。

是年、與劉楚楨、楊季子重刊說文答問疏證六卷。

按李方赤序云、說文答問疏證六卷、甘泉薛子韻先生所著、陳石士侍郎亟賞之、鈔版閩中、而校讎未精審也。其友劉君楚楨孝廉、劉孟瞻明經、楊季子上舍、議重刊之。是序是年七月朔作、且繫諸此。

是年、琢齋翁躋九十、王句生作序爲壽。舍是集卷七

撰直隸州州判劉君墓表。青集卷九

君姓劉氏諱羣字又曾原名錫爵字得天先世蘇州人。明宣德間遷居寶應。八世祖永澄萬曆辛丑進士官兵部主事。與顧端文公高忠憲公劉忠端公講學東林世所稱劉職方者也。曾祖碩太學生祖斯陶奉祀生父大來揚州府學增生。君幼穎悟八歲能屬文稍長益致力于學家極貧叔祖端臨先生官丹徒訓導召至學舍授以經義學益進。汪容甫先生每奇君才謂端臨先生曰此君之高第弟子也。後將應縣試邑令新安李公與鄉先達語詢邑中年少有才學者先達首舉君名或以語君君慨然曰吾不敢因鄉先達以求進也。遂易今名終獲高列。洎應院試時方患瘍文成腕痛不可書同試生願以金百鎰售文稿君不與。後凡朋試屢有奉金倩代者皆峻卻之曰貪利則喪志逞才則遭忌吾不爲也。道光乙酉侍郎辛公從益督學江蘇選君充貢年已四十八矣。朝考就職直隸州州判歸里數



歲患鼻淵久不瘥。氣血始耗。復遽肝疾。竟以不起。生于乾隆四十三年十月初八日。卒于道光十五年五月二十三日。即以其年某月日葬於某原。配蔡孺人。生子三人。長某。次芳。芳早殤。次晉康。廩膳生。君既從端臨先生遊。學有根柢。自少至老。手不釋卷。丹黃繡校。簡畢爛然。然終不著一書。爲文出入韓歐。醞釀深厚。詩風格雅近中唐。偶有作。輒棄去。晉康輯其詩文稿。僅得十之二三。凡若干卷。藏于家。余耳君名久矣。每讀君文。冲和淵雅之氣洋溢楮墨。輒想像其人。願內交而不可得。歲戊子。余與君族叔楚楨同寓金陵。君來視楚楨疾。乃得相見。余謂君雅似喬君循吉。君於喬君爲鄉里後進。其高才不遇也同。而樸雅謙抑之度無一不相似。喬君身歿之後。子姓式微。而君之季子文采斐然。天殆有以昌君之學耶。顧余與喬君猶得侍几杖。敘殷勤。談笑終日。以申其繾綣。而於君握手數語。即別去。遂不復相見。以余契君至深。而會合之難如此。殆亦有數存于間。而非人所

能主者耶。君歿四年，君之子以狀介楚楨乞表墓之文。余義不獲辭。君雖易今名，而知交仍字君曰得天。余謂君之故字與行實相應也，因系以銘曰：不汨沒其所賦，不憂戚於所遇。生有錮之者耶？死無數之者耶？嗚乎！是爲吾友劉子得天之墓。

毓崧以左傳舊疏考正過訪康伯山，伯山賦詩贈先生。

按伯山詩鈔望雲集卷六云：劉孟瞻文洪子毓崧伯山攜其尊人所刻左傳攷異過訪，作此以贈，並質孟瞻門庭。忽見氣和溫，過訪從知世誼敦。如此丰標真玉立，慚余兒子誤金根。風詩卜氏西河衍，文望昌黎北斗尊。謂孟瞻一笑偶然同賤字，渾疑安石要爭墩。

按續纂揚州府志卷十三康發祥字伯山，歲貢生，工詩古文詞，性耿介。家貧，以著述自娛。著有三國志補義、伯山詩話、詩鈔、雜文、小海山房詠史詩若干卷，卒年七十八。

毓松補廩膳生。通集卷六亡妻汪孺人墓志銘

十九年己亥 五十一歲

春、前太守李方赤來揚。三月四日、先生與同人遊桃花庵、爲展上巳之會、因撰桃花庵展上巳會序。青集卷四

禊飲之事、由來尙矣。劉楨魯都賦云、素秋二七、天漢指隅、人胥祓除、國子水嬉。此秋禊也。而春禊爲盛。禮傳云、仲春之時、於水上翫潔、此春禊也。而上巳之禊爲尤盛。續齊諧記載、晉武帝問三月曲水之義、摯虞對以平原徐肇、生女不育、固爲不經、東晉對以周公飲洛、羽觴隨波、秦昭置酒、金人捧劍、其事於他書未之見、恐亦晉之節說。按風俗通義云、周禮、女巫掌歲時祓除疾病。禊者絜也、於水上盥絜也。已者祉也、邪疾已去、祈介祉也。韓詩外傳云、三月桃花之時、鄭國之俗、三月上巳於溱洧兩水之上、執蘭招魂、祓除不祥。齊書禮儀志云、三月三日、清明之節、將修事於水側、禱祀以



儒藏

劉孟瞻先生年譜 卷下



祈豐年。竊謂韓詩及風俗通所言祓除之義傳之自古而齊志所謂祈年亦有合於古者爲民請命之意。周禮太祝掌六祝之辭：一曰順祝，二曰年祝，三曰吉祝，四曰化祝，五曰瑞祝，六曰筴祝。鄭司農謂順祝順豐年也。瑞祝逆時雨，寧風旱也。祝有六而爲民祈年者居其二。蓋古者劬農重穀如此故於上巳之時除其災惡而迎其嘉祥。後人不察，以上巳爲遊豫之令節，抑亦務末而不尋其本也。道光己亥三月四日，太守李月汀先生以公事來揚州，其弟子趙子新沐、王仰賢、家模、姚惠伯、志僑、黃靜川、溍、錢備卿、文份、郭星白、庚吉、李楚珍、珩、方肖圃、鼎銑請公遊桃花庵爲展上巳之會。公去歲權守揚州，前後僅六月，政教肅清，民懷其惠。公眷念揚人於坐間詢問民生疾苦甚至。揚州當鹽筴彫敝之後，辛壬之歲繼以水災，困苦極矣。幸頻年豐稔，小民稍得瞻其家室，故望歲甚殷。與疇昔富贍之時以稼穡爲末務者，其情迥異。時方一月不雨耳，民已竊竊憂之。公詢知其情，方

愀然不樂。是日氣候驟暖，岸上行者解衣。磐礴至午未之交，雷雨大作，宣陽導滯，二麥昭蘇。即謂公之斯遊，有以逆時雨，順豐年也可。同人既作詩以詠歌其事，而文淇遂爲之序。

春黃春谷示族祖黃生號白山所著之義府字詁，屬先生爲校字。

按黃白山先生義府字詁序，青集卷五云：己亥春間，觀察黃承吉先生出義府字詁各一帖見示，曰：此余族祖白山先生所撰，新從文宗閣錄出者，屬爲校字，將以刊行。

秋諸生勸先生應試，以父琢齋公年踰九旬，故不復應。因疊前韻戲作別席號舍詩，以明心跡。青集卷十一

余自辛卯場後作別號舍詩，壬辰秋未赴省試，復疊前韻。甲午乙未爲及門牽率，不能堅守舊約。丁酉頭場坐席號甚委頓。己亥科諸生復有勸行者，賦此示之。



漫言廣廈萬千間、一宿蓬廬鬢更斑。似此折磨真不少、也應參透利名關。  
諸生懇款願依劉、勸我重吟白下秋。蒲柳自慚衰鈍質、銀河那許汎仙舟。

附和詩

孟瞻以別號舍詩見示次韻奉答

孫應科

聲名突過杜林間、

君著有左傳舊注疏證

鬢已星星戲彩斑。

尊公琢齋先生年踰九旬

梅柳紛

紵占春色、

謂蘊生賓叔

推君詞賦動江關。

從來鼎峙說孫劉、改歲聯吟白下秋。喬梓同登應不遠、

雍正癸卯科、先高祖及先曾祖

同捷。道光庚子科、盛事屬君家矣。

莫教散髮掉扁舟。

按此和詩非此年所作。以云道光庚子科、盛事屬君家也。庚子毓崧獲優貢。

是年撰銅陵縣典史程先生墓表。青集卷九

表云、道光十九年四月八日、前銅陵縣典史程先生卒。即以其年某月日、



葬於泰州南鄉之張家堡。與其配兩孀人合兆。家孫祥棟以狀徵銘。祥棟與其叔字光齊名。予先後與締交。得聞先生行義甚悉。宜有銘。先生姓程氏。諱應鍾。字序東。先世休寧人。康熙中。由江都遷泰州。曾祖諱雲鳳。誥贈通奉大夫。祖諱盛修。雍正庚戌進士。由編修改官御史。進詠史樂府十二章。得旨褒獎。後官至順天府尹。考諱選青。乾隆癸酉舉人。先生幼承家學。熟於史漢。工制藝。尤精筆札。乾隆中。遵例以未入流投効。分發安徽。補銅陵縣典史。自漢世嗇夫游徼。由三公辟薦。至達官者。史不絕書。沿及唐宋。茲風未沫。故其時多魁傑之選。後世微員。不能有所拔擢。居其職者。率閤冗不治事。其不肖者。至勾通胥吏。因緣爲奸。而忘其恥。先生獨毅然有所不屑也。銅陵故瘠邑。又屢被水。先生奉檄散賑。有蠱役盜用錢二十千。立發其奸。其極貧不能待大賑者。先捐廉以濟。凡辦賑者七。前後所捐踰千金。或遇水阻。不得前。則解鞵以涉。巡撫荆公道乾時。爲池州守。欲拔用之。

不果。後捐升縣丞。在任候銓。嘉慶十三年。獄有逃犯革任。旋緝獲開復。遂請告歸。士民送江上。有泣下者。而是時山陽冒賑之案適發。郡守縣令皆獲罪。大吏亦受嚴譴。人乃歎先生之廉能不可及。而尤惜其治績無由上聞也。後十餘年。祥棟至銅陵。扶其祖妣張孺人柩。邑民環問先生起居。爭來襄事。其視古循吏得民心者。亦豈有歉哉。先生歸里後。事其伯兄甚謹。年踰七十。而拜跪應對之節。罔或失。訓勉子孫。各勤所事。絕不問家人生產。先是。京兆公既乞養歸。其別子有留京師者。因家焉。宇光幼往依之。以年例已符。入籍宛平。道光丁酉。舉順天鄉試第一。先生年已八十二矣。踰二年卒。春秋八十有四。先娶延安府知府漢陽張公輔女。繼娶澳門同知長洲宋公清源女。生男六人。紹煥。候選從九品。早卒。次紹安。紹裘。紹康。紹沅。次即宇光。女四人。皆適舊族。孫四人。祥棟。廩膳生。祥森。祥桂。祖望。曾孫葆慶。貽慶。銘曰。



矯矯先生、能守其身、祖武是繩。不以官卑、而怠厥司、以禮自持、救民之災、如己斯飢、清白是貽。胡此末職、不稱厥德、下民其惑。天聽維聰、福祿來崇。不於其躬、於其孫子。報施之理、斯銘請視。

是年、撰娛景堂集序。青集卷六

竇應劉君幼度、以嘉慶丁卯舉孝廉、屢躋禮闈、老始爲五河校官。未滿任、輒請告歸。道光己亥六月、以疾卒于家。時君弟楚楨館于郡城、聞訃奔歸、檢其遺稿、得娛景堂集三卷、皆君所手訂者。楚楨既來郡、舉以示余。余受而讀之、其說經之文、不主故常、要能實事求是。其尤精者、如易否卦小人吉、大人否、亨、謂吉當作喜、古篆文吉喜二字相似、易爲君子謀、不爲小人謀、故言利貞、不言利不貞。言貞吉、不言不貞吉。言利禦寇、不言利爲寇。上九先否後喜、以否喜對言、尤其明證。洪範九五福、五曰考終命、謂考讀爲左氏傳下臣獲考之考。釋詁、考成也。赴義捐生、以成其志、謂之考。故解揚



臨刑而曰獲考終命、謂終其正命、以見考非老壽之謂。蓋赴義捐生者雖不壽、不得謂之凶短折、偷生忘義者雖壽、不得謂之考終命。禮記中庸禘嘗之義、謂專言禘嘗者、蓋謂明乎所以重之之義、則治國不難、非泛言祭祀。祭統云、古者于禘也發爵賜服、順陽義也。於嘗也出田邑發秋政、順陰義也。故曰禘嘗之義大矣、治國之本也。朱子謂四時皆祭、舉其一非是、皆右功于經義。其他論史諸作、具有特識、文筆亦廉悍、可以傳後矣。憶余因楚楨納交于君、幾二十年、君嘗往來郡城、每與談論、偶出所作詩示余、既爲之序、其鶴汀詩鈔矣、而絕口不談經史。身沒之後、余得讀君遺集、乃知其于經史之學、至爲深邃。余前序君詩、謂謙雅之量、不可及者、於茲益信。爰促楚楨付諸梓、而暢述其大略、以告後之讀君書者。

按、楚楨年譜有云、翌年庚子二月、楚楨赴京、應禮部試、則先生撰此序。恐在是年、故繫之。

是年女汝士歸江都國學生田溥光。劉容季氏歷錄亡姑國子監生田君妻劉孺人墓誌銘

按續纂揚州府志卷十一人物志云、田溥光字季華、江都人。欲編廣陵文徵未果、編修汪廷儒輯廣陵思古編、溥光舉所搜集者授之。蓋田溥光文淇女夫、惜哉早歲而卒。再按府志藝文志、田溥光著有揚州金石記、金石話目、耕齋筆記、漢學堂詩文集等、生卒未詳。

二十年庚子 五十二歲

三月、撰黃白山義府字詒序。青集卷五

己亥春間、觀察黃春谷先生出義府字詒各一帙見示、曰、此余族祖白山先生所撰、新從文宗閣錄出者、屬爲校字、將以刊行。文淇受而讀之、其有原書可檢校及灼然知爲筆誤者、謹爲改正。不知則闕。其間有兩書俱見者、如毛詩之信信、漢官儀之僕射、及考工記兩欒謂之鈇、國語執而紡於



儒藏

劉孟瞻先生年譜 卷下

庭之槐、彼此俱見、當是編纂時偶未及檢。又如義府通峻條引三國志趙達傳注、而無所申釋、亦是寫者脫誤。既無別本可校、謹仍其舊、不敢妄有改易。是書博大精深、所解釋者皆實事求是、不爲鑿空之談。夫聲音訓詁之學、於今日稱極盛、而先生實先發之。義府僂僂條下云、僂僂、上力主切、下於主切、俯身向前也。此背曲之病。莊子作疐僂、字書僂佝、當即一義。又左傳臧會竊其寶龜、僂句、此亦以其形名之。史記甌婁滿籥、甌婁高地、亦以其形名之。據莊子疐僂、則僂僂、僂佝、僂句、甌婁皆當作此音。以語有倒易、字有通借、諸書昧其義、遂異其音。此與王懷祖先生廣雅疏證拘婁條下說同。女陽物而晦時條下云、左傳是謂近女室、疾如蠱、非鬼非食、惑以喪志。此本四字成句、二句成韻。隸釋孟郁修堯廟碑、乾川見徵條下云、漢碑多以川爲乾坤字、無作坤者。易坤者順也、順諸川聲、而川又諧紉馴諸字。疑古坤字作川者、假借用之。此與王伯申先生經義述聞同。字詁吹字



條下云、許慎注、詮詞也、引詩吹求厥寧。愚按、詮詞謂自解說其上文語意之詞。詩適駿有聲以下四句、皆發明文王有聲之義。注但以適爲發語詞、是不知說文詮詞之訓。此與戴東原先生毛鄭詩考正說同。又如以與而通用、引樂記治世之音安以樂也字一作兮、引淮南子其儀一也、心如結也。有讀爲又、孟子聖人有憂之、與上堯獨憂之句相血脉、均與伯申先生經傳釋詞同。是書別無刻本、諸公固所未見。然如以上所舉數端、皆經生家奉爲圭臬者、而具見于先生書中、亦足見先生小學之精矣。他如魏其武安列傳、程李俱東西宮衛尉。今衆辱程將軍、仲孺獨不爲李將軍地乎。謂此語隱隱帶刺。時李廣爲未央衛尉、程不識爲長樂衛尉。未央宮乃衛天子、長樂宮乃衛太后、意言投鼠忌器、以挑在坐諸人之怒。隸釋都鄉正衛彈碑、據漢官儀、民年二十三爲正、一歲爲衛士。正謂正卒、衛謂衛士。駁方桐山引周禮注街彈室之誤、均足信今而傳後。其餘有關於經史者、不

可枚舉、讀者當自得之。觀察嘗謂古人文字重聲而不重形、故得其聲、凡與聲相近之字皆可通假。近爲文說、發明以聲爲網之義。文淇、樞衣之際、幸得飫聞其說。觀察初亦未見先生之書、而先生書中論字有初義之音、有次義之音、或字本無義、以聲取之、或借音專而本音遂廢、幼眇之論、已見萌芽、將待觀察而昌明之矣。按刻本義府字話以此序爲跋。

春、應郡守汪于泗請、與郡中紳士商榷恤養局事。通集卷五揚州恤養局新建總坊記

按、毓崧代郡守汪于泗所撰之揚府恤養局新建總坊記。通集卷五云、余以庚子春來守此郡、甫下車、即延董局紳士魏太令廷瑜、程指揮光治、吳孝廉文鑄、劉明經文淇等在局、公同商榷建一總坊。

是春、毓崧舉優貢生。通集卷六亡妻汪孺人墓誌銘

八月八日、父琢齋公卒、年九十有二。先生撰先府君行略。青集卷十



行略云、府君姓劉氏、諱錫璵、字懷瑾、一字琢齋、先世居溧水。曾祖國學生諱春和、始由溧水遷揚州。以長子守備君起、寅貴、贈明威將軍。祖諱起泰、國學生。考諱隱、與其從兄儒林君墮、占籍儀徵、補博士弟子。府君昆弟六人、伯仲早卒。三伯父諱錫章、僑居鹽城。四伯父諱錫璜、補郡文學、出嗣儒林君後。六叔父諱令聞。府君年九歲、即失怙恃、家室蕩然、遂至鹽城。值三伯父爲事牽累、窮于生計、不能撫育、府君賣豆于鹽城市上、日得二十錢、僅供饘粥。四伯父廉知之、乃往携府君歸、親爲教讀。是時府君年十二歲、始入家塾、讀四子書、詩、書、易三經。至十四歲、四伯父又卒、遂廢讀、在族兄肆習賈。未及三載、有同業張翁者、習知府君年雖童幼而老成幹練、遂以肆事託焉。府君顧念每歲所得不過二十金、無以立家業、遂有志學醫。購四大家書、讀至夜半、晝則執業、默誦所讀書。聞人有奇方、多方購覓、躬自修合。求治者其效如神、日不暇給。如是者幾十載、張翁乃另延一人治肆



事仍請府君總理其綱。府君乃賃宅別居。自是病家有餽遺者始收受之。前此不受一錢也。年三十五娶吾母。凌孺人。時六叔父已成立。舉室來依。家累日重。府君素性恬淡。不與人爭利。每揭債以供朝夕。遇貧苦者。悉心診治。或不能具藥餌。則出資助之。嘗有役夫某住河東。患背疽。府君每日徒步渡河。其家赤貧。無甘旨調理。府君袖錢往遺之。又有患危證者。衆醫莫能治。其家已無生望。最後延府君往。時值炎夏。斗室中狹隘殊甚。患者臥牀。不言語者已三日。瘡口潰裂。蠅蚋叢集。家人莫敢嚮邇。立戶外以長竹繫塵尾爲之驅蠅。府君一視。輒謂可治。其家猶未敢信。府君曰。汝家貧若此。吾豈望報哉。然其證實可生。遂朝夕往視。未匝月全愈。若富貴之家。隨其酬謝。從不之較。亦未嘗以他事干謁。自六十後。家計稍裕。始免揭債。有餘。即以周窮乏。先是有祖遺香肆<sup>③</sup>一區。長房次房輪年直業。其不直業之歲。直者貼銀三十金。次房以府君幼弱。遂獨據其業。起家至數萬金。時



府君困甚、親族勸以約劑往、通計三十年應得之數、不下千金。否則、令其還肆。府君曰、吾兄若慷慨者、不待吾告、告則爭、爭而得利、吾弗爲也。及其家中落、子孫幾無以自存、府君極力拯助之、無小吝。凡族中無庄後者、每歲必省視其墓、歷數日乃罷。弟子貧不能具修脯者、盡心教誨之。年至八十、有延請診視者、始謝絕之。然遇有危險之證、踵門來告者、猶爲之處治方藥。鄉之人言及府君者、無不稱其厚德焉。性好讀書、資質最敏、壯年所讀者、至老猶能背誦。暇即瀏覽載籍、以自娛樂。後因目力昏耗、乃已。府君自悔幼時失學、不能承先人儒業、僅以貲補國子學生、乃令不孝文淇讀書。每自塾歸、必督課盡一燭、率以爲常。時值屢空、親串有勸令廢讀者、府君堅執不肯。及文淇應布政司試、凡十四次無所遇、而府君初無幾微不豫之色。蓋冲和澹定、不以人事得失介懷類如此。以故年登九十、矍鑠強固。去歲精神稍覺衰弱。今歲夏秋間、漸形頹憊、然飲食猶能如常。詎意寢

疾二日、遂至不起。嗚乎痛哉。伏念府君少時流離顛沛、中年勞苦拮据、可謂備生人之極艱。竭力經營、家獲再造、而力行善事、至老不衰。生平隱德、爲文淇所不及知者甚多。積善之躬、當食厚報。顧文淇學業謏陋、不能有所顯揚。蚤夜常用自疚。然以府君精力強固、人僉謂期頤可卜。即文淇之心、亦私冀優游頤養、可稱百歲之觴。乃侍奉無狀、竟隕天年。此皆不孝罪孽所鍾。天降之罰、夫復何尤。嗚乎痛哉。府君生于乾隆十四年六月十四日丑時、卒於道光二十年八月初八日戌時、享年九十有二歲。恭遇覃恩、三膺粟帛。配凌孺人、先府君十八年卒。生子一、即不孝文淇。嘉慶己卯科優貢生、候選訓導。女一、適同縣府學生員陳傳洛。孫一、毓崧、道光庚子科優貢生。孫女一、適國學生田溥光。曾孫壽曾、幼。文淇將以明年二月某日奉府君柩、與吾母凌孺人合葬于城西郝家寶塔之原。文淇苦塊餘生、昏迷瞽亂於府君懿行、罔漏實多。然不敢以無實之辭誣我先人。伏惟當代



儒藏

劉孟瞻先生年譜 卷下

立言君子賜之傳銘以光寵歟則世世子孫感且不朽謹狀。

十一月三日友人方中卒病革時屬毓崧爲所著易學五書撰序。通集卷

二方氏易學五書序

是年撰項羽都江都考。青集卷四

前漢書地理志廣陵國高帝六年屬荊。毛本荊下衍州字非也。十一年更

屬吳景帝四年更名江都武帝元狩三年更名廣陵領縣四廣陵江都高

郵平安據志則江都郡乃景帝所立其以江都名郡者以郡有江都縣也。

顧廣陵之名已見于史記六國表楚懷王十年城廣陵此人所共知而江

都之名景帝以前未之前聞今按史記秦楚之際月表知江都之名項羽

時已有此縣。太平寰宇記謂漢景帝立江月表分二十一格第一格載義

帝事第二第三格皆言項羽事第二格言諸侯尊懷王爲義帝西楚伯項

王籍始爲天下主命立十八王都彭城第三格言項籍自立爲西楚霸王

都江都。以下十八格分言十八王所都之地。史記高祖本紀、義帝元年正月、項羽自立爲西楚霸王、王梁楚地九郡、都彭城。以下紀十八王所分之地。四月、兵罷戲下、諸侯各就國、項羽亦于是月出關、使人徙義帝于長沙郴縣。是義帝之徙郴縣、亦在四月也。項羽本紀亦言項王自立爲西楚霸王、王九郡、都彭城。而月表第二格言項羽都彭城、第三格言都江都者、江都乃項羽初都之地也。懷王初都盱台、後徙盱台之彭城。項羽于義帝元年正月猶在關中、分天下、立諸將爲侯王、是時雖有都彭城之意、而懷王尙在彭城、故先以江都爲都。羽本紀云、漢之元年四月、諸侯罷戲下、各就國。項王出之國、使人徙義帝長沙郴縣。是羽于四月始都彭城。且懷王未徙郴縣之先、彭城方爲懷王所都、羽豈能與懷王共都一地。此亦事理之顯然可見者。故知江都爲項羽初都之地也。羽雖未至江都、然先議所都之地實在江都。太史公于羽本紀直言都彭城、不言都江都、所以紀其實。





月表兼載都江都所以存其名。此月表紀項羽事所以獨立二格、一載都彭城、一載都江都也。此正史公體例之精。若所都之地無先後之分、則月表不必立二格矣。漢書異姓諸侯王表紀項羽事、第立一格、言都彭城、從其略也。必知廣陵江都爲項王所分之地者、史記羽本紀謂羽王梁楚地、漢書高祖本紀五年、漢王與齊王信、魏相國越期會擊楚、至固陵不會、漢王謂張良曰、諸侯不從、奈何。張良曰、楚兵且破、未有分地、其不至固宜。今能取睢陽以北至穀城、皆以王彭越、從陳以東傅海與齊王信、則楚易破也。從之。羽死、漢王下令曰、楚地已定、義帝無後、欲存恤楚衆、以定其主。齊王信習楚風俗、更立爲楚王。王淮北都下邳。魏相國建成侯彭越勤勞魏民、卑下士卒、常以少擊衆、數破楚軍。其以魏故地王之、號曰梁王、都定陶。是以羽之楚地分信、羽之梁地分越也。高祖本紀六年冬十月、人告楚王信謀反、執之上、還至洛陽、赦韓信。春正月、韓王信等奏請、以故東陽郡、治



陵、說。鄣郡、吳郡五十三縣立劉賈爲荊王、以碭郡、薛郡、鄆郡三十六縣立見後。鄣郡、吳郡五十三縣立劉賈爲荊王、以碭郡、薛郡、鄆郡三十六縣立弟文信君交爲楚王。楚王交傳、高祖六年、旣廢楚王信、分其地爲二國立賈爲荊王、交爲楚王。是又分韓信所封之楚爲二國、而以故東陽郡、鄆郡、吳郡即會稽郡爲荊國也。黥布傳、布發兵反、東擊荊、荊王劉賈走死富陵。高祖本紀、十二年、詔曰、吳古之建國也、日者荊王兼有其地、今死亡後、朕欲復立吳王、乃立沛侯濞爲吳王。吳王濞傳、立濞爲吳王、王三郡、五十三城。所謂三郡五十三城者、即賈所封故東陽郡、鄆郡、吳郡五十三縣也。江都易王非傳、初立爲汝南王、吳楚反時、非自請擊吳。吳已破、徙王江都、治吳故國。子建有罪自殺、地入于漢、爲廣陵郡。廣陵厲王胥傳、武帝元狩六年、立爲廣陵王。前漢地理志廣陵下云、江都易王非、廣陵厲王胥皆都此。由易王厲王而上、遡之、吳王濞所封之地、因荊王賈、賈因楚王信、信因項羽、有明徵矣。灌嬰傳、齊地已定、使嬰別將擊楚將公杲于魯北、破之。前至下相



以東南僅取慮、徐、度、淮，盡降其城邑。至廣陵。蘇林曰：別將兵屯廣陵也。師古曰：此說非也。謂從下相以

東南盡降城邑。乃則廣陵為項羽地，尤為確證。或問曰：廣陵為項羽地，信至廣陵，皆平之。

已。第前志云：高帝六年屬荆，不知未屬荆之前，廣陵、江都二縣究屬何郡。

曰：是則水經注言之矣。水經注淮水篇云：淮陰縣有中瀆水，首受江於廣

陵郡之江都縣，縣城臨江。下云：楚漢之間為東陽郡。高祖六年為荊國，十

一年為吳。然則廣陵、江都二縣楚漢之間屬東陽郡。

太平寰宇記謂揚州在楚為九江郡地，項

羽以封英。漢書地理志雖無東陽郡，而高祖紀云：以故東陽郡、鄣郡、吳郡布者，非也。

立劉賈為荊王，是楚漢之間有東陽郡矣。文穎注：東陽，今下邳。文穎後漢

時人。按後漢書郡國志：下邳國，武帝置為臨淮郡。是後漢之下邳郡即前

漢之臨淮郡，亦即楚漢之間東陽郡也。前志：臨淮郡有東陽縣、焦氏里堂

謂東陽郡自治廣陵，廣陵為附郡之縣。東陽郡自在廣陵之東，東陽郡不

治東陽，其論甚竅。而項羽之都江都，自來方志諸書皆未之及。幸賴月表

有此一語。余故廣引史漢諸書證成其說。似足以爲江都最先之故實矣。又按史記貨殖列傳云。夫自淮、北、沛、陳、汝南、南郡。此西楚也。彭城以東、東海、吳、廣陵。此東楚也。衡山、九江、江南、豫章、長沙。此南楚也。項羽本紀云。項王自立爲西楚霸王。王九郡。都彭城。孟康注云。舊名江陵。爲南楚。吳爲東楚。彭城爲西楚。即據貨殖傳而言。羽立自立爲西楚霸王。都彭城。而東海、吳、廣陵諸郡亦羽所分之地。唐人之詠廣陵者。每以西楚稱之。司空曙送鄭況往淮南詩云。西楚見南關。韓翃送友之揚州詩云。綠樹叢垓下。青蕪闊楚西。詠揚州而專及羽事。又嘉靖志載隋彭城閣。引大業雜記注云。舊爲彭城鄉。煬帝因地以名閣。揚州而有彭城鄉。是皆因江都爲項羽地。故有西楚彭城之稱也。

按青集此後收載阮元附跋。然視揚州叢刻所載附跋少其前半。

又按揚州叢刻所載項羽都江都考跋云。江都縣衙前榜二。其一曰邑



儒藏

劉孟瞻先生年譜 卷下

壁荆王、汪容甫先生據史駁之、謂孝景前四年始徙汝南王江都、荆王  
劉賈以高帝六年封、至十一年爲英布所殺、無後、其立國至淺。賈都於  
吳、此地爲其支邑、自名廣陵。至孝景置江都國、賈死已四十三年。江都  
縣之名、前此絕無所見、疑即託始於此。按樂史太平寰宇記謂漢景帝  
立江都、遂因國以立縣、汪氏之說蓋與之同。近按以下文青劉孟瞻明

集收載之。

經文淇作項羽都江都考、據史記秦楚之際月表第三格、知項羽自立  
爲西楚霸王、都江都。然則項羽曾以江都爲都、是秦楚之間早有江都  
之名、非始於景帝矣。此說甚爲新異可喜。及檢新揚州府志沿革建置  
門有雙注云、史記秦楚之際月表有項羽都彭城、一本又云都江都。考  
諸書無羽都江都之事、殆傳刻誤。此蓋嘉慶年間修志者見有無江都  
之本而致疑也。明人程正揆所刻張守節正義本月表脫去都江都三字。余檢至此、亦爲之疑。因思  
余家文選樓有舊本史記、檢之、則是元中統二年連索隱之板、明明有

都江都一事爲之大快。然則府志所云有江都者古人之遺無者爲妄人削去也。元中統與宋理宗時相值則與宋板無異。桓字缺筆世所習也。此書古色古香恐勝於今單行索隱之處尙多俟再校之。因復思古人如項羽者滅秦封漢氣蓋一世快意之事正在爲霸王都江都之時。而江都王者以項氏爲最先。乃此事黯然不彰。縣縣欲絕幸賴明眼人於旁行斜上蠅頭細書之月表識別而出而又得此霉爛蠹蝕五百餘年之故紙爲之確證所以古本之可貴如此。道光二十年儀徵阮元跋。

是年與楊季子等刻薛子韻所著文選古字通疏證六卷。

按通集卷十三文選古字通疏證序代涇縣程君惟善作云某以嘉慶中遊揚州與甘泉薛君子韻同肄業於梅花書院以文行相砥礪者且二十年。子韻博極群書詞藻鴻茂尤精於小學著說文答問疏證六卷。又以文選多古字思爲文選古字通疏證一書草創有年尙未卒業。道

光戊子冬、新城陳碩士師督學福建、延子韻往襄校。己丑秋、按臨汀州、子韻猝得疾、卒於行館。碩士師遣使護其喪歸、而出貲屬閩士爲刻說文答問疏證。校讐者未能精密、往往參以臆見、碩士師深以爲憾。某時官江西、寄金至揚州、屬友人寶應劉君楚楨、甘泉楊君季子、儀徵劉君孟瞻詳加審定、重梓行之。而諸君已先期約同人醵金、另爲刊板。因就文選古字通疏證內擇其首尾完具者錄出六卷、即以某所寄金付諸梓人、而問序於某。此序作于辛丑季春、然其開雕在于此年孟冬。

二十一年辛丑 五十三歲

二月、奉父琢齋公柩、與凌孺人合葬于城西郝家寶塔之原。青集卷十先府君行略

四月、撰夢陔堂文說序。青集卷六



儒藏

劉孟瞻先生年譜 卷下



夢陔堂文說者、觀察黃春谷先生之所作也。先生以揚雄有童子雕蟲篆、刻壯夫不爲之語、而後世之輕視文辭者、輒祖述雄語、以爲口實。雄又以史遷行不副文、是非謬於聖人、而班固亦即以其語爲傳贊、又申之以先黃老、後六經等說、儼然與雄爲一唱一和、因作文說正之、凡若干篇。其中論雄者至多、而論固者僅一篇、以是書專爲辨雄而作也。書作於癸巳、成於庚子。先梓其十一篇、而命文淇序其緣起。夫雄固之失、先儒亦嘗言之、而雄之作、奸於前、固之效尤於後、則前人從無論及之者。先生慨然發憤、條舉二家之失、皆根據史傳、不爲鑿空之談。雄謂辭賦壯夫不爲、而雄所作諸賦、正在壯年。雄自序其賦、謂多諷諫之辭、人皆信以爲實、而不知賦作在先、序作在後。賦作於成帝之時、比昭儀於西王母、又以崑崙爲西王母所居、賦中所用故實、皆係崑崙、其所以獻媚於昭儀者至矣。晚年作序、乃自託於諷諫、是其巧於作僞也。其他雜文及法言、太玄諸篇、皆一一條



其謬妄。而司馬相如、東方朔之爲雄所排詆者，亦皆辨明其冤。廓清之功，比於武事矣。至於班固誣遷之罪，較甚於雄。漢書不應爲雄立傳，其所以立雄傳者，固恃雄爲奧援，以爲誣遷之地。他傳皆作史者撰述之辭，獨於司馬遷、揚雄二傳，則全錄二人自序之辭。蓋固若實敘二人之事，則遷所以任中書令之故，與雄仕莽之事，皆不得不言，故創爲此體。且史公報任安書，先言陵敗書聞，即叙召問之辭，後乃言李陵旣生降，是聞敗在前，聞降在後。班固於李陵傳顛倒其書中之事，以爲陵降之後，遷猶推言陵功。遷作中書令，在武帝旣悔之後，固沒而不叙，但言尊寵任職。夫中書令即尙書令也，爲權要之職，固於百官公卿表不獨不著，其中書令之官，並尙書令之職，而亦減滅之。又於成帝紀及張安世、京房、賈捐之、劉向等傳，任意增添，以成其含混之計。先生披郤導窾，迎刃而解，可謂洞悉其情狀矣。至其所以表章太史公者，尤不遺餘力。謂史公自序中兩太史公曰：前稱

其父談後乃自稱故別行另起。徧舉孔子世家及老莊申韓仲尼弟子孟子荀卿諸列傳之辭及五帝本紀贊以明其所以尊聖表經而黜黃老者。甚至外戚世家危言讜論委曲申明莫非原本聖經以爲垂戒章比句櫛洞豁昭晰洵讀史者之一大快事也。雄又謂靡麗之賦勸百而風一特設風勸二字以陷司馬相如乃先誤解詩序。序謂上以風化下下以風刺上主文而譎諫言之者無罪聞之者足以戒故曰風乃所以明正風而非變風。自雄以風爲刺惡而後人之讀詩序者不明風刺諫戒等本然之字義以爲屬於衰世閤主之規譏而詩人溫柔敦厚之旨以失。先生謂六經莫外於小學小學者即載道之文字而文字之訓詁莫非本於聲音故凡字義以所從之聲綱爲主而偏旁乃逐物形迹之目。又謂字義必視乎隨文所用而字之本義則一核其本字之聲斯義無不明而其字義遷流之故亦即於字中可見明乎此則知風刺諫戒等字初不主于刺惡而詩序上



以風化下數句、益確然知爲正風、而非變風。此皆發前人所未發者、尤治經者之一大快事也。先生嘗謂著書立說、原不必好議前人、然學術之是非、關乎人心之邪正。迹雄之所以毀遷者、乃惡遷之尊孔孟、闡六經於前、無以爲己之地、故謂子長云五經不如老子之約、以見遷之不能闡明聖道。其實遷無此語、即遷父談亦無此語。雄組織談之語意、以成此辭、固之所以毀遷者、固效遷之體例、以爲漢書、攘竊其辭、又欲沒遷之善、以揚己名、乃多爲誣陷之語、使徒震乎揚班之名、而一任其是非混淆、邪正倒置、亦學術人心之患也。世之讀是書者、苟能細爲尋繹、則先生嘉惠來學之意、與其不得已之苦心、其亦可以共見也已。因撮舉是書之崖略、以諗世之實事求是者。

冬、撰舍是集序。青集卷六

昔劉知幾謂作史有三長、曰才、曰學、曰識。後人取以論詩、謂作詩者亦必

具三長、而後其詩乃工。錢辛楣先生申其說云：放筆千言、揮灑自如、詩之才也。含經咀史、無一字無來歷、詩之學也。轉益多師、滌淫哇而遠鄙俗、詩之識也。是固然已。竊謂三者之中、尤必以學爲本。才非學則不展、識非學則不卓。吾友王君句生、性情肫篤、淵源庭誥、工爲古文詞、尤好爲詩。自漢魏以及三唐、剖析原委、考究得失。其於諸家體製、聲調神韻、體會至微、而抉擇至當。故其爲詩也、典雅和平、舉世俗疎淺浮薄之習、一洗而空。吾於是歎句生才之博、識之高、而尤服其學之邃也。句生旣長於詩、願不欲以詩自見、而名其集曰舍是。蓋深知學詩之難、而又以士人所當學者、非詩之所得盡。故前此數十年、專用力於詩、亦旣卓然有以自見、而猶歉然若不自足、謂不能逮古之作者。後此則屏棄一切、務爲有用之學、深以從前之作、輟爲恨。謂爾後詠歌之事、不擬更作、而欲專力治經、以續成舊學。其意謙而志銳、爲如何邪。昔洪稚存、孫淵如兩先生、皆先爲詞章之學、而後



從事於經、卒之經術文章兼擅其美。以句生之勤學若是、其於詩也、既奄有衆長、則其治經也、必能發揮前賢之微言奧義矣。余才識謏陋、所學又不能專、遜於句生遠甚。頃以梓詩屬序、固辭不得、因念句生好左氏學、左氏史家之祖、遂舉三長之說以復焉、未知有當於句生之意否也。

冬、與毓崧校勘宋元鎮江府志。青集卷五校刻宋元鎮江府志序

是年、友人汪孟慈督餉兩淮、因與先生及汪廷儒首唱、請旌明末揚州殉難貞烈婦女千餘人、建坊入祠、歲時奉祀。汪孟慈先生行述

按、續纂揚州府志卷九云、汪廷儒字醇卿、儀徵人。道光二十年舉人、二

十四年進士、改庶吉士、授編修。二十六年、典試江西。咸豐元年、分校鄉闈、胥以得士稱。生平友愛篤行、有族弟廷儀少失怙恃、依廷儒爲生、待之如己弟。居鄉以郡中節孝年久湮沒、請建祠坊。又爲合郡亡友刊古今文傳世、名廣陵思古內外篇。自著有延月軒古文鈔、知榮根味軒詩



集年四十九卒於京邸。子有泰、庠生。

是年撰經遺堂集序。

江都韋西山先生博學通才、所著詩文詞集二十六卷、蔚然鉅觀、丁小研比部序中言之詳矣。文淇與校字之役、獲觀全集、竊歎先生之政事卓絕、迥非尋常俗吏之所可及也。先生以名進士出宰廣西、歷蒼梧、懷集、馬平、凌雲四縣、以彊直爲同僚所忌、讒諸上官、卒以軍需案罷官、謫戍、士論惜之。其在馬平也、江上有搶奪案、先生聞報、即馳騎往捕、賊方入鄰村分贓、未散、全數弋獲。一訊服罪、即日具讞詞以上。每冬初、粵東將軍委弁赴鎮買馬、至柳江、移縣代雇民船。先生以非民情所欲、爲免其役。湖南苗之叛、督撫赴柳江防堵、懷遠令某捕得難民七十餘名、誣服從賊、招解到郡、檄先生覆訊。平反其獄、難民得釋。縣捕役名曰鷹捕、有蔣標者、索事主賄、先生立斃之杖下。一縣肅然。提標兵七千名在城、歲終例借縣倉米千石、



歷年多不能給。先生力爲預籌、如數支借、六營歡感。此皆見于題馬平衡齋詩注中者。其在蒼梧懷集、凌雲也。地尤繁劇。凡有來訟者、先生據几、手自立讞、凡二千宗、皆剖斷明允。其見於詠歌者、則如集中箬葉刀、青竹竿、一片碣、山有木、諸樂府是已。而先生顧歉然不敢自矜也。其蒼梧行部詩云、兀然據牘背、涕淚下被筆。才拙勉清靜、此外又無術。懷集縣憫農行云、我來因陋無良籌、民訟水利爭呶囁。眼前勘斷非遠謀、勸分行部心懷羞。則其勤求民瘼、不自滿假可知。又如泗城府復南北關、左江江心巖暨搖人獻歲、岑將軍廟諸碑文、具見先生不鄙夷其民、無事不與民休養。而其正祀典、釐民俗之意、反覆詳盡。其治視古人亦何多讓。後之人欲考先生政事者、胥可於詩文中求之、則是編固不可不亟刻也。先是甲午乙未間、余與小研比部嘗同文酒之會、每言先生全集副本久藏笥中、行將付梓。未幾、而比部遽歸道山、茲事遂輟。今年春、先生高弟江君鳴玉、文君汝梅、

范君凌雲、楊君亮暨同志友夏君慶保、汪君廷儒搜求先生遺書、力謀剞劂。適程君焜得一寫本於其族子雅扶處、自歛郵寄、較比部所藏尤爲完善。比部喆嗣光煦篤念師門、追承先志、遂以百金付余、俾鈐諸木。同里岑君建功、黃君奭、蔣君照、陳君輅復出貲刷印百部、令讀者觀爲快。而先生之孫光祖亦於是秋補博士弟子。余故備述先生政事之美、見循吏之必當有後、並是集刊布之難如此。光祖其克守遺經、繼先生未竟之緒也。

按此序云先生之孫光祖亦於是秋補博士弟子、而檢光緒江都縣續志、卷十六韋光祖補博士弟子亦在道光二十一年。且是書既是年孟冬所刻、則此序作于是年也明矣。

二十二年壬寅 五十四歲

二月二十二日、孫女順曾生。劉容季氏啓錄

四月、代阮伯元撰校刻宋元鎮江府志序。青集卷五



余家久藏宋嘉定、元至順寫本鎮江志二部，乃乾隆六十年宣城張木青學士燾所贈之書。嘉慶間，曾經進呈內府，又錄兩副本，一藏家中文選樓，一藏焦山書藏，以待有志者刊之。良以二書有關於京口之掌故甚鉅也。京口自東晉以來，屹爲重鎮，流民僑郡，分併改隸，都督開府，參佐從事，寄治版授，建置紛煩，以及宋之差遣，元之祿屬，讀史者憚於鉤稽，往往沿訛襲謬。今詳觀宋志，於六朝僑寄郡縣縷析條分，於節度觀察等官罷復紀之甚詳。其刺守歷任年月，於紀傳所不載者，皆稽考得其次序。是故一人之傳，必參酌群書而後定。如刺史韋損傳，以唐地理志、練塘碑及李華復練塘頌序、招隱大律師碑參定。都知兵馬使張子良等傳，以新舊唐書、李錡傳、舊唐書、憲宗紀、通鑑、太平廣記參定。此例爲前此作郡志者所未有。至於元至順志，本承宋志而作，然絕不勦襲其書。宋志於刺守宰貳等官，載至嘉定九年止，而元志即從嘉定十年起，其例尤爲可法。土產門引說

文廣雅、字林、方言等書，亦地志中所僅見。又二書於晉宋以來士大夫居宅墳墓，皆詳其坊巷鄉都所在。其作銘作記之人，亦莫不羅列。雖遺跡久湮，而按籍考之，猶可得其彷彿。後人性好簡略，鮮有及此之詳明者。其餘精當處，亦不勝僂指。二書洵海內之秘笈也。乃問之鎮江人，無肯采之者。

余於送楊忠愍公墨蹟歸焦山記中，已慨乎言之。去冬，丹徒包景維良丞

介吳陶伯孝廉文鑄來謁余，談次及之。景維因言及其考中憲知有是書，

欲刻未果，今願刊布，以成先志。余因出家中選樓本，並發焦山書藏本，校

仍還焦山。再加繙閱，選樓本爲歸安嚴久能元照所校，焦山本爲烏程張秋水

鑑所校。又丹徒戴桐孫守橋亦有籤記，其中精確者致多。然猶引其端未

竟其緒。復屬門下士劉孟瞻文洪暨其子伯山，鑑詳考全書體例及所

徵引各書，正其譌誤，作爲校勘記四卷，附刻於後。二書俱不著撰人姓名，

書錄解題有盧憲鎮江志宋志中稱憲者四條，因共定嘉定志爲盧憲所



作而至順志則不知出於誰手。適丹徒柳賓叔孝廉興恩以書來告、謂檢鎮江府志成化舊序、知至順志爲俞希魯所作。余按、俞氏乃元末遺老、爲金華宋濂所推。若非詳撰此志、烏知俞氏之學精密若是。則刻書洵有功於古人也。是書初刻時不知書中載包氏名人甚多、乃校勘後、知包氏爲丹徒舊族。宋元二志人物門俱以漢大鴻臚包咸爲首、厥後包融、包何、包佶、俱有名於唐代。而元志俞庸修高資橋記亦言丹徒包氏不墜先業。中憲名祥麟、字厚村、捐賑施藥、頗多善舉、實爲鴻臚之後。雖此書朽蝨而班班可考。然則是書之刻於包氏、固天理當而人心安也。刻旣成、余故樂爲序之、以爲刻古書者勸。大清道光二十二年夏至日、揚州予告太子太保體仁閣大學士七十九叟阮元序。

是月、宋元鎮江府志校勘竣事、因成宋元鎮江府志校勘記四卷、並自撰其序文。青集卷五



校刻古書難矣、而展轉傳抄之書、則校刻尤難。是故宋元槧本及影宋抄本、皆可據原書付梓。問有訛誤、著于別錄、而不必改易舊文。至於傳抄之書、脫文錯簡、往往而是。若不刊謬正訛、則其書幾不可讀、亦憾事也。伏讀欽定四庫全書、凡從永樂大典錄出者、悉經刪衍補脫。京口耆舊傳陳升之、許陽米友仁、邵節、譚知柔、李珙等傳案語、或引嘉定鎮江志、或引至順鎮江志、疑二書亦從大典中錄出。館臣曾見是書、而未經編定、故有宋志斷爛、而以元志補之者、有元志淆謬、而以宋志牘入者、有子注而誤爲正文者、有子目而混爲總類者。選樓校本及焦山校本、已詳言其誤。今因包君景維刊刻是書、相國阮公命文淇及子毓松重加校正、並諭以不必以學經室提要在前有所牽就、總期實事求是、不爲鑿空之談。爰取二書反覆詳校、其有彼此互淆、前後倒置者、悉加釐正、而仍載原文於校勘記、並述其所以改易之故。至嘉定續志、咸淳志、永樂志之牘入二書者、則另入

附錄之中而不加刪削、俾後人得以考見。昔宋彭叔夏作文苑英華辨證、其體例大約有三、實屬承訛、在所當改。別有依據、不可妄改。義可兩存、不必遽改。茲編所校、略仿其例。其有以一條而彙舉各條者、亦彭氏之例也。惟是學識譾陋、疎謬猶多。尚望博雅君子匡其不逮焉。道光壬寅孟夏、儀徵劉文淇識。

四月三十日、王西御、句生之父、家幹、峙亭卒、年七十八。先生爲撰王峙亭先生家傳。青集卷八

七月三日、黃春谷卒、年七十二。研經室再續二集卷二

是年、甘泉岑建功欲刻舊唐書、延先生父子及羅茗香、陳卓人校勘。先生與茗香商訂凡例四條。

按、校刻漢書凡例通集卷五云、道光壬寅癸卯、揚州刻舊唐書、除分校寫樣、刻樣、延請四人外、另延四人分纂校勘記、每人分任數十卷、目錄



內臚列姓名。又與地紀勝序通集卷七云、道光壬寅、丹徒包氏欲刻嘉定、至順鎮江志、借錄選樓抄本。余遂檢紀勝中鎮江府一卷、俾其附刻於後、而全書仍未能刻也。是歲、甘泉岑紹周提舉、建功方重刻舊唐書、延其友分纂校勘記、而自輯逸文。

按、續纂揚州府志卷十四云、岑建功字紹周、監生。性勤謹、好儒雅、頗善居積。每謂天之所厚、不敢自私。凡死喪孤寡無告者、咸周洽之。每得異書、必鳩工重刊。如舊唐書、與地紀勝、皆見珍於世。

羅茗香傳詳咸豐三年

二十三年癸卯 五十五歲

三月三日、阮伯元福壽第燬於火、文選樓所藏之書歸灰燼。雷塘庵弟子記卷八時先生館于第、校勘舊唐書。

按、嵇庵文集卷二重刻舊唐書後敘云、今紹周獨任其事、延余友羅君



茗香士琳、劉君孟瞻、文洪總校，即以余所藏聞本並毀本互勘。時孟瞻館於儀徵相國府第，府燼於火，而余書因是又失去十五本。

七月，爲門人陳卓人撰句溪雜著序。青集卷六

嘉慶庚辰冬，先舅氏淩曉樓先生自粵中返里，家居授徒。卓人年甫舞勺，受業於門，天資穎悟，已具成人之概。道光甲申，先舅氏客授他氏，卓人遂學於梅君蘊生，受詩文之法，學日進。乙酉春，先舅氏復家居，閉戶著述，精公羊春秋，兼通鄭氏禮。卓人復從受經，⑥聞緒論，斐然有著述之志。泊先舅氏臥病董子祠中，令卓人問字於余。余學殖荒落，於余舅氏無所肖似，而公羊禮服之學，卓人蚤得其傳，遂乃博稽載籍，凡有關於何鄭之學者，手自抄錄，推闡其義。所著白虎通疏證十二卷，實能條舉舊聞，絕無嚮壁虛造之說。今歲季夏，發行篋中說經之文若干篇，先付諸梓，而乞序於余。余維漢儒之學，經唐人作疏，而其義益晦。徐彥疏公羊，空言無當。賈孔禮

疏亦少發明。近人如曲阜孔氏、武進劉氏、謹守何氏之說，詳義例而略典禮訓詁。歛金氏、程氏、習鄭氏禮，顧其所著書往往自立新義，顯違鄭說。先舅氏怒然憂之，慨然發憤。其於公羊也，思別爲義疏，章比句櫛，以補徐氏所未逮。其於其禮也，思舉後儒之背鄭氏者，一一駁正之。惜晚年病風，精力不逮，僅成公羊禮疏十一卷、禮論百餘篇。卓人行將校文東觀，會議石渠，讀生平未見之書，以續成先舅氏未竟之志。是則余所深望。知卓人亦必有樂乎此也。癸卯七月，儀徵劉文淇。

閏七月，代阮伯元撰重刻舊唐書序。青集卷五

有唐三百年，正史所關最鉅。後唐長興中，詔修唐書，至後晉開運二年，方纂成奏上。五代會要中但言書付史館，而未述刊版之事。宋嘉祐五年，頒新唐書於天下，而舊書遂不甚行。郡齋讀書志及直齋書錄解題雖皆載其書，而不言始刊之歲月。是北宋以前之舊槧，其有無固無從考證。明嘉



靖乙未、餘姚聞人詮督學南畿、念舊書刻本漸少、懼其就湮、於是徧加尋訪、得紀志於吳縣王延喆家、得列傳於長洲張汴家。其書乃南宋紹興初年越州所刻、卷後載有校勘姓氏。舊唐書之流傳於明代者、以此爲最古、而卷帙尙有闕佚。復假應天陳沂、長洲王穀祥所藏本、彼次補苴、始爲完書。刻未及半、而詮以奉諱去官。繼其任者、請諸撫按、與郡邑各官捐俸倡率、凡歷四年而後告成。其裒聚與刊布之難、悉詳原序。特當時聞本所據之書、止就殘篇斷簡、蒼萃而成、初非全部。故魯魚亥豕之文、夏五郭公之句、正復不少。論者惜其未盡善焉。我朝稽古右文、度越前代。乾隆四年、敕武英殿校刻此書、聞本脫誤之甚者、逐條釐訂、各附考證於每卷之後。及四十七年、編定四庫全書、特置此書於正史、而庋藏於三閣。閣本之考證、又較殿本加詳。惟是閣本但繕寫而未發刻、讀者既艱於傳鈔、殿本列於二十四史之內、坊肆間罕有單行者。寒素之家、購求匪易、而開版久亡、其



書尤爲難覓。甘泉岑紹周提舉，建功嗜學好書，尤喜鐫刻古籍。其友江都梅蘊生植之，勸其重刊此書，遂慨然獨任之。延江都沈與九齡，殷時若、煥、凌東笙、鏞、儀徵黃聖臺、泰熙分任校字之事。全書字句悉以殿本爲主。其間有刊刻小譌，爲人所共知者，即隨筆改正。外此則不敢妄改。至於行款書式，則仿照汲古閣史書。蓋毛氏所刻十七史久已風行海內，而唐書有新無舊，故特補其所未備也。復延甘泉羅茗香、士琳、儀徵劉孟瞻、文洪及其子伯山、鏡崧、句容陳卓人立排列各本，討論群籍，得校勘記共若干卷。凡殿本閣本之與聞本異者，一一臚列，並登載其考證。而沈氏新舊合抄所辨析者，亦附見焉。若夫北宋初年太平御覽、冊府元龜等書，皆成於歐宋未修以前，其引唐史確係劉書所據實最初之本，足以補正聞本者，不可枚舉，皆採而集之。他如通典、通鑑、唐會要、文苑英華以及十七史商榷、廿二史攷異之類，可以互證參訂此書者，亦廣爲尋校，加以斷制。其體裁



義例悉遵殿本、閣本之成法而推廣引中、以竟其緒。蓋殿本之總校爲沈歸愚、尙書其自作考證跋語云、蒐羅未備、挂漏良多。閣本之分校爲邵二雲、學士其集中所載提要云、參核攷定、尙有待耳。誠以官修之書、人心不齊、議論多而成功少、每致卒業無期、故但能略舉大端、開其門徑而已。後人若不由一反三、因源及委、其何以成前賢未遂之志哉。今岑氏捐資、既勇任事、亦堅能集衆、長而成鉅業。昔元童時讀文選、汲古閣本、每慨然慕毛氏之爲人。毛氏之名、今亦永垂藝苑、此毛氏之福也。毛氏有此名、有此福、而明於事者能效之、則今岑氏是也。揚州有力能刻古籍者甚多、而願者究少、則以此事亦須有讀書之性情嗜好、與辨事之才識福分、談何易哉。是書始刊於道光壬寅九月、告成於癸卯七月、計未及一稔、而粲然大備。衰年見此、洵爲快事、故樂得序之。道光癸卯閏月乙未、予告體仁閣大學士晉太子太保揚州阮元序。

九月二十四日、梅蘊生卒、年五十。青集卷十

十月、撰夏退庵所輯海陵文徵後序。

萃一郡一邑之詩文以爲集者、六朝以來已有之、而其書多不傳。其傳者、北宋孔延之會稽掇英總集、南宋董弁之嚴陵集。然二集體例、凡有關於本郡者即錄之、不盡土著之人。明程敏政新安文獻志、其甲集六十卷、皆其郡先達詩文、故當時推爲鉅製。至於萃一邑之詩文以爲總集、其最著者、元汪澤民、張師愚所同編之宛陵群英集。然有詩而無文。明張應遼海虞文苑、詩賦雜文莫不悉載。然所輯者僅有明一代之文。即明一代之中、又略於遠而詳於近。論者謂時代既近、牽於鄉曲之恩怨、不免有所濫收。凡輯一鄉之文者、均不免此失。甚矣編集之難也。吾友泰州夏君退庵輯海陵文徵正集二十卷、自張懷瓘至湯治昭、共七十二人、凡爲文四百六十篇、其蒐采之勤、亦云至矣。而吾所歎服者、尤在於抉擇之精且嚴也。邑



中有僑寓數世、可稱土著而籍貫仍隸他邑者、則列于附錄之中、而不入正集。東臺自乾隆三十三年由泰州割出分置、今錄東臺人之文、斷自乾隆戊子以前。又集中所采輯者、大率有關於地方利病及闡揚忠孝之作、凡風雲月露之辭、概從刊削。即墓志行狀傳述、亦必人屬名賢、事關倫紀、而後采入。讀其凡例、可知其體例之善矣。退庵博學工詩、撰述甚富。海陵文徵之外、又有附錄十二卷、詩徵十六卷、泉譜八卷、筆記十六卷。而其所最注意者、尤在於此編。樣本甫寫定、而退庵遽歸道山。詰嗣子猷嘉謨克成先志、節齋衣食、以贍付其從兄子猷嘉穀來郡付梓、是皆佳子弟也。刻既成、屬文淇爲之序。文淇與退庵交最久而先母氏浚系出僉憲之後、僉憲爲海陵鄉賢、退庵凡例中謂浚僉憲舊業堂集關係桑梓最爲切要者也。挂名簡末、有深幸焉。

夏退庵名荃、泰州人行實未詳。

此月代阮伯元撰張石州所著魏延昌地形志序。青集卷五

魏收所撰魏書地形志二

抄本  
作三

卷簡略太甚其敘州郡不述太和全盛之

規轉錄武定分裂之制識者病之平定張君穆著有延昌地形志一書抄本

此下有精博四字。其抄本無

大旨謂魏收書乃東魏之志與北魏無涉於道武

太武建國之模孝文宣武親垂之業一字不紀而徒貢諛高齊自來志書

抄本  
字作家

無此荒謬乃博采旁稽重事釐訂凡古書及金石遺文有涉及魏

事者必詳采之西北隋唐

抄本  
字作塘

堰澤中尉紀敘最詳今并攷其興廢及

見今情形翼後來者有所取法收志譌字甚多以酈氏水經注及各地志

訂抄本  
字作正

其譌脫有總圖有各州郡圖載每卷之首余略爲繙閱洵爲抄本

此下有

實事求是之書其中尤精確者如并州上黨郡之石井關收志沿

班志上黨郡有天井關之文不知漢上黨郡南逾陽阿魏上黨境南不過

元氏乃改繫之建興郡高都下并州平陽郡之禽昌縣

抄本  
有收字

此下云即漢



晉之北屈不知漢晉北屈縣在今吉州東北魏禽昌縣在今平陽東洪洞  
東南相距絕遠斷非一地。並抄本並字皆作并字。推詳其致誤之由。抄本此下有字。永安

郡平寇縣有雞頭山神祠謂即今忻州。抄本無忻州二字。繫舟山之。抄本無支阜。

繫舟雞頭聲轉最近。浮陽郡章武縣有大家姑祠或云麻姑神。據寰宇記

清池縣有麻姑城而水經濁漳水。抄本無注。清河又東北逕紅姑邑南俗

謂之新城。俗說麻姑蓋即由傳會紅姑之名而起。紅麻義相通。抄本此下有字。

又此書雖爲魏志而作兼爲讀水經注者示其表畷故凡與酈注相涉者

每不憚詞費然亦不意存左袒如太倉翟泉則從伽藍記而不從酈氏之

說。至於戴氏所校之本未免意爲刪改如收志濕沃縣有后父城即濕水

注之后輔城近本后譌作石戴氏不知取證收志而改右爲左凡若此者

亦一一辨正之其繫以延昌者據初學記引括地志云魏孝文帝都洛陽

開拓土宇明帝熙平元年凡州四十六鎮十二郡國二百八十九矣熙平



者、宣武延昌四年之後一年。抄本有也字。元魏之盛、至此已極、故斷自延昌也。

余於嘉慶十五六年間。抄本無同字。在京師文穎館總閱全唐文、時館中供事

於永樂大典中抄得古洛陽圖數紙、內有後魏洛陽宮城圖、金墉城圖、所

載宮殿樓觀甚詳、並有李彪、崔林、長孫稚、鄭道昭諸宅、其圖非後人所臆

造。抄本此下有會字。試取觀之、倘亦有所裨助焉。道光二十三年冬十月、揚

州阮元識于怡志林泉之館。

十二月朔、撰汪醇卿所編廣陵思古編序。

吾友留心於鄉邦文獻者、於淮安得丁君儉卿、寶應得劉君楚楨、泰州得夏君退庵。三君於其鄉先輩軼事遺文、殘編斷簡、搜羅宏富、積三十年之力以成書。楚楨所採輯者、有寶應圖經若干卷、儉卿輯山陽詩徵二十四卷、退庵輯海陵文徵二十卷、詩徵十六卷。儉卿楚楨之書成而未刻、退庵已歸道山。其哲嗣先刻其文徵、余既爲之序矣。今同邑汪君醇卿以廣陵



思古編見示，屬爲之序。此余所欲爲而未暇爲者也。猶憶邵伯揚學博刻  
婁東雜著，阮相國爲之序云：昔年撰淮海英靈集時，但求之於詩，而未求  
之於文。彼時若續用力於各邑各家之遺編故帙，選擇而成一書，則故家  
遺俗嘉言善行，必斐然可觀。惜祇力於詩，僅以其餘力爲廣陵詩事數卷  
而已。蓋深歎廣陵遺文之未編也。適相國來館中，余醇卿此編代爲就正。  
相國細加繙閱，深嘉醇卿之志，謂當更加搜輯，以成鉅觀。因即述余向所  
傾倒於三君者，並今相國之言，以識簡末。道光癸卯十二月朔，同里弟劉  
文淇撰。是序青集未收。

是月，撰黃春谷所著夢陔堂文集序。青集卷六

吾鄉黃春谷先生，早負重名，與焦里堂、江鄭堂、鍾保岐、李濱石諸先生聲  
應氣求，極一時之盛。文淇童年在家塾中，已鈇聞之。後讀漢學師承記，謂  
先生天資過人，爲漢儒之學，篤志研究，得其精微。通歷算，能辨中西之異

同。又工詩古文，自出機杼，空無依傍，寓神明於規矩中，不屑爲世俗詩文者也。心竊儀之。及聞汪孟慈言先生著有讀周官記、讀毛詩記各若干卷，於是嚮往倍切。時先生遠宦粵西，無由親炙。比自粵歸，孟慈又入都中，尙以不得階主，未敢造次請謁。而先生忽偕梅蘊生過訪，因招同羅茗香、劉楚楨、王西御、吳熙載、王句生常集筌園爲文酒之會。暇又至余館中，縱談今古，輒移晷刻。自癸未至壬寅，歷二十年之久。是時先生曩日講學諸友零落殆盡，所常往還者祇文淇輩六、七人。先生篤忘年之誼，綖綖綢繆，每有所作，輒舉以相示。竊見先生嗜學之專，有非寒畯所能及者，宜乎所造之深邃也。先生於人事酬酢外，終日坐一室中，羅列群籍，徧爲探討。心有得，奮筆疾書，俄頃千言。夜則燃二巨燭，冥情搜索，必四鼓乃寢，率以爲常。其夜讀之況，詩集中每自道之。江氏所謂篤志研究者，誠哉其篤志也。當初見先生時，請讀所著詩禮割記，先生答以祇有草稿，尙未成帙。厥後稿



儒藏

劉孟瞻先生年譜 卷下

燬于火先生亦不以介意。蓋其所專致力者在于文說經說、文說已刊行者十一篇、經說百餘萬言、尚未編次而大指已具於文集中。作文說經說時、詩文亦不多作。就詩文二者論之、先生素以詩自許、未嘗以文自豪。即與同人談藝、亦論詩至多而論文絕少。然觀文說第一編論文章關繫至重、首詳文之體用、次述文之藻績聲韻、而要歸于措辭不詭于正、持論極爲精確。先生固深于文者、集中諸作多直抒胸臆、無不達之辭、亦無不盡之意。融會古人神理、而不規規然襲其迹象。江氏所謂空無依傍者、誠哉其無依傍也。公子善庭刻文集既竣、事屬爲序、其大凡、文淇紉繹全書、深歎江氏之所稱道者爲得其實、因推闡其說、以識簡末。道光癸卯季冬、儀徵後學劉文淇撰。

按此序與刻本夢陔堂文集所錄小異。

是月河道總督潘雲閣招先生等四人屬以校書、因赴袁浦。

按、聲遠堂文鈔卷二同舟守歲圖序云、歲在昭陽、月惟嘉平、河帥潘雲閣先生駐節袁浦、介要劉孟瞻明經、楊季子上舍及余昆季四人將有借寫閣書、對正百家之業。爰因三冬歸餘、俗務多暇、拏權往謁、刻期過返。

按、潘錫恩字芸閣、安徽涇縣人。嘉慶辛未進士、授編修。大考第一、擢侍講學士。道光二十三年、再任南河道總督。在任十載、無河患。二十八年、以病回籍。同治六年、加太子太保銜卒於家。賜諡文慎。續碑傳集卷三十三有傳。

回里時、恰值除夕、泊舟寶應之汜水鎮。王西御作詩、並命其子悲雲繪圖記事、屬先生以序。青果卷四除夕同舟守歲圖序

是歲、張石州致書先生、論魏延昌地形志、並求爲序。國粹學報第六期

書云、孟瞻先生執事、穆定于下月三日、偕茗香同舟北上、茲將拙著延昌



地形志前八卷之一。三分呈誨、並求賜敘。鄧著此書、因魏收書乃東魏之志、與北魏無涉、讀水經注者偶一援及、輒成歧誤。且于道武大武建國之模、孝文宣武勦垂之業一字不紀、而徒以貢諛東魏張貢諛高齊之本、自來史家無此荒謬。故爲博采旁稽、稍還元魏舊觀于司州恒朔十二鎮三事、蓋殫三年之力、然後得其梗概焉。竹汀詹事謂地形志當斷自太和、穆乃斷自延昌者、案初學記引括地志云、魏孝文帝都洛陽、開拓土宇。明帝熙平元年、凡州四十六、鎮十二、郡國二百八十九矣。熙平者、宣武延昌四年後之一年也。元魏之盛、至此已極。又通鑑梁天監十年下云、是時梁之境內有州二十三、郡三百五十、縣千二十二。是後州名寢多、廢置離合、不可勝記。魏朝亦然。案梁天監十年爲魏宣武永平四年、次年遂改元延昌。故訂志以斷自延昌爲允。今本收志譌字不可勝校、穆以鄧注爲經、各地家言爲緯、訂其譌、拔已得十之七八。此書爲讀水經注者通其郵、故凡與鄧



注相涉者，每不惜詞費，然不敢意存左袒。如言太倉翟泉，則伽藍記是而水經注非；故卽奉羊以訂鄭也。戴氏校水經注，妄改最多。如收志石沃縣有后父城，卽漯水注之后輔城。近本后譌作右，戴氏不知，取證收志而改右爲左。戴氏又托言據永樂大典，實則大典並不作左，穆嘗檢大典而知之。此不可不訂正也。若西北陂塘堰澤中尉紀敘最詳，今並考其興廢及現今情形，冀後來者取法焉。又穆著此書，凡古書金石遺文有涉及魏事者，必詳采之，故有總圖，有各州郡圖，以載于每卷之首。謹陳著書大旨如此，伏望裁其違謬而賜之敘，幸甚感甚。穆再拜。

按國粹學報載記者，即劉師培。漢識語云：案石洲先生此書係癸卯過揚州時所作，而延昌地形志之體例悉載于書中。先生又有延昌地形志自序，刊入月齋文集中，可與此書參觀也。記者識。

二十四年甲辰 五十六歲

十二月二十九日姚配中卒年五十三。燕舟雙槳卷八

是年與同人校勘舊唐書。舊唐書校勘記序

是年撰清故貢士梅君墓志銘。青集卷十

君諱植之字蘊生姓梅氏祖諱訓自宣城徙江都。考諱徇積德在躬鄉黨稱長者。幼孤育於其舅范氏。范以爲嗣。及長娶於黃生子某。即以之繼舅氏。後而已歸宗。繼娶於胡。乃生君。君年十二已能爲古今體詩。二十學駢儷之文。博覽經史。工書善琴。而所嗜尤在詩。性簡傲。凡鄉里先達及流寓名公有所招邀。未嘗輕造其門。必歷久知其學實勝己。乃執弟子禮事之。朋輩所心折者僅十數人。視世俗齷齪之士蔑如也。家貧無書。所謂經注及古文詞。率手自鈔寫。偶購舊唐書殘本。展轉借全。帙錄之二句而畢。余交遊中多勤學之士。其最攻苦者甘泉薛傳均。子韻於百憂中。手不釋卷。儀徵汪穀小城病至咯血。誦讀自若。而君實似之。君中歲疊遭考妣喪。未



備藏

除服而妻許氏又卒。家室蕩然。其愁苦抑鬱無聊賴之狀。一寓於詩。余每不忍卒讀。勸其少輟。君諾之。而莫能改。然君即不事吟詠。而所處爲生人極艱。身非金石。摧折之。斬艾之。欲求無死。不可得已。余固憂君之不永年也。而君竟以肺疾卒。悲夫。繼娶黃孺人。結縭甫七歲。生男女各一。皆不存。沒之前夕。新舉一男。君猶強撫視之。名之曰毓曾。未匝日。縗絰一襲。加於文襟。嗚呼。可哀也已。君由揚州府學增生。中式道光己亥科舉人。生於乾隆甲寅六月二十日。卒於道光癸卯九月二十四日。春秋五十。即以其年十二月十二日。葬甘泉縣施家沖。附其考處士君之墓。君詩近體主少陵。古體則導源康樂。駢文宗江鮑。而參以庾徐。哀豔散行文。亦雅有歐曾矩矱。所著嵇庵詩集六卷。友人王君瓚華梓行之。其續集四卷。文集二卷。則門人上元黃國華所刻也。江都薛壽及君妻姪儀徵黃春熙亦嘗受學於君。謂君之學行不可無所稱述。伐石刊詞。埋諸幽壤。以渴葬。不能遠求鉅

公之文、而丐文於余。余文何足傳君。君之詩文、其必傳於後、則無疑也。爰爲銘曰、

君志之高深兮、飲清風而餐白雪也。君學之勇決兮、挽六鈞而徹七札也。謂韞于中、宜有所設施兮、奚出門而車軸折也。惟遺編足以垂後兮、芳馨其不滅也。

二十五年乙巳

五十七歲

二月六日、孫貴曾良甫生。左、食集卷六先府君行略

按、劉容季氏來書云、貴曾字良甫、一字少厓、副榜貢生、候選州判。卒於光緒二十四年三月初三日、年五十四。

四月、江西撫署揚州水道記四卷。<sup>⑪</sup>

五月朔、撰文學方君傳。青集卷八

君名申、字端齋、本姓申氏、舅氏方取以爲子、故從舅氏姓、而以申爲名。其



儒藏

世系詳余所撰方節母家傳中。君少孤家貧，備書於外，以所得錢奉節母甘旨，備盡色養。室中極狹，母歿，徹去床几，僅容一棺。時久雨不霽，屋恒漏，君以席覆棺，差免滲淋。晝夜坐臥於其側，衣服沾濡，不離苦次。如是踰月，始克舉葬。既竣事，即置几筵於室中，以奉主。遇時節及忌日，必從食肆中，市羹飯，置主前祭之。雖祈寒暑雨，未嘗輟懷慶。太守汪君孟慈謂君之孝，不愧古人，故表君之墓曰孝子。太守即節母之族弟也。君雖以備書廢業，而素通文義，人以藁本倩君傳寫者，大率多塗乙難識，君悉能辨之，且爲之校正誤字。余舅氏凌曉樓先生重其爲人，命其子鏞師事之。道光己丑，舅氏卒，時鏞方八年，余携之歸，而仍延君課鏞讀。君訓誨懇摯，終日坐書室中，於世俗之紛華泊然無與。余因與劉君楚楨勸君習制舉業。時君年已踰四十矣，市應童試，屢見黜於有司，而學益進。至戊戌冬，督學祈公按試揚郡，君始以經解見知，拔置闔郡第一，督學劇賞之。正場試律，以人間



重晚晴命題。蓋爲君發也。補饒徵縣學生員。庚子秋。赴試江寧。積勞成疾。歸而益劇。卽於十一月三日卒。年僅五十有四。祔葬於節母墓側。次年。凌鑑亦以經解受知於督學毛公。入江都學。而君已不及見矣。君自悔晚學。故致力綦勤。其最精者。尤在周易。朝夕鑽研。未嘗釋手。君以張氏惠言約舉鄭氏易象而未及其他。毛氏奇齡引諸家易象而尙多挂漏。因徧閱諸家書。有涉及易象者。咸摘錄之。成諸家易象別錄一卷。又以易家之言象者。以虞氏爲最密。惠張二家所述猶未完備。因詳核虞注之引逸象者。縷析條分。成虞氏易象彙編一卷。又以後儒解易罕引說卦傳。因博攷古注。參閱諸緯與春秋內外傳。注援據易說卦傳者。排比其次第。各繫於本文之下。成周易卦象集證一卷。又以春秋時列國卜筮必據互卦。以與正卦相參。因尋繹漢儒之所言者。反覆求其條理。而知互卦之法。正例有七。附例有二。成書一卷。名之曰周易互體詳述。又以卦變之法。傳之已久。言人



人殊無所統貫。因參伍攷訂，以深求其義例之所在，成書一卷，名之曰《周易卦變舉要》。是爲易學五書。君之於易，可謂勤矣。古之士懷才抱異，阨塞而不遇者，何可勝道。然如君之少苦流離，中歲困蹟，終其身寂寥寡歡者，蓋亦尠矣。君以貧故，未婚娶。族中又無可爲君後者，君之祀斬焉。人道之窮，至君而極。世有蹶弛之士，或恃才傲物，頽然自放於禮法之外，其致窮也有由。君則抑然自下，束脩安貧，而摧抑亦若是之酷。天道其果可知也耶。今孟慈太守悲君之遇，爲梓遺書，俾垂久遠。然則君之所以不朽與天之所以彰君者，其在茲乎。其在茲乎。

是年與同人成舊唐書校勘記六十六卷。

按舊唐書校勘記六十六卷，此年竣功。先生所任，自卷一至卷十、本紀自卷二十至卷二十三、地理志自卷六十一至卷六十六、列傳凡二十卷。伯山所任，卷十三十四、音樂志自卷二十四至卷二十六、職官志卷



二十八卷二十九、經籍志自卷四十八至卷六十、列傳凡二十卷。羅若香所任自卷十五至卷十七、歷志卷十八、天文志卷十九、五行志卷三十、食貨志自卷三十二至卷三十九、列傳凡十四卷。陳卓人所任卷十一、卷十二、禮樂志卷二十七、輿服志卷三十一、刑法志自卷四十至卷四十七、列傳凡十二卷。

是年編修汪醇卿訪得鮑孝女墓於京師、因寄書先生而屬爲之傳。先生撰鮑孝女傳。青集卷八

是年代阮伯元撰江甘貞孝節烈總坊錄序。青集卷五

序云、嘉慶十一年、元與伊墨卿太守於縣學節孝祠中議立四碑、將江甘兩邑待旌貞孝節烈婦女姓氏鐫諸碑石。其時未有請建總坊之例、故創爲此舉、以冀垂諸久遠。十六年修府志時、即據此碑采入志中。道光七年、武進陽湖兩邑紳士請建總坊、得旨允行、於是江蘇各屬彙請者次第舉

行。而江都甘泉兩邑亦於二十二年由學轉詳請建總坊。禮部議准奉旨依議。旋經樹立總坊於節孝祠前。並於祠內設位致祭。而旌表姓氏總錄尙屬闕如。汪編修廷儒輯爲總錄。捐貲付梓。茲請暇歸省。請序於元。元惟總坊之立。前此所無。今奉旨允准。直省通行。有以見聖朝風化之盛。卓絕千古。故褒錫之典。爲曠代所未見也。錄中首載公牘一卷。次列兩邑新旌姓氏。凡一千四百八十六人。分爲四卷。建立總坊後。又續采得合例旌表者一卷。以待續請。而元所立之題名碑及府縣志所載未請總坊以前已蒙旌表者。將學冊神主參互比對。各爲一卷。其有筆畫訛誤。姓氏岐複者。詳爲辨正。而事實見於各家詩文集小志者。亦間爲采輯。以備續修志乘者有所徵從。編修好善之意。有足嘉者。元故樂得序之。

二十六年丙午 五十八歲

九月初三日。邀晉江陳慶鏞、頤南與岑紹周、羅茗香、楊季子等偕遊華清宮。

慶鏞字乾翔、頌南其別字、晉江人。道光壬辰成進士、改翰林院庶吉士、官至中議大夫、掌陝西道監察御史、候選道。咸豐八年八月三日卒於泉州團練公所。春秋六十有四。著有箱經堂類稿、齊侯特銘通釋。其三家詩攷說、文釋、文校本、古籀攷、穀梁通釋、屬草多未竟。續碑傳集卷十九有傳。

九月十六日、與吳熙載、王旬生等泛舟遊平山堂。葬遠堂集卷二

冬十一月、代阮伯元撰劉孟涂所著廣列女傳序。青集卷五

桐城劉君孟涂、余久嚮其名、未識其人。嘉慶丙子、余撫中州時、孟涂來見、以詩文就質。其詩才高筆健、接跡前賢。駢體獨出機杼、余甚重之。別後、遂不相見。而時以詩文兩寄。後聞其客死亳州、亦絕不知其家消息。丙午冬、其子少涂繼來謁、始知其詩文集四十卷、爲其友姚君伯山所刊。先是孟



涂以其母夫人吳氏撫孤守節之故輯廣列女傳二十卷藏諸篋笥尙未付梓。孟涂卒時少涂甫三齡病且殆。孟涂之喪適歸其配倪孺人大慟曰。吾夫旣客死於外而子之病又甚危篤。吾夫殆無後矣。即自剄不殊。至人定後卒自經死去。孟涂之卒才百日。今少涂幸得成立年甫踰冠。即橐筆走京師。節省館穀刻成此書以成父志。以彰其君母之烈。可謂偉然佳子弟矣。孟涂此書之例斷至明止。余謂二母之節烈不可沒也。少涂當輯二母事實。即以祖母殿諸節婦之後。以君母殿諸烈婦之後。誰曰不宜。孟涂尙有未刻書八種。論語補注三卷。大學正旨二卷。中庸本義三卷。孟子拾遺二卷。續集六卷。外集六卷。別集六卷。詞一卷。共二十九卷。皆少涂所搜輯。錄有清本爲著其目於此。

劉孟涂名開字明東。孟涂其一字。又作孟塗。桐城人。師事姚惜抱。學詩古文。與同門方植之。管巽之。梅伯言。有方劉管梅之稱。道光四年閏七



儒藏

劉孟瞻先生年譜 卷下

月十四日卒於亳州志局、年四十一。續碑傳集卷七十六有傳。

按此序云、始知其詩文集四十卷、然刻本劉孟塗集文集十卷、駢體文二卷、詩前集十卷、詩後集二十二卷、凡四十四卷也。

冬、撰周烈女傳。青集卷八

是年、刻薛子韻所著閩遊草一卷。

按聲遠堂文抄卷二薛子韻閩遊草後序云、檢楮葉於緘膝、空藏手墨、越今十有七年。素交劉孟瞻明經慨駒隙之易流、謂鴻泥之可惜、爰取劉楚楨大令舊所錄存詩若干首、總爲一卷、重付影寫、銀之梨板。

是年、與伯山爲岑紹周從事輿地紀勝校勘。

按舊唐書校勘記岑紹周自序云、校勘記六十六卷、刻既成、而此自序作於道光丙午仲冬。然伯山代阮伯元所撰輿地紀勝序通集卷七云、是歲甘泉岑紹周提舉建功方重刻舊唐書、延其友分纂校勘記、而自



輯逸文、擬俟其告成、卽從事紀勝。癸卯春初、奉舊唐書謁余求序、且言願刻紀勝全書、請先假歸影鈔、然後授梓、余欣然許之。未幾、余舊居福壽庭第爲鄰火所焚、凡選樓書籍分藏於彼者悉燬於一炬、而紀勝以借鈔之故、巍然猶存。洎影鈔旣畢、紹周復延儀徵劉孟瞻、文洪及其子伯山、毓松纂輯紀勝校勘記、而自補鈔闕文。戊申孟夏、舊唐書校勘記刻工已竣、逸文亦垂欲開雕、將次第及於紀勝、而紹周遽亡。乃舊唐書校勘之功已竣、此歲應當着手與地紀勝校勘。

二十七年丁未 五十九歲

正月、王子涵調儀徵縣知縣、謀重修儀徵縣志。

按、重修儀徵縣志阮序云、丁未孟春、司馬王公來宰儀徵、政通人和、循聲懋著。下車之始、卽詢及縣志、知已四十餘年未修、慨然以身任之。

王子涵名檢心、原名立人、子涵其字、河南南陽人。同治八年五月卒、年

六十五。著有易經說約、春秋本義、孝經本義、四書存真、禮傳合鈔二十餘種。已刊有王子涵全書。續碑傳集卷三十六有傳。

五月十六日、門人薛壽父長慶吉人卒、年七十五。先生爲撰薛君家傳。青集

### 卷八

八月三日、汪喜荀卒、年六十二。汪孟慈先生行實

九月十六日、孫富曾謙甫生。

按劉容季氏來書云、富曾字謙甫、光緒戊子科舉人、揀選知縣。生於道光二十七年九月十六日、卒於民國十七年十月二十六日、年八十二。己卯孟春、余至揚、與謙甫門人蔣太華氏面晤、獲聞其爲人與學風。劉容季氏蓋謙甫之哲嗣也。

九月十九日、同郡金雪舫邀同人雅集樗園、爲展重陽之會。先生父子與焉。金以畫圖示先生屬序、伯山代撰展重陽樗園雅集圖序。通集卷七



按金雪舫名長福、雪舫其字、高郵人、貢生。父芸、工書法。雪舫幼聰慧、眇一目、博洽經史、尤深選學。屢試不售、淡於進取、然好學至老不倦。著有廣陵新舊事、小墨莊詩話及駢體古文、古今體詩數十卷。咸豐三年後、揚郡三次失陷、與當事辦團防盡力、保奏以教諭、加提舉銜。卒年七十五。續纂揚州府志卷十三

是年、先生父子纂輯輿地紀勝校勘記、成書五十二卷。十二月、伯山代先生撰輿地紀勝校勘記序。通集卷七

二十八年戊申 六十歲

夏岑紹周卒。

按輿地紀勝序通集卷七云、戊申孟夏、舊唐書校勘記刻工已竣、逸文亦垂欲開雕、將次第及於紀勝、而紹周遽亡。又舊唐書逸文序通集卷五云、紹周復就諸書所引舊唐書與今本不相比附者、薈萃參考、爲舊

唐書逸文十二卷。戊申夏甫經寫定而紹周遽亡。

夏知縣王檢心開局重修儀徵縣志延先生爲總纂伯山與分纂。重修儀徵縣志

按重修儀徵縣志阮序云丁未孟春司馬王公來宰儀徵政通人和循聲懋著下車之始卽詢及縣志知已四十餘年未修慨然以身任之且議將新舊各志一律重修戊申仲夏商之於余又云王公及纂修諸君頗肆余說開局未及期月編次已有端倪又張丙炎序云經始於道光戊申卒業於咸豐壬子成書五十卷。

八月十二日先生覆書楚楨。

覆書橋川子雍氏所藏手札云前缺介伯輩爲社會亦尙不間斷淇所編儀徵志將來成書亦斷不能及尊公之寶應圖經惟爲岑氏所撰校勘記中之帝紀地志彙傳三種二十卷尙不大謬現已刻成惜卷帙太多兼之



儒藏

劉孟瞻先生年譜 卷下

道遠不獲侍奉寄耳。現在岑氏昆仲復刻王象之與地紀勝業已開工大約明年可以成功。此書照影宋本刻其有訛誤伊現屬小兒爲之校勘近來肯刻古書者甚罕岑家叔侄尙有根器也。此覆並頌侍安文淇手啟。八月二十日。

九月二十六日戴文燦卒年六十五。

戴文燦傳詳道光三十年。

十月先生與楊季子王西御王句生有袁浦之役歲暮撰除夕同舟守歲圖序。青集卷四

序云呂氏春秋季冬紀注云前歲一日擊鼓驅疫謂之逐除歲除之名始于此其夕即謂之除夕六朝以前除夕見于題詠者甚鮮。問有一二作者如宋張望有蜡除詩梁庾肩吾隋薛道衡均有歲盡應令應教詩然皆不名爲守歲守歲之名始于唐太宗徐堅初學記載其二詩其一詩云共歡



新故歲、迎送一宵中。又一詩云、對此飲終宴、傾壺待曙光。則亦如今之俗達旦不寐矣。其後蘇東坡又因守歲廣爲饋歲、別歲詩三首、以寄子由。時東坡官于岐下、歲暮思歸而不可得、故爲此三詩以寓慨。其饋歲詩云、亦欲舉鄉風、獨唱無人和、感子由不在側也。道光癸卯冬十二月、余與楊季子暨王君西御、句生、昆仲于役袁浦、回里時、恰值除夕、泊舟寶應之汜水鎮、西御作詩、並命其子瑟雲繪圖紀事。夫西御之詞、亞於玉局、句生之學、不後穎濱。矧疇昔之會、無兄弟離別之苦、有友朋相聚之樂、視東坡酸鼻獨吟者、其境固不同矣。昔晉嵇含有娛蜡賦、其序云、大蜡之夕、雖天下同、有攜金蘭以齊馨利、貴得意以遺榮勢、孰我尙哉。竊謂此役方之嵇生、可以無愧。宜西御以此自豪也。西御作此詩、即屬余序之。余諾之、未果作。戊申十月、同人又有袁浦之役、舟次邵伯者三日、西御續作一詩來責前諾。余以傭書少暇、未能應命。歲暮歸來、稍得餘暇、薄田數畝、已納官糧、館穀



所餘聊資卒歲。既無租吏之催，何必議臺之避。惟茲宿諾久，未能償。又逼歲除，皇然負疚，吮墨伸紙，拉雜書之，以呈西御。正當柏酒初開之時，辛盤乍薦之候，西御覽此，當滿飲一巨觥也。

十二月撰周烈女傳紀後。青集卷八

是年寄書知縣王子涵論重修儀徵縣志體例。青集卷三

與王子涵司馬論修縣志書云：竊惟修志一事，先定體例，而體例之定，須將所有舊志參互考覈，擇善而從。現修儀徵新志，以嘉慶府志爲法，分門別類，略仿其例，誠爲盡善。然亦有當議變通者。府志以嘉靖維揚志爲最古，阮太傅處藏有一部。癸卯年燬於火，世間遂無其書。前此修府志時，採用雖多，然散見各門，其原書體例無可窺尋。考古者深以爲憾。儀徵舊志除陸志顏志外，康熙三十年馬公章玉續修之，胡志已不可多得。文淇訪之郡中藏書家，得康熙七年胡公初修之一部，又得雍正初年李公初修



之一部、皆阮太傅所未見者。舊志之難得如此。嗣又覓得隆慶申志一部。揚州府屬八縣、江都爲附郭首縣、而縣志僅有國初所修者、絕無明代之書。而儀徵則有隆慶志、誠不可不愛惜之也。太傅前撫浙江時、顏公修志、請定凡例。太傅勸其存留舊志、續修數卷。又屬江鄉堂先生別爲校補陸志一冊、附于顏志之後。及文淇館於太傅處、亦嘗論及修志之事、謂不可掩蔽前人。此次修志、擬推廣其意而變通其法。現所修各門、首隆慶申志、次康熙胡志、次康熙馬公績修之胡志、次康熙陸志、次雍正李志、次嘉慶顏志、次今日新增。其有爲各志所無而此次新增者、如鹽法事略之類、不妨照府志等書、新立一門而注明其故。文淇前胡志、鹽法志、所加籤條亦謂常采申志、胡志、食貨之文、加以新采各書、別立鹽法一門。惟陸志、顏志、原列於官署門、及前此曾致書局中、秩官門者、不必移入鹽法、當注明互見、以存其舊耳。

與諸君子商酌、第約略言之。今特細爲剖析。如能條列各志於前、有五善焉。書莫善於存古、古書存世頗少、邑志之舊者更少。隆慶申志、康熙胡志

實爲不概見之書、更數十年後、恐此二書亦難於永存、卽存、亦若滅、誠以原板久失、邑中人士不能盡見其書也。今將中胡各志彙列於前後、人讀新志者、卽可得此二書之崖略、則中胡二志雖滅、猶存焉。李陸顏四志亦並傳不朽、其善一也。事莫貴於核實、邑乘之得失、必具列其書而後可知。若空言某志善、某志不善、其得失之故、不能明也。今詳列其書、逐條核對、

而得失自見。

卽如田賦、門申志載洪武戶若干、口若干、永樂至正德戶口各有增減。陸

志因之、不以申志核之、則不知永樂至正德戶口之數有減無增。今列申志原文於前、而注明胡陸二志所改者於下、則胡陸二志之得失見矣。人

物門、胡志所收最濫。如廣陵吳晉等、皆係江都人、而胡志僅據後漢有廣陵鄉、遂濫行收入。不知江都亦有廣陵鄉也。今詳載胡志原文、而加按語

於後、則申志之所以不采、陸志之所以經刪、二志之駁謬見矣。既不掠人之美、亦不爲人受過、其善二也。

修志之法、貴精密而戒複漏。聚則易精、易密、散則易複、易漏。若將各志析散另編、恐或有新志本於舊志、而采新遺舊者、亦或有新志詳於舊志、而采舊遺新者、且恐有彼此俱遺、及彼此複見者。縱悉心考核、難保無疎舛。



之虞。今條列各志於前，則無重複遺漏之弊。其有詳略互見者，不妨隨條附注，以求精密。其善三也。凡修書，固不貴於速成，然亦不可遷延，以致半途而廢。日下志局所捐經費已極艱難，加以城郭被水，辦理賑務，捐項斷不能加多。而同局諸君子率多寒素，皆有館事羈身。若另立規模，必致曠日持久。今以前志爲主，後志與前志同者無庸複述，惟遇有詳略互異者，然後注明，似乎剋期可成，事半功倍。其善四也。夫作事期於易成，而立法貴乎能繼。歷數十年後，地方情形固有今昔之不同，而邑中人文蔚起，其應紀載者必逐漸加多。若不隨時纂錄，恐年代久遠，必有湮沒不彰之患。各地方修志，鄭重遲延者，多因經費難籌，誠以續修一志必另開生面，故築室道謀，事大難舉。若新志非井有條作法，貽後閱數十年，如有續修，即增補數卷，附於新志之後，則易於集事，無用更張。觀今日之力存舊志，知後日之必存新志。後之視今，不異今之視昔，其善五也。且地理志以漢書

爲最古、其首列禹貢全篇、次列周禮職方氏一官、然後述漢時疆域、此即新志備載舊志之例。後此郡縣志用其例者、如元至順鎮江志、各門每先引宋嘉定志。是古人已有成例、並非自我作古。或有嫌其沿襲、無所改作者、然以各志互相參考、加以釐訂、並非徑錄舊文。況舊志新增、分析登載、其注明以上舊志者、足以見諸君子編次之精、根據之確。其注明以上新增者、足以見諸君子搜羅之廣、纂輯之勤。則沿舊者不啻更新、而新采之功更著矣。又或疑年代先後、固有倒置者。然嘉慶揚州府志列女一門、有年代在前而反列於後者、實以前次修志時漏未登載、後次續修始經補入故耳。府志既循舊志次序登載、則縣志亦不妨仿此。矧正史之中、如後漢書內即有補前漢書之遺者、仍復各自爲編、不相牽涉。則時代之說、亦不必過拘也。以上諸條、皆管見所及、伏乞核定後、飭小史別錄一通、遞至書院、就正同局諸君子是禱。



按先考行略通集卷六云、總纂儀徵縣志、於編訂則獨肩其全、於修脯則僅受其半、同鄉諸君子歎爲世俗所難能。

是年、江夏童石塘濂權離政、延先生及楊季子、吳熙載、王句生注南北史。

按汪梅村先生文集卷七南北史補志表後序云、往者道光戊申己酉間、江夏童石塘濂太守權離政、延儀徵劉孟瞻文洪年丈暨楊君季子亮、吳君熙載、廷闕、王君句生翼以注南北史、設局邗城福因庵。童濂二十九年調任兩淮鹽運使、行實未詳。

是年、代阮伯元撰誥授中憲大夫道銜懷慶府知府汪君墓表。青集卷九

道光二十八年五月、河南懷慶府知府汪君之喪歸揚州、即以其年十月三日權厝於甘泉縣西鄉徐原橋之原。先期、其孤保和、溥熙、介徵持狀來乞表墓之文。余少與君之考容甫先生交、君又嘗從學於余、熟君之行事、不可無以應其孤之請也。按狀、君諱喜荀、字孟慈、江蘇甘泉人。先世居歙、





自唐忠武將軍越國公華始昌其族。忠武裔孫承清當北宋時，自唐模遷古唐，至君凡二十七世。高祖鎬京工詩及篆刻，始遷於揚州。曾祖良澤工篆刻，具有家法。厚德高風，鄉里矜式。祖一元，江都增廣生，矜立名節，不苟取予，性至孝，欽旌孝子。父中，字容甫，乾隆丁酉<sup>12</sup>科拔貢生，博聞強識，通知古今，爲文典正，閎麗卓然成一家言。國史館儒林傳彙有傳。君祖考皆以君官贈中憲大夫、道銜、河南懷慶府知府。祖妣鄒氏、妣朱氏皆贈恭人。鄒太恭人苦足疾，朱太恭人以口吮之，病亟，割股以進，欽旌節孝。君初諱喜孫，時鄒太恭人望孫甚切，禱於神而生君，因名之。嗣以避九世祖諱，更易今名。乾隆五十九年，容甫先生歿於西湖葛嶺園，喪歸，君哀毀如成人。時年甫九歲，朱太恭人親爲課讀，比長，延同里通儒魏先生彝群、丁先生澐、韋先生佩金、鍾先生懷授以根底之學。嘉慶十一年，督學莫寶齋先生晉取入甘泉縣學，即於次年丁卯中式本省舉人，報捐內閣中書，復改捐員



外郎簽分戶部補山東司員外郎監督儲濟倉。改湖廣司員外郎欽差東河學習補河南懷慶府知府欽加道銜誥授中憲大夫。道光二十七年八月三日卒於懷慶府任。君自傷幼孤鄉舉後託病謝絕酬酢博覽群籍於文字聲音訓詁多所究心。凡鍵戶三年學遂大進。父執王懷祖劉端臨段茂堂諸先生咸加歎賞而君顧歉然自下殷殷請益於政治沿革得失留心講求下筆爲文皆有關世用不作無益之語。君官戶部最久其主河南司稿也東河總督奏撥另案工需久經奉旨撙節及三汛安瀾後復請動帑君力言於上官奏駁。時河工用度浩繁乾隆嘉慶年間均係攤征于民積欠在嘉慶二十二年萬壽恩詔以前有八十二萬兩之多。君亟言于英煦齋相國和奏請豁免。其主貴州司稿也兼管各關榷稅力主不添關不添稅之議。江蘇巡撫咨請以揚州儀徵攔潮閘改駐新城擬增設羅泗閘。君以爲揚關統轄南北爲賦稅要地至于分口小閘吏胥多藉稽查以肆

援害。且新城至揚厘四十里，已有攔潮閘。若再增閘，似重徵擾民，有傷國體。力主議駁。載入則例。有議增浙海關稅，肩挑步擔一例征取者。有議以儀徵商船飭令至瓜洲交稅，由長江至沙漫洲，復遶道至瓜洲，不獨舟人不便于行，且恐滋賄囑關吏之弊。君皆力止其議。道光十年正月，補儲濟倉監督，不置車馬，不隨僕從，以杜騷擾需索之弊。嗣調海運倉監督，以丁朱太恭人憂去官。十五年入都，戶部尚書奏留本部管理井田科主稟。十九年，保送河工引見，奉旨記名。蒙召見，垂詢科分及在部歷任諸事甚悉，有久資老成之諭。奉旨發往東河。六月到工，隨同栗恭勤公防守兩河。凡遇老卒多方詢采，于隄工泉源漕運賑務靡不悉心講求。恭勤公深相倚重，所陳機宜皆邀契賞。二十一年，學習期滿，保奏奉旨發往東河以知府用。君具摺謝恩，蒙召見於圓明園大宮門，垂詢東河情形甚悉。又問前人有用甄工者否。君以黎襄勤之成法對，可以堅久掛淤。至爲搶險挑溜起



見則甄工亦較稽料更爲得力。上嘉納焉。陛辭請訓，仰蒙垂諭云：汝是讀書人，學問素好。今用汝外任，須要實心辦事，不可習尚浮華。君請謝恩後，即馳抵東河。七月，奉委防守黃河北岸七廳。值下北搶險，君晝夜搶護，不遺餘力，化險爲平。二十四年中，牟河決，委掌攔黃大壩。君會同都司劉公天保晝夜巡緝，獲放火搶奪工料、連傷人命匪犯楊元杜栓等二十名，嚴治之。牟工合龍議敘，奉旨賞加道銜。二十五年，補懷慶府知府。下車之始，日坐堂皇聽斷。凡遇應提之案，不徇情面，不易時日。履任未久，審結積案百數十起。先是二十三年，河內縣民李百幅調戲李遂姐，羞忿自縊一案，始則其母受賕匿報，既以需索未遂，屢控經年。案事者疑以和姦久之未決。君悉心推鞠，盡得其情，抵李百幅於法，旌李遂姐於朝。獄遂平反。暇輒巡行郊野，勞問民間疾苦。懷慶北枕太行，南瀕黃河，自清化以北，武陟以東，每屆嚴冬時，有劫掠。君捐資團練鄉勇民壯，時時親率巡查盜賊之風。

爲之頓息。郡中舊有覃懷書院，歲久傾圯。君捐廉五百金，重爲修葺，增建學舍，每值課期，必在院終日品隲文藝，講貫經史，孳孳不倦。丙午科鄉試，闔郡中式者十人，周嗣敬領解，文風稱盛。郡境濟河發源于濟瀆，駟分支于栢香鎮，東穿郡城，至龍澗村入沁。此乾隆四十八年所修故道也。旋因沁河灘地淤高，水洩不暢，河身節節壅滯。嘉慶十二三年間，濟水盛發，下游爲沁水頂阻，旁趨官道，匯注成河，土名官路河。繼又別開南北河一道，導引入黃，仍未暢洩。每逢大雨，溢出爲患。河武兩邑互相訐訟。君徧詢故道形勢，親履查勘，剴切出示勸挑。又恐沁水淹入郡城，用水旱平測量，都城一帶至龍澗村水口，較之沁河外灘高出數尺，可無倒灌之患。乃於道光二十六年四月興工，親行督飭，將舊河身及四門城濠逐段挑濬，深通一律。七月工竣，濟河遂復故道。計自栢香邨至龍澗東西七十八里，得水澆地一萬二千餘畝。郡內西王曲邨舊有河形，壅塞已久，居民爭水致訟。





君親行履勘督飭興工分水六道引沁流以資灌溉得水澆地三千餘畝。河口建閘外加八字石牆以禦沁河伏汎。居民立碑頌德名曰新開汪公河。二十六年閏五月大雨決旬沁丹並漲水高九尺有餘淹及沿河邨莊三十六處居民大恐。君冒雨馳赴搶護自河內天師廟至武陟木梨店百餘里間督率屬吏竭五晝夜之力將民堤加高培厚。又於張莊喫緊處所捐廉趕築甌壩堤身賴以穩固。又親赴被水邨莊散放饘餅分給蓆片搭蓋竹棚暫避風雨。工穩水落始請緩征繼求撫卹。大吏入告蒙恩發帑賑給口糧。君又親赴各村莊查勘撫慰目擊情形聲淚俱下。災民迎送道左咸感泣曰此吾儕眞父母也。是年饑饉接畛河內濟源兩縣搶糧者衆禁之不可。君出示勸諭富戶有屯糧者酌借與親族鄰里公同登記簿籍俟歲有秋照償不償者許稟官追給并勸富戶煮粥分路以賑窮民之無告者。由是貧富皆安各縣取以爲式。嘗查郡境離水較遠者諭令鑿井轆轤



引汲資灌地畝。每行郊外，輒就農民諄諄曉諭，人皆鼓舞從事。故二十六年間，河北彰德、衛輝、懷慶三府同時被旱，而懷慶府屬獨輕，賴君勸脩水利有素也。君體素健，年逾六十，鬚髮未白。自中牟工次掌守大壩，烈風雨雪，經秋徂春，宿於蘆棚，席地而臥，感受潮濕，頻年夏患腳氣。然調治至秋即愈。去夏又告愆陽，深入太行山，步行峻嶺亂石中六十餘里，至白龍潭取水歸郡，始得大雨。炎天遠道，涼霧深宵，感受山嵐暑濕，兼之積勞，遂至一病不起。君生於乾隆五十一年七月十六日，春秋六十有二。著有國朝名臣言行錄、經師言行錄、尚友記、從政錄、孤兒編，且住菴詩文彙。凡若干卷。又編集名公先輩所撰傳誌詩文爲汪氏學行記。娶范氏，誥封恭人。子三：長保和、江都縣學增廣生員，出嗣君從兄壻後。次溥熙，次介徵，俱國學生。考取國子監算學天文生孫一，繼善。君生有至性，每與人稱述先世懿德，輒泣然流涕。於容甫先生所著書，片言隻字，無不析及精微，心知其



意。又於先生手蹟斷箋敝紙無不寶而藏之。歷官中外、釐姦剔弊、每爲胥吏所切齒。在部時主藥、與大吏意見不合、則面諍不已。大吏每以強項稱之。泊爲外官、勤求民瘼、屬吏每不便君之所爲。然君在任時、鄰境以漕事屢興大獄、而懷慶獨靜謐無事。君歿未踰歲、歸德彰德諸府縣以辦災不善暨挑河緊帑事爲科道糾參、大吏俱被嚴議、而懷慶屬吏無被訐者。則君之治績可知也。余次序其家狀、擇其大者表於阡、且系之以銘曰：嗟汪君、亮節高誼、處爲孝子、出作循吏。儒素承家、經術飭治。勤官而死、誰不墮淚。伐石表阡、我銘無愧。

二十九年己酉 六十一歲

八月撰戴靜齋先生傳。戴靜齋先生遺書

傳云、先生姓戴氏、原名口口、避宣宗廟諱、改名清、字靜齋。其先世爲休甯人、祖父始遷揚州。先生天資穎異、自出就外傳、性耽典籍、凡有關實學者、

勤加采錄、異同疑似尤所究心。著四書典故考辨十二卷、自序云、漢人談經、最詳典故。宋大儒視典故爲粗跡、空疎者未必不有所藉口。我朝文教覃敷、名儒輩出、即四子書、考據者不下數十家。流覽之下、勤加采錄、垂二十載、得千有餘條。列孔孟年譜及其弟子考于卷首、尊古聖也。列記載注疏引用沿襲之訛於卷末、砭俗儒也。餘分十二卷、顏之曰四書典故考辨。爲朱子諍臣、不爲朱子諛臣。實事求是、前人固言之矣。其解論語拜下云、臣見之君當拜下者、覲禮九、聘禮四、燕禮十二、射禮四、公食大夫禮六。凡此五禮皆所謂禮也。邢疏引燕禮酬賓及覲禮賜車服二事證之、未備。其解孟子不挾兄弟而友云、江氏永云、古人以婚姻爲兄弟、挾兄弟而友與挾故而問相似。余謂爾雅釋親云、婦之黨爲婚兄弟、壻之黨爲姻兄弟。僖二十五年公羊傳注云、宋魯之間名結婚姻爲兄弟。此江說所本、當從之。所論皆確不可易。而最精者尤在地理。如孔子之去魯至衛、去宋至陳、孟



子之自鄒至梁、去齊至滕、以及太師之適齊、亞飯、三飯、四飯之適楚、適蔡、適秦、大王之踰梁居岐、晉人之由虞伐虢、莫不核其遠近、計其險夷。凡正路岐路之殊、陸行水行之別、皆一一書其古地、證以今名、犁然若聚米畫沙、俾閱者瞭如指掌、眞有功經義之作也。又著群經釋地十卷、自序云、歷來注經者、於地理一門、不無疎脫。昌黎云、土地之書、未嘗一得其門戶。且謂古之人、未有不通此而爲大賢君子、方欲退而往學、予敢矜言此哉。況乎儒者足跡、不能徧天下、徒抱遺編、相爭競、一有譌錯、村夫豎子、皆得指而議之、此注地理、尤難也。然拳拳之心、莫能自己、爰取向所錄存者、細心辨析、是者仍之、誤者正之、缺者補之。問出己意、參訂均釋、以今日地名、成書經、詩經、周禮、禮記各一卷、春秋三傳三卷、爾雅、論語、孟子各一卷。他經附見。顏曰、群經釋地、從爾雅舊名、亦就閻百詩先生四書釋地推廣之耳。其解爾雅東山云、史記吳起列傳、殷紂之國、左太行、右孟門。河北諸山以

太行爲大。秦漢以來，謂山東山西者，皆指太行山。周師自西而東，故曰東山。其解明堂位鬼侯云，孔疏周本紀作九侯，九與鬼聲相近。徐廣史記注云，鄴縣有鬼侯城。案鄴縣故城在今臨漳縣西四十里，集說以爲鬼方，非也。其解襄三十年傳成憇奔，平時云杜說周邑。按說文時，天地五帝所基址祭地。此邑必近周郊祭天處，當在洛陽縣境。其解哀九年傳吳城邾溝，通江淮云，杜注於邾江築城穿溝。按閻若璩云，夫差穿溝，疑爲今儀徵舊江口。正漢江都境，城亦在大江濱。其解釋山獨者，蜀云案揚州城北有蜀岡，蓋取其一山獨矗也。全書之考稽精審，類此者甚多。此外尚有雙柑草堂古今體詩八卷、古文二卷、駢體文二卷、經史管見四卷、史記說苑新序正誤各一卷、韻辨三卷、左氏兵法集證二卷。惜多散佚不傳。先生弱冠補儀徵縣附學生，屢試高等，食廩餼。以嘉慶癸酉歲貢生在籍，候選訓導。道光丁亥年卒，年六十六。子文超、文起、文越。余應童試時，先生爲認保，余以



師禮事之。先生顧折節下交，凡所著書，屬余校定。偶有爭議，先生必改而從之。余每聳肩付梓，顧以家書力不能刻。今墓木已拱，文超等寶藏其書，余故詳述先生著書大指，俾後之人有所考見焉。

十月十三日，阮元卒于儀徵，年八十六。雷塘庵弟子記卷八

十一月初九日，張石州穆卒，年四十五。張石州年譜

十二月，陳輅卒，年三十九。青集卷九

按陳輅字樸生，儀徵人。道光甲辰舉人，先生撰其墓表。

是年，撰處士余君暨妻姚孺人合葬墓表。青集卷九

按余氏名沅，字湘芷，揚州人。卒於乾隆癸酉十二月十二日，年四十一。道光己酉，其孫文煥以狀至，乞先生爲文表墓。

是年，應江夏童石塘濂之請，在邗城福因庵注南北史。

按此書或離兵燹而亡乎。未目睹焉。惟汪士鐸梅村所著之南北史補



志表佚於兵亂而後再獲。梅村所撰補志表後敘云、往者道光戊申己酉間、江夏童石塘濂太守權離政、延儀徵劉孟瞻文洪年丈暨楊君季子亮、吳君熙載、廷驥、王君句生、鳳注南北史、設局邢城福因庵。余以家累不克作遠遊、乃分任補兩史志表、而屬草於里門。又云、草稿既具、童公即世、此本存兩江節署。東南兵燹、不知所終。同治壬申、兩淮運使定遠方公購得此稿、劉君恭甫壽曾、孟瞻年丈賢孫也、證爲拙稿。方公將刊以輔延壽書、因介恭甫詢其顛末。是年、總纂重修儀徵縣志。

是年、女夫國子監生田溥光卒。劉容季氏歷錄劉壽曾撰亡姑國子監生田君妻劉孺人墓誌銘

道光三十年庚戌 六十二歲

十一月朔、元氏知縣劉楚楨郵書索取近作、因仿少陵存歿口號、賦六絕句

寄之。青集卷十一

懷人六絕句效少陵存歿口號并序云余素少交游自姻戚以外生平相知至厚者不過十數人就中子韻交最久季懷子敬子駿孟開次之楚楨儉卿蘊生仲虞賓叔彥之又次之最後乃得石州今存歿各半即其存者亦散處四方惟賓叔館於揚郡尙得偶相過從適楚楨自直隸元氏郵書索取近作爰仿少陵存歿口號賦六絕句寄之以懷人爲題故朝夕相見者如茗香季子熙載西御句生諸君皆未之及云道光庚戌十一月朔日識。

搜羅寶應圖經富

楚楨輯齊應圖經

續補延昌地志詳

平定張石州著魏延昌地志

元氏甘棠

誰薦達石州宿草劇淒涼

丁鴻豪健才猷懋

山陽丁儉神究心彙梓利病見所著石亭記事

姚信凋零樸學深

旌德姚仲虞深於周易著

有一經唐叢書多口未妨稱國士苦心何處覓知音



柳氏文章師子厚

丹徒資叔

柳梅君詩筆勝都官

江都梅生有嵇庵集

一經行世迂迴

待

資叔精於穀梁春秋著書七種待刊

片石貽孤鄭重看

蘊生家藏唐貞元田府君石

五色明珠輝璧社

高郵孫彥之與辛老同族編四書說苑

九苞威鳳耀河東

甘泉薛子韻系出河東著說文

答問疏證文選古字通等書

珠光久照人將老鳳彩先消遇最窮

廣文有道官偏冷

歙縣閔子敬官全叔母博有古君子風

公子多才命不猶

歙縣洪子駿爲桐生師嗣子

苜蓿闌干情自適芙蓉搖落稿誰收

子駿工詞有殘荷詞尤佳今遺集不存

大包君與小包君講藝談經迴不群

涇縣包季愷撰毛詩禮微其鍾阜孤族子孟開治公羊論語之學

墳悲夜月

季愷葬江寧

金臺旅館悵寒雲

孟開客京師館於呂鴻臚宅

楚楫得之賦答載在念樓外集

卷一

歲抄得孟瞻懷人詩賦答云吾郡

文又儒首推吾宗秀堅貞竹柏懷香潔芝蘭臭與俗寡所諧歲晏今朋

舊吟詩首及余懇懇意良厚封緘遠見貽令我日三復時余方行役房

涿久逗遛常恐集愆尤違復計去就登高望故鄉陰雲彌四宙日暮百

禽稀天寒萬山瘦。臨風訴遠心、離情滿襟袖。

是年撰清故貢士戴君墓志銘。青集卷十

君姓戴氏諱文燦字蔚華號雲軒先世福建漳浦人。高祖諱維瑞貿易六合因家焉。曾祖諱世鐸祖諱源父諱廷楷例授登仕佐郎。僑居揚州。後因家道中落遂歸六合而君常館揚州。君少聰慧九歲作蠅頭書即工整喜摹印章稍長受業於儀徵方立堂先生之門學遂大進。嘉慶丙寅補縣學弟子員肄業梅花書院。鹽政阿厚菴先生山長吳山尊先生亟稱賞之。試皆前列。嗣丁母憂事庶母如母視從昆弟若親昆弟戚黨貧無依者君皆賙恤之。中式道光辛巳恩科舉人以登仕君年老不赴禮部試。越二年登仕君卒哀毀盡禮服闋後兩遇大挑親朋勸君北上謂即不中式亦可與挑選君却之曰士子讀書所以求祿仕者不過博父母歡耳。今二親俱逝復何志於此耶。卒不赴。余嘗謂君有三反君最工制義兼善院體書人咸



儒藏

謂取青紫如拾芥、而君足迹不一踏京華塵、此一反也。君博覽羣籍、於聲音訓詁致力甚深、而同儕講藝、酬酢紛紜、君獨若一無所省識者、然此二反也。君善談名理、偶發一語、饒有竹林諸賢風味、而束身甚嚴、履規蹈矩、不似晉人之放蕩、此三反也。吾友梅君蘊生嘗作五君詠、以齒爲序、君居其首、次薛子韻、次余、次劉楚楨、次王西御。其詠君詩云、淵衷富圭璧、含輝資深美。履道衆忘介、飲和物莫鄙。蘊生固不輕許人者、其傾倒若此、則君之爲人可知矣。君生於乾隆甲辰五月二十五日、卒於道光戊申九月二十六日、春秋六十有五。著有石城遊記、子史韻編、竹齋印譜、鋤月種梅花館賦鈔、種梅書屋詩草、聽鸛館試體詩及制義若干卷。配曹孺人、勤儉持家、孝慈有則。生於乾隆戊申五月初八日、卒於道光己酉四月初五日。春秋六十有二。子廕培、縣學生。孫其祥、女適江寧縣學生汪珏。君晚年善病、而神氣不衰。卒之前二日、由揚州尅日遄歸、與親友訣別、奄忽而卒。其卒



之日、即登仕君忌日也。余與縉生、子韻、楚楨、西御諸君蹤迹至密、獨與君疎闊、或隔歲一見、或一歲三四見。然相視莫逆、亦與諸君等也。戊申八月杪、存君館中、君言笑欵曲、甚至。未匝月而聞君訃、傷已。廕培將以庚戌十二月初三日葬君及曹孺人於六合縣峨眉山之原、先期請銘。余誼不獲辭、因次序其生平而系之以銘曰、

藏器不用、反吾性真。恬於勢利、迺見斯人。緬昔子雲、自矜寂寞。行不副言、人嘲投閑。好古樂道、君實過之。後有來者、請視斯辭。

是年、仍總纂重修儀徵縣志。

是年、撰劉迪九先生墓表。

表云、道光某

念樓集卷八  
行狀作元

年月日、寶應劉寶楠楚楨以其先人行狀及遺

書來請銘。文淇與楚楨游最久、不敢以不文辭。按狀、先生姓劉氏、諱履恂、字迪九、先世蘇州人。明初遷寶應、遂著籍。曾祖中從、康熙戊子科舉人、石



埭縣教諭。祖家晟，附貢生。本生祖家昇，康熙甲午科副榜貢生，以孫台斗貴，贈工部營繕司主事。父世詵，附貢生。世修儒業，邑人稱道學家，必曰東門劉氏。先生年十八，補揚州附學生，試高等，補廩膳生。中式乾隆五十一年舉人年，四十九矣。時主試者爲故大學士大興朱文正公，故編修大庾戴公心亨所取多績學士，而寶應劉氏有三人，先生其一也。累赴禮部試，不第。大挑二等，錄用教諭。改國子監典簿，旋以疾卒於京師。從弟營繕君以其喪歸。先生事親孝謹，父早卒，母成孺人多疾，先生與諸弟更侍，不假婢嫗。雖褻器必啟視色，如常則喜。與諸弟友愛，治家內外有法度。善議論，有幹事才，解紛撥煩，拯人困急。嘗畀族人金使治生，卒蕩其貲，迫飢寒，其妻復碁之來。某曰：雖渠必更助我無顏。尋病死。先生歛葬之。族某將遠依其戚，謀于先生。時方鬻田償責，輒盡持其直以爲贐。其行誼類如此。幼習毛詩，長乃博覽經史百家之說。其說經多以經注經，折衷一是。其詩溯源



騷選、質雅、冲和。著有秋槎雜記一卷、義迹山房詩稿一卷。即今所刊刻者也。先生凡再娶，皆喬氏。初娶同縣附貢生其崇女，賢明不壽。繼娶同縣廩貢生光宗女，幼涉書史，略通文藝。年十九來歸，前孺人所生子女皆幼。孺人曰：欲兒輩學閔子騫，我先勿爲閔子騫之母。慈愛終其身。先生鄉舉後，奔走衣食，終于旅次。孺人仰事成孺人，俯育諸孤，井臼皆親操之。成孺人疾，不御藥。孺人奉藥跪床下，率諸子以次伏地移時，乃強御。孺人退至私室，慟欲絕。隨遭成孺人及伯子仲子之喪，哭泣無虛日。年未五十，衰病如老人。處娣姒善，忍讓憂喜與同。授事必力，教子束修，外不名一錢。自立身行已至一話一言，朝夕檢誨，反覆不倦。卒之前月，將有事先墓，猶力疾治滌濯，必敬必潔。蓋數十年如一日也。先生卒於乾隆六十年四月二十一日，年五十有八。前孺人卒於乾隆三十九年正月二十一日，年三十有四。孺人卒於嘉慶十六年閏三月二十九日，年五十有五。合葬城北二十五

里黃陸溝之原。前孺人生羣集、廩膳生、芝集、增廣生、女適歲貢生喬德全。孺人生寶樹、嘉慶丁卯科舉人、五河縣教諭。次寶楙、次寶楠、道光庚子科進士、直隸元氏縣知縣。孫八人、霖、縣學生、寔、恭綬、恭珩、恭笏、縣學生、恭冕、恭絢、俱府學生。曾孫一、長年。先生以寶楠官、贈文林郎、元氏縣知縣。兩孺人均贈七品孺人。既次序其狀、因表其墓曰、昔歐陽文忠公爲唐子方之父、贈公作墓表、其言有曰、余於此見朝廷所以褒贈臣子之意、豈不厚哉。又以其子之爲善者、雖湮沒幽鬱、其潛德隱行、必有時而發、而遲速顯晦、在其子孫。然則爲人子者、其可不自勉哉。蓋古之爲子者、祿不逮養、則無以及其親。今之爲子、其有克自樹立者、則尙有榮名之寵焉。嗚呼、文忠之論、可謂善勉人子者矣。抑余又有說焉。世之褒贈及親者、豈少也哉。然不能如子方之直聲亮節、則亦無以貽親以令名。雖榮名之褒贈、曷貴焉。楚楨爲縣令十年、所至俱有循聲、是真無愧於子方而能以令名貽親者矣。



榮名之寵云乎哉。因系以銘曰、

先生之學博乃益精。先生之德晦乃益明。惟兩孺人同宗之秀。先後來歸。女誠是守。厥有賢子。競爽迪哲。能讀遺書。能揚先烈。果有令名。以慰孝思。伐石表阡。我無媿辭。

按墓表云。楚楨爲縣令十年。按劉楚楨先生年譜。道光二十年進士。授直隸文安縣知縣。明年四月赴任。二十六年。授元氏縣知縣。咸豐紀元。去元氏任。故繫之此年。

是年。校刻寶應朱彬武曹所著之禮記訓纂。

按朱彬之子士達序禮記訓纂云。丁未。解組歸里。卜居邗上。始得校字。並囑大甥陳孝廉輅詳校。未終而卒。復延劉孟瞻明經文淇。王寬甫封翁敬之。重加校訂。閱二年而畢。急付梓人。又孫念祖序云。泊丁未歸田。後屬儀徵陳孝廉輅。劉明經文淇。高郵王封翁敬之。先後詳斟。乃付剞

氏版存邦江寓邸、襲弄弗敢忘。癸丑春、府君還白田、未浹旬而郡城有警云云。據之、先生校刻禮記訓纂、始于是年、其竣工恐在于咸豐元年。再按、朱彬字武曹、一字郁甫、寶應人、授國子監學錄銜、以子士彥官、贈光祿大夫、內閣學士、兼禮部右侍郎、與劉端臨、汪容甫、王石臞、邵二雲相善。生於乾隆十八年九月、卒於道光十四年正月、年八十二。著有經傳攷證八卷、禮記訓纂四十九卷、文集四卷、詩集一卷、朱氏支譜一卷、白田風雅二十四卷、邑乘志隅、玉山草堂課藝各若干卷。又編錄劉端臨遺書。

是年寄書楚楨之子恭冕。叔俛 橋川子雍氏所藏手札

手札云、俯之世講足下、去歲曾獲一緘、諒已鑒入。比維侍奉曼福、著述日增爲頌。淇現爲岑氏校刻輿地紀勝及朱武曹先生禮記訓纂、均約于春夏間可以竣事、終日碌碌、未遑自理舊業。每念英俊勤于編集、深爲健羨。



論語疏證尊甫已有長編足下能繼述盛業不使高郵父子專美於前是所望也。劉都轉之子茲民茂才深嗜金石昨持凝禪三級浮圖碑見示紀年元象亦係東魏時物。碑稱居士趙姓係元氏人不知此石在否。如在此乞代拓數張分贈同人。沈君常山金石志如有釋文亦希抄示。沈君書能代覓一部更妙。近來邑中曾訪得新出土及舊有者若干能見知一一否。揣此奉布即頌侍安不一文祺頓首。

按清史列傳卷六十九及寶應劉楚禎先生年譜恭冕楚禎次子字叔俛一字俯之號勉齋附監生。光緒五年舉人守家學通經訓初入安徽學使朱蘭幕爲校李貽德春秋賈服注輯述移補百數十事後主講湖北經心書院編纂沔陽州志黃州府志黃陽縣志晚年治公羊春秋發明新周之義闢何劭公之謬說又繼父志成論語正義他著何休論語注訓述廣經室文鈔等。



咸豐元年辛亥 六十三歲

五月十四日、孫顯曾歿甬生。

按劉容季氏來書云、顯曾字誠甫、一字橙浦、戊子科舉人、壬辰科進士、官監察御史。生於咸豐元年五月十四日、卒於民國十七年三月七日、年七十八。

十二月撰戴靜齋先生遺書序、且於其著四書典故考辨十二卷、群書釋地十卷中各擇數十條、編爲兩卷刊行之。

序云、吾鄉戴靜齋先生著述甚多、其尤精者、四書典故考辨十二卷、羣書釋地十卷。詰嗣宗謝文超、子揚文超兩君藏其稿於家、未能付梓。文淇謹於二書中各擇數十條、編爲兩卷、寫成樣本。吳陶伯中翰、汪醇卿太史暨及門岑生仲陶捐貲刊刻。雖所刻無多、而吉光片羽、實爲希世之珍、俾讀者先覩爲快。倘有好古者將二書全行刊布、庶先生之學得以盡顯於世。

而兩嗣君謹守遺書、惟恐失墜之意、亦可稍慰云。咸豐元年十二月、同邑後學劉文淇謹識。此序青集未收。

季冬伯山代先生撰寶應成蓉鏡所著禹貢班義述序。通集卷二。是年、仍總纂重修儀徵縣志。

咸豐二年壬子 六十四歲

是年重修儀徵縣志五十卷竣功。

咸豐三年癸丑 六十五歲

二月二十日、孫淑曾生。

按劉容季氏來書云、生於咸豐三年二月二十日、卒於光緒十七年三月二十日、年三十九。適曲阜進士山東即用知縣孔昭來。昭來隨大府治河落水死、淑曾仰藥以殉。奉特旨旌表節烈。碑傳集補卷六十有傳。

二月二十三日、林鳳祥等率衆陷揚州。續纂揚州府志卷二十四



備藏

二月先生避難邵伯埭。青集卷七漢延熹西嶽華山碑舊拓本跋。摛出重修儀徵縣志而佚其一卷。重修儀徵縣志張丙炎序。

八月王西御絕粒死。年六十二。結纂揚州府志卷十三。

九月羅茗香爲賊所殺。年六十五。揚城殉難錄卷二。

羅茗香名士琳。茗香其字。諸可寶所編時人傳三編卷四以茗香爲號。次廖爲字。甘泉人。上舍生。

循例貢太學。考取天文生。咸豐元年恩詔徵舉孝廉方正。以老病辭。二月郡城失陷。窮餓自甘。不屈於賊。屢脅入館。堅執不從。九月間爲賊所殺。至死罵不絕口。年六十五。給雲騎尉。妻孔氏子亨輔。婦金氏。孫女二人並被殺。茗香精天文算學。著述頗富。又編續時人傳六卷。工駢儷文。有觀我生室彙稿。時人傳三編。卷四揚城殉難錄卷二等有傳。

十二月於邵伯市肆獲漢延熹西嶽華山碑舊拓本。青集卷七。

是月丁儉卿以團練之役橫被仇誣。羈繫揚州七閱月。先生朝夕省視。劉容

季氏歷錄丁晏撰皇清優貢生候選訓導劉君墓誌銘

按丁儉卿所撰墓誌銘云癸丑冬季余以團練之役橫被仇誣羈繫揚州七閱月君朝夕省視患難之交親逾骨肉自痛衰病餘年鮮民之生不如死之久矣蓋此年先生在邵伯鎮故其朝夕省視當在次年。

是年楊季子絕粒卒年五十七。

按續纂揚州府志卷十一咸豐三年粵匪陷城絕粒死長子諸生建和孫積厚俱自刎死長媳周氏被殺。

包慎伯欲避難卒於途年七十九。

按續碑傳集卷七十九書安吳包君謝應芝云癸丑歲以避粵賊之亂卒於途丁晏所撰頤志齋感舊詩云癸丑季冬年七十九卒於海州然清史列傳卷七十三云咸豐五年卒年八十一者恐誤包世臣字慎伯安徽涇縣人世榮之從父兄慎言之族兄嘉慶十三年舉人大挑一等



周遊天下、誘掖後進、所造就尤衆。其在揚州最久、工詩文書法、私淑亭林、潛心經濟。著有安吳四種、小倦遊閣詩文集。

咸豐四年甲寅 六十六歲

避難在邵伯。青集卷二重修玉皇閣記

三月、撰漢延熹西嶽華山碑舊拓本跋。青集卷七

按跋尾云、咸豐歲次癸丑、余避難邵伯埭上。嘉平十日、於市肆偶獲是冊、晨夕展玩、遂至忘憂。天殆憐余衰老、聊以此慰藉於羈愁寂寞之時耶。抑神物有知、久晦於故紙堆中、欲使余之鑒別以顯著其瓌寶也。甲寅三月、亟爲重裝、爰跋冊尾。

秋伯山代先生撰歲貢生董君家傳。通集卷六

是年、在邵伯寓玉皇閣、撰重修玉皇閣記。青集卷二

按重修玉皇閣記云、咸豐甲寅文淇寓居閣中、管君以此次重修未有

記文屬爲紀其年月。

是年亂收復後先生回揚州。

按丁儉卿序楚楨詩文集十卷念樓府君行狀引云咸豐癸丑余以剛練被議羈繫揚州孟瞻時時省視攜襦被與共居。

是年與王句生編揚城殉難錄四卷。

按男冊二卷殉難者共一千三百三十一人女冊二卷殉難者共一千一百一十七人。通共二千四百四十八人。自此年二月至十一月止或被殺或絕粒死或焚死或自刎或自縊或入水死不論老幼不堪卒讀。別補遺男三十一人女四十一人皆錄自咸豐三年至八年續纂揚州府志忠義節烈本是書云蓋是書亂收復後歸揚先生與王句生合纂而其補遺則句生獨纂耶。

是年題王西御僧保秋橋唱和圖并序青集卷十一



備藏



題云、道光壬午、西御與其弟句生、及梅蘊生省試後、買舟石城橋、同賦秋柳詩、繪圖紀事。咸豐癸丑、粵寇陷揚郡、西御殉難。收復後、謝守之、購得此圖、出以屬題。時句生游浙江學幕、蘊生物故、踰十年矣。

卅角論交即識君、元龍豪氣迥超羣。誰知晚值紅羊劫、白髮蕭蕭陷賊軍。絕粒吟成絕命詞、誦君遺什淚漣漣。劇憐垂死呼號際、猶盼官軍奏凱時。風景何殊跡已陳、白門楊柳浣緇塵。披圖誰不增惆悵、却少新亭對泣人。九月二十一日巳時卒、年六十六。

按、先考行略通集卷六云、不意項側生雛、膿雖出而體甚虛。俄頃之間、氣息漸微、倏已棄養。此皆不孝侍奉無狀、致隕天年。嗚呼痛哉。先考生於乾隆五十四年十月二十三日申時、卒於咸豐四年九月二十一日巳時、享年六十六。

遺命不延僧道齋懺禮也。丁巳撰皇清優貢生候選訓導劉君墓誌銘

饒崧撰先考行略。

咸豐五年二月九日葬於城西郝家寶塔之原。通集卷六先考行略

劉楚楨撰墓表。念樓外集卷二丁儉卿撰墓誌銘。劉容季氏贈錄

同治四年二月二十六日黃孺人卒年七十三。其年五月初三日合祔於郝家寶塔之原。通集卷六先母黃太孺人行略

以孫顯曾貴。誥贈奉政大夫。覃恩。晉贈朝議大夫。

劉孟瞻先生年譜卷下終



備藏

劉孟瞻先生年譜 卷下

校記

①原校：「月朔」之下脫「撰」字。

②姚瑩：原作「瑩姚」，據下條「送姚石甫先生瑩觀察台灣」乙。

③香肆：原作「香肆」，據下文及《青溪舊屋文集》卷一〇《先府君行略》改。

④立：當衍，見右引書卷四《項羽都江都考》。

⑤原校：「讀者」下脫「先」字。

⑥飫：原作「飲」，據《青溪舊屋文集》卷六《句溪雜著序》改。

⑦宮：原作「供」，與上文「館中供事」之「供」互訛，據原校及《青溪舊屋文集》卷五《魏延昌地形志序》乙正。

⑧此處當有脫誤。

⑨稿：原作「橋」，據《青溪舊屋文集》卷六《夢陔堂文集序》改。

⑩庾徐：原作「庾徐」，按，庾、徐即庾信、徐陵，據右引書卷一〇《清故貢士梅君墓志銘》改。

⑪「揚」上當脫一字。

⑫丁酉：原作「丁酉」，據《青溪舊屋文集》卷九《懷慶府知府汪君墓表》改。

⑬原校：「浮君」下誤衍「請」字。

⑭原校：「銘曰」下誤衍「漕」字。

⑮書：疑誤，或當作「貧」。

⑯愁：原作「秋」，據《青溪舊屋文集》卷七《漢延熹西嶽華山碑舊拓本跋》改。又前文「避難」，右引書作「避兵」。



儒藏

劉孟瞻先生年譜 卷下

## 附錄

劉國子家傳江東布衣包世臣撰書

江淮間有篤行君子曰懷瑾劉君者嘉慶甲子余再至揚州識凌曙曉樓以識君及君之子文洪孟瞻。曉樓蓋君妻弟也。孟瞻時年十二三穎敏誠樸善讀書余尤愛之。因數過君家與君習。庚午余挈眷來僑汜道光甲午乃移居白門前。後三十年中間曉樓不祿。孟瞻名日起故余論交於揚州以君喬梓爲最久而善也。揚人之稱君也謂君齷齪失怙恃淪落甚年十二始入書塾甫三年則已熟經書解文義。貧不能卒儒業乃習賈而所業復不足自立君私購醫家書乘夜誦習之晝執賈業無遺誤久之人知君能求治者多應手愈遂改業醫。君治病者不論貧富皆輒往。富室酬報從其意貧者且贈以藥餌或袖錢資將息。其有瘡潰膿血臭穢至家人莫敢近者君見可治狀必親爲洗滌加膏丹以瘳



爲度。君醫名既噪，泊瘞老不改其初。君家故有祖遺神香肆，各房輪值司肆事。其不值之房，值者歲貼白金三十兩，值者欺君孤弱，遂據如私產，起家累萬。旁觀憐君困，皆憤勸君持約劑，結算當得錢千緡。君曰：「貧富命也，爲財利傷同氣之好，吾不忍也。」後據業者蕩其積，君境漸給，振助之，有宗人恩。凡君生平行治，其見稱於鄉里者如是。余則謂挾術者多居奇，搜利者必乘危。君雖不諱自濟，而意則專於濟人，市肆中無是人也。世儒讀書，無關於考試者，輒莫省。或稍加披覽，又厚自矜異。君記問過人，雖不事舉子業，暇輒溫煖經籍，泛覽史冊，答問者無所隱滯，而絕不以知能自銜。庠序中無是人也。古之被褐懷王者，大都任情絕俗，而君和易豈弟，無崖岸，山林中亦無是人也。是可謂幼壯孝弟，耆耄好禮，不從流俗，修身以俟死者矣。君諱錫瑜，號琢齋，懷瑾其字也。援例入國子監。以道光庚子八月八日卒於家，年九十有二。曾祖春和，始自漂水遷揚州。以長子起寅貴，贈明威將軍。祖起泰，國學生。父礪，始占籍儀徵，與從兄瞳俱爲縣學。



生員配江都凌氏前卒。子一即孟瞻。嘉慶己卯優貢生。文學爲江淮甲觀。藝林無異詞。而年逾五十閉戶著書。無幾微不豫色。孫一毓崧道光庚子優貢生。其未成童也。文筆已騰蹕凌厲。排突前哲。而馴謹訥言。俱有君之風。女一適同邑庠生陳傳洛。孫女一適江都國學生田溥光。曾孫一壽曾。

清故優貢生候選儒學訓導劉君墓表 劉寶楠撰 念樓外集卷二

君諱文洪字孟瞻先世溧水人高祖諱春和監生始遷揚州以長子起寅官贈明威將軍□□營守備曾祖諱起泰監生祖諱礪占籍儀徵補縣學生考諱錫瑜監生累世載德潛伏弗耀君岐嶷者學長通羣經嘗謂左傳杜注多襲取漢魏人舊說成左傳舊注疏證八十卷纂輯凡四十年始脫藁謂唐孔氏疏多襲劉光伯述議成左傳舊疏考正六卷按刻本八卷也又以餘力究心地理水道表微開幽孜孜不輟成楚漢諸侯疆域志三卷揚州水道記四卷讀書隨筆二十卷青溪舊屋文集十卷詩集一卷按美術叢書收錄先生所著藝蘭記吾郡文學自興化任氏寶應劉氏高郵王氏李氏江都汪氏焦氏江氏儀徵阮氏並博通經史各成羣書衣被海內君與母舅凌君曙甘泉羅君士琳薛君傳均繼其後而君之學傳習者尤衆君早補縣學生嘉慶己卯學使蕭山相國湯公以君優行貢太學待次吏部君事親純孝父年篤老日省君侍起居朝夕扶掖寒夜與父同被臥不入私室



凡十餘年。浚君極貧、遺孤饒瑞、君收育之、延同里方申爲師、並補諸生。通虞氏易、饒瑞通公羊春秋、皆君教也。寶楠與君同貢太學、就館郡城、與君鄰、交最深、知君內行最悉、用揭其學行之大者、以表君墓。君子饒崧優貢生、傳君學。孫四人、壽曾甫成童、已能讀君書。餘幼。同歲生寶應劉寶楠謹表。

皇清優貢生候選訓導劉君墓誌銘

同門生山陽丁晏撰文  
儀徵吳熙載書并

嗚呼。揚州純儒劉君之墓既卜。垔有日矣。其孤毓崧以狀來乞銘。按狀。君諱文淇。字孟瞻。儀徵人。高祖春和。自溧水遷揚。以次子守備起。寅貴。贈明威將軍。曾祖起泰。監生。祖礪。始隸儀徵籍。補諸生。父國學君錫瑜。以醫名世。壽逾九秩。君孝養承志。能得歡心。幼而穎異。稍長。即研精古學。貫串羣經。於毛鄭賈孔之書。及宋元以來通儒解詁。博覽冥蒐。實事求是。尤肆力春秋左氏傳。謂杜注襲取先儒雷同勦說。君取賈服古注疏。通證明上稽先秦諸子。下攷漢唐故書。旁及史傳御覽筆記文集。左右采獲。擇精語詳。成書八十卷。又輯左傳舊疏攷正六卷。謂孔冲遠刪定舊疏。不出一人之手。多襲取劉光伯述議。攘爲己文。其闡明經義。皆前儒所未及也。究心漚水通鑑。諷誦略皆上口。鉤稽正史地理之沿革。水道之變遷。尤所諳悉。據史記秦楚之際月表。謂項羽曾都江都。輯項羽王九郡考。十八王分地考。又據吳越春秋。水經注等書。謂唐宋以前揚州地勢南高。



儒藏

劉孟瞻先生年譜 附錄

北下、且東西兩岸未築堤防、與今運河形勢迥殊、著揚州水道記四卷。學有心得、隨時劄記、著讀書隨筆二十卷。古文淵雅淳茂、不爲無用之作、大抵攷訂經史及閭閻之文爲多、著青溪舊屋文集十卷、詩一卷。君爲人天性誠樸、端重無戲言、從學者多歸然尊爲祭酒。而君沖挹自下、鄉黨逶逶獎人之長、忘人之過。願勇於爲善、遇友朋緩急親故、貧必竭力營救、家屢空不恤也。自治甚嚴、斷於義利之辨。守揚郡者、如劉公源灝、李公璋煜皆重君之學、禮接甚恭。君道義自持、非公不至、可謂純德君子矣。嘉慶丁卯君補附學生。甲戌君歲試第一、食米廩。學使蕭山湯公嘉君經學舉己卯科優貢生、以爲多士矜式。應秋闈、十四試不售。君之意泊如也。讀書下帷、老而彌篤。晚歲阮文達公延主師席、深敬禮之。生於乾隆五十四年十月二十三日、卒於咸豐四年九月二十一日、壽六十有六。遺命不延僧道齋懺禮也。配黃孺人子一、毓松能嗣君學。道光庚子優貢生孫四、壽曾、貴曾、富曾、顯曾葬於城西郝家寶塔之原。君與余以優行同舉、

長余五歲。締交三十六年。問學切劘。久要無間。病革前一日。語毓崧曰。淮南書信已來。逾時。余書方至。君若前知之者。亦見君之卷卷於余也。癸丑冬季。余以團練之役。橫被仇誣。羈繫揚州七閱月。君朝夕省視。患難之交。親逾骨肉。自痛衰病餘年。鮮民之生。不如死之久矣。君迺先我歸宅。順受考終。既爲健羨。益深蠱傷。銘曰。澹泊儒門。君迺振起。風雨如晦。雞鳴不已。瘡石蜚飛。民多戕死。全受全歸。戢身安止。守學彌惇。修身以俟。我銘幽堂。永傳千載。<sup>②</sup>



儒藏



清故優貢生劉君某誌銘

實應劉恭是撰文  
邵陽魏耆書丹

君諱毓崧字伯山又字松崖先世有諱春和者由漂水遷揚遂籍儀徵祖諱錫璵國學生精習醫術鄉稱仁善父諱文洪嘉慶己卯科優貢生候選訓導掣經篤行爲世儒宗君束髮受學不好嬉弄八九歲時閱通鑑習其句讀父執驚畏目爲奇童自是問學日進名譽大起當世持文衡者咸願得君爲舉首道光庚子以廩膳生舉優行貢太學最後廣東巡撫湘陰郭君嵩燾奏君樸學宜充八旗教習以資講課而湘鄉相國曾公尤禮異之自訓導君爲左氏學君續前業用力甚深旁通諸經史諸子百家之書凡所寓目略能記誦悉其原委廣座中聞君談論或私取原書核之皆無有誤精於勘校友人有所述作或刊刻多質君乃定著有春秋左氏傳大義周易尚書毛詩禮記舊疏考證經傳史乘諸子通義彭城獻徵錄舊德錄王船山年譜通義堂詩文筆記各若干卷君事父母終身無一日失歡姊妹皆早寡遺孤嗣亦幼就食君家君承先志無所異視撫



教孤幼、俾各成立。與朋友交、勸善懲過、終始不渝。爲人謀周慎、必期有成。臨財無所苟取。綜君學行、質之古人、宜無愧已。生於嘉慶戊寅二月二十三日、卒於同治丁卯八月初九日、得年五十歲。配汪孺人、同邑縣學生諱穀之女、有婦德。母教爲三黨所知。其卒也、君爲之誌。繼配黃孺人、子四、壽曾、同治甲子科副榜貢生。貴曾、富曾、並縣學生。顯曾、咸世君學女二、長適縣學生汪兆曾、次未字、均汪孺人出。壽曾等將以是年十月二十四日卜葬君於郡城西郊郝家寶塔之原、與汪孺人合葬、而屬恭冕爲埋幽之文。恭冕與君世交垂四十年、生平所敬事如君者、曾不數人。而君今遽歿、悲夫。乃重爲之銘。其詞曰、世稱君爲經師兮、抑其行爲無悖也。天遽奪此賢達兮、世孰爲予誨也。願詰謀之無愆兮、大業終其不廢也。予冀言以傳信兮、非於君有私愛也。願長貞茲佳宅兮、幸樵采之無逮也。

清故副榜貢生候選知縣劉君某志銘

江寧汪士鐸撰文  
秀水高行篤書并並篆蓋

國家以文德化成海內、百年來、尤重經術、江淮間推儀徵劉氏、自孟瞻先生以經學純德師表儒術、余同年伯山繼之、其良子恭甫又繼之、三世通經精博、學者企若吳門惠氏。光緒八年孟秋、恭甫弟良甫來視余、泫然垂涕、告恭甫七月十六日以疾卒於家。哀動左右、余不禁錯愕失聲。蓋余從君三世游、不幸如昌黎之於馬北平也。良甫以君狀來乞銘、義不忍以衰朽辭。且哀良甫昆季友于之戚、而自歎蒲柳不凋、芝蘭早賈焉。按狀、君諱壽曾、恭甫其字也、又字芝雲。同治三年刻榜貢生、光緒二年又中副榜第一。以籌餉勞、得知縣、晉同知銜。年四十五配李宜人。江都方聞士賓、岫女、少君三歲。子師蒼、方九齡。女一、亦幼。明年、川良甫等葬君於郡城西郝家寶塔之原。狀言、國學生諱錫璫者、君曾祖。孟瞻先生諱文洪、伯山同年諱毓崧、皆優行貢生。當世幼崽所習聞、君之祖若考也。嗟乎、有生之理、必天竺之人養之。既資梓抱懿、已或不免獲於內外、免焉而



稊落無所遇。至有所遇、遂衍衍醉飽、汗漫弗省錄、此則宜有人責矣。君乃魚濡獸起、期副知我、其神既散、散則疾去之勢也。念君自同治初旅金陵書局、其府主則洪琴西都轉也、其賞拔則曾文正以來六七公也。此皆一代名卿大夫、甲推乙掖、躋君於雅材之右、豈詘於人不知邪。食人食者、事人事、卒以積瘁、至不逮中壽。莊生所謂以有涯隨無涯、日遠於冥極、竭於報稱、而忘其原不給也。君孝友謙謹、孚於人、治經該博、摘詞古雅、大師碩彥、禮先縞帶。嘗修江都縣志、又偕余纂江甯府縣志、份份冠吾曹。所校刊者多官書、所自著有傳雅堂詩文集及札記若干卷、昏禮重別論、對駁義南、史校義集平、文譜類釋、臨川答問若干卷、良甫等裏之、臧於家。昔余嘗謂倫理者所以養人性情者也、出即劬於所執、入而有孔懷之歡、室家之好、不猶足宣暢人之志意乎。孟瞻先生里居教授、伯山辟寇、盡室與偕。惟君旅寓吾郡十餘年、所居飛霞閣、踞冶城山顛、下行百數十級、抵山麓、始睹人獸迹。終歲樵汲、寄一雇僮。每至窮秋繁霜、坐臥一斗室、

意勑出步、寒烟無極、北望廣陵、雁行復阻、斜暉西沒、孤鐙青熒、百蟲逃絕、雖無悲笳牧馬之烏烏、而我影偶我畧、聞遠柝、啟牖四顧、闐寂塞外、度君情猶人耳、安能當此而不憺然動心哉。嗚乎。此亦足以傷君之一也。因爲之銘曰、

羞之飽之、祖所遺茹也。播之穫之、考所遺畛也。啐之馱之、舊德之醢也。翼之終之、羣季合勑也。孚家孚邦、蜚令譽也。斧如屋如、非山鬼所謫。迺神質不節、微眚遂莫之衙也。

清故副榜貢生候選直隸州州判劉君墓志銘

江都吉亮工書并篆蓋

君諱貴曾、字良甫、一字少匡。先世有諱春和者，由溧水遷居于揚，世爲儀徵人。曾祖錫瑜，太學生。祖文淇，優貢生，候選訓導，以經明行修聲于時。淮海號爲大師。父毓松，優貢生，薦舉八旗官學教習，閉戶講習，高蹈弗仕。母汪太恭人，生子四，壽曾、富曾、顯曾及君。壽曾才而早逝，兩中副貢生，候選知縣。君其仲也。自君以上，三世攻經學，重名誼，學行具載國史儒林傳。君生而開敏，竺行年十二，遭寇亂，爲賊所掠，使之牧馬斯薪，數月卒以計挾一兒跳免。君自傷屯遘，淬厲奮發，益劬于學，教習故博通，四方求請編纂，辭文之役無虛日。君晝勤，夙掃夕讀，書訓諸弟，佐父兄爲文事。故君雖年稚，已博涉通經誼。大理寺卿臨川李公聯琇，峻望少許可，唯與君昆季日久，無間言。君事繼母黃太恭人孝，教習捐館金陵，食指日繁，處益困。伯兄善著書，君謝家事，而自奉母攜弟妹返揚州，米鹽筐篚，凌雜之事，力任其勞。賓祭慶弔，必躬必親。暇則結社會文，四方賓客過揚者，





或就君談藝、莫不滿其望以去。君伯兄嘗語人曰、吾之有仲、猶吾之有二身也。伯兄歿、遺二女、一子、名師蒼、方九齡。君自督課、衣食寒煖、一身司之。迨長、各爲嫁。輒師蒼故穎異、年十六、已能經解詞賦、受知於學使。丁酉、更用選拔中秋賦、君大喜曰、今可以慰吾兄矣。君明恕廉絜、纖芥弗苟。交游資諾、久要不忘。故工經藝、門下執經請業者、或策名委籍以去。君凡一再中丙子己丑省試、副貢生、慨然曰、吾十上有司而止此、命也。候選直隸州州判、奔不就。君于學多通、先是、訓導治左氏賈服鄭三君之學、糾駁杜氏經營四十年、長編甫具、寫定者僅一卷。君欲助伯兄廢成之、而未逮。迺從寶應成先生孺受三統曆法、推衍春秋朔閏、以正杜氏長曆之失、爲春秋曆譜。它文詞皆有法度、而出之必當。嗚乎、博學而恥于爲名、介節而不違俗、深藏若虛、明穎特達、可謂君子儒哉。君夙更憂患、中歲以後、痰濕競作。光緒二十四年三月丙戌寅時、竟卒於揚城里第。年五十有四。而富曾先率師蒼應禮部試、君屬續、神明湛然、唯以未能侍養弟姪宦游。



爲念。延領北囑。聲情惻愴。哀通旁人。嗚乎。此可以觀君已配李孺人子師培女。適江都庠生梅兆禔。君赴至金陵。繇爲位哭寢門外。而富曾顯曾具狀來請曰。今將以是年 月 日葬君于城西郝家寶塔之原。以祔我先人。子其爲銘。昔蔡中郎爲郭有道碑。謂無慙色。君盛德在躬。不期聞達。媿負鶩質。敢謝不文。謹箸同辭。用彰懿美。其詞曰。於穆劉君。溫恭朝夕。孝于惟孝。作世典則。沈摯其性。雪白之仁。負寄汎愛。永言終身。儒門孔修。通德大雅。玉佩瓊琚。人時知者。仰瞻棖栢。俯察機筵。我將我範。明棗豆筵。庭闈安愉。友于竺祐。媿彼匪忱。睥睨行路。劉殷七業。韋賢一經。家風用侂。永尉先型。臥名醫醫。撫孤猶子。彼問業者。亦儒亦史。綜君百行。天寔難知。我銘牛脊。唯無愧辭。

清故舉人揀選知縣儀徵劉先生墓志銘

南陵徐乃昌撰文同邑張允蘇篆蓋卞絳昌書丹

江淮間有君子儒焉、其舊畚經訓、累葉清芬、則惠氏紅豆續也。其湛深經術、兼習洞淵、則焦氏里堂亞也。其校讎經籍、思誤是適、則顧氏淵菴流也。其修明經行、樂動規言、則朱氏柏廬選也。幼而孝弟、老而好學、郭有道所謂人師、韓昌黎所謂祭社者、繫先生庶幾近之。按狀、先生姓劉、諱富曾、字謙甫、揚州儀徵縣人。曾祖錫瑜、國學生。祖文淇、優貢生、候選訓導。考毓崧、優貢生、保薦八旗官學教習、被徵未赴。徵君四男、長壽曾、次貴曾、皆副貢生。季顯曾、進士官御史。先生其叔子也。儀徵劉氏自訓導公治、左氏春秋、而徵君及先生伯兄更續纂業、遞禪三世、並入國史儒林傳、海內宗仰、論者咸以爲難能。先生賦質誠樸、逮事重親、夙秉義方、夙聞庭誥。少長、勝衣就傅、率從揚州老宿游、故於經史文藝、蚤具根柢。同治乙丑、徵君佐曾文正公墓、<sup>⑤</sup>臥宅金陵。先生昆弟悉隨侍誦讀。年二十、應學院試、與仲兄同入邑庠、旋肄業鍾山惜陰兩書院。主講李大理聯琇、薛觀察



時雨孫學士瑒鳴深加器賞。當是時，內有賢父兄之督責，外有良師友之觀摩，而先生之學乃大盛。丁卯，遭外艱，先生返里，訓迪生徒，課餘清暇，旁習算法。嘉道中，甘泉羅氏士琳精曉人術，咸同而降，繼起者希，獨徐氏鳳誥私淑頗殷。先生道幸不孤，引爲密契，切磋砥厲，克底于成。光緒戊子，與季弟同舉於鄉。屢試禮部弗售，遂絕意進取，客授四方。最後敖遊海上，爲年家子吳興劉京卿承幹典司校勘，歷有年所。而其精神專注，顧莫如宋會要一書，是書湮沒已久，大興徐氏松供職京都，從永樂大典鈔錄，計殘巨帙多冊，藥木流傳，踐更數主，頃由京卿收藏。京卿雅重先生，迺昇而句其審訂。先生昕夕鑽研，紬繹條理，於卷數增減、門目分合、事實隸屬、字句考正，一一整比之，鉤稽之，釐然秩然，殺青可付。歲次甲子，編排甫畢，而先生歸老里門矣。先生性孝友，悅親養志，事繼母黃太淑人尤謹。迨歿，哀毀柴立，孺慕終其身。伯兄仲兄暨伯兄子師蒼俱先黃太淑人卒。師蒼遺孤葆儒，崇儒稨甚，飲食教誨，胥先生是賴。家本清素，所耕破硯所

挹廉淙。然逢械鄰困乏，不恤典戾衣物，急濟其匱。又慮風俗澆薄，不厭書示格言，冀化其頑。立己立人，達己達人，雖願閔力絀，而白首罔勸。苟非學行純樸，何以及此。可不謂君子儒歟。丙寅，先生壽登八十，重游泮水。今年春，遘季弟喪，先生令原抱痛，氣體驟衰，竟於十月二十六日丑時終于里第。春秋八十有二。著有遺藁若干卷，尙待掇拾，寫定禮堂。元配江孺人前卒，無出嗣。伯兄仲女師韞爲女，季弟仲子師穎爲子。茲師穎泣奉狀來，以卜兆有期，將葬先生於郡城西郊郝家寶塔之原，與江孺人合墓，並以嚆志爲請。竊念光緒庚辰，乃昌伯父光祿公都轉兩淮揚州故有梅華書院，使者例值文課，先生輒擢高等，用此受知爲伯父門下生。繼又授從弟乃斌經，乃昌因識先生函丈，周旋談藝，無虛日。乙未，乃昌服官江甯，蹤跡始隔。而光風霽月，恒縣心目，益想見教思之无窮。辛亥以還，先生與乃昌同旅松曲，幸得常常聚晤，商量舊學，勢難當年會。乃昌纂南陵縣志，延先生爲編輯，山川人物，指畫區分，恍若孫洪近接几席，嗟乎文章道



義之交淡而彌真、久而彌固、撫今追昔、豈容以存歿間哉。紀實靈幽、乃昌不敏、  
誼曷忍辭。銘曰、  
觥觥儒術、熾且都、春秋家法、尋常殊。先生世澤、久涵儒樸、  
學篤行古、爲徒詁經、演算操奇、觚羽翼炫灼、爭前驅、校理秘笈、剖錙銖、上攀中  
壘、共轍塗。孝乎惟孝、兼友于、天爵自尊、忠信俱、樂善好義、仁聞敷、年耆望碩、德  
充符。辰龍在歲、賢人徂、老成凋謝、餘典模。我銘無媿、異矯誣、刻石元堂、永不渝。



清故監察御史劉先生墓志銘

并序 江都陳懋森撰文  
儀徵陳延輝書丹并篆蓋

先生諱顯曾字誠甫姓劉氏先世由江寧遷揚州居郡城而籍儀徵曾祖錫瑜、國學生祖文淇、候選訓導考毓松八旗官學教習兩世俱以優行貢太學以先生貴贈如其官妣氏汪繼妣氏黃封大淑人教習君有子四人並著名行長壽曾、候選知縣次貴曾、候選直隸州州判皆兩中副榜貢生次富曾舉人棟撰知縣其季則先生當嘉道間訓導君以治春秋左氏學名海內教習君暨先生伯兄續承其業同治初湘鄉曾文正公總督兩江延教習君入幕府先生隨父兄讀書金陵弱冠補諸生時伯兄知縣君主金陵官書局先生則肄業惜陰書院院長薛觀察時雨名宿也器先生多所獎藉知縣君捐館舍先生代主官書局事光緒戊子舉於鄉壬辰成進士以主事籤分吏部補考功司主事洊升員外郎郎中加四品銜轉甘肅道監察御史協理遼瀋道俸滿截取以知府用先生通籍後居京師垂二十年庚子聯軍之役兩宮西狩大臣以下相率奔竄自臺



省迄部寺、幾於一空。先生時官吏部、兼總理各國事務衙門章京。或勸其暫避、先生以食祿忠事持不可。未幾京師陷、仍日趨直如故。時各國駐軍張甚、遇我國官員輒呵問、故加凌侮。先生以理折之、不爲屈。光宣之際、朝局日非、先生居臺諫、前後七上封事、皆關天下大計。方貴倖用事、於言官所陳多遏抑。唯最後論賦稅徵解銀兩不便一疏、奉旨交度支部議奏、餘皆留中。是以先生所言雖切、外莫能知也。庚戌、丁黃太淑人憂歸。翌年國變、自此遯跡秦州。以王伯厚、元遺山自矢、遂不復出。先生十歲喪母、事後母以孝聞。伯兄蚤逝、仲兄亦前卒、禮敬寡嫂、撫遺孤有恩。叔兄孝廉君無子、以己子爲之後。歲乙丑、先生復由秦返揚。時孝廉君猶健在、兩老人偶作近游、榮杖偕出、僂僂道中、衣冠古樸、貌恭而色溫、君子之儒可望而知也。先生祖考暨伯兄俱列傳國史、儒林人比之東吳惠氏。所居青溪舊屋有老柏、高外墻外、若車蓋。屋甚庫陋、而三世傳經其中。滄桑而後、百年詩禮之門殆不多觀。先生沒、孝廉君旋亦長逝。世變方殷、未知所

底。而吾鄉所稱老成人者數年之間、相繼殂謝、曾不少留一二、以待天下之清、吁可慨也。先生以戊辰三月初七日卒、春秋七十有八、葬於西郊開家坂先塋之次。平生所爲詩文多散佚、尙待搜輯付梓。書法北朝如金石文字、所藏甚富。元配江氏、繼娶吳氏。君男二人、長師愼、民政部七品警官、蚤卒無子、以從兄師蒼次子崇儒爲嗣。次師穎、後孝廉君先命生也。女四人、長字泰州錢慰貞、在室卒。次適商水李國璜、次適同縣方觀洛、次適夏縣賈延禔。曾孫二人、模、楷。銘曰、劉氏之先、潛德弗曜、歸然儒門、防自訓導。服賈舊說、蔽於當陽、訓導闡之、左氏乃昌。黃金遺子、不如一經、爰及諸孫、咸有令名。諸孫繩繩、先生居季、郎中御史、官不滿位、憂歸明季、九鼎遂移。鮮民遺民、一身兼之、晞髮朝陽、種桑海濱。誓不復出、辱我先人、晚計艱難、復還故里。有兄八十、白髮垂耳、衰老相視、情親意悲。携手道山、後先同歸、廉頑敦薄、誰爲師表。天胡不弔、不遺一老。高墳峨峨、樹以松楸。有古君子、首正此邱。

亡姪丁酉科舉人師蒼墓志銘

旌德朱德潤書丹並篆蓋叔父儀徵劉富曾撰文

曾祖文洪

嘉慶己卯科優貢生

誥贈奉政大夫

覃恩晉贈朝議大夫。

祖毓松

道光庚子科優貢生薦舉八旗官學教習

誥贈奉政大夫 覃

恩晉贈朝議大夫。

父壽曾

同治甲子科

光緒丙子科副榜貢生同知銜候選知縣

誥授

奉政大夫。

於庠。吾忍銘吾亡姪哉。亡姪名師蒼字張侯伯兄恭甫子也。幼負異秉、讀書過目不忘。篤內行、無子弟過。由廩膳生拔光緒丁酉萃科中式舉人、竟以壬寅仲秋送其弟師愼、師培應鄉試、涉江水阨死、年僅二十有九。吾忍銘吾姪哉。姪生九歲而孤、仲兄良甫撫同己子、以養以教、至於成人。戊戌歲仲兄卒。今茲亡姪、蓋去伯兄之歿歲星未再周、去仲兄歿四載、猶未安厝也。於庠哀哉。吾家世治經、先祖爲左氏正義長編已就、先兄繼之、僅及其半。姪幼學嗜古、有著述才。當



儒藏

劉孟瞻先生年譜 附錄

家庭暇豫。姪每侍側。輒以析疑問難爲樂。每發一義。出人意表。纂言提要。不讓儒宿。方將與之陳書發篋。撥拾叢殘。共編定先世遺文焉。今已矣。姪之著錄遺墨。尙待爲之裒輯整比已。悲夫。姪生同治十三年八月初三日。歿光緒二十八年八月初四日。室胡氏甘泉進士文淵女。生子葆儒。有遺腹妊。已七月。重慈衰邁。嫠孤悲哀。斯亦人生之極艱矣。今將於

年 月 日 窆於揚州

西郊郝家寶塔之原。爰揭而書諸石。銘曰。是爲吾猶子之崇封兮。前後岡

道而左右林泉。姪生而資性超越兮。信孝友之天全。威儀瑰瑋現天男相兮。詎優曇易萎夫華嚴。謂文章之憎命兮。何早攀桂闕之聯翩。謂生材必有用兮。乃短折首六極凶占。遺孤相其歧嶷兮。庶詩書之澤孔延。賦巫陽而下招兮。恨精衛之難填。於序江流幾時竭兮。哀此恨永永安有窮焉。我銘汝汝有知否耶。寫淚墨而泐漣。千秋萬歲後。請視此阡。姪亡之年十一月二十三日。遺腹生男。命名崇儒。特書碣尾。以慰窮泉。富曾手記。



亡姪師培墓志銘 塋郡城西鄉開家坂叔父揚子劉富曾撰文妻兄揚子何家駱書升並篆蓋

曾祖文淇 嘉慶己卯科優貢生 誥贈奉政大夫 覃恩晉贈朝議大夫。

祖毓崧 道光庚子科優貢生薦舉八旗官學教習 誥贈奉政大夫 覃

恩晉贈朝議大夫。

父貴曾 光緒丙子科己丑恩科副榜舉人 敕授文林郎 誥贈奉政大  
夫。

歲在己未九月二十八日、三姪師培病歿京師、年甫三十有六也。時任大學講  
席、大學校長蔡子民先生經紀其喪。翌年二月、命門人劉君叔雅爲之歸櫬揚  
州、旅櫬蕭寺、待寒冬窆祖塋焉。蓋距宣統辛亥、予在武昌一見吾姪後、倏已八  
年矣。迴溯其先、一見於蕪湖、再見於金陵、至武昌、則一別永訣、終古無再見期、  
烏乎傷哉。予同胞兄弟四人、姪爲良甫二兄貴曾子。兄得子遲、年三十九始生  
姪、時爲光緒甲申年閏五月初二日。猶憶姪甫生、兄爇香神前、忽潸然下泣。予





在旁言曰、生兒如願、極喜慶事、何反感傷爲。嗚乎。孰知其爲歿折不永、微機先動耶。姪生而岐嶷、髫髻授讀、過目成誦、習爲詩文、有如宿構。亡友朱君鳳儀、目爲奇童。迨兄歿、姪入泮後、即膺鄉薦、是爲光緒壬寅補行庚子辛丑恩正併科。時姪年僅十有九也。英妙獲雋、聲譽鵲起。會試一不得當、游學四方。姪材蘊瑰奇、少年氣盛、思欲有以自見。然名之所在、謗亦隨之。故泛東瀛、避難入西蜀、又遇險、其間坎壈游經、跬步荆棘、瀕於顛隕者屢矣。茲者班超生入玉門、畢萬死于闕下、又蒙蔡劉兩君紀理歸喪、千里會葬、雲天高誼、方之古人、蔑以加焉。學堂門人心喪抱痛、更欲爲其師刊遺著傳世、何其厚也。姪雖死不死矣。又況二十餘年游學以來、當代名公巨卿、耆儒碩學、行輩較長多姪所當師事之人。而諸老先生咸愛其才、願爲忘年交。而姪益恂恂、抑然持下、故人尤樂親之、恩義綢繆、相依患難、驅其愉樂、恤其陵夷、拯患分災、扶危拯困、所謂生死肉骨、其大有庇於姪者、非惟知己、抑且感恩焉矣。年來講學京師、仍理經生素業。予老矣、



方期倦游歸來、與之同訂先世左疏藁本。蓋曾戡理先祖左氏長編、并衍習三統天算、欲接續大兄二兄所編之業爲之也。今無望已。姪長身玉立、癯瘠秀削、如不勝衣、而辯口懸河、滔滔不窮、一名一物、精詳考覈、旁徵博通、均能言其所以然。故講席壘主、羣弟子奉手受教、尊仰斗山、無不推崇中叔先生者、殆其教澤及人、有不能忘者歟。夫物忌過盛、姪得名太早、厥性無恒、好異矜奇、<sup>⑧</sup>帙急近利、且書法枯槁、無潤氣、均非壽徵。嫂氏李今歲七十有八、衰齡值此、痛切揆心、倚閭已無望王孫之歸、立槁乃轉哭畢魚之死。嗟嗟母子、慟見黃泉、亦竟於今歲十月十二日相繼下世。蓋去姪歿僅朞月十四日也。傷已姪生子不育、嫂氏歿後、子季顯曾以孫葆懃爲嫂氏承重孫。死者有知、亦應少慰也已。配何氏爲余女、夫揚子增生何家、輅胞妹。艱難中間、關相從武昌戎馬、保全先著稿本、蠶叢崎嶇、尋夫蜀道。今者廢室哀吟、苦空徹悟、爰訪名山、將爲比邱尼終焉。悲夫。悲夫。銘曰、其生也天既畀以殊姿、然亦第一第之榮。而憂患屢經、仍爲命

齋而才豐也。其歿也，天復隴以塞運，然名山大業傳之其人，後學庶得所會通也。發舍橫經，待問撞鐘，諸生濟濟，披拂春風。其在周易曰：澤上有地，臨。君子以教思無窮。

儀徵劉孟瞻先生年譜自跋

稿既成、有客詰余曰、國人編先賢年譜者頗衆矣、咸摘記詩文梗概、約舉其言行、有功於學甚鉅也。今子編孟瞻先生年譜、全引詩文、繁煩冗漫、抑何陋哉。余曰、子言洵然。但余以爲編年譜之事、須實事求是、不可廁私意。且古人云、文者人也。編者摘記梗概、即是編者文、未必是先賢文。或雖可以知先賢學行、而欲渾然體會其爲人與爲學、則未矣。余所以全引詩文、而不敢輕輕<sup>⑨</sup>廁私意者、蓋欲體會先生爲人以自資耳。近年斯學滋精密、然竊謂學術殊途、吾道本尊德性與道問學、闕其一不可也。從事斯文者、不可不維持紀綱、致學術同軌。又余不孝、相繼失怙恃、自僑居幽燕、未歷半載、師之歸道山者已六人、而余子亦殤矣。海山千里、無由奔歸。嗚乎。余碌碌無成、值愧死矣。因聊欲以此書告于幽壤。余不自揣而試爲者、此區區微心耳。客握余手曰、子之志也壯、子之意也善。因余退記與客問答語爲跋。



校記

①逡逡：當作「逡巡」。

②載禊：當衍「載」字。

③輒：當作「娶」。

④賊：當作「賦」。

⑤慕：當作「幕」。

⑥高外：「外」字當誤。

⑦命生：當作「生命」。

⑧帽：疑誤。

⑨輕輕：當衍一「輕」字。

[General Information]

书名=儒藏 史部 儒林年谱 44

丛书名=

作者=吴洪泽，尹波，舒大刚主编

出版社=

出版日期=2007.04

形态项= 878

页数=878

原书定价= 35000.00 全套

读秀号=000007507319

SS号=12365611

ISBN= 978-7-5614-3656-1 / B222.9

分类号=0204030207&sw=81.901475E-3075B2D8+AB7B2BF+82.636783E-30851D642.638914E-307A

主题词=

参考文献格式=吴洪泽，尹波，舒大刚主编.儒藏 史部 儒林年谱 44.成都市：四川大学出版社,2007.04.

简介=